

N^o 16934

117124

MMI 56

32571/B

— Praelectiones anatomicae. Ed. nova. Vindob. 1778. 8vo. With
enr. title vign. Bds. Frs. 15.—

219 40320

37 19

mater. cr. 2 1/2. — 24

ligat. — . 17

non Dr Carl v. Patru

1/1 1842.

Digitized by the Internet Archive
in 2019 with funding from
Wellcome Library

<https://archive.org/details/b30514319>

51726

FERDINANDI LEBER

SAC. CAES. REG. APOST. MAIESTATIS A CONSILIIS, CHIRVRGIAE
DOCTORIS, ANATOMES, CHIRVRGIAE THEORETICAE, ET PRAC-
TICAE PROFESSORIS PVBL. ORD. IN VNIVERSIT. VINDOBON. CAES.
REG. IVDICII CIVICI, ET PROVINCIALIS, TVM ET
NOSOCOMII CIVICI, ET AD S. MARCVM CHI-
RVRGI PRIMARII &c. &c.

PRAELECTIONES ANATOMICAE.

EDITIO NOVA,
EX GERMANICO TRADVCTA,
CORRECTA ET AVCTA.

*Reipubl. Ulmen.
Phys. ord. 37*




VINDOBONAE,
APVD RVDOLPHVM GRAEFFER. 1778.



Non docentibus, sed discipulis;

Non eruditis, sed erudiendis.





PRAEFATIO AVTHORIS

IN

EDITIONEM HANC LATINAM.



Quæ in editione germanica libri hujus non adeo exacta erant, aut quæ prætermiffa, ea in hac editione partim correxi, partim addidi. Ordinem, quem a 15. abhinc an-

*

2

nis,



nis, ex quo cathedram conscen-
di, sequutus in hunc diem fui,
optimum, & prælectionibus meis
publicis adcommodatissimum sem-
per judicavi. Opus hac ratione
utilitati, & commodo studentium
aptius reddidi. Mens quidem
erat, adjungendi ubique cautelas
in praxi chirurgica obvenientes,
quas & in collegiis publicis sem-
per adfero: mutavi tamen con-
siliium, ne opus justo amplius
evaderet.

Dabam Vindobonæ,

13. Feb. 1777.



PRAEFATIO AVTHORIS

IN

EDITIONEM GERMANICAM.




Exhibeo hic Anatomem lingua germanica exaratam. Optaram dudum, fateor, tale opus; sed mearum quoque partium esse ratus sum, ut, quod ipse optaram, auditoribus meis demum opus traderem. Evictum fane est, quæ ob defectum libri, rem anatomicam patrio sermone exponentis, in tyrones linguæ Ciceronis ignaros redundent detrimenta; hinc & factum fuit, ut Viri plures egregii utilitatem hujusmodi operis palam deprædicarint. Memoriam aliunde fat fatigat anatomica doctrina; magis tamen illam turbarat, vel certe defatigarat in hominibus latinum idioma non callentibus, ingens copia terminorum technicorum latinorum, græcorumque;



rumque; progressus in hac scientia plurimum enim subflaminabatur. Germanica terminorum technicorum interpretatio, tum & totius doctrinæ germanica expositio sublevare omnino multum tyrones poterunt; inprimis, quum studium omne adtuleram, ut definitiones quascunque exactas, breves, ac omnibus perspicuas concinnarem. Termini technici germanici non solum retineri facile queunt, quum patrio sermone scripti sint; sed & ideis rerum citius adfundunt lucem, & exactam illarum cognitionem faciliorem exhibent, quam quidem latini.

Res ejusdem momenti est ipsa doctrinæ anatomicæ, abs vocum latinarum admittione, germanico unice sermone facta explicatio.

Non minus enim necessarium est, seriem, & nexum rerum, uti & expressiones, quibus illas designamus, quam res ipsas perspicere.



Ardua fors hæc methodus videbitur iis, qui scientiam anatomicam terminis latinis variegatam addidicerunt: tyrones tamen, uti reor, via multo expeditiori ad illius cognitionem sic ferentur.

Reddidi nunc rationes, incæpti, & ad finem usque deducti operis. Ut prodessem, erat scopus; gaudium, quod nunquam non sensi, dum, officio meo satisfacturus, proximo opem tuli, erit, quod exopto, præmium.

Si quis penitius in anatomica disciplina instructus esse cupiat, adire poterit *elementa Physiologiæ* Ill. HALLERI, *expositionem anatomicam* Cl. WINSLOW, *scripta varia anatomica* Cl. MECKEL, *Osteologiam & Neurologiam* Cl. MONROO, & *Osteologiam* Cl. BERTIN, tum & *doctrinam vasorum lymphaticorum* Cl. HEWSON. Icones optimæ anatomicæ sunt *Tabulæ myologica, & osteologica* Cel. ALBINI; *Tabulæ myologica* COWPERI, *Tabulæ anatomicæ* Ill. HALLERI: icones *uteri gravidi* dederat



dederat prius Cel. ALBINVS; nunc vero elegantissimas, optimas, ac exactissimas a magno Anatomico Londinensi, Cl. HVNTER accepimus. De *ligamentis* egregiæ sunt *Tabulæ* Cl. WEITBRECHT, de *nervis cardiacis* *Tabulæ* Cl. NEUBAVER, de cerebro *Tabulæ* Cl. TARIN: si quis *Tabulas* desideret universæ anatomes, exactissimæ omnium sunt *Tabulæ* EVSTACHIANÆ ex *editione* Cl. ALBINI.

Opus præfens pro *prima parte* *Prælectionum* mearum haberi poterit; sequenti anno excipiet hanc altera, *Prælectiones chirurgicas* complectens; in qua perficienda nunc occupor.





DE
ANATOMIE
IN GENERE.



ANATOMIE scientia est humani corporis fabricam ope artificiosæ partium dissectionis exponens.

Dividitur anatomie in partes septem:

- 1) OSTEOLOGIA *ossa* examinat;
- 2) SYNDESMOLOGIA circa *ligamenta* versatur;
- 3) MYOLOGIA *musculos* contemplatur;
- 4) ANGIOLOGIA *vasa* exponit;
- 5) NEVROLOGIA *nervos* describit;
- 6) ADENOLOGIA *glandulas* evolvit;
- 7) SPANCHNOLOGIA demum de *visceribus* agit.

A PRINCIPIA

PRINCIPIA CORPORIS HVMANI; SEV CONSTITVTIVAE ILLIVS PARTES.

Constat corpus humanum partibus *solidis*, & *fluidis*: *solidæ* in *duras*, & *molles* denuo dirimuntur; sub *solidis duris* ossa militant, & cartilagine; *solidis mollibus* muscoli adcententur, viscera, omnesque demum partes corporis molles aliæ.

S O L I D A C O R P O R I S.

Corporis humani *solida* aut *simplicia* sunt, aut *composita*: partes sic dictæ firmæ, *solidæve simplices* principia subpeditant nostri corporis; constituunt has ipsas atomi terrei, mediante glutine animali inter sese invicem nexi.

Molecularum talium terrestrium glutinis ope cohærentium series *fibræ* generat *simplicem*.

Dum fibræ plures simplices secundum latitudinem sibi adponuntur, *lamina simplex* enascitur.

Ex unione laminarum multarum simplicium *textus cellulosus* exurgit.

Compactior cellulosus textus *membranam* format.

Convolutæ in canalem liquida circulanti coërentem plures membranæ ideam *vasorum* exhibent.

Membranæ crassæ, robustæ, elasticæ *ligamenta* audiunt.

Cartilagine componi videntur ex gelatina coagulata elastica, & singulari fibrarum specie.

Ossa partes corporis humani durissimæ sunt, & siccissimæ, fibris contextæ firmis, fragilibus, insensilibus, tum & glutine inter fibras hærente terrestri, in coagulum ducto.

Nervi fasciculi cernuntur molles, orti ex filamentis innumeris candidantibus, pulposis, parallela directione productis; horum interventu & motus, & sensus in corpore perficitur.

Musculi partes sunt organicæ motui corporis dicatæ; ex nervis compositæ, fibris, arteriis, & venis.

Tendines principia, finesvè musculorum sunt; in his tamen tenaciores fibræ sunt, robustiores, arctius ad invicem pressæ, colore subargenteo dotatæ.

Glandulæ partes corporis sunt organicæ, compactæ magis, rotundæ, aut oblongatæ, membrana propria cinctæ, ex arteriis, venis, nervis, contextæ; humoris cujusdam determinati secretioni, aut mutationi dicatæ.

Viscera partes sunt organicæ, ex vasis, nervis, glandulis, ductibus secretoriis, & excretoriis, celluloso textu, & membranis compositæ.

Organon vero, aut *pars organica*, pars corporis quævis animata, determinato muneri sacra, dicitur.

FLVIDA CORPORIS.

Priusquam partes corporis *fluidæ* seorsim examinentur, ideam præmississe juverit compendiariam *œconomix animalis*.

Ingesti cibi in cavo oris dentibus discerpti, contriti, saliva & aëre misti, actione musculorum linguæ, ossis hyoidis &c. in cavum faucium, & pharyngis, ex his vero per œsophagum in ventriculum deferuntur. Transcendere vero necessum habent alimenta tum solida, tum liquida, antequam cavum intrent pharyngis, hiatum capitis asperæ arteriæ ante pharyngem positi: hinc, ne in ipsam inlabantur trachæam, atque suffocationis excitent periculum, epiglottidem illi natura inposuit, quæ dum alimenta

trachææ aperturam exsuperant, hanc eandem undique exacte obtegit, & hoc mechanismo cibis, & potui pro ponte quasi inservit.

In ventriculum nunc delati cibi admistione bilis saponaceæ, succi pancreatici, tum & motu peristaltico intestinorum, eorumque succo enterico magis denuo solvuntur, adtenuantur; mucilaginosum diluitur, oleosa cum aquosis permiscentur, hinc demum liquor albus, lacteus, quem *chylum* dicunt, extrahitur: chylus hic ipse a copiosissimis finibus vasorum lacteorum in cavum intestinorum tenuium patulis, resorbetur; pars reliqua ciborum crassior, ex qua chylus omnis jam resorptus fuit, in intestina crassa promovetur; ex his vero, interventu motus peristaltici, per anum ex corpore ejicitur. Vasa lactea resorptum chylum in glandulas lymphaticas mesentericas deducunt, a lymphâ ex inferioribus corporis partibus redeunte adtenuandum, diluendum; ex glandulis his ipsis mesentericis fertur in *cisternam lumbarem*, demumque in *ductum thoracicum*, loco superiori in collo venæ subclaviæ sinistræ implantatum; cui venæ chylus ex ductu nunc dicto infunditur.

Sanguini admistus chylus in ventriculum cordis dextrum descendit; contractione ventriculi hujus, ejusdem una cum sanguine, ex illo in truncum arteriæ pulmonalis, in ramos hujus, & furculos omnes minimos, per pulmones dispersos, ejicitur; tum actione ipsorum vasorum, tum & inpetu rapti per vasa sanguinis, cum massa cruoris intime permiscetur; sanguis una cum illo perficitur, compingitur; hinc vero nutriendo corpori, humoribus cunctis in organis corporis secretoriis deficientibus resarciendis aptum natum redditur.

Quo vero mutationes nunc enumeratæ sanguinis, & chyli fieri omnes queant, respirationis mechanismo

nismo inspiratus, exspiratusque reciprocis vicibus aër atmosphæricus facere non parum videtur; sub inspiratione namque ramos omnes bronchiorum, vesiculas pulmonicas, hinc ipsos pulmones per omnem ambitum quaquaversum expandit: expansione hac elongantur vasa hæmatophora; minus sibi invicem adprimuntur; expeditior per ea fluit sanguis; sub expiratione vero angustiores fiunt, magisque contracti pulmones, in angustiores angulos trahuntur vasa omnia, hinc & magis comprimuntur, sanguini libere prius circulanti major fit remora; donec sanguis in ventriculo cordis dextro, & arteriæ pulmonalis trunco, majori copia accumulatus novam nobis extorqueat inspirationem. Adparet exin manifesto, quantæ sint partes purissimi, integrique aëris in hæmatopoësi, & dimanante ex ea sanitate: sed & sub ipsa expiratione moleculæ plurimæ volatiles, aquosæ, in putredinem pronæ sanguinis ex pulmonibus fugantur: conferre præterea ad rubrum sanguinis colorem maximam partem videtur aër.

Sanguis, descripta ratione in pulmonibus confectus, liquor ad speciem homogeneous, ex integro colore rubro præditus, coagulabilis, eo lætius purpurascens, quo sanius, quo meliori nutrimento fultum corpus fuerit, ex quo educitur; sanguis, inquam, hic ipse a venis pulmonicis in ventriculum sinistrum cordis reducitur; ex hoc in aortam, ex aorta in omnes partes corporis proficiscitur; ubi pro diversa ratione partium, & viscerum diversi secernuntur humores: qui ex his corpori sunt inutiles, ex eo prorsum eliminantur; utiles, & laudabiles nutritioni, & conservacioni machinæ inpenduntur.

Chemica sanguinis principia volatili aquoso lactice, lympa coagulabili, oleo, sale alcalino, volatili, &

6 PRINC. CORP. HVM. SEV CONST. ILLIVS PART.

fixo, sale muriatico, terra alkalina, una cum magna copia aëris, paucoque ferro, absolvuntur.

Præcipui, qui ex massa sanguinis secernuntur, Succi, & humores sunt:

In auribus *cerumen*.

In lacrymali glandula *lacrymæ*.

In glandulis salivalibus oris *saliva*.

In glandulis muciparis narium, oris, intestinorum, asperæ arteriæ, &c. *mucus*.

In ventriculo *succus salivæ analogus* (*succus gastricus*).

In hepate *bilis*.

In pancreate pariter *humor salivæ æmulus*.

In renibus *lotium*.

In testibus *semen*.

In membrana adiposa, imprimis vero in omento *pinguedo*.

In articulationibus *synovia* (*liquidum Haversianum*).

In mammis *lac*; nonnisi quod elaboratum magis sit, a chylo diversum.

In cute *materies perspirabilis* (*perspirabile sanctorianum, transspirabile insensibile*); hanc, si copiosior, & sensibilis magis fiat, non jam transpirationem insensibilem, sed *sudorem* dicunt.



Handwritten text, likely bleed-through from the reverse side of the page, is visible in the background.

OSTEOLOGIA.

[The page contains extremely faint, illegible handwritten text, likely bleed-through from the reverse side of the paper. The text is mirrored and difficult to decipher.]

De Juntura ossium.

Comune illud omnibus cadaveris ani-
malis ossibus est, quod jungantur vel cum
motu; vel sine motu. Juncti ossium cum
motu articulatio, junctio vero sine motu
Synarthrosis dicitur.

variat vero iterum tam articulatio, quam
Synarthrosis, si ulteriora attenderis.


Potest enim esse ut sit articulatio vel
cum motu, evidentissimo, omnium maxi-
me sensibili, omnesque fere versus partes
protendi, quo in casu dicitur articulatio
Diatrosis. Vel potest esse motus non tam
magnus, sensibilis, atque evidens, sed obscurus
rarumque mobilis, quae motus sine ar-
tulationis haecies Synarthrosis nomine
venit. Vel denique motus potest esse
insensibilis plane ac obscurissimus, motus
amen semper aliquis, et tunc dicitur esse
Ampharthrosis.


est praeterea articulatio duorum ossium
a esse comperata, ut unum os seu
excipiens habeat cavitatem exiguam et super-
ficariam tantum, os alterum vero, seu excipien-

omni capite donetur humili atque depresso
et dani articulatio per diatros in Arthrodia
auoit.

.i. vero eueniat contrarium, et ossis excipien-
tis caritas magna sit ac profunda vocata
Enatrosis. Sed notandum esse caput ossis exci-
piendi esse quoque debere magnum lon-
gumque.

Gingivæ dicitur metra receptio ossium ubi
nempe os unum atque alterum. capita habent
et caritates.







OSTEOLOGIA.

Pars Anatomæ, quæ doctrinam de *Ossibus* exponit, OSTEOLOGIA dicitur; considerantur vero ossa, vel dum partes ambientes molles omnes omnino ablatae prius fuerint; vel dum quædam ex illis adnexæ ossibus manserint.

Hinc *Osteologia* in *siccam*, & *recentem* dirimitur. Examinabimus hanc post illam, quum temporis, quo osteologica Tyronibus traduntur, sic jubeat ratio.

Objectum osteologiæ ossa constituunt aut singulatim sumta, aut artis auxilio invicem nexa; sicca; aut recentia, ligamentis suis naturalibus juncta; aut ex infantis, aut ex hominis adulti corpore petita.

Os vero describitur pars corporis durissima, maxime compacta, inflexilissima, ac insensilissima; constans lamellis multis exiguis, quæ denuo ex fibris exsurgunt rigidis debito situ arctissime sibi mutuo adpositis.

Dum *elementa corporis* longitudinali serie sese excipiunt, *fibræ* enascuntur *osseæ*; dum fibræ hæ ipsæ lateraliter, & secundum latitudinem sibi adponuntur, exsurgunt *lamellæ* *osseæ*; has inter effusum hæret *gluten* sensim coagulatum: his *genesis ossium* absolvitur. Punctum illud, ubi ossificatio omnium primo conspicua occurrit, *Punctum ossificationis* adpellatur.

Ossa nec ex cartilagineis, nec ex membranaceis fibris oriuntur; sed incunabula sua ab ipsis illico repetunt moleculis illis terrestribus, ex quibus semper *osseæ*, nunquam vero molliores, v. g. cartilagineæ, tendinosæ, musculares &c. exsurgunt fibræ.

Pro ratione diversa seriei, ac numeri, qua fibræ dictæ *osseæ* invicem cohærent, lamellæ etiam

producuntur, quoad longitudinem, latitudinem, crassitiam, lævitatem, copiam omnino diversæ; lamellæ hæ ipsæ mutuo per strata sibi inpositæ, denuo necuntur eminentiis numerosissimis irregularibus, & claviculis lateralibus, ex illarum superficie utrinque enatis. Deducitur ex hac fabrica, quæ inter ossa intercedit, diversitas, eorumque triplex substantia.

Discrimen adfert in ossibus tum magnitudo, tum figura; nam vel longa sunt, vel brevia, cylindrica, lata, inflexa, rotunda, angulis prædita, aut formæ prorsum indeterminatæ. Occurrunt præterea in superficie ossium eminentiæ, foveæ, impressiones, cavitates; atque hæ quidem ultimæ in plurimorum ossium medullis adsunt.

Eminentiarum binæ sunt species: *apophyses*, ac *Epiphyses*.

Apophystrum, seu *Processuum* sub nomine veniunt prominentiæ ex variis ossium regionibus productæ, cum ipsa ossis substantia concretæ, nec sub decoctione secedentes.

Epiphyses dicuntur eminentiæ, finibus, aut lateri cuidam ossium, ope periostii, & cartilaginum, adfixæ: hanc ob rationem epiphyses sub decoctione ab osse secedunt. In infantibus epiphyses laxè adhærent, teneræ, & vix non cartilagineæ sunt indolis.

Prominentiæ tales ratione figuræ, situs, directionis, & usus varias indispiscuntur denominationes.

Processus in fine ossis cujusdam protuberantes, læves, rotundi, *capita* dicuntur; *condyli* verò audiunt, si superne vel ex lateribus complanati magis fuerint. Pars infra caput hærens angustior, tenuior, reliquam etiam ossis partem tenuitate excedens, *collum* adpellatur. Processus inæquales, scabros, *tuberositates*, seu *tubera* vocant; acutos verò, & longiores *processus* adpellant *spinosos*, seu *styloideos*, quod spinæ, aut styli obse-

obferant speciem; processibus tenuibus, latis, extremitate scindente præditis *cristarum*, aut linearum scindentium inditum est nomen: alii a *forma*, quam referre videntur, *processus alares*, seu *pterygoidei*, *mammillares*, seu *mastoidei*, *dentiformes*, seu *odontoidei* e. s. p. dicuntur. Ratione *situs*, *superiores*, *inferiores*, *exteriores*, *interiores* vocantur processus: Ratione *directionis*, *obliqui*, *longi*, *transversi* &c. audiunt; ratione *usus*, *trochanteres*, seu *rotatores* &c. &c.

Foveæ, *inpressiones profundiores*, & *cavitates*, aut excipiendis vicinis ossibus, ut cum iisdem articulationem constituent, dicantur, ac *articulares* tum appellantur *cavitates*, quæ jam profundiores, jam superficialiæ magis sunt; aut partes excipiunt duras, quin tamen articulationem cum iisdem producant.

Inserviunt præterea *cavitates*, ut partes molles transire easdem, tum & adfigi his queant.

Varia ob *magnitudinem*, & *formam* ossium, *inpressionibus*, *cavisque* induntur cognomina. Si sub initium lata, ampla, parum profunda sint, sub finem vero magis denuo contrahantur, *foveæ* vocantur: *sulcus* canalis est in superficie ossium secundum longitudinem apertus: *Canalis* vocatur tubus cavus, circularis, ejusdem plerumque per totum decursum diametri, plus minusve rectus, curvus, longus, aut brevis: *foramen* aut apertura canalis est, aut ab adpositis invicem marginibus excissis binorum ossium efformatur. Dum vero marginis ossis cujusdam ea est forma, ac si exacta inde foret portio, *excissio*, aut *incisio* id ipsum vocatur.

Occurrunt insuper in ossibus *cavitates mucilagines*, & *labyrinthi*; de quibus alia occasione agemus. Operæ pretium haud est, ut adnotentur hic speciatim sub nomine inæqualitatum loca quædam inæqualia ossium; etsi id factum ab Auctoribus nonnullis fuerit.

Color

Color siccorum ossium a magno præparantis eadem dependet labore; quo efficitur, ut ossa nunc albißima sint, nunc nonnisi flavicantia maneant. Colorem quod attinet naturalem ossium recentium, tum inter sese comparatorum, tum & ratione ætatis diversæ consideratorum, in OSTEOLOGIA RECENTI aptior recurret dicendi locus.

Substantia ossium est duplex. Si fibræ, & lamellæ ossium arctissime sibi invicem adhæreant, & incumbant, substantia illorum enascitur firmior, densior, magisque compacta; atque hæc quidem in osse omni externam partem absolvit. Substantia hæc copiosissima adest in corpore, seu in media parte ossium cylindricorum, parcior in extremitatibus; ambit insuper maximam partem ossium latorum lorica, seu cortice nonnisi tenuiori. Vbi vero fibris illis, ac lamellis interstitia intercipiuntur notabiliora, vel cava prorsum formantur specialia, substantia ossium *rarior* est: hæc vero ultima rarior ossium textura in ossibus denuo duplex occurrit: dum enim a lamellis osseis fibræ secedunt, varia ratione incrispantur, sibi que intertexuntur, ut spongiæ tandem exhibeant speciem, *substantia* exurgit *cellularis*, *spongiosa*: altera autem, *reticularis* dicta deprehenditur in medulla ossium cylindricorum; componitur hæc ipsa fibris osseis longis, tenuibus, interstitia manifesta intercipientibus, sese mutuo decussantibus, ac speciem retis efformantibus.

Gaudent itaque ossa longiora *Substantia triplici*; 1) *Compacta*, firma, densa; 2) *Spongiosa*, seu *cellulari*; 3) *reticulari*. Reliqua vero nonnisi *spongiosa* constituit substantia, quæ a compacta recluditur.

Interiora ossium majores exhibent cavitates, receptacula minora, cellulas, & foramina diversa.

Cavitates majores per totam longitudinem ossium cylindricorum cernere licet, ubi substantia compacta in canalem magnum, longum flectitur. Cellulæ in omnibus adsunt ossibus; breves sunt, aut longæ, circulares, angulares, aut ovaes &c. Foramina quod attinet, aut canalium sunt orificia, aut exigua adeo sunt, uti pori cutanei.

Quodsi ossa omnia universi corporis legitima, & naturali serie sibi mutuo sint unita, unio hæc *Sceleti* sub nomine venit; *Skeleton* vel *artificiale* est, nexis filorum metallicorum ope ossibus; vel *naturale*, ossibus per ipsa ligamenta naturalia revinctis.

Dividitur *Skeleton* in *caput*, *truncum*, & *extremitates*.

Caput cranio, & ossibus faciei absolvitur.

Cranium constituunt octo ossa: loco antico *os frontis*, postico *os occipitis*, superiori, & laterali *ossa duo parietalia*, laterali & inferiori simul *ossa duo temporalia*; anteriori sub osse frontis, *os ethmoideum*, inferiori *os sphænoideum*.

Processui cuivis petroso ossium temporum inhaerent *ossicula* quatuor *auditus*; utpote: *malleus*, *incus*, *stapes*, & *ossiculum orbiculare*: adsunt etiam sæpius inter suturas ossium cranii *ossicula* quædam exigua, *triquetra* dicta.

Faciem Anatomici in *maxillam superiorem*, ac *inferiorem* dividunt: *maxilla superior* constat ossibus tredecim, scilicet: 1) *Ossibus binis maxillaribus*; 2) *binis nasalibus*; 3) *binis lacrymalibus*; 4) *binis jugalibus*; 5) *binis palatinis*; 6) *binis spongiosis inferioribus*; & 7) *osse vomeris*.

Maxilla inferior in adultis nonnisi unico osse componitur.

Hinc vero *faciem* absolvunt ossa quatuordecim; inter quæ sex sunt paria, duo imparia.

Maxillis

Maxillis binis lege naturali infiguntur *dentes* triginta duo ; ea ratione , ut sexdecim in superiori, sexdecim in inferiori adsint maxilla. Calculo itaque subducto patet, sexaginta duobus ossibus caput esse compositum. Iungere his potes sexagesimum tertium, *os hyoides*.

Ad *truncum* referuntur omnia, quorum caput, & extremitates superiores, ac inferiores limites ponunt. *Truncum* constituunt *spina dorsi*, *thorax*, & *pelvis*. *Spina dorsi* denuo constat *vertebris* viginti quatuor *veris*, seu *legitimis* ; nimirum 7. *vertebris colli*, 12. *vertebris dorsi*, & 5. *vertebris lumborum*.

Pelvis componunt ossa quatuor ; nimirum duo *innominata*, *os sacrum*, & *os coccygis* ; ossa hæc duo ultima a quibusdam ; sub nomine *vertebrarum spuriarum* adnumerantur *spinæ dorsi*.

Thorax constituitur ex utroque latere *costis* duodecim, (quarum septem supremæ *veræ*, quinque inferiores *spuriae* vocantur, omnesque *vertebris* duplici ratione adnectuntur) anterius vero *sterno*, quod ex duabus constat partibus, & in extremitate inferiori adnexam habet *cartilagineam xyphoideam*. Absolvitur hinc *thorax* viginti sex, *truncus* vero totus quinquaginta quatuor in universum ossibus.

Extremitates quatuor sunt ; binæ *superiores* ad latera *thoracis*, binæ *inferiores* ex inferiori parte ossium *innominatorum* dependentes ; priores *brachiorum*, posteriores *femorum* & *crurum* etiam veniunt nomine.

Extremitates superiores distinguuntur

- 1) In *humerum*, ex *scapula*, & *clavicula* compositum.
- 2) In *brachium*.
- 3) In *antibrachium*, compositum ex *ulna* & *radio*.
- 4) In *manum*, divisam in *carpum*, *metacarpum*, & 5. *digitos*.

Ad *carpum* referuntur octo *ossicula*, ordine ab *radio* ducto; 1) *naviculare*; 2) *lunare*; 3) *cuneiforme*; 4) *pisiforme*; 5) *multangulum majus*; 6) *multangulum minus*; 7) *magnum*; 8) *unciforme*.

Metacarpum constituunt ossa quinque, &

Digitos quinque, ossa in universum *quatuordecim*; quorum *pollici* bina, reliquis vero *digitis* quatuor, nimirum *indici*, *medio*, *annulari*, & *auriculari* tria singillatim propria, & in totidem series, speciali nomine *phalanges* dictas, divisa sunt. Patet hinc brachium quodvis, seu extremitatem superiorem quamvis triginta duobus componi ossibus.

Extremitates inferiores constituunt

- 1) *Ossa femoris*.
- 2) *Crura*, divisa in *tibiam*, *fibulam*, & *patellam*.
- 3) *Pes extremus*, subdivisus in *tarsum*, *metatarsum*, & quinque *digitos*.

Tarsum componunt ossa septem; nimirum 1) *astragalus*; 2) *calcaneum*; 3) *os naviculare*; 4) *ossicula tria cuneiformia*; 5) *ossiculum cuboideum*.

Metatarso quinque sunt ossa;

Digitis demum *quatuordecim*; *pollici* bina, reliquis quatuor *digitis* tria sunt propria; distributa in series tres, quæ etiam hic loci *phalanges* audiunt. Occurrunt præterea vix non semper inter os primum *metatarsi*, & *pollicem* *ossicula bina sesamoidea*; quæ subin & in manu, rarissime vero inter *femur* & *tibiam*, reperiuntur.

Aequalis itaque est numerus ossium extremitatum inferiorum, ac superiorum. Omnium vero sceleti perfecti, hominis adulti, ossium numerus ex dictis erit sequens :

In Capite, una cum osse hyoide	-	-	Ossa 63
In Trunco	-	-	54
In Extremitatibus superioribus	-	-	64
In Extremitatibus inferioribus	-	-	64
Summa omnium			245

Vsus ossium est, ut corpori universo pro fulcramento, directione, & firmo partium omnium præsidio inferviant.

Ossium connexionem TABVLIS adpositis binis illustrare placuit. Nexus vero ossium aut mobilis est, aut immobilis; varias, quæ ad priorem classem, spectant species Tabula I., reliquas Tabula II. exponet.

O S S A C A P I T I S.

Caput, supremam Sceleti partem, vertebræ primæ colli innitentem, antea in *cranium*, & *faciem* divisimus: enumerata tum simul fuerunt ex ordine ossa omnia, caput constituentia.

Figuram quod attinet cranii, sphæram refert cavam, irregularem, antè, superius, & posterius fornicatam, ex utroque latere compressam, inferius planam, & inæqualem. Formatur ab ossibus octo cranii. Faciei tamen ossa triangulum referre magis videntur. Capitis *magnitudo* in homine bene formato ad reliquum corpus se habet uti unum ad novem. Circa *regiones* capitis notandum est, vocari mediam, superiorem *verticem*, inferiorem *basin*, duas anteriores, laterales, complanatas, *tempora*; anteriorem *faciem*, posticam *occiput*.

Substantiam ossium cranii componunt laminæ duæ osseæ, seu substantia duplicata, firma, compactaque; lamina exterior crassa est, æqualis, *pericranio* obtecta; interior vero inæqualis, tenuior, firmior
tamen,

RATIONE NEXVS IMMOBILIS.

Ossium nexus firmus, immobilis
Symphisis.

Symphisis mediata; vix mobilis.

Triplex est.

Synchondrosis; per
cartilaginem.


V. g. costæ cum
sterno.

Synevrosis; per liga-
mentum.

V. g. os sacrum cum
osse coccygis.

Syffarcosis; per car-
nem.

V. g. os hyoides cum
sterno; scapula cum
costis, &c.



Symphisis immediata; firma.

Denuo triplex est.

Harmonia.

V. g. ossa nasi inter
se se mutuo.

Sutura.

Vera, & falsa.

Gomphosis.

V. c. dentes cum
maxillis.

OSSIVM CONNEXIO FIT RATIONE MOTVS:

Articulatio nexus ossium mobilis, dum ossa duo mutuo connexa moventur ad - & versus invicem.

Motus hic aut sensibilis, aut obsecurus, aut omnino insensibilis est.

Primo sub respectu.

Secundo sub respectu vocatur

Tertio sub respectu.

Articulatio cum motu manifesto

Diarthrofis.

Hæc triplex est.

Art. cum motu obscuro

Synarthrofis.

V. g. ossa carpi, & tarsi cum ossibus metacarpi, & metatarsi.

Art. cum motu non perceptibili

Amphiarthrofis.

V. g. ossa carpi, & tarsi inter sese.

Articulatio profunda

Enarthrofis.

Dum caput magnum ossis unius recipitur in foveam, seu acetabulum profundum ossis alterius v. g. caput ossis femoris in acetabulum.

Articulatio superficialis

Arthrodia.

Dum caput rotundum ossis in foveam minus profundam recipitur; v. g. ossis brachialis in scapulam.

Articulatio reciproca.

Ginglimus.

Dum ossa bina ad modum fere pyxididis cum operculo sibi adnexo (*Charriere*) iunguntur; & motus est reciprocus, sed nonnisi rationibus binis sibi oppositis.

Ginglimus angularis.

Dum os unum sub motu cum altero angulum facit: v. g. ulna cum osse humeri.

Ginglimus lateralis.

Dum motus fit lateralis; v. g. radius cum ulna; vertebra secunda colli cum prima.

tamen, dura meninge vestita; *lamina*, seu *tabula cranii vitrea* hæc ultima adpellatur.

Tabulis nunc descriptis utrisque interjecta hæret substantia cellulosa, succo medullari repleta; substantiæ cæterorum ossium spongiosæ hæc est similis; in diversis tamen cranii locis non adest, quin & in senibus haud raro omnino deficit; hinc vero inæqualis exsurgit ossium cranii crassities. Probe respiciendum ad ossium horum structuram sub trepanatione chirurgis est.

In infantibus ossa parietalia, & os frontis ad tertium usque ætatis annum in unum non coalescunt; sed interstitium, quum perfecta nondum ex integro sint, sat notabile intercipiunt, membrana firma occlusum, *fontanellæ*, aut *fontis pulsabilis* sub nomine notum. Tenendum præterea in genere adhuc est, in infantibus recens natis ossa diversa pluribus constare partibus; & sensim demum in unicum os coalescere.

Caput, respectu ad *nexum ossium mobilem* (Tab. I.) sumto, cum vertebra prima colli *ginglymo*, & cum maxilla inferiori *arthrodia* jungitur. *Nexum immobilem* quod concernit ossium, seu *symphysin immediatam* (Tab. II.), omnes tres hujus species in capite occurrunt: nam ossa quædam, faciei, uti v. g. ossa nonnulla nasi, *harmonia*, alia, uti dentes, *gomphosi*, ossa demum ipsa cranii *suturis* inter sese cohærent.

Suturarum 5. sunt; 3. *veræ*, & 2. *nothæ*, seu *spuriæ*.

Sutura coronalis, caput transversim emetiens, os frontis cum ossibus parietalibus jungit.

Sutura sagittalis partem supernam cranii in duas æquales partes dirimit, tum & ossa utraque parietalia necit; exoritur a medio futuræ coronalis, ac in medium lambdoideæ terminatur.

Sutura lambdoidea unit os occipitis cum ossibus sincipitis; inter hanc & dicta nunc ossa hærent sæpissime ossicula parva, triangularis maximam partem figuræ. Suturae nunc enumeratae *suturas veras*; seu *legitimas* constituunt.

Suturae duæ nothæ, seu *spuriæ*, quibus utrinque os temporum cum osse parietali necitur, *sutura squamosæ* adpellantur.

Suturis itaque hæcenus descriptis tantummodo ossa cranii invicem junguntur, unde & *suturae propriæ* audiunt; quarum vero ope ossa faciei cum ossibus cranii coalescunt, ex *suturae* dicuntur *communes*: quatuor ex his specialia adquisiverunt nomina; utpote *sutura transversalis*, conjungens os frontis cum osse nasi; tum & *suturae ossis sphenoidalis*, *ossis ethmoidalis*, *ossisque zygomatici*, queis dicta nunc ossa cum vicinis vinciuntur. *Suturae reliquæ*, notatu minus dignæ, speciali nomine carent.

Commisura vero suturarum verarum perficitur ope majorum, minorumve sese invicem excipientium denticulorum, ac hamulorum.

Vsus Suturarum cranii est, ut 1) testitudo hæc fornicata eo aptius formetur; 2) ut sub partus negotio earum interventu magnitudo capitis fœtus minui queat, quum sic ossa pressione propius invicem accedant, quin & nonnunquam sese mutuo transcendant; quibus omnibus expeditior multo fit transitus. 3) Manifesta intercipiunt interstitia, per quæ communicatio fit pericranii cum dura meninge, hinc & vasorum cranii externorum cum internis. 4) Remorantur fracturas cranii, queis hac fabricæ lege quodammodo ponuntur termini. 5) Quum cedant, vel & omnino a sese invicem recedant, Encephalon a vi externa cæterum longe magis futura noxia, haud raro tuentur.

OSSA CRANII.

Inter ossa octo, cranium constituentia, OS FRON-
TIS anteriori loco ponitur. *Figura* ossis hujus
concham dimidiam sat bene refert. In adultis uni-
co osse constat; in infantibus autem in duas partes
divisum cernitur.

Structura ossis frontis, uti ossium cranii reli-
quorum laminis duabus constat, substantiam spon-
giosam recludentibus. Ossificatio omnium primo
circa arcus superciliares incipit.

Notare debemus in osse frontis *faciem exter-*
nam, convexam, prominentem, & *faciem internam*,
concavam; *marginem superiorem*, *marginem* duos *late-*
rales, *marginemque inferiorem*, quorum tres priores
profunde denticulati sunt; margo inferior autem la-
tus, & inæqualis est. In margine superiore in in-
fantibus magna satis portio deficit; unde, uti antea
dictum fuit, fontanella augetur.

Eminentie ossis frontis *externæ*, *inpressiones*, &
foramina externa sunt sequentia: 1) In facie convexa
illico supra marginem cavi orbitalis, seu orbitæ, ex
utroque latere *eminentiæ duæ*, quibus formantur *sinus*
pituarii ossis frontis; *duæque aliæ*, *arcus supercilia-*
res producentes. 2) *Apophyses quinque*, nempe *nasa-*
lis una, *duæ angulares externæ*, *os jugale*, *duæque*
internæ, ossa lacrymalia attingentes.

Foramina, & *inpressiones*; 1) *cava duo magna*,
partem formantia *superiorem orbitarum*. 2) Post
apophyses angulares internas foveola, cui insidet *troch-*
lea muscoli obliqui superioris oculi. 3) Infra *apophyses*
angulares externas foveola paulo major, *glandulam*
lacrymalem excipiens. 4) Ex utroque latere *pars fo-*
veæ temporalis. 5) In regione interna *arcuum super-*
ciliarium excisio, seu *foramen*, quod *foramen di-*

cunt *orbitarium superius*; transit hoc rami primi, paris quinti nervorum encephali, furculus primus, una cum arteria exigua; cavere itaque Chirurghi debent, inprimis in infantibus, ne hic loci incisiones faciant. 6) *Foramen orbitarium internum*; quod transgreditur furculus rami primi, paris quinti, ad nares tendens, una cum ramo arteriæ ophthalmicæ. 7) Deinum *foramen in angulo oculi interno*.

Eminentia, & cavitates internæ. In medio linea acuta, quæ *spina frontalis* audit; supra hanc *fulcus* longus, cui inhæret sinus longitudinalis; infra hunc *foramen clausum*, seu *cæcum* dictum; & infra foramen hoc *exsectio magna*, recipiens partem cribrosam ossis ethmoidei: *foveæ duæ*, queis incumbunt lobi anteriores cerebri; *sulci* varii innominati, & *foveolæ* minores. Si ferræ ope os frontis transversim, versus arcus orbitarios dissectetur, in conspectum veniunt *sinus* duo pituitarii, a secessu laminarum duarum ossæarum enati. Separati maximam partem ab invicem sunt mediante diaphragmate osseo; hiant plerumque ad processum angularem internum in nares. In infantibus necdum conspici queunt.

Connexio ossis frontis fit cum tribus ossibus cranii, & cum quatuor ossibus faciei: 1) superius cum *ossibus parietalibus* per suturam coronalem; 2) inferius, ac interne cum *osse ethmoidali*, a quo & futura simul nomen suum acquirit; 3) posterius, & inferius cum *osse sphænoideo* per suturam sphænoidealem; 4) inferius, ac anterius cum *ossibus nasi* per suturam transversalem, 5) inferius, ac lateraliter cum *ossibus lacrymalibus* per harmoniam; 6) cum *osse maxillari superiori* per suturam transversalem; 7) cum *processu angulari externo* ad os zygomaticum per suturam zygomaticam.

Vsus ossis hujus est, ut formet tempora, orbitas, sinus frontales, & pituitarios; auget insuper odoratus organon, inservit recipiendis lobis anterioribus cerebri, sinuique longitudinali duræ meningis: ossa demum vicina cum osse frontis ope futurarum magis minusve manifestarum connectuntur.

OSSA duo PARIETALIA, aut BREGMATIS partem cranii superiorem, partesque laterales constituunt. Latissima sunt, quadrangulum irregulare referentia.

Substantia uti in reliquis cranii ossibus est.

Ossificatio in ossium horum medio omnium primo occurrit. Notanda circa hæc ossa veniunt sequentia: 1) *Facies externa* convexa, *interna* concava. 2) *Margines* quatuor, quorum *superior*, isque maximus futuram format sagittalem; in infantibus perfectus margo hic nondum est, unde & auget in his fontanellam; *margo anterior* cum osse frontis futuram coronalem, *posterior* cum osse occipitali futuram lambdoidalem generat; *margo inferior* tempora respicit. Tres marginum horum priores denticulati sunt, ultimus autem cum ossibus temporum per futuram spuriam cohæret. 3) *Anguli* quatuor; duo *anteriores*, quorum unus superior, alter inferior, simulque longissimus est, ac sinistrum os a dextro distinguit; duoque *posteriores*.

Notandus insuper in facie externa horum ossium *arcus semicircularis* pro adhæsiōne musculi temporalis.

Foramina parietalia; unum plerumque ex his in quovis osse est; vasa sanguifera per foramina hæc eadem ad sinum longitudinalem feruntur. *Interna* ossium horum *facies sulcos* multos irregulares exhibet, queis vasa incumbunt: eminent inter hos ii,

qui in angulo anteriori, ac posteriori, tum & ille, qui recipit sinum duræ meningis longitudinalem.

Connectuntur ossa parietalia 1) inter *semetipsa*, marginibus superioribus reciprocis futuram sagittalem formantia; 2) marginibus anterioribus cum *osse frontis* coronalem producunt futuram; 3) ope marginum posteriorum cum *osse occipitali* per futuram lambdoideam coalescunt; 4) per margines inferiores adnectuntur ad *os temporum*, & *sphænoideale*, quocum, futuram faciunt squammosam.

Vsus in eo consistit, ut fornicem producant superiorem cranii, lobos encephali medios obtegentem; tum ut secundum directionem cohæisionis suæ sinum longitudinalem excipiant.

OS OCCIPITIS a situ quem occupat, nominis deduxit originem; constituit hoc partem cranii posticam, & partim etiam inferiorem: os magnum, latumque est, quadrangulum arcuatum, irregulare, oblongum referens. In adultis integrum est; in fœtu autem, uti & in infantibus tenellis, quatuor specialibus componitur partibus, in quarum medio omnium primo conspicitur *ossificatio*.

Dividitur os occipitis in *faciem externam*, tum convexam, tum planam, & *internam*, concavam; in *marginibus* quatuor, nimirum in duos *superiores*, denticulatos, duosque *inferiores*, inæquales, quæ totidem formantur *anguli*; unus *superior*, vix non rotundus, duo *laterales*, unusque *inferior*, qui speciali nomine *apophysis sphænoidealis* adpellatur.

In *facie externa* adfunt *eminentiæ* sequentes: 1) In medio eminentia, *tuberositas ossis occipitis* dicta; adhæret huic ligamentum cervicale, & enascitur exin etiam linea acuta, quæ *spina occipitalis* audit. 3) Excurrit transversim supra hancce spinam *arcus*, cui adfigun-

adfiguntur plures muscoli. 4) *Condylis* duo *articulares* ex utroque latere prope foramen occipitale magnum siti, ab foveis articularibus superficialibus vertebræ primæ colli excipiendi; eaque ratione articulationem constituentes. 5) *Processus sphænoïdalis* ossis occipitis.

Foveæ & cavitates sunt: 1) secundum latera spinæ occipitalis externæ sex occurrunt; nempe duæ *superiores*, duæ *inferiores*, duæque *mediæ*. 2) *Foveæ* duæ *parvæ* ante condylos articulares insculptæ; pluresque aliæ *exiguæ* in processu cuneiformi. *Excisuræ* quatuor: duæ *majores*, duæque *minores* ad marginem processus sphænoïdalis, cum excisuris apophyseos petrosæ ossium temporum, foramina lacera posteriora producentes.

Foramina quinque *propria*: 1) *foramen magnum occipitale*, quod transeunt medulla oblongata, nervus accessorius Willisii, & arteria vertebralis; 2) *quatuor foramina* in condylis articularibus; *anteriora* duo pro transitu paris noni nervorum, duoque *posteriora*, pro transitu venarum jugularium.

Eminentia, & cavitates interiores sunt: 1) *Eminentia* duæ, crucis formam referentes, atque hanc ob rationem *spina cruciata* ossis occipitis interna dictæ; *productio* spinæ hujus ejusdem cruciatæ *superior* in medio, aut lateraliter excavata est, ut recipere queat sinum longitudinalem superiorem. *Productiones* duæ *laterales* pariter excavatæ sunt, ac sinus duos recipiunt laterales; *productioni inferiori*, seu *spinæ occipitali internæ* etiam dictæ adhærescit septum occipitale parvum.

Foveæ, quatuor, per spinam cruciatam internam sejunctæ; duæ *superiores*, inserviunt recipiendis lobis posterioribus cerebri, duæ inferiores *cerebello* dicantur.

Excavatio longa in processu sphœnoidali, cui medulla incumbit oblongata.

Substantia ossis occipitis binis laminis componitur, queis substantia spongiosa in diversis locis jam copiosior, jam paucior interjicitur; unde & os occipitis superius, ac in medio crassissimum, inferiori loco autem tenuius est.

Nexus cum quatuor ossibus fit; 1) superius cum *ossibus parietalibus* per suturam lambdoideam; 2) lateraliter cum *ossibus temporum* pariter per suturam lambdoideam; 3) inferius, & anterius cum *osse sphœnoideo* per apophysin sphœnoidalem; 4) inferius cum *vertebra prima colli* per ginglymum.

Vsus est ossis occipitalis, ut recipiat lobos posticos cerebri, & cerebellum; ut transitum concedat medullæ oblongatæ, nervis variis, vasisque tum intransantibus encephalon, tum egredientibus; movendo demum inservit, firmandoque capiti.

OSSIVM TEMPORVM sub nomine veniunt ossa duo, laterales capitis partes occupantia, *tempora* ita dicta in specie constituentia, tum & ad formandam basin cranii concurrentia. Os totum *figuræ* irregularis est. In adultis quodvis horum ossium est integrum; in infantibus vero junioribus adhucdum distinguere potest separatio partis squamosæ a petrosa. Punctum ossificationis omnium primo sub initium apophyseos zygomaticæ partis squamosæ conspicitur: pars petrosa in fœtu septimestri substantia molliori nonnisi componitur.

Dividitur ossium horum quodvis in homine adulto in duas partes; *squamosam* unam, semicircularem &

petrosam alteram, pyramidalem.

In *squamosa parte* consideranda veniunt:

Facies

Facies externa convexa; & interna inæqualiter concava.

Margines duo semicirculi, quorum unus os zygomaticum, alter sinciput, & os sphœnoidale respicit.

In parte petrosa notentur :

Tres facies; externa inferior, interna superior, & interna posterior.

Anguli totidem; queis facies dirimuntur.

Apex partis petrosæ, respiciens os cuneiforme.

Basis partis ejusdem, os occipitale attingens.

Externe in osse temporum sequentes adfunt apophyses, seu processus.

Processus mastoideus, inferius posteriora versus situs; interne cellulis plurimis, membrana mucosa vestitis, compositus.

Processus styloideus, enatus a parte petrosa.

Processus zygomaticus, oriens a parte squamosa; crassior hic sub initium est, & eminentiam obliquam producit articulationi, & firmandæ cartilagini interarticulari meniscoidi dicatam; per decursum tenuior factus connectitur demum cum processu temporali ossis zygomatici, & una cum hoc eodem pontem zygomaticum efformat.

Cavitates externæ sunt :

Fovea articularis in facie inferiori.

Fissura foveæ articularis in hujus medio.

Orificium meatus auditorii externi in facie externa partis squamosæ.

Sulcus infra apophysin mastoideam.

Foramen stylomastoideum, inter apophysin styloideam, & mastoideam; transit hoc portio dura nervi acoustici.

Excisura in parte petrosa, quæ cum alia simili ossis occipitalis foramen producit lacerum; per quod vena jugularis externa egreditur.

Canalis caroticus; per hunc intrat carotis interna, exit nervus intercostalis magnus.

Pars ossea tubæ acousticæ prope canalem nunc dictum, decurrentis inter partem squammosam, & petrosam ad tympanum.

Interne notentur :

Denticuli exigui, queis perficitur futura squammosa.

Fovea cui insident lobi cerebri medii. Sulci etiam varii abs determinato ordine, & numero decurrentes, queis vasa inhærent.

Sulcus in superiori angulo pro sinu duræ meningis medio.

Meatus auditorius internus, in facie postica apophyseos petrosæ; transit portio mollis nervi acoustici.

Orificium internum aquæductus fallopiani, terminati in antea dictum foramen, inter apophysin styloideam, & mastoideam positum, portionem duram nervi acoustici recipientis.

In basi apophyseos petrosæ *sulcus* pro sinu laterali duræ meningis.

Fovea pro vena occipitali.

In angulo posteriori apophyseos petrosæ versus medium *foramen lacerum*.

Interne in apophysi petrosa habitat *organon Auditus*; circa quod ordine notentur sequentia :

- 1) *Meatus auditorius externus*.
- 2) *Cavitas tympani*.
- 3) *Labyrinthus*, &
- 4) *Meatus auditorius internus*.

Meatus auditorius externus canalis est incurvus, sex pluresve lineas longus, in adultis ex integro osseus.

seus. Meatus hujus orificium externum, in concha incipiens, hæret superius in squammosa, inferius autem in petrosa parte ossis temporum; exhinc oblique interiora versus flectitur canalis, in medio angustior, quam in ambabus extremitatibus; orificium internum undique circumdatur sulco, cui superintenditur membrana tympani. In infantibus recens natis meatus auditorius mollis adhucdum est; & *circulus*, seu *annulus* tantum invenitur *osseus*, cui membrana tympani adhæret.

Tympanum, aut *cavum tympani*, cavum est oblongum figuræ indeterminatæ, meatum auditorium externum excipiens; in *regionem anteriorem, posteriorem, ac mediam* divisum. Ad sunt in regionibus nunc enumeratis inæqualitates varix.

Cavitates, & foramina sunt:

Orificium tubæ acousticæ; est vero *tubæ* acoustica meatus oblongatus, conoideus, partim cartilagineus, partim membranaceus; cujus pars cartilaginea in aurem, pars vero altera membranacea retro nares in cavum faucium hiat.

Canalis cui inhæret musculus tensor tympani; oritur ab orificio tubæ, & hamulo exiguo ad fenestram ovalem terminatur.

Cavum ad aperturam substantiæ cellulosæ processus mastoidei.

Fenestra ovalis foramen est oblongum, seu ellipticum, hians in vestibulum, claudendum a stapede.

Fenestra rotunda foramen est minus paulo præcedente, sed omnino rotundum, ducens ad cochleam, membrana speciali clausum.

In *cavo tympani* hærent *ossicula* quatuor sequentia:

- 1) *Malleus.*
- 2) *Incus.*

3) *Officulum subrotundum*, seu *orbiculare*.

4) *Stapes*.

Circa *malleum* notentur :

Caput rotundum, tenui cartilagine incrustatum, incudi ginglymo adnexum.

Collum angustum inter caput, & manubrium, ex quo enascitur processus longus, tenuis, sulco tubæ inhærens, ad fissuram usque cavitatis articularis ossis temporum productus.

Manubrium sine lateacente, processu brevi, conoideo, membrana tympani adligato, tandem terminatum.

Situs mallei in cavo tympani sequens est :

Caput una cum collo sursum spectat, incudi adnexum; manubrium secundum membranam tympani deorsum fertur, & hujus medio ope extremitatum suarum latecentium, extrorsum nonnihil inflexarum adnectitur; jungitur etiam per ligamentum exiguum cum majori crure incudis.

Incus, officula auditus reliqua & magnitudine excedens, & robore, dirimitur in *corpus*, & bina *crura*.

Corpus anteriora versus hæret, latius magis est, quam crassum, eminentiis binis instructum, & foveolis binis, cartilaginea crusta inductis, excipiendo capiti mallei dicatis.

Crus brevius finitur ad marginem cellularum apophyseos mastoideæ.

Crus longius una cum manubrio mallei, cui ligamenti ope adhærescit, idem iter emetitur; sine suo interiora versus incurvato officulum orbiculare recipit, cujus interventu cum stapede unitur.

Officulum orbiculare ossium omnium corporis humani est minimum; hæret inter crus longum incudis,

dis, caputque stapedis; mediantibus binis suis faciebus convexis, ossibus nunc dictis duobus adfigitur.

Stapes a similitudine, quæ cum stapede equestri ei intercedit, sortitus fuit nomen: notanda circa stapedem veniunt:

1) *Caput*, ex unione binorum crurum enatum; sine suo excavato officulum orbiculare excipit, atque hac ratione cum crure longiori incudis conjungitur.

2) *Duo crura*, quæ, uti in stapede equestri in arcum flectuntur.

3) *Basis*, fenestram ovalem obtegens.

Labyrinthus vocatur auris regio, retro cavum tympani hærens, in fenestras duas antea descriptas aperta.

In *labyrintho* notentur:

1) *Vestibulum*.

2) *Canales tres semicirculares*.

3) *Cochlea*.

Vestibulum cavum est inæqualiter rotundum, inter cochleam, & canales semicirculares positum: considerandæ in hoc veniunt aperturæ sequentes.

1) *Orificia quinque canalium semicircularium*.

2) *Fenestra ovalis*.

3) *Scala vestibuli*.

Canales tres semicirculares hærent versus basin apophyseos petrosæ, & in adultis acrite huic eidem adcreti sunt: medium circuli segmentum nonnihil excedunt, in medio angustiores, in extremitatibus latefcunt; ratione situs sui 1) in *inferiorem & posteriorem*, 2) in *superiorem & medium*, 3) in *exteriorem anticum* dividuntur.

Situs duorum priorum perpendicularis, tertii vero horizontalis est. Canaliū horum quivis duos habet exitus, qui tamen omnes, quinque solum orificiis in vestibulum terminantur; quum exitus unus canalis

lis superioris cum exitu canalis inferioris in ostium commune confluat.

Cochlea nomen a figura fuit adepta; hæret loco anteriori versus apicem apophyseos petrosæ.

Circa *cochleam* notentur :

1) *Nucleus*, sive *modiolus cochleæ* osseus, conoideus, per totam suam longitudinem foraminulis multis pertusus, in apicem tandem terminatus.

2) *Gyri cavi cochleiformes* circa modiolum; absolvuntur gyris duobus cum dimidio; per medium dividuntur septo interjecto in binas partes æquales, *scalæ* dictas. Oriuntur hæ a medio modioli, & terminantur in duas aperturas, quarum prior in vestibulum, posterior in fenestram rotundam tympani abit; unde & illa *scala vestibuli*, hæc *scala tympani* salutatur. Communicant inter sese mediante foraminulo exiguo in medio modioli *scalarum* harum cavitates.

3) *Lamina spiralis* est ipsum antea dictum diaphragma, cujus ope cochlea bifariam dirimitur. Lamina hæc ipsa maximam partem ossea, portio tamen exterior membranacea est; a medullosa undique obducitur tunica.

Meatus auditorius internus meatus est parvus, osseus, interne a facie postica ossis petrosi orificio longitudinali incipiens, versus vestibulum & cochleam decurrens, ac ibi loci ope eminentiæ in cavitates duas minores divisus, quarum superior, eaque minor orificium constituit aquæductus fallopii, portionem durum nervi acoustici excipientis; altera vero inferior, pauloque major foraminulis plurimis exiguis perforatur, per quæ portio mollis nervi auditorii in labyrinthum excurrit.

Aquæductus fallopii per faciem superiorem apophyseos petrosæ extrorsum fertur; inter canalem
femicir-

femicircularem anteriorem, & fenestram ovalem, mediante parvo foraminulo cum cavo tympani communicat; in parte postica hujus ejusdem cavi inferiora versus descendit, ac aperitur in foramen hærens inter apophysin mastoideam, & styloideam.

Partes nunc enumeratæ auris omnes, & singulæ periosteo subtili obducuntur.

Substantia partis squamosæ ossis temporum componitur laminis duabus osseis, quas inter medulla reconditur: *apophysin mastoideam* cellulæ plurimæ, *apophysin petrosam* substantia firma, maxime compacta constituit.

Connexio fit cum ossibus quinque cranii:

1) Superius cum *osse syncipitis*, per futuram squamosam.

2) Posterius, ac inferius cum *osse occipitis*, per futuram lambdoideam.

3) Anterius, & inferius cum *osse sphænoideo*, per harmoniam.

Cum duobus ossibus faciei:

4) Anterius cum *osse jugali*, per harmoniam.

5) Cum *maxilla inferiori* per arthrodiam.

Vsus est ossis hujus, ut recondat, tueatur organon auditus; ut medios cerebri lobos, & partem cerebelli excipiat; ut tempora, & partim etiam basin cranii perficiat.

O S S P H O E N O I D A L E .

OS SPHOENOIDEVM, BASILARE, CVNEIFORME, MULTIFORME, hæret loco inferiori in basi cranii, ossibus cranii, ac faciei, cunei adinstar quasi intrusum. *Figura* vespam, aut vesperilionem alis expansis fere refert. In fœtu os hoc ipsum quinque partibus componitur; in infantibus autem a nati-
tate

tate non procul remotis partes duæ laterales a corpore ossis reliquo separari adhucdum queunt.

Obducitur sensim substantia hujus ossis spongiosa lamellis osseis tenuibus; quæ per ætatem maxime indurantur; in partibus lateralibus pauca nonnisi medulla laminis dictis hæret interposita.

Dividitur in *corpus*, & *processus*.

In *faciem internam*, cavum cranii, & *externam* collum respicientem.

Occurrunt in hisce plurimæ eminentiæ, & cavitates.

Eminentia, seu *apophyses externæ* sunt :

1) *Spina sphaenoidalis inferior* hæret in medio corporis ossis hujus, recipit os vomeris; a spina hac eadem, eminentia adhuc exigua ad connexionem ossis cum osse ethmoidali.

2) *Processus duo temporales*, seu *alæ majores*, ossa temporum, & sincipitis attingentes.

3) *Processus duo orbitales*, connexi cum osse frontis, & jugali; concurrentes ad formandam partem orbitæ.

4) *Processus duo pterygoidei*, quorum quivis in *alæ duas minores*, unam *externam*, alteram *internam* subdividitur: superior processuum horum pars *finis*, inferior *radix* adpellatur.

5) *Hamulus* in fine *alæ posterioris*, quem ambit *musculus posterior palati*.

6) *Processus duo spinosi posteriora*, & superiora versus, lateraliter *sulco* excavati, cui adhærescit portio cartilaginea *tubæ acousticæ*.

Eminentia internæ sunt :

1) *Alæ duæ minores*, tenuissimæ, ad formandam fissuram orbitalem superiorem concurrentes.

2) *Processus quatuor ephippiales*; anteriores duo, duoque posteriores.

Cavitates & foveæ externæ sunt :

1) *Sinus pituitarii sphœnoidales*, cavitates duæ sunt corpori ossis hujus sub ephippio insculptæ, magnitudine variæ, septo osseo plerumque separatæ, ad latera spinæ sphœnoidalis in cavum narium hiantes:

2) *Fovea pterygoidea*, ex utroque latere inter processus-ptyerygoideos, pro insertione musculorum quorundam.

3) *Foramina duo pterygoidea* ad radicem processuum ptyerygoideorum; orificia sunt duorum canalium, eodem nomine donatorum, quos transit ramus quinti paris recurrens.

4) *Foramina duo spinosa*, ad apicem spinæ sphœnoidalis, transitum largiuntur arteriæ duræ meningis mediæ.

5) *Foramina duo sphæno-palatina*, per quæ nervi, & vasa hæmatophora ad membranam feruntur pituitariam.

Cavitates, & foramina interna sunt :

1) *Rimæ duæ sphœnoidales*, seu *orbitales superiores*; in harum margine extimo sulcus parvus, vel subin & foramen est, pro transitu rami arteriæ carotidis externæ in cranium.

2) *Foramina optica*, per quæ nervus opticus, una cum arteria centrali transit.

3) *Fovea* inter apophyses quatuor ephippiales, quæ *sellæ turcicæ* sub nomine venit; inhæret ei glandula pituitaria; foraminula etiam hic loci adsunt varia exigua, in sinum pituitarium ossis sphœnoidalis ducentia: ad apophyses ephippiales posticas utrinque *sulcus* est pro arteria carotide internâ.

4) *Foramina duo rotunda*, pro transitu nervi maxillaris superioris; &

5) Foramina duo ovalia; pro transitu nervi maxillaris inferioris.

Connexio ossis sphenoidis fit cum septem ossibus cranii omnibus; cum tribus paribus; unoque impari faciei; *anterius* 1) cum *osse frontis*, 2) cum *osse ethmoidali*, 3) cum *ossibus maxillaribus*; 4) cum *ossibus zygomaticis*.

Lateraliter 5) cum *ossibus temporum*. 6) cum *ossibus sincipitis*; *posterius* 7) cum *osse occipitali*.

Inferius 8) cum *ossibus palatinis*, & 9) cum *osse vomere*.

Vsus est, ut contribuat ad formationem orbitalium, & fovearum temporalium, tum & baseos cranii, ad depositionem muci narium; ut demum transitum concedat nervis plerisque encephali.

OS ETHMOIDEVM.

OS ETHMOIDEVM, seu CRIBROSVM os unicum est. Nominis origo deducitur a copiosissimis foraminulis, quibus, cribri adinstar, pertusum est. Hæret loco interiori, ac anteriori in basi cranii inter os sphenoidale, radicem nasi, & foveas orbitales; pars ossis hujus superior explet totam excisuram ossis frontis.

Figura irregularis maxime est.

In foetu tribus partibus constat; quæ denuo lamellis tenuissimis invicem retortis componuntur.

In adultis partes hæ in os unicum coalescunt.

Dividitur os ethmoideum in *facies* sex, utpote:

1) In *faciem superiorem*, cavum cranii respicientem, laminam horizontalem referentem, cribri adinstar copiosissimis foraminulis pertusam, per quæ primum nervorum encephali ad nares fertur.

2) In *inferiorem* alveolorum apum adinstar exculptam, nares respicientem.

3)

3) In *anticam* os frontis, hujusque sinus pituitarios attingentem.

4) In *posticam*, per parvam excisuram cum osse sphænoideo nexam.

5) In *duas laterales*, læves, tenues, ossis hujus partem præcipuam, tum & partem internam orbitarum constituentes.

Eminentie sunt :

1) *Crista galli*, prominens in medio faciei superioris, atque hac ratione os hoc ipsum in duas partes dirimens: adnectitur ei processus falciformis duræ meningis.

2) *Lamina perpendicularis*, seu *septum ethmoidum*, fertur perpendiculari directione a crista galli per medium ossis ethmoidis, os hoc in partes duas æquales dividit; &, ubi in facie hujus inferiori eminet, cum osse vomeris jungitur.

Substantia ossis ethmoidis superne, & lateraliter lamellis tenuibus, osseis absolvitur; interne, ac inferius constat *ossibus* sic dictis *spongiosis superioribus*, quorum pars convexa nares, pars concava lateraliter os maxillare superius respicit; in medio sejunguntur ab invicem ossa hæc duo spongiosa per laminam perpendicularem duplicatam; cæterum a membrana pituitaria undique amiciuntur.

Cavitates, & foramina sunt :

1) *Foramina ossis ethmoidis*, in facie hujus superiore, per quæ feruntur nervi olfactorii.

2) *Foramen orbitale nasi*, in facie interiori ossis ethmoidis; transit hoc ramus nervi ophtalmici.

Connexio fit cum ossibus septem; cum duobus nimirum cranii, & quinque faciei; 1) cum osse frontis, 2) cum osse cuneiformi; 3) cum ossibus maxillaribus superioribus; 4) cum ossibus lacrymalibus; 5) cum

ossibus nasalibus ; 6) cum ossibus palatinis ; 7) cum osse vomere.

Vsus ossis ethmoidis est, ut subfulciat simul lobos cerebri anteriores ; ut transitum largiatur primo nervorum pari ; ut adfigatur ei productio falci-formis duræ meningis ; ut demum contribuat ad formationem organi olfactus.

OSSICULA CRANII TRIQVETRA, si adsint, magnitudinis diversæ cernuntur ; quædam minima, & angusta, alia latiora, majoraque sunt ; numerus etiam eorum determinatus non est : hærent sæpius inter ossa syncipitis, & occipitis, a futura ipsa lambdoidea intercepta, quam quidem in futura coronali, & sagittali ; omnium rarissime inveniuntur in futuris ossium cranii cum ossibus faciei. Margo ossiculorum horum undique denticulatus est, & cum vicinis ossibus legitimam futuram perficit.



ORDO SECVNDVS.

OSSA FACIEI.

FACIES pars est capitis anterior, inferior, minima, triangulum fere referens, in *maxillam superiorem*, ac *inferiorem* divisa.

Ad *maxillam superiorem* referuntur ossa ~~tredecim~~ ^{quatuordecim} quorum, uno solum excepto, omnia sunt paria.

Maxilla inferior unico osse absolvitur.

Ossa maxillaria superiora maxima sunt ossium reliquorum huc spectantium; in media faciei parte antè ad invicem sita sunt.

Figura, sive separata spectes, sive juncta invicem, irregularis nunquam non est.

Notanda circa hæc ossa veniunt:

Facies externa, quæ externe in facie, & palato conspicitur; &

Interna, maximam partem cavi narium absolvens.

Adsunt in utrisque *eminentiæ plurimæ*, & *concavitates*.

Eminentia externa, & *interna* sunt:

1) *Processus nasales*, laterales nasi partes constituentes, ad os frontis usque producti.

2) *Processus orbitales*, marginem inferiorem constituent, partem inferiorem, fissuramque inferiorem orbitarum.

3) *Processus jugales*, seu *zygomatici*, cum osse jugali connexi.

4) *Processus palatini*, anteriorem palati partem faciunt; posteriori loco ossibus palatinis adhærent.

5) *Arcus alveolaris*; componitur hic, si bina simul spectentur ossa, *alveolis sexdecim*; quibus *dentes*

inhærent : pars postica , in qua alveoli non amplius adsunt , *tuberositas maxillaris* audit.

6) *Spina nasalis* , oritur ab unione ossium binorum maxillarium interius in cavo narium ; adhæret ei tum pars cartilaginea , tum septum narium.

Cavitates , & foramina externa , & interna sunt :

1) *Excisura magna* pro parte nasi cartilaginea.

2) *Sulcus* in parte superiore , & interna apophyseos nasalis , versus orbitam , pro sacco lacrymali ; sulcus hic inferiori loco partem dein constituit *canalis nasalis* , in cavum narium aperti.

3) *Foramen infraorbitale* , seu *foramen orbitale anterius* , seu *exterius* ; illico sub margine orbitali inferiori apertura est *canalis* , in apophysi orbitali excurrentis , loco posteriori prope fissuram orbitalem inferiorem terminati in *foramen orbitale posterius* , nervum orbitalem inferiorem transmittens.

4) *Foramen palatinum anterius* , in parte antica apophyseos palatinæ retro dentes incisores ; aperitur hoc superius ad spinam nasalem ; & transitum largitur arteriæ palatinæ anteriori , una cum tunica palatina cavum narium subeunti.

5) *Foramina varia exigua* in tuberositate maxillari , per quæ feruntur nervi alveolares anteriores , producti a nervo orbitali inferiori.

6) *Ibidem loci impressio parva* , ubi adhærescit ala ossis palatini ; tum & proxime impressioni huic eidem *sulcus* , cum osse palatino , & sphænoideo canalem generans , cujus finis

7) *Foramen palatinum posterius* audit : situm id est retro dentem ultimum molarem in tuberositate maxillari ; transitum facit nervo alveolari posteriori.

8) *Alveoli* , septem , octove ex utroque latere.

9) *Eminentia transversalis* inter partem infimam canalis nasalis, & apophyfin mastoideam, cui adhærescit anterior pars ossis squammosi inferioris.

10) *Sinus maxillaris*, seu *antrum Highmori*, cavitas magna est in medio hujus ossis, superius sub orbita ad fissuram hujus usque inferiorem; inferius autem ad alveolos usque producta: *orificium* hujus *antri* in nares obtegitur partim ab ossibus spongiosis inferioribus, ac palatinis; hinc vero & angustum adeo redditur, ut calamum vix admittat scriptorium.

Ossa hætenus exposita, *nectuntur* tum inter sese *invicem*, tum & cum ossibus decem aliis; nempe cum ossibus tribus cranii, 1) cum *osse frontis*; 2) cum *osse ethmoideo*; 3) cum *osse sphænoideali*; & cum ossibus sex faciei; utpote 4) cum *osse nasali*; 5) cum *ossibus lacrymalibus*; 6) cum *ossibus zygomaticis*; 7) cum *ossibus palatinis*; 8) cum *ossibus spongiosis*; 9) cum *osse vomere*; & 10) demum cum *dentibus*.

Vsus. Constituunt partem orbitarum, palati, faciei, & cavi narium; tum & inserviunt secretioni mucii narium, masticationi, & retinendis, firmandisque dentibus.

O S S A N A S A L I A.

OSSA ambo NASALIA ad invicem hærent sub basi ossis frontis in parte superiore, & media nasi. *Figura* horum ossium quadrangularis oblongata est.

Notanda in quovis sunt:

Facies duæ,

Margines quatuor.

Facies externa convexa, nonnihil introrsum pressa, dorsum nasi efficit.

Facies interna cavum respicit narium.

Margo superior crassus est, angustus; os frontis attingit.

Inferior tenuis, latus, denticulatus, unitur cum cartilaginibus narium.

Interior planus, unitur cum socio ope harmoniæ; interne eminentia parva præditus est, cui adhæret septum narium.

Externus jungitur cum apophysi nasali ossis maxillaris superioris.

Ossium horum quodvis versus finem superiorem foramen habet, quod nervi, aut vasa sanguifera transeunt.

Connectuntur mutuo per harmoniam; præterea vero & cum ossibus tribus aliis; utpote:

- 1) Cum *osse frontis*.
- 2) Cum *osse maxillari superiori*, &
- 3) Ope marginis interni cum *osse ethmoideo*.

Vsus est, ut organon tueantur olfactus, & nasum forment.

O S S A L A C R Y M A L I A.

Ambos OSSA LACRYMALIA, seu OSSA VNGVIS, ossium faciei minima sunt, & tenuissima; ossa *lacrymalia* dicuntur, quod lacrymæ supra ossa hæc in nares defluant; vel ossa *unguis* audiunt, quod magnitudine, & figura unguem digitorum referre videntur: ossium horum quodvis hæret in orbita sui lateris, parte inferiore anguli oculi interni.

Figura ossium lacrymalium fere quadrangularis est.

Notanda in his veniunt:

Facies externa concava, versus orbitam tendens.

Facies interna convexa, os ethmoideum respiciens.

Margines

Margines quatuor.

Superior, nexus cum osse frontis.

Inferior, junctus ossi maxillari superiori.

Internus, adcretus laminæ tenui ossis ethmoidis.

Externus, adhærens apophysi nasali ossis maxillaris superioris, donatus in medio *fulco*, cum semicanale apophyseos nunc dictæ fossam pro canale nasali perficiente.

Nexus fit cum ossibus quatuor; 1) cum *osse frontis*; 2) cum osse maxillari superiori; 3) cum osse ethmoideo; 4) cum osse spongioso inferiori.

Vsus horum ossium est, ut fossam pro sacco lacrymali, uti & canalem nasalem perficiant; ut concurrant ad formandam partem orbitarum; ut obtendant labyrinthum narium.

O S S A Z Y G O M A T I C A .

OSSA, IUGALIA, seu ZYGOMATICA, seu OSSA MALAE, sita sunt, ex utroque latere faciei, in parte superiore.

Figura eorum inæqualiter quadrangularis.

Dividuntur.

In *faciem externam* convexam, & *internam* concavam, qua pars maxima fossæ zygomaticæ perficitur; tum in *corpus*, & *apophyses* quatuor.

1) In *apophysin*, seu *processum*, *frontalem*, in angulo oculi externo ossi frontis adnexam.

2) In *apophysin orbitalem*, quæ partem facit orbitæ.

3) In *apophysin malarem*, cum osse maxillari superiori junctam.

4) In *apophysin zygomaticam*, cum apophysi zygomatica ossis temporum coeuntem, atque sic pontem zygomaticum efformantem.

Cavitates & foramina sunt :

1) In facie externa *foramina* varia, pro transitu vasorum, ac nervorum.

2) *Fossa zygomatica*, sub ponte zygomatico.

Connexio ossis hujus fit cum quatuor ossibus aliis; 1) cum *osse frontis*; 2) cum *osse maxillari*; 3) cum *osse temporali*; 4) cum *osse sphænoideo*.

Vsus. Ossa maxillaria superiora fulciunt; faciem formant; partem inferiorem, ac lateralem orbitæ perficiunt.

O S S A P A L A T I N A.

OSSA PALATINA hærent loco posteriori in parte superiore palati inter apophyses pterygoideas, & os maxillare superius, secundum cujus latera in parte postica cavi narium ad orbitas usque adscendunt.

Figura triangulum inæquale exhibent; sursum incurvantur; eminentiis, & cavitatibus variis redduntur superficie sat inæqualia.

Dividitur quodvis in regiones quatuor: 1) in regionem palatinam; 2) in regionem pterygoideam; 3) in regionem nasalem; 4) in regionem orbitalem; quæ denuo *marginibus*, & *faciebus* suis gaudent.

Regio palatina locum occupat posteriorem; *marginem* hæc habet *anticum*, parti palatinæ ossis maxillaris superioris adnexum; & *posticum*, nonnihil inflexum, fornicem palati cum cavo narium perficientem; margini huic adhæret columella, palatum molle, pluresque huc pertinentes muscoli.

Connexio amborum ossium in facie superiori lineam producit asperam, cujus medio *sulcus* pro adhæssione ossis vomeris insculptus est; in facie inferiori *sulcus* est parallelus.

Regionem

Regionem pterygoideam alii *processum* solummodo dicunt *pterygoideum*. Sita pariter est inferius, & posterius inter alas ossis sphœnoidalis, & tuberositatem maxillarem; inæqualis est, ex lateribus introrsum pressa, *fulci* ope a regione palatina, & nasali diremta; *fulci* hujus finis *foramen palatinum posticum* dicitur, quod ramus nervi palatini transit; proxime foramini huic ostiala duo parva sunt, queis terminatur exitus alterius meatus, quem pariter ramus nervi palatini transit.

Regio nasalis tenuissima est, lateraliter adscendit, & duabus gaudet *faciebus*; *interior*, nares respiciens a regione palatina linea prominente sejungitur, cui pars posterior ossis spongiosi inferioris incumbit; *exterior* versus orificium sinus magni pituitarii directâ est, quod & partim obtegit.

Regio orbitalis a regione nasali per excisuram separatur; hæc vero cum alis ossis sphœnoidis coiens aperturam excitat, quæ *foramen sphæno-palatinum* dicitur. Regione hac eadem *externe* lateraliter orificium sinus pituitarii ossis maxillaris superioris tegitur; superius *apophysin* emittit, ad partem orbitæ posticam, sub nomine *processus orbitalis* decurrentem.

Ossa palatina *nectuntur* dein cum ossibus duobus cranii; 1) cum *osse sphænoide*; 2) cum *osse ethmoide*: tum & cum ossibus tribus faciei; 3) cum *osse maxillari superiori*; 4) cum *osse spongioso inferiori*; 5) cum *osse vomeris*, & 6) *inter sese mutuo*.

Vsus. Partem formant posticam palati, cavi narium, partemque exiguan orbitæ. Obtegunt præterea partim sinum pituitarium maxillæ inferioris.

O S V O M E R I S .

OS VOMERIS nomen denuo adeptum fuit, quod vomerem referat. Os est unicum, in medio cavi narium perpendiculari situ positum, idque bifariam dirimens.

Notanda circa os vomeris sunt:

Facies duæ; *dextra*, & *sinistra*, cavum narium respicientes:

Margines quatuor; *superior*, *inferior*, *anterior*, *posterior*.

Margo superior sulco gaudet longo, spinam sphœnoidalem excipiente.

Inferior, canalem ossium palatinorum, & maxillarium superiorum ingrediens.

Anterior in lamellas binas finditur, queis interceptitur lamella perpendicularis ossis ethmoidis, parsque septi nasi cartilaginea.

Posterior inferne acutus est, adscendens obtusior sensim fit, & ab ossium omnium aliorum nexu liber fauces respicit.

Connectitur os vomeris cum ossibus quatuor; 1) cum sphœnoide; 2) cum osse ethmoide; 3) cum osse maxillari superiori; 4) cum osse palatino, & 5) cum septo cartilagineo nasi.

Vsus. Cavum narium bifariam dividit; hinc organon olfactus auget; nasum fulcit.

O S S A S P O N G I O S A I N F E R I O R A .

OSSA AMBO SPONGIOSA INFERIORA hærent in partibus lateralibus inferioribus cavitatis cujusvis narium; adnectuntur vero anteriori loco eminentiæ transversali ossis maxillaris superioris, loco posteriori eminentiæ obliquæ ossis palatini, ea ratione, ut
sub

sub apertura sinus pituitarii ossis maxillaris superioris, & supra aperturam canalis nasalis locentur.

Figura concham referunt, uti ossa spongiosa superiora, quibuscum ratione fragilitatis, tenuitatis, & magnitudinis adprime conveniunt.

Notentur in his:

1) *Extremitates* binæ, quarum
Anterior latior, *posterior* magis acuminata.

2) *Margines* bini, quorum
Inferior major, crassior, libere in cavo narium hæret; *superior* tenuior, antè eminentiæ prius dictæ transversæ ossis maxillaris superioris, postèrius linæ obliquæ ossis palatini incumbit.

3) *Facies* duæ; *exterior* concava, sinum pituitarium ossis maxillaris superioris, *interna* convexa septum narium respicit.

4) *Apophyses* duæ; *minor* recta sursum tendit, & ad finem canalis nasalis sulcum parvum format. *Major* secundum ductum marginis superioris horum ossium excurrit, ac partem aperturæ sinus pituitarii ossis maxillaris superioris obtegit.

Substantiam lamellæ tenuissimæ, spongiosæ, membrana pituitaria undique vestitæ absolvunt.

Connectuntur singulatim cum tribus ossibus; 1) cum osse maxillari superiori; 2) cum osse palatino; 3) cum osse lacrymali.

Vsus. Tunicæ pituitariæ superficiem adaugent, hinc & latius patens organon olfactus reddunt; extremitatem canalis nasalis constituunt; aperturam sinus pituitarii maxillæ superioris angustiores faciunt.

MAXILLA INFERIOR.

OS MAXILLARE INFERIVS, aut MAXILLA INFERIOR hæret in parte infima, & maxime antica faciei, totiusque capitis. Ossium faciei omnium est maximum;

maximum; *figura* soleam equinam aliquatenus refert. In adultis osse unico, in fœtu autem, & infantibus adhucdum tenellis, portionibus duabus constat.

Dividitur

1) In *corpus*, seu partem anteriorem, ac mediam, *menti* nomine in specie notatam.

2) In *marginem superiorem*, & *inferiorem*, quorum *priori* foveæ 16 conoideæ insculptæ sunt, *alveoli* dictæ; inhærent his ope radicum suarum varia ratione formatarum dentes totidem. *Inferior* in *labrum externum*, ac *internum* subdividitur.

3) In *faciem externam*, ac *internam*; in quibus conspiciuntur *foramina maxillaria*.

4) In *extremities* duas, corpore magis complanatas, utrinque quadrangulum irregulare exhibentes.

Eminentie maxillæ inferioris sunt:

1) *Processus coronoideus*, anteriori loco positus, planus, superius acuminatus, deorsum latefcens, adligationi musculi temporalis dicatus.

2) *Processus condyloideus*, postrosum situs, in condylum oblongum, cartilagine incrustatum extuberans, situ transversali fere, foveæ articulari ossium temporum incumbens. Condylum hunc, seu caput *collum* excipit, posteriora versus nonnihil intortum, foveola, pro insertione musculi pterygoidei parvi donatum.

3) *Anguli* maxillæ inferioris ad extremities marginis inferioris, ubi os maxillæ inferius posteriori loco utrinque sursum retorquetur.

4) *Spina menti externa*, & *interna* sub nomine, *linea* venit, in exteriori, ac interiori facie menti, ad maxillæ hujus ejusdem symphisin.

Cavitates, & foramina sunt:

1) *Excisura magna semilunaris* inter condyloideum processum, & coronoideum.

2) In

2) In facie interna sub processibus ambobus *foramen maxillare posticum*, initium canalis, per os maxillare antrorsum excurrentis, & in

3) *Foramen maxillare externum*, in facie ossis huius externa, terminati. Dicantur pro transitu nervi maxillaris inferioris, & arteriæ mentalis.

4) *Alveoli*, antea dicti, sexdecim, in margine superiori.

Substantia externe compacta est, interne spongiosa.

Cohæret maxilla inferior cum *cavitate articulari ossis temporum* per *arthrodian*, cum *osse hyoide* per *symplicofin*.

Vsus. Masticationi sacrum est, & loquelæ, formæ etiam concinnæ faciei; dentes sexdecim, multæque partes molles in osse hoc firmantur.

D E N T E S .

Infixi DENTES sunt in serie continua maxillæ tum superiori, tum inferiori ea lege, ut in homine adulto *sexdecim* numerentur superiores, *sexdecim inferiores*; hinc in universum triginta duo.

Exigua quidem, durissima tamen omnium corporis humani sunt ossa. Media dentis cujusvis pars, extra alveolum prominens, latior, *corpus*, huiusque pars superior, *corona dentis* dicitur; pars vero intra alveolos abscondita, in cuneiformem quasi apicem terminata, *radix dentis* audit. *Radix* quælibet in extremitate sua *foraminulo* gaudet, per quod nervus, arteria, vena, & *periostrium* internum dentis in cavitatem illam parvam, quæ in substantia dentium interiori adest, pertingunt. Circulus, radici & coronæ interjectus *collum*, aut *collare dentis* dicitur.

Dividuntur dentes in tres ordines, seu classes.

Quatuor

Quatuor anteriores, medii, lati, scindentes, *incisores* audiunt.

Hos excipiunt duo *canini*, ex quibus a quovis latere incisivorum unus hæret. Canini duo maxillæ superioris *oculares* etiam vocantur.

Caninis posteriora versus adjunguntur utrinque *molares* quinque; duo ultimi, quum sero plerumque prodeant, *dentes sapientiæ* etiam salutantur.

Incisores quatuor, ab usu, quem exserunt, ita dicti, in maxilla inferiori minores, & angustiores sunt, quam quidem quatuor in maxilla superiori obpositi. *Coronæ* horum latæ, scindentes, ac in infantibus maximam partem ferratæ, sunt; *radices* breves, lateraliter latefcentes, & planæ, in apicem terminantur simplicem, obtusorem.

Coronæ caninorum crassiores sunt, quam in incisivis, antrorsum convexæ, postorsum rotundæ, in apicem obtusum abeuntes. *Radices* horum longiores, acutiores, quam in aliis dentibus sunt, adeo, ut superiores in antra usque nonnunquam penetrent Hyghmori.

Molares magnitudine differunt; *anteriores minores* sunt *posterioribus*.

Coronæ in his terminantur in superficiem latam, pluribus, paucioribusve eminentiis scrupeam: in *molaribus anterioribus* minores plerumque sunt apices, & plerumque duplices solum; in posterioribus vero multo majores, triplices, quadruplices, quin & quintuplices.

Radices molarium longæ sunt, minusve planæ, simplices, duplices, triplices, quadruplices, rarius quintuplices; ab invicem remotæ, aut concretæ; rectæ, vel curvæ.

Substantia dentium compacta est; superficies coronæ exterior obducitur substantiâ singulari, *en-*
caustum,

caustum, vel *crusta adamantina* dicta, tenui, candida; vitri adinstar splendente, substantiam compactissimam licet reliquorum ossium firmitate, duritie superante.

Dentes *insuntur* alveolis gomphosi, ea ratione, ut lege naturali dens quivis *alveolum* sibi proprium, septo interjecto tenui, spongioso osseo, a vicino sejunctum, expleat: *collare* præterea dentis *gingiva* undique cingit.

Dentes masticationi *dicati* sunt; dentes enim *incisores* cibos dividunt, scindunt, *canini* in minores moleculas lacerant, *molares* conterunt, conminuunt: præterea & pronunciationi distinctæ litterarum quarundam, & faciei ornandæ inserviunt.

Circa *dentes* notanda *in specie* adhucdum sunt sequentia:

In foetu, tum & in infante tenello primis a natiuitate mensibus, hæere in alveolis duplicem dentium ordinem, *gingiva* reclusum, lamella tenui ossea ab invicem sejunctum; superiores ex his sexto, aut septimo mense, subin vero elapso demum a natiuitate anno integro per *gingivas* erumpere, ea ratione, ut primi prodeant *incisores*, hos excipiat unus, alterve *molarium*, sequantur demum *canini*.

Dentes nunc dicti *primarii*, aut *lactei* dicuntur: excidunt autem denuo sensum circa septimum ætatis annum; tumque prodit alter ordo, qui hætenus in alveolorum parte infima delituerat; durare solent, nisi morbis forsan adficientur, dentes hi *secundarii* per reliquum vitæ tempus; qui ex his omnium postremi prodeunt, duo ultimi, uti antea diximus, *dentes* dicuntur *sapientiæ*.

Consideravimus hucusque ossa capitis in specie; jam, ut eo melius memoriæ succurramus discendum, repetere placuit in compendio partium qua-

D

quarum-

quarundam calvariae in unum compositae, enarrationem.

C A V U M N A R I V M .

ORGANON OLFACTVS, NASI nomine passim veniens, componitur ossibus 14. sequentibus; utpote :

- 1) Ossibus *nasi*.
- 2) Ossibus *maxillae superioris*.
- 3) Osse *frontis*.

Superius interne, ac lateraliter,

- 4) Osse *ethmoide*, &
- 5) Ossibus *lacrymalibus*; interne, inferius, & posterius denuo ossibus *maxillae superioris*, &

6) Ossibus *palatinis*.

7) Osse *sphaenoidali*; dividit tum

8) Os *vomeris* nasum in duo cava, in quibus

9) Ossa *spongiosa inferiora* sita sunt. Nasus ipse terminatur anterieus binis orificiis in faciem, & orificiis totidem loco posteriori in fauces; quae orificia sub nomine *orificiorum nasi anteriorum*, & *posteriorum* sub titulo designantur; ultima speciali nomine & *choanae narium* audiunt: cavitates nunc dictae per *sinus pituitarios frontales*, *sphaenoidales*, *maxillares superiores*, ac *labyrinthum ethmoidalem* plurimum augentur.

O R B I T A E .

Binae ORBITAE, quae inhaerent oculi, componuntur septem ossibus.

Inferius osse *jugali*, & *maxillari superiori*.

Superius osse *frontis*.

Interne osse *lacrymali*, *ethmoidali*, & *palatino*.

Externe, & in fundo osse *sphaenoidali*.

Notandi

Notandi præterea *arcus* duo *orbitales*; *superior* ab osse *frontis*, *inferior* ab osse *jugali*, & *maxillari superiori* productus. Vbi *arcus* nunc dicti *externe*, ac *interne* coeunt, *angulum* faciunt; major est *internus*, minor *externus*.

Cavitates, & *foramina* *orbitalium* sunt.

1) *Fossula* illico supra *angulum externum*, pro *lacrymali glandula*.

2) *Fossula* superius in *angulo interno*, concurrans ad *formandam trochleam*.

3) *Fossa* in *angulo interno* pro *sacco lacrymali*; ab osse *lacrymali*, & *apophysi nasali maxillæ superioris* formata.

4) *Canalis nasalis*, *productio* est *fossæ lacrymalis*; hiat sub osse *spongioso inferiori* in *cavum narium*.

5) *Fissura*, seu *rima orbitalis superior*, in *fundo orbitæ*, formatur ab osse *cuneiformi*; transit eam *par tertium*, *par quartum*, *par quinti nervorum* *ramus primus*, *par sextum*, *uti & arteria ophthalmica*.

6) *Rima orbitalis inferior*, seu *sphæno-maxillaris* effingitur ab osse *cuneiformi*, *maxillari superiori*, *palatino*, & *zygomatiko*; transeunt *rimam hanc nervi*, & *vasa*.

7) *Foramen opticum*, in *fundo orbitæ* osse *cuneiformi* *insculptum*; intrat per hoc ipsum *nervus opticus*.

8) *Foramen superciliare*, sæpius nil nisi *excisura* est, *conspicitur* in *regione interna arcus orbitalis superioris*; transmittit *nervum frontalem*.

9) *Foramen orbitale interius*, seu *foramen nasale orbitæ*, in *parte interna orbitæ*, inter *laminam lateralem ossis ethmoidei*, & *os frontis*; transit per hoc *ramus nasalis*, *nervi ophthalmici*, in *cavum narium*.

IO) *Foramen infraorbitale posterius*; in parte postica orbitæ exoritur margo, quem *canalem infraorbitalem* dicunt; canalis hic terminatur anteriori loco in

II) *Foramen infraorbitale anterius*, sub arcu orbitali inferiori; per foramina hæcce nervus infraorbitalis faciem ingreditur.

C A V U M O R I S.

CAVUM ORIS quinque ossibus constituitur.

- 1) Ossibus binis *maxillæ superioris*.
- 2) Ossibus binis *palatinis*.
- 3) Osse *maxillæ inferioris*.
- 4) *Dentibus* triginta duobus.

C A V U M F A V C I V M.

CAVUM FAVCIVM componunt ossa decem.

Superius *apophysis cuneiformis*, ossis *occipitalis*.

Inferius os *hyoides*.

Anterius *apophyses pterygoideæ* ossis *sphænoidis*, ossa *palatina*, & os *vomeris*.

Posterius *vertebræ tres superiores colli*.

Lateraliter utrinque *apophyses petrosæ* ossium temporum.

Eminentia exterior in capite sunt:

In ossibus *cranii*:

Apophyses duæ mastoideæ.

- - *styloideæ*.

- - *spinosa*.

- - *pterygoideæ*.

- - *zygomaticæ*.

Condylus duo articulares ossis *occipitis*.

Eminentia, & *spina occipitalis*.

In

In facie :

- Apophyses* duæ *nasales*.
 - - *orbitales*.
 - - *palatinæ*.
 - - *maxillares*.

Postremæ *arcus* duos faciunt, quæ in hærent *dentes*; in extremitate posteriori *tuberositatem* produ-
 cunt *maxillarem*.

Spina nasalis.

Condylis duo *articulares*, & *coronoidei processus*
maxillæ inferioris.

Ad *foramina capitis externa* referuntur :

- Foramina* duo in ossibus *sincipitis*.
 - - in *condylis articularibus* ossis *occi-*
pitis.
 - - inter *apophysin styloideam*, & *ma-*
stoideam.
 - - posterius in *apophysi mastoidea*.

Meatus duo *auditorii externi* in ossibus tempo-
 rum.

Tubæ duæ *acousticæ* in ossibus temporum.

Foramina duo *pterygoidea* in osse *sphœnoidali*.

- - *palatina postica* in eodem osse.
 - - inter os *cuneiforme*, & *palatinum*.
 - - *palatina anteriora* in ossibus *ma-*
xillaribus superioribus.
 - - anterius *sub arcu inferiori orbitali*.
 - - in *parte orbitarum inferiori*.
 - - in ossibus *zygomaticis*.
 - - *superciliaria*, seu *excisuræ* in arcu-
bus supraorbitalibus.
 - - *nasalia*, in ossibus *nasalibus*.
 - - *anteriora*, &
 - - *posteriora* in osse *maxillari inferiori*.

Foramina varia in osse zygomatico, *variaque* in ossibus nasalibus.

Eminentia interna in cranio sunt :

Spina frontalis in osse frontis; *crista galli* in osse ethmoide.

Alæ duæ minores ossis cuneiformis.

Apophyses quatuor ephippiales ossis cuneiformis.

Apophyses duæ petrosæ ossium temporum.

Spina cruciata interior ossis occipitis.

Cavitates, & foramina interna in cranio sunt :

Excavatio in sella turcica pro glandula pituitaria.

Foveæ octo pro cerebro, & cerebello.

Sulcus pro sinu longitudinali duræ meningis in osse frontali, & syncipitis.

Sulci duo pro sinibus lateralibus duræ meningis.

Inpressiones variæ, & sulci ab arteriis excavati.

Foramina diversa exigua in osse ethmoidali.

- - duo pro nervis opticis in osse cuneiformi.

Rima orbitalis superior &

- - inferior in osse cuneiformi.

Foramina duo rotunda in osse cuneiformi.

- - ovalia in eodem osse.

- - prope spinam ossis hujusce.

- - lacera inter apophysin petrosam, & os occipitis.

- - pro arteriis carotidibus in apophyfibus petrosis ossis temporum.

Meatus duo auditorii interni.

Foramina duo anterius in condylis articularibus ossis occipitis.

Foramen occipitale magnum.

O S H Y O I D E S .

OS HYOIDES os est parvum, simplex, in parte anteriori faucium inter basim linguæ, & caput asperæ arteriæ hærens.

Figura ossis hujus semilunaris est.

Dividitur in

Corpus, &

Cornua duo majora, &

- - - - - minora.

Corpus, seu *basis* vocatur pars lata, crassa, media, antrorsum inæqualiter protuberans, postrosum excavata: instructa est

Margine superiori, & inferiori; facie externa, ac interna; extremitate dextra, & sinistra, queis adhærent cornua majora.

Cornua majora adnectuntur utrinque *radice* sua ipsi corpori ossis; *apice* versus processum styloideum ossis temporum adscendunt, eique, uti & posterius cornubus cartilaginis thyroideæ, per syndesmosin adhærent; *pars* eorum *media* inferiora versus nonnihil inflexa, lataque est.

Cornua minora ad nexum majorum cum corpore ossis conspiciuntur; ope ligamenti subcartilaginei basi adhærent.

Connectitur os hyoides tam per syndesmosin, quam per syssarcosin 1) cum *capite laryngis*; 2) cum *processu styloideo* ossis temporum; 3) cum *maxilla inferiori*; 4) cum *scapula*; 5) cum *sterno*; 6) cum *lingua*.

Vsus. Linguam fulcit; deglutitioni dicatur, ad articulatam vocem multum facere dicitur.

S E C T I O II.



O S S A T R V N C I.

TRVNCVN, sceleti secundam partem, ad quam ossa omnia referuntur, inter caput & extremitates hærentia, divisimus jam antea

In *spinam dorsi*;

In *thoracem*, &

In *pelvin*. Notatum simul tum fuit, quot singula hæcce ossibus componantur, de quibus nunc in specie agendum erit.

O R D O P R I M V S.

O S S A S P I N A E D O R S I.

SPINA DORSI dicitur columna illa ossea, a condylis articularibus ossis occipitis ad os sacrum usque excurrens.

Series ossium spinæ dorsi omnium simul sumtorum columnam refert antrorsum rotundam, posterorsum eminentiis plurimis, & cavitatibus inæqualem; interne cavam; lateraliter columnæ huic eidem foramina multa sunt insculpta, in canalem usque anteriorem spinæ dorsi penetrantia.

Ossa, columnam nunc dictam componentia, quoad *figuram* sibi sunt simillima; differunt tamen *magnitudine*; connectuntur invicem interjectis cartilaginibus, seu synchondrosi; proprio nomine *vertebræ* dicuntur.

Spina dorsi integra constat vertebris viginti-quatuor, in *tres ordines* subdivisis; quæ ex his loco superiori

superiori positæ sunt, *vertebræ colli*; duodecim mediæ, *vertebræ dorsi*; quinque inferiores, *vertebræ lumborum*. Referunt Auctores nonnulli huc & novem vertebrae infimas, os sacrum, & os coccygis constituentes, easque, discriminis gratia, *vertebras nothas*, seu *spurias* adpellant, nos vero hasce ad pelvin retulimus, ac, ubi de pelvi agetur, simul considerabimus.

Vertebra quævis dividitur

- 1) In *faciem superiorem*, & *inferiorem*;
- 2) In *marginem supernum*, ac *infernum*;
- 3) In *corpus*, & in *7. processus*; aut *apophyses*:

Corpus, pars antica crassissima donatur loco anteriori plus minusve rotunda *peripheria*, posteriori *excisura* magna: facies tum superior, tum inferior obducitur cartilagine, quæ ex stratis composita, & partim ligamentosæ indolis esse videtur.

Processus septem sunt:

1) Duo *superiores*, *oblique adscendentes*; quorum ex utroque latere unus loco hæret superiori.

2) Duo *inferiores*, *oblique descendentes*, quorum ex utroque latere unus loco hæret inferiori; cartilagine omnes ex æquo obducuntur.

3) *Processus* duo *transversi*, unus ex utroque latere anguli, &

4) *Processus spinosus*, posteriori loco productus, in epiphysin terminatus. *Processus* hi postremi simul sumti *spinam* sic dictam dorsi proprie constituunt.

Cavitates, & *foramina* sunt:

1) *Foramen magnum*, quod ad formandum canalem illum, cui medulla spinalis inhæret, magnum, ab initio spinæ dorsi ad finem usque productum, concurrat; canalis hic in collo, & lumbis amplior, in dorso angustior est.

2) *Excisura* quatuor, ea ratione dispositæ, ut ex utroque latere una adsit superior, altera inferior; coeunt hæ cum excissuris superioribus, aut inferioribus vertebrarum vicinarum, atque tum *foramina lateralialia vertebrarum* producunt, quæ nervi dorsales transeunt. Foramina nunc dicta majora sunt in collo, & lumbis, ac ex lateribus decurrunt, minora vero in dorso, & postrosum magis disponuntur.

Substantia corporum vertebrarum spongiosa, foraminibus plurimis pervia, processuum compacta est.

Connexio spinæ dorsi cum *capite* per ginglymum, cum *osse sacro* per sychondrosin fit; vertebræ omnes *inter sese invicem* junguntur, ope processuum obliquorum per diarthrosin, corpora per sychondrosin. Vertebræ dorsales cohærent insuper cum costis.

Vsus spinæ dorsi est, ut corpus erectum teneat; motum simul necessarium relinquat liberum; *caput*, ac truncum subfulciat; medullam spinalem recludat, tueatur; nervis inde ortis per foramina lateralialia transitum faciat.

VERTEBRAE CONSIDERATAE IN SPECIE.

VERTEBRAE COLLI septem primæ, & superiores spinæ dorsi sunt. Differunt a reliquis:

1) *Corpora*, antrorsum potissimum, planiora, & tenuia sunt.

2) *Facies superiores* vertebrarum colli quinque inferiorum ex uno latere versus alterum transversim, *inferiores* autem a postica parte anteriorem versus excavatæ sunt.

3) *Cartilaginee*

3) *Cartilagine* eis interjectæ crassiores quam in vertebris dorsi sunt.

4) *Processus spinosi* supremarum duarum recti fere sunt; ordine vero a tertia ducto deorsum flectuntur; apices simul bifurcantur, brevioresque, quam in vertebris aliis sunt.

5) *Processus obliqui* in genere magis obliqui sunt, quam quidem in vertebris omnibus aliis, cartilagine ea ratione obducti, ut nunquam non processus obliqui inferiores vertebræ colli superioris, cavitatem superficiale[m] habeant, qua excipitur processus obliquus superior vertebræ priori subiectæ.

6) *Processus transversi*, excepta solummodo vertebra prima, & ultima, brevissimi sunt, initio duplici orti, in apicem acutum terminato; foramine præterea speciali gaudent, per quod arteriæ, venæque vertebrales adscendunt, & descendunt.

Præter hæc generaliora, circa vertebam colli primam, secundam, & septimam notanda in specie veniunt sequentia:

Vertebra prima, quum caput sustineat, *atlas* dicitur. Processus ei spinosus nullus est, sed hujus loco parva donatur eminentia, ne scilicet inpediarur flexio capitis in posteriorem partem; foramen vertebræ hujus magnum multo majus, quam in reliquis omnibus est: corpore componitur parvo, tenui, duro tamen, firmoque; annulum inæqualem refert, qui in *arcum anteriorem majorem*, vices corporis obeuntem, & *posteriorem minorem* distinguitur.

Anteriorem in facie externa eminentia, in interna fovea cartilagine incrustata obsidet, quæ processum dentiformem, seu odontoideum vertebræ secundæ excipit: utrinque cavitas, & eminentia adest, cui ligamentum adfigitur transversale, processum odontoideum in situ firmans.

Processus

Processus transversi oriuntur a medio laterum initio latiori; longiores multo sunt, quam in vertebrae sex sequentibus colli; in apicem obtusiores desinunt; foramina directione perpendiculari sese excipiunt; multæ præterea adsunt inpressiones a musculis variis, iisdem adfixis.

Processus obliqui superiores non adsunt, sed horum loco cernuntur cavitates duæ, cartilagine obductæ, excipientes condylos articulares ossis occipitis per ginglymum: processus inferiores superioribus e regione subponuntur, eadem fere ratione cavitatibus instructi, minores tamen sunt, & cum processibus obliquis superioribus vertebræ secundæ colli uniuntur. Sub processibus obliquis superioribus adest sulcus, quem arteriæ, venæque caput subeuntes, transeunt.

Conjungitur superius cum capite per ginglymum; inferius cum *vertebra secunda colli* ope processuum obliquorum inferiorum, & processus odontoidi per ginglymum lateralem.

In *vertebra secunda colli*, quæ *axis*, seu *epistropheus* etiam dicitur, *corpus* adest crassius, robustius, quam in vertebrae colli cæteris. *Processus transversi* brevissimi, obliqui, foraminibus pertusi; *processus spinosus* latus est, bifariam profunde sectus, superius per *eminentiam* acutam in partes binas laterales, inferius per *lineam* in duas cavitates divisus. In facie superiori corporis adest *processus dentiformis*, cartilagine obductus, foveam vertebræ primæ colli intrans, eique per ligamentum transversale, tum & foramini occipitali magno per ligamenta duo alia lateraliter adfixus.

Vertebra septimæ colli corpus latitudine reliqua omnia superat; *facies hujus inferior* fere plana; *processus spinosus* raro fissus, vix non rectus, omnium reliquorum longissimus; in *processibus transversis* foramen subin adest, quod arteria transit cervicalis posterior.

VERTEBRAE DORSI IN SPECIE.

Duodecim VERTEBRAE DORSI vertebrae colli proximæ excipiunt. Magnitudine per descensum sensim increfcunt; *corpora* harum crassiora, latiora; *facies superior*, & *inferior* planior; retrorsum magis excavatæ sunt, quam vertebrae colli. In *lateribus* corporum versus processus transversos tam in superiori, quam & inferiori margine utrinque *excavatio* est, cartilagine obsita; duæ inferiores una cum superioribus duabus vertebrae sequentis *foveam* semper formant, cui inseritur costarum extremitas postica major; hinc quævis costa inter duo vertebrarum corpora recipitur.

Processus transversi magis postorsum tendunt; a superioribus inferiora versus magnitudine decrefcunt, in extremitatibus *foveæ* adsunt *articulares*, cartilaginibus obductæ, in quas recipiuntur extremitates costarum posteriores minores. *Foveæ* autem hæ ipsæ in vertebrae duabus ultimis dorsi plerumque deficiunt.

Processus obliqui directionem vix non perpendicularem observant; *facies cartilaginea superiorum* elatior paulo est, ac antrorsum tendit; inferiorum vero excavata aliquantum, posteriora respiciens.

Processus spinosi vertebrarum quatuor supremarum dorsi longi adeo non sunt, latiores etiam, & rectiores, quam in sequentibus. Dum contraria ratione spinosi processus vertebrarum inferiorum superius scindentes magis sunt, inferius crassiores, ex lateribus angusti; obliqua magis directione deorsum tendentes, arcte sibi superinpositi: in undecima, & duodecima dorsi vertebra spinosi processus latitudine denovo augentur, minuuntur longitudine.

VERTEBRAE LUMBORVM IN SPECIE.

VERTEBRAE quinque LUMBORVM postremæ, vertebrae dorsi excipientes, maximæ omnium sunt.

Corpora harum majora, crassiora, latiora, corporibus vertebrarum reliquarum omnium.

Facies planæ, in medio excavatæ.

Processus spinosi ex lateribus lati, superius scindentes, inferius *linea* eminente in labia duo divisi; sursum erecti, extremitate crassiore præditi.

Processus transversi longiores, tenuiores quam in vertebrae lumborum, excepta solum prima, postremaque lumborum vertebra, in quibus plerumque breviores sunt; directio horum recta magis est; posterius complanati, anterieus læves sunt.

Processus obliqui omnes oblongi, superiores excavati, inferiores convexi; facies cartilaginibus vestitæ *concavæ* introrsum, *convexæ* extrorsum tendunt.

Cartilagine interarticulares crassiores, quam in reliquis omnibus.

Foramina medium corporis transeuntia magna, ampliora, quam quidem in reliquis sunt, antrorsum plana, postorsum vix non angulosa.

OSSA THORACIS.

THORAX, seu PECTUS, trunci altera pars, cavum refert fornicatum osseum, superius angustius, inferne latius, anterieus complanatum, posterius secundum longitudinem cavum, ex lateribus convexum.

Componitur thorax septem ossibus:

In parte postica *vertebris dorsi* duodecim; in antica *sterno*, & adfixa huic *cartilagine ensiformi*; lateraliter *costis* viginti quatuor.

VERTEBRAS DORSI paulo ante vidimus.

S T E R N V M .

STERNVM, seu OS STERNI secundum longitudinem partem thoracis anteriorem, mediam, cartilaginibus costarum verarum interceptam format.

Substantia spongiosa est

Figura plana, inæqualiter lata, fere triangularis: in adultis constat partibus binis, in junioribus vero pluribus: lineis transversalibus partium, queis in juventute componebatur, definiuntur limites.

Dividitur passim in partem superiorem, inferiorem, & hujus adpendicem.

In faciem internam, & externam.

In marginem dextrum, & sinistrum.

In extremitatem superiorem, & inferiorem.

Pars superior latissima, simulque crassissima est; inferiora versus tenuior, angustior; triangulum fere, aut quadrangulum irregulare exhibens.

Hujus extremitas superior crassior est inferiori, in medio *excisura* donatur; *extremitas inferior* angusta est, tenuis, parti inferiori sterni adcreta.

Pars inferior angustior in genere, & longior est superiori; *extremitas hujus superior* angustior extremitati inferiori partis superioris adhæret; *extremitas vero inferior*, latior cum cartilagine ensiformi coalescit.

Facies externa nonnihil convexa, *interna* concava.

Margines bini laterales obliqui, sat crassi sunt; *cavitate* donati *articulari*, cartilagine obducta, claviculam excipiente; sub hac ipsa plures *excisuræ* adsunt, cartilagine costarum excipientes.

Pars infima, aut *adpendix sterni* nomen suum adquisivit a similitudine, quam cum mucrone, aut ense habet;

habet; unde *cartilago*, seu *processus ensiformis*, seu *xiphois*, seu *cartilago mucronata* vocatur. *Figura* hujus varia est, mox rotunda, mox acuta, nonnunquam & profunde bifurcata; jam introrsum, jam extrorsum flexa, vel & foramine pertusa. Nec minor inconstantia circa longitudinem est, quum nunc tertiam pollicis partem, nunc pollicem integrum, plerumque vero unum cum dimidio exæquet.

Cavitates, & foramina ossis hujus sunt;

1) *Excisura magna* in extremitate superiori, ut decurrere queat aspera arteria.

2) *Cavitates duæ articulares* in marginibus lateralibus, claviculas excipientes.

3) *Excisuræ septem*, aut *foveæ* in margine quovis laterali, pro adhæsiōne cartilaginum costarum 7. verarum.

Connectitur sternum superius cum *clavicula* per *arthrodian*, ex lateribus cum septem *costis veris* per *synchondrosin*.

Vsus. Costas fulcit; anteriùs pulmones tuetur, & cor; mediastinum, diaphragma, muscoli nonnulli eidem adfiguntur.

C O S T A E.

COSTÆ partes constituunt laterales thoracis; arcuam ad instar incurvatæ, a vertebra obliquo, & transverso fere decursu antrorsum, & deorsum ad sternum feruntur, eique adhærent ea ratione, ut extremitas dextræ & sinistræ costæ semper sibi invicem obversa sit.

Figura semicirculum referunt.

Ordinaria lege viginti quatuor sunt; quarum ex utroque latere duodecim numerantur.

Dividuntur in genere in *veras*, & *nothas*, seu *spurias*. *Costæ*

Costæ veræ septem ex utroque latere supremæ dicuntur, ope cartilaginum suarum sterno antè adnexæ, & cum costis lateris obpositi circulos totidem integros perficientes.

Nothæ, seu *breves* vocantur costæ, quæ priores utrinque sequuntur quinque, sternum non adtingentes, sed cartilaginibus suis invicem nexæ; duæ ultimæ prorsus hærent liberæ; hinc spurix costæ unius lateris cum aliis lateris obpositi circulum integrum, verarum adinstar, non absolvunt.

In costâ quavis notentur:

Pars media, seu *corpus*.

Extremitas anterior, & *posterior*.

Margo superior, & *inferior*.

Facies externa, & *interna*.

Corpus costæ primæ breve est, latius tamen corporibus costarum omnium insequentium. *Facies superiora*, & *inferiora*, *margines* autem exteriora & interiora respiciunt, adeo, ut costâ hæc ipsa *faciem superiorem*, ac *inferiorem*, *marginem anteriorem*, & *posteriorem* habeat. In costis sex reliquis veris *corpus* angustius, & prout costæ ipsæ magis descendunt, sensim longius fit; *facies* etiam paulatim antrorsum & postrosum, *margines* sursum, ac deorsum vertuntur. *Corpora costarum spuriarum* ex ordine denuo decrescunt, ut ultimâ omnium brevissima sit.

Longitudinis costarum ea est ratio, ut veræ a superioribus deorsum continuo increscant, spurix vero ita decrescant: idem & circa longitudinem cartilaginum tenendum; costæ omnes digito circiter transverso ab invicem remotæ sunt; posteriora versus magis tamen ad sese accedunt.

Extremitates anteriores omnes, uti antè dictum fuit, depressæ magis sunt posterioribus; fovea parva ibidem adest, cui implantatur cartilago.

Cartilaginēs costarum septem superiorum a costis ad sternum usque feruntur, & foveis totidem, huic fini dicatis, inplantantur. Differunt ab invicem ratione longitudinis, latitudinis, flexibilitatis, & curvaturæ. Costæ primæ cartilago brevis, durior, firmiorque est; reliquarum flexiliores sunt; supremæ tres eandem fere cum costis suis observant directionem; sequentes vero tres magis semper incurvantur, & angulum efficiunt, a quo ad sternum sursum adscendunt, magisque ad sese mutuo accedunt. Costarum spuriarum cartilaginēs sternum ipsum non attingunt, sed tres illarum priores inter semetipsas cohærent, ac uniuntur cum cartilagine costæ ultimæ veræ; quartæ demum, quintæque nothæ costæ cartilaginēs hærent liberæ, & musculis solummodo vicinis, membranisque adnectuntur.

Extremitates posteriores altius omnes locantur anterioribus; pro varia crassitie vertebrarum, quibus cum cohærent, ab invicem sunt remotæ.

Margines bini, quorum *superior* crassus, & rotundus, *inferior* scindens est, *labio externo*, & *interno* sunt instructi: in costa prima, & secunda vera margo superior scindens est, postrosum tendens, inferior magis rotundus, & anteriora respiciens.

Eminentia costarum sunt:

1) *Caput magnum*, superiori, & inferiori loco donatum *faciecula*, per *lineam eminentem* divisa, cartilagine obducta, foveas articulares vertebrarum dorso intrante: caput primæ costæ, duarumque ultimarum facieculam nonnisi unicam habent cartilagine obductam; reliqua duplici instruuntur.

2) *Collum*, angustius, tenuius, caput magnum excipit.

3) *Caput minus* adhæret extremitati anteriori colli; facies hujus cartilaginea convexa est, extremitatibus

mitatibus processuum transversorum vertebrarum dorfi unita; in costa undecima, & duodecima caput minus non adest.

4) *Angulus costæ* eminentia est obliqua, inæqualis, plus minusve lata, ad extremitatem costæ cujusvis posticam hærens.

Externa costarum superficies convexa, *interna* concava est, in hac versus marginem inferiorem *sulcus* adest, ab angulo cujusvis costæ antrorsum excurrentis, vasa hæmatophora, & nervos maximam partem recipiens.

Sulcus hic in costis infimis veris, & supremis spuris manifestior est, ac in reliquis.

Substantia costarum externe compacta, interne spongiosa.

Nexus costarum loco posteriori duplex est: caput magnum unitur foveis articularibus vertebrarum; caput minus jungitur processui transverso vertebræ subjæctæ.

Anteriori loco junguntur costæ mediantibus epiphysibus suis cartilagineis sterno; tres nothæ superiores ope cartilaginum cohærent inter sese mutuo, tumque costæ nectuntur veræ ultimæ. Motus capitum majorum fit per ginglymum, minorum per amphiarthrosim.

Vsus costarum. Partes formant thoracis laterales; sub respiratione thoracis cavum angustius, majusve reddunt; pulmones, & cor tuentur; muscoli eis adhærescunt varii; exterius mammæ iisdem incumbunt.

P E L V I S.

PELVIS in trunci regione hæret infima: a figura sua sortita est nomen.

Dividitur:

1) In duas *alas*, seu partes laterales supremas.

2) In *cavum*; cujus notetur *introitus*, & *exitus*.

Componitur pelvis ossibus octo sequentibus.

Posterius ex *osse sacro*, & *osse coccygis*.

Lateraliter ex *ossibus ilii*;

Anterius ex *ossibus pubis*.

Inferius ex *ossibus ischii*.

I.

OS SACRUM sic nominatum, uti videtur, fuit, quod pars hæc animalium priscis temporibus Diis sacra fuerit. Partem trunci posticam & inferiorem constituit; cunei adinstar ossibus pelveos reliquis hæret intrusum, atque hinc pro basi totius spinæ dorsi haberi poterit. Eandem ob rationem Anatomici nonnulli *os sacrum*, & *os coccygis* sub nomine *vertebrarum spuriarum* vertebris ad censuerunt.

Os hoc magnum triangulum refert oblongum, cujus basis loco superiori hæret, apex deorsum spectat, & introrsum curvatur. In adultis osse unico absolvitur; in junioribus dividi potest in 5. vel 6. partes; quæ, uti antea monitum fuit, a quibusdam Auctoribus *vertebræ spuria* dicuntur, seu *vertebræ nothæ*.

Circa os sacrum notentur:

1) *Basis* elata sursum.

2) *Apex* deorsum directus, os coccygis excipiens.

3) *Facies anterior*, vel *interior*, excavata; *posterior*, aut *exterior* convexa.

4) *Margines* duo cartilaginibus incrustati *laterales*, quorum interventu cohæret cum osse ilei: eminentiæ præterea plurimæ, *cavitates*, & *foramina*.

Cavitates, & *foramina* sunt:

1) *Foramina* decem, duplici serie decurrentia in facie ossis anteriori, producta ab excisuris coëuntibus

tibus binarum vertebrarum; superiora horum foraminum sat magna sunt, inferiora magnitudine sensim decrefcunt; tranfeunt paria totidem nervorum sacralium.

2) *Foramina* decem duplici ferie decurrentia in facie offis postica, musculis obtecta, pro transitu nervorum minorum, & vasculorum.

3) In medio *foramen*, aut *canalis*, uti in vertebris, inhæret huic cauda equina.

Margines laterales sat lati superius sunt, & inæquales. Notanda est facies magna cartilaginea, cujus interventu os sacrum cum offibus ilei jungitur.

Eminentie sunt :

1) *Apophyses* duæ veræ *obliquæ* superius in basi hujus offis, conjunctæ cum vertebra ultima lumborum.

2) In *facie postica*, *eminentie* loco *processuum obliquorum*, *transversorum*, & *spinorum*.

3) In *facie anteriori*, *vestigia* separati in plures partes offis in junioribus.

Substantia spongiosa est.

Connexio fit superius cum *vertebra ultima lumborum*, inferius cum *osse coccygis*, lateraliter cum *offibus innominatis* ope cartilaginum, & ligamentorum.

Vsus. Trunco integro basim subpeditat; pelveos partem facit posticam; finem caudæ equinæ excipit; muscoli varii eidem adnectuntur.

II.

OS COCCYGIS adhæret basi, aut parti inferiori offis sacri; exiguum est; *figura* pyramidem refert inversam.

In infantibus os coccygis componitur partibus tribus, aut quatuor; coalescunt vero hæ per ætatem in partem unicam non ultra sejungendam; remanentibus

tibus tamen vestigiis separati olim in plures partes ossis.

Circa coccygem adhuc notentur :

- 1) *Facies anterior*, seu *interna*, excavata.
- 2) - - *posterior*, seu *exterior*, convexa.
- 3) *Basis*, apici ossis sacri adcreta.
- 4) *Apex*, aut *extremitas inferior*, antrorsum nonnihil inflexa, hærens libere.

Connexio cum osse sacro fit per *synchondrosin*, *arthrodian*, & *diarthrosin*, cum ossibus ischii per *syndesmofin*.

Vsus. Partem constituit pelveos; incumbens intestinum rectum subfulcit.

III.

OSSA ILEI constituunt partes laterales supremas pelveos.

Figura irregularis est.

In ossium horum quovis notentur :

Facies interna, concava, exterioris adinstar musculis obtecta, postorsum inæqualis, partim cartilagine obducta, quæ laterali parti ossis sacri unitur.

Facies externa antrorsum inæqualiter convexa, tum & nonnihil excavata est.

Margo supremus, seu *crista ilei* oritur a *spina iliaca posteriori*, & excurrit ad spinam usque *iliacam anteriorem superiorem*: margo hic in ossibus recentibus arcum refert cartilagine vestitum, in labium externum, & internum subdivisum. *Extremitates* hujus cristæ *processus spinosi* ossis ilei dicuntur.

Pars infima, seu *basis* ossis ilei magnam partem acetabuli, excipiendo ossi femori dicati, tum & maximam partem excisurarum iliacarum constituit.

Eminentia ossis ilei sunt :

1) *Spina iliaca posterior*, hæret loco posteriori ad initium marginis superioris, ubi os ileon cum osse sacro jungitur.

2) - - *anterior superior*, sita est anterieus ad finem marginis superioris ossis ilei.

3) - - *anterior inferior* illico sub priori.

4) - - *obliqua*, quæ os ileon ab osse pubis separat.

5) *Linea transversalis*, excurrens a spina obliqua, directione transversa postrosum ad os usque sacrum; faciem internam ossis ilei ab osse ischii, & pubis separans.

Cavitates & foramina sunt :

1) *Cavitas iliaca externa*, &

2) - - *interna*; illa in externa, hæc in interna ossis hujus adest facie.

3) *Excisura* inter spinas anteriores iliacas.

Fabrica ossium horum componitur laminis duabus tenuibus, queis interjacet substantia cellulosa: pars ossium horum posterior, & inferior crassissima est, media vero tenuissima, & compacta.

In infantibus crista ossis ilei cartilaginea est, dein vero sub forma epiphyseos cum osse conjungitur. Extremitas magna inferior in infantibus ossea ex integro nondum est.

Connexio ossium ilei cum osse sacro fit per synchondrosin, cum ossibus ischii, & pubis per suturas.

IV.

OSSA ISCHII, COXAE, s. COXENDICIS constituent infimas partes laterales pelveos.

Figura irregularis est.

Notentur in ossibus hisce :

1) *Corpus*, quod partem infimam, & maximam acetabuli constituit.

2) *Tuberositas ischii* pars est marginis inferioris ossis ischii, cui sedentes innitimur; variis gaudet impressionibus, pro insertione musculorum.

3) *Spina ischii* in parte ossis postica, & superiori.

4) *Crus* parvum, cum osse pubis nexum, ad formationem foraminis ovalis concurrens.

5) *Foramen ovale* apertura magna est, ex unione ossis ischii, & ossis pubis enata: in margine superiori donatur excisura obliqua pro transitu vasorum, nervique ischiatici brevis: cæterum vero aperturam hancce totam muscoli duo obturatores tegunt.

6) *Tres incisuræ*; *posterior* inter spinam, & protuberantiam ossis ischii, pro transitu m. obturatorum internorum; *lateralis*, inter protuberantiam ossis ischii, & acetabulum, pro transitu m. obturatorum externorum; *anterior* ad marginem acetabuli pro ligamenti.

Connexio ossium ischii cum ossibus pubis, & ilii per futuras fit.

Substantia, a substantia ossium latorum omnium non discrepat: pars superior, & posterior horum ossium lata, & crassa, inferior, & anterior angustior, tenuiorque est.

In infantibus recens natis pars horum ossium, quæ ad formandum acetabulum concurrat, spina, & protuberantia cartilagineæ adhucdum sunt indolis.

V.

OSSA PUBIS constituunt partem anteriorem pelveos.

Figura irregularis.

Notentur in his:

1) *Pars crassior, & maxima*, concurrens ad formandum acetabulum : in extremitate hujus antica prominentia parva est, *spina ossis pubis* dicta.

2) *Crus* parvum inferiora versus, unitum cum simili ossis ischii, ad formationem foraminis ovalis concurrens.

3) *Margo superior*, &

4) - - *inferior*, incisura donatus, constituens partim foramen ovale.

5) *Pars interna*, aut *anterior*, cum osse pubis ex latere altero unita.

Connexio ossium pubis inter sese fit per *synchondro-symphisim*; cum o. ilei, & ischii per *futuras*.

Ossa hæc tria ultima ex utroque latere posita, os nempe ilei, ischii, & pubis plerique Anatomicorum uno nomine sub *ossibus innominatis* complectuntur; hinc vero & pelvin dividunt in os sacrum, os coccygis, & ossa duo innominata.

Notanda circa hæc ossa in specie adhuc sunt :

Conjungi ea futuris ad formandum acetabulum dicatum excipiendo ossi femoris; necti itaque mediante hoc eodem acetabulo cum capite ossis femoris per *enarthrosin*.

Acetabulum hoc hæret inferius in facie externa, ubi ossa hæc tria invicem coeunt. Oblique extrorsum vertitur; notanda in eo sunt: *Margo* cum *excisura*, *cavum articulare*, hujusque *excavatio* fundo insculpta.

Margo multum prominere, circulum tamen integrum circa acetabulum non absolvit, sed anteriorem, & inferiorem partem versus sensim depressior fit, tandem vero *excisura* prorsum interrumpitur; per hanc vasa acetabulum ingrediuntur: in ossibus recentibus marginis defectum ligamentum subplet robu-

stum, flexile. Cavum ipsum inductum est cartilagine lævissima in recentibus ossibus marginem aliquantum exsuperante, hinc vero cavum augente. Cartilago tamen nunc dicta non totum acetabulum, sed anteriorem solummodo hujus partem obducit: tum sequitur *excavatio* inæqualis, oblecta cartilagine, glandulam articulare, & ligamentum rotundum excipiens.

Vsus ossium horum omnium est, ut forment acetabulum pro excipiendo osse femoris, tum & pelvis.

Vsus vero *pelveos* sequentibus absolvitur: partem intestini ilei, intestinum rectum, vesicam urinariam, in viris vesiculas feminales, & ductus spermaticos, in feminis vaginam uteri cum partibus vicinis adhærentibus excipit, tuetur.

OSSA EXTREMITATVM SVPERIORVM.

BRACHIA, EXTREMITATES SVPERIORES dependent, uti antea diximus, ex utroque latere thoracis, cui adfiguntur, ultra pelvis usque. Divisim tum simul in partes quatuor:

- 1) In *humerum*,
- 2) In *brachium*.
- 3) In *antibrachium*, &
- 4) In *manum*; quæ omnes partes ossibus simul componuntur triginta duobus; atque hæc ipsa nunc speciatim considerabimus: quæ circa ossa brachii unius adferentur, dicta etiam sint circa ossa brachii alterius.

Extremitates superiores datæ nobis ad perficiendos labores, tuendumque corpus fuerunt.

OSSA HUMERI.

HUMERVS pars brachii prima componitur ossibus binis, *scapula*, & *clavicula* : locus, ubi ossa hæc ce bina coëunt, *summitas humeri* dicitur.

SCAPVLAE.

OS SCAPVLAE, seu OMOPLATAE situm est posterius, ac superius in dorso. Excurrit a prima ad septimam circiter costam.

Figura vix non triangularis est ; cæterum os hoc latum est, planum, tenue ; in fœtu quinque mensium osseam indolem jam adquisiuit.

Notantur in scapula :

- 1) *Facies anterior*, & *posterior*.
- 2) *Margo superior*, *anterior*, & *posterior*.
- 3) *Anguli tres* ; *superior*, *externus* ; *inferior* ; *anterior*, seu *superior internus*.
- 4) *Eminentie quædam*, &
- 5) *Cavitates*.

Facies posterior, seu *externa* inæqualiter elata est ; per *spinam scapulæ* bifariam dividitur : pars superior angusta, inferior multo latior est ; ambæ musculis obsidentur.

Facies antica, seu *interna* inæqualiter excavata, & lineis multis eminentibus inscripta est, queis musculus adhæret incumbens.

Margo superior minimus, & tenuissimus est ; hæret inter collum scapulæ, & angulum superiorem externum.

Margo posterior, seu *externus* a nonnullis etiam *basis scapulæ* vocatur ; omnium hic est longissimus, prope *spinam dorsi* a superioribus oblique descendit ea ratione, ut inferius a vertebriis dorsi fiat remotior : *labio* gaudet *externo*, & *interno*.

Margo

Margo anterior, vel *internus* crassissimus reliquorum est: a collo oblique descendit postrosum ad angulum inferiorem; *sulco* in duo *labia* manifeste dirimitur, quorum *exterius* tenue, *interius*, crassum, & rotundum est.

Anguli tres in scapula ita collocantur, ut *superior externus* dicatur, qui inter marginem posteriorem, & superiorem hæret.

Alter, inter marginem posticum, & anticum positus, in adultis cartilagine obductus, *angulus inferior* audit.

Anterior denique, vel & *superior internus* est, qui margini superiori ac inferiori interjicitur; maximus hic est, & *collum scapulæ* quoque dicitur.

Eminentia scapulæ sunt:

1) *Spina scapulæ*, faciem posticam bifariam dirimens.

2) *Processus coracoideus*, seu *rostro corvino similis*, ob figuram ita vocatur; oritur a parte anteriori marginis superioris, exhinc sursum adscendit, & antrosum flectitur, ubi demum in apicem obtusum terminatur: adhærent ei muscoli varii.

3) *Acromion* productio est spinæ scapulæ lata, complanata, in anteriori parte, pro nexu cum clavicula, *facie cartilaginea* instructa.

Cavitates sunt:

1) *Cavitas glenoidea* in extremitate colli scapulæ, ovalis fere formæ, inferne latior, superne angustior, cartilagine obducta, caput ossis brachialis excipiens.

2) *Fovea parva* in fine acromii, cui adnectitur clavicula.

3) *Cavitas supraspinata*, &

4) *Cavitas infraspinata*, in facie postica scapulæ.

5) *Excisura tres* in parte superiori scapulæ, ob diversam magnitudinem dividuntur in *parvam*, hærentem inter marginem superiorem, & processum coracoideum; in *magnam*, quam spina cum collo constituit; & in *mediam* a processu coracoideo, & cavitate glenoidea ortam.

Substantia scapulæ spongiosa, externe lamellis compactis obsita est. Substantia vero ipsa spongiosa variam observat crassitiem; in collo enim, & processu coracoideo est crassissima, minus crassa in margine inferiori, & spina: omnium minima hujus portio per corpus ossis distribuitur, unde & diaphanum fere omne est.

Nexus fit, 1) cum *osse brachiali* per arthrodiam; 2) cum *clavicula* per synarthrosin; 3) cum *capite, osse hyoide, sterno, costis, & vertebra* per syssarcosin.

Vsus. Os brachiale cum ea articulatur; trunci partem tuetur posticam; musculorum variorum sibi insertorum motum aptiorem perficit; tum denique onera portantibus in specie inservit.

C L A V I C V L A.

C L A V I C V L A horizontali fere fitu superius in antica thoracis parte inter acromion, & partem sterni lateralem superiorem ponitur.

Figura latinam litteram S. ad speciem refert.

In fœtu jam perfecta, & debite incurvata est.

Dividitur ossum omnium cylindricorum adinstar in *corpus*, & *extremitatem anteriorem*, ac *posteriorem*.

Corpus cum extremitate anteriori arcum constituit; unde os ipsum externe convexum, interne concavum redditur. Corpus habet *facies* binas; *superiorem* planiorem, *inferiorem*, *sulco superficiali*, cui vasa subclavialia incumbunt, notatam.

Extremi-

Extremitas anterior crassior est posteriori, fere triangularis, lateraliter cavitati supremæ sterni unita.

— — *posterior* tenuior, latior, planior præcedente; superne, ac inferne eminentiis variis inæqualis, extrorsum flexa, ut arcum faciat parvum: facie plana, subrotunda articulari, cartilagine obducta, acromio connexa gaudet.

Substantia spongiosa est, lamellis compactis incrustata.

Connectitur clavícula extremitate anteriori cum *sterno* per arthrodian; extremitate posteriori superius, & posterius cum acromio denuo per arthrodian.

Vsus. Extremitates superiores firmat, ne antrosum nimis supra thoracem volutentur; vasa quædam majora tuetur; scapulam, & humerum thoraci necit.

O S B R A C H I A L E .

OS BRACHIALE, vel & OS HUMERI nomen suum a situ adquisivit; incipit inter acromion, & antibrachium a thorace, & utrinque secundum hujus latera dependet.

Figura cylindrica est.

Dividitur hinc ad modum ossium omnium cylindricorum in *binas extremitates*, quæ in junioribus erant *epiphyses*); ac in *partem mediam*, seu *corpus*.

In *extremitate superiori* notandæ sunt *eminentiæ*, & *cavitates* sequentes:

1) *Caput* hemisphæricum cartilagine obductum, cujus centrum oblique postrosum versus cavitatem articulare scapulæ, in quam & recipitur, versum est.

2) *Collum* pars angustior, capiti subjecta est.

3) *Tuberculum majus*, apice sursum erectum, capiti e regione obpositum, *facieculis* duabus instructum, queis muscoli adnectuntur.

4) *Tuberculum minus*, lateraliter magis positum; faciecula pro musculorum insertione pariter donatum: inter ambas hasce protuberantias *sulcus* adest sat profundus, deorsum excurrens, tendinem bicipitis musculi longum excipiens.

In *extremitate inferiori* adsunt *condyli articulares* tres.

Condylus externus inæqualiter oblongus, reliquorum omnium minimus, protuberantiæ magnæ extremitatis superioris e regione subjicitur.

Condylus internus præcedente major, magisque reliquis protuberans est. Condylis hisce binis musculi adnectuntur varii.

Inter condylum externum, ac internum *condylus hæret capitatus*, cartilagine obtectus, ab extremitate superiori radii excipiendus.

Inter hunc, & externum hæret in medio *trochlea humeri*, cui inseritur os ulnæ.

Tres præterea adsunt *foveæ* parvæ, duæ *anteriores*, una *posterior*.

Fovea major illico supra foveolam internam trochleæ posita coronam cubiti ad flexuram excipit.

Minor exteriora versus supra condylum capitatum.

Posterior reliquarum maxima, immediate post foveolam latiore trochleæ locatur, ut sub extensione brachii olecranon intrare eandem queat.

Corpus superne crassius, magisque rotundum; inferne planius, tenuius est. *Lineæ* in hoc adsunt eminentes tres: *prima* ab tuberculo majori, *altera* ab tuberculo minori ad extremitatem inferiorem decurrit; *tertia* condylum externum extremitatis inferioris attingit; lineis his ipsis os in totidem *facies* dividitur.

Substantia in corpore compacta, interne reticularis, medulla repleta, in quavis extremitate spongiosa est.

Connexio fit superius cum *scapula* per diarthrofin; cum *radio* per ginglymum lateralem, & angularem, cum *ulna* per ginglymum angularem.

Vsus ejus est, ut ad formandum brachium concurrat.

O S S A A N T I B R A C H I I.

ANTIBRACHIVM, uti antea diximus, binis ossibus componitur; unum horum in interiori latere, versus digitum minimum dispositum *os ulnæ* dicitur, alterum in latere externo versus pollicem, *radius* vocatur.

C V B I T V S.

CVBITVS, seu *VLNA* situm habet in latere interno antibrachii a trochlea humeri versus digitum minimum; radio longior est.

Figura ulnæ inæqualis, triangularis, superius crassior, inferiora versum sensim tenuior. Dividitur, uti ossa cylindrica omnia, in *extremitatem superiorem, inferiorem, & corpus*.

In extremitate superiori adsunt *processus* duo.

Major audit *olecranon*, seu *processus anconeus*;

Minor, acutus, anterior, *corona cubiti* dicitur; sub hoc ipso adest *eminentia* parva, cui tendo musculi brachialis interni adfigitur.

Cavitates sunt :

1) *Cavitas sigmoidea major* inter processus nunc expositos, cartilagine obducta, *linea* eminente a corona ad tuberculum per medium decurrente, bifariam divisa; partes hæ ambæ denuo *fulcō* transversali sejunguntur. Dicatur unice insertioni trochleæ humeri.

2)

2) *Cavitas sigmoidea minor* in latere coronæ externo, cartilagine pariter obducta, ut rotari super eam queat pars lateralis extremitatis superioris radii.

Extremitas inferior angustior, minorque superiori est, in hac notentur:

1) *Capitulum* anterius parum excavatum, cartilagine undique obductum.

2) In latere hujus versus tuberculum *processus styloideus cubiti*, excisura a capitulo sejunctus: capitulum una cum processu hoc eodem speciem malleoli in latere interno, & inferiori antibrachii constituit.

Pars capitulo subjecta angustior, *collum* dicitur.

Corpus dividitur in *facies* tres, & *angulos* totidem; facierum *una* excavata hæret ex latere cavitatis sigmoideæ minoris; *altera* rotunda, angusta sub tuberculo; *tertia* complanata in latere obposito.

Angulus exterior scindens est, a cavitate sigmoidea minori descendens; angulo huic adnectitur ligamentum interosseum; *duo* reliqui *interni* discriminantur in unum *superiorem*, & alterum *inferiorem*, a tuberculo ambo exoriuntur.

Substantia, uti in osse humeri, & ossibus omnibus cylindricis triplex est.

Connexio fit superius cum *trochlea humeri* per ginglymum angularem; inferius cum *carpo* per arthrodian; lateraliter superius, ac inferius cum *radio* per ginglymum angularem.

Vsus. Ad formationem facit antibrachii; flexionem, & extensionem, tum & rotationem internam, & externam illius reddit faciliorem.

R A D I V S .

RADIVS situs est in latere externo antibrachii versus pollicem.

Figura cylindrica, inæqualis, triangularis.

Substantia, & *divisio* hujus cum ulna plane eadem; nisi quod radius aliquanto brevior sit.

Capitulum, aut *extremitas superior*, tenuius est extremitate inferiori, excavatum, cartilagine tectum, pro insertione condyli capitati ossis humeri; margo, versus ulnam cartilagine latiori instruitur, cum cavitate sigmoidea ulnæ unita. *Capitulum collum* excipit, interiora versus in *eminentiam* inæqualem, cui tendines adhærent musculi bicipitis, terminatum.

Extremitas inferior radii latior, tribus *faciebus*, totidemque *angulis* gaudet.

Facies duæ *latæ* cum una *angustiori* adsunt; laterum una sub flexione humeri retrorsum facta superiora tenens, sat æqualis, modice tamen excavata est; facies altera latior sub ante dicta humeri positione inferiora respicit; inæqualiter convêxa hæc est, *lineis* quibusdam eminentibus in *sulcos* tres, vel quatuor *longitudinales* divisa, quibus inhærent tendines musculorum; facies angustior secundum longitudinem excavata est, ope excisuræ suæ sigmoideæ, cartilagine tectæ, inferiorem extremitatem ulnæ attingit, excipit. *Anguli* bini circumscribunt faciem angustam, sicque tres omnes facies ab invicem separant; tertius angulus, sub antea dicta brachii positione exteriora respiciens, hæret inter facies ambas latas, & in apicem obtusorem finitur, quem *processum styloideum radii* dicunt.

Angulus nunc dictus, & apex obtusus exteriora versus speciem malleoli una constituunt. Extremitas inferior radii integra terminatur in *excavationem* superficialem triangularem oblongam, cartilagine investitam, linea tenuissima in duas partes divisam, quæ ossa prima duo carpi excipiunt.

Corpus extrorsum nonnihil flexum *faciebus* tribus donatur; una *externa* rotunda, binis *internis* planis; tum & tribus *angulis*: *superior*, ac *inferior* obtusi sunt, & *faciem* rotundam a planis disjungentes; tertius *internus* acutus est, *facies* nunc dictas ab invicem separans, *ligamentum* interosseum firmans: *faciebus* his ipsis varia inhærent loca inæqualia pro adhæsiōne musculorum.

Connexio fit superius cum *condylo capitato* humeri per *ginglymum* lateralem, & *angularem*; inferius cum *osse naviculari*, *semilunari*, & *cuneiformi* carpi per *arthrodian*; superius, & lateraliter cum *ulna* per *ginglymum* lateralem.

Vsus. Concurrit ad formandum *antibrachium*; facit & ad *flexionem* manus exteriora, & interiora versus.

O S S A M A N V S.

MANVS componitur OSSIBVS CARPI, METACARPI, & DIGITORVM.

C A R P V S.

CARPVS hæret inter *antibrachium*, & *metacarpum*; absolvitur ossibus octo exiguis, *irregulari* figura præditis, in duas series distinctis.

Figura carpi quadrangularis est. Notentur:

Facies duæ, quarum *exterior*, dorsum manus respiciens convexa, *interior* concava, & eminentiis quatuor instructa est, queis *ligamentum* adhærescit carpi *internum transversum*.

Margines quatuor.

Superior convexus, adhærens *antibrachio*;

Inferior, nexus cum *metacarpo*;

Exterior, magnus, *radium*, aut *pollicem*, &

Interior parvus *ulnam*, aut *digitum minimum*

respiciens.

Serierum quævis componitur ossibus quatuor ; quorum ea, quæ in *superiori* hærent, cum ossibus *antibrachii*, quæ in *inferiori*, cum ossibus *metacarpi* junguntur.

In *serie prima*, a radio versus *ulnam*, sunt :

- 1) *Os naviculare.*
- 2) - *semilunare.*
- 3) - *cuneiforme.*
- 4) - *pisiforme*, seu *orbiculare.*

Ossa nunc enumerata omnia donantur *faciebus* suis specialibus *articularibus*, cartilagine obductis, cum ossibus vicinis unitis.

Ossa *seriei secundæ* sunt :

- 1) *Os multangulum majus* ;
- 2) - - - - *minus* ;
- 3) - *capitatum* ; &
- 4) - *unciforme.*

Os naviculare gaudet *faciebus* quatuor ; *superiori*, convexa, cum extremitate *inferiori* radii nexa ; *inferiori*, cartilagine grandiori, & minori vestita, quarum prior cum osse primo *seriei secundæ*, posterior cum osse secundo, *seriei ejusdem* cohæret ; *interna*, quæ duabus cavitatibus instruitur, major os *capitatum*, minor os *semilunare* excipit ; os hoc ipsum unam ex quatuor protuberantiis carpi producit ; *externa facies* hæret libera.

Os alterum seriei primæ, seu *semilunare* denuo *facies* quatuor habet *articulares*.

Superiorem convexam rotundam ; hæc una cum *facie* convexa ossis *navicularis* protuberantiam longiusculam constituit, ac ab excavatione *inferiori* radii excipitur.

Inferiorem concavam ; hæc cum simili ossis *navicularis* *facie* os *capitatum* excipit.

Internam, fere triangularem pro osse *cuneiformi*.

Externam,

Externam, pro osse naviculari:

Os cuneiforme tertium est seriei primæ; *faciebus* hoc *articularibus* quatuor sequentibus instructum est; *prima*, protuberans marginem carpi superiorem absolvit; *altera* unitur cum osse unciformi; *tertia* cum semilunari; *quarta* cum pisiformi.

Os pisiforme quartum est seriei primæ; secundam hoc protuberantiam carpi format; faciem nonnisi unicam cartilagineam habet, ossi cuneiformi nexam.

Altera series ossium carpi incipit ab *osse multangulo majori*; os hoc tertiam producit carpi protuberantiam; in latere antico, sulco instruitur, cui inhæret tendo flexoris pollicis proprii.

Quatuor huic sunt *facies articulares*; *superior* concava ossi adhæret naviculari; *inferior* os primum metacarpi excipit; *interna* sursum, os secundum carpi seriei primæ respicit, inferius nequitur cum extremitate ossis secundi metacarpi; *externa* hæret libera.

Os multangulum minus os alterum carpi seriei secundæ constituit. Notantur in hoc *facies* cartilagineæ sequentes: *superior*, parva, connexa cum osse naviculari; *inferior* adhæret extremitati inferiori ossis secundi metacarpi; *exterior* jungitur cum osse carpi primo seriei secundæ; *interior* excipit os carpi tertium seriei secundæ.

Os capitatum, os facit tertium carpi seriei secundæ; *capite* donatur hoc superius exiguo rotundo, cartilagine incrustato, cavitatem intrante, quam formant ossa duo prima carpi seriei primæ; inferius *faciem* habet inæqualiter triangularem, conjunctam cum osse metacarpi tertio: *facies externa*, omnium minima, unitur ossi multangulo minori; *facies interna* attingit faciem ossis unciformis.

Os unciforme os quartum carpi, seriei secundæ est.

Notanda in hoc sunt: *corpus*; *processus*, & *facies* tres.

Processus prodit ex parte interna corporis, complanatus est, inflexus, & quartam protuberantiam in metacarpi concavitate excitat. *Facies interna* unitur faciei internæ ossis capitati; *superior*, partim convexa, partim concava est, ut adaptetur faciei internæ ossis cuneiformis; *inferior* linea eminente curva in facies binas subdividitur, quæ excipiunt ossa duo ultima metacarpi.

Protuberantiis quatuor carpi adhærescit ligamentum transversale internum carpi.

Connexio horum ossium fit sequenti ratione: cum *ossibus antibrachii* junguntur per *arthrodian*; *inter sese* per *synarthrosin*; cum *ossibus metacarpi* per *ginglymum angularem*.

Vsus horum ossium est, ut manum reddant flexiliorem, variisque muneribus obeundis aptiorem.

M E T A C A R P V S.

Carpum METACARPVS insequitur; componitur hic ossibus quinque parvis cylindricis, metacarpum inter ac digitos hærentibus.

Figura quadrangularis est.

Notanda veniunt in metacarpo :

Facies binæ :

Exterior convexa, dorsum manus, &

Interior concava, palmam manus absolvens.

Margines quatuor, quorum

Posterior, aut *superior*, carpum,

Anterior, aut *inferior* digitos respicit :

Exterior cum pollice, &

Interior

Interior cum digito minimo in eadem linea fertur.

Dividuntur, ad morem ossium omnium cylindricorum,

In *extremitatem anticam*, *posticam* &

In *corpus*.

Substantia ossibus hisce cum substantia ossium cylindricorum denuo est eadem.

In ossibus omnibus metacarpi, primo solum excepto, extremitates carpo obversæ triangulares sunt, cartilagine inductæ, & ex lateribus facieculis exiguis cartilagineis pariter instructæ.

Corpus ossium horum angustum est, ac ab angulis tribus in facies totidem subdivisum. Facies externa convexa, partem dorsi manus constituit; reliquæ duæ interiora versus nonnihil concavæ sunt.

Extremitates anticæ, digitos attingentes, capitulum referunt, ex lateribus compressum, cartilagine vestitum; illico sub capitulo hoc eodem os quodvis eminentiis binis obtusis donatum cernitur.

Os metacarpi primum a quibusdam pro phalange prima pollicis habetur; atque Auctores hi quatuor solum ossa ad metacarpum referunt: quum vero ad ossa metacarpi reliqua magis accedat, his ipsis a nobis etiam adnumeratur.

Extremitas ossis hujus *postica* cavitatibus suis, & eminentiis, eminentias & cavitates ossis multanguli excipit.

Extremitas antica, seu *caput*, superne plana, cæterum vero ossibus metacarpi reliquis similis, & cum phalange pollicis prima juncta est. Os ipsum reliquorum omnium metacarpi ossium brevissimum, simul vero & crassissimum est.

Os alterum metacarpi fertur ad indicem digitum, reliquorum omnium longissimum. *Extremitas*

postica, seu superior jungitur ossi multangulo parvo; extremitas antica, seu inferior phalangi primæ indicis.

Os tertium metacarpi extremitate cohæret posteriori cum osse capitato carpi, anteriori cum phalange prima digiti medii.

Os quartum cohæret extremitate posteriori cum osse unciformi, anteriori cum digito annulari.

Os quintum metacarpi omnium minimum, & brevissimum est trium reliquorum. Facies hujus postica non triangularis, uti in reliquis, sed æqualiter lata est, & faciei mediæ ossis unciformis, extremitas anterior autem phalangi primæ digiti minimi adjungitur.

Nexus ossis metacarpi primi cum osse multangulo carpi per arthrodian, reliquorum vero ossium metacarpi cum carpo per ginglymum angularem fit: omnia demum cohærent extremitatibus suis anterioribus cum digitis per arthrodian.

DIGITI.

DIGITI ultimam, & anteriorem manus partem constituunt; in quavis manu quinque digiti adsunt, ratione crassitie, ac longitudinis ab invicem diversi.

Hærent ad extremitates anteriores ossium metacarpi.

Figura pyramidi longiori, extrorsum convexæ, introrsum concavæ similis est.

Digitorum quivis ossibus tribus, pollex autem ossibus binis componitur, quæ ossa in totidem distribuuntur series, seu *phalanges*; phalanges denuo variæ sunt magnitudinis; ac in *primas*, seu *postiores*, in *medias*, & in *ultimas*, seu *anteriores* dirimuntur,

In ossium horum quovis notentur, uti in ossibus cunctis cylindricis, *corpus*, & *extremities* binæ.

Pollex duas tantum phalanges habet, quum primam ad ossa metacarpi retulerimus. *Phalanx prima pollicis*, posterius excavata, cartilagine vestita, utrinque eminentiis exiguis cincta os primum attingit metacarpi. *Corpus* nonnihil inflexum est ea ratione, ut facies externa convexa, interna subconcava sit; in facie concava lineæ cernuntur binæ inæquales, queis ligamentum transversum adnectitur; extremitas antica, phalangem ultimam, aut anteriorem pollicis attingens, trochleæ adinstar formata, cartilagine tecta, & utrinque foveola parva donata est, eminentiisque exiguis, ut excipere queat extremitatem posteriorem phalangis anterioris.

Phalanx altera prima brevior est; extremitas hujus posterior cavitate donatur duplici, cartilagine incrustata, ubi eminentiæ trochleæ phalangis primæ inseruntur; facies corporis externa planior est; extremitas anterior marginem hemisphæricum, omnino inæqualem, semilunarem refert.

Phalanges digitorum quatuor reliquorum sibi invicem sunt simillimæ, & sola differunt magnitudine. Phalanges digiti indicis, & auricularis quoad magnitudinem vix differunt. Digito medio phalanges longissimæ, auriculari minimæ, & brevissimæ sunt. Eadem magnitudinis ratio inter digitos intercedit. In phalangibus seriei primæ, ac secundæ facies convexæ, & concavæ manifestius distinguuntur, quam in phalangibus seriei postremæ, ubi facies planissimæ sunt. In priorum facie concava linea cernitur inæqualis, cui adnectuntur ligamenta transversa pro firmandis musculis; linea vero hæc ipsa in phalangibus ultimis non adest. Extremitates posteriores seriei primæ rotunda donantur concavitate, in quam recipiuntur ossa

metacarpi ; extremitates anteriōres trochleam referunt , & cum phalangibus secundæ seriei junguntur ; extremitates ambæ vestiuntur cartilaginibus.

In *phalangum seriei secundæ* extremitate posteriori duplex adest excavatio , cui semper inferitur trochlea statim dicta phalangum primæ seriei. Extremitates harum anteriores excipiuntur denuo trochlea sua in excavationes extremitatum posteriorum phalangum ultimarum.

Phalanges digitorum ultimæ , ad modum phalangis ultimæ pollicis, margines habent semilunares, queis adfiguntur tendines musculorum digitos flectentium.

Connexio phalangum digitorum primarum cum *ossibus metacarpi* per arthrodian fit ; phalanx prima pollicis cohæret cum *osse* sibi proprio *metacarpi* per ginglymum angularem ; eadem connexionis ratio per phalanges digitorum subsequentes omnes obtinet.

Vsus digitorum in specie est , ut organon tactus subfulciant ; præterea vero , una cum ossibus metacarpi, & extremitatibus superioribus, universis laboribus exercendis , corporique tuendo dicantur.

OSSA EXTREMITATVM INFERIORVM.

EXTREMITATES binæ INFERIORES ultimam sceleti partem absolvunt : dependent utrinque secundum lineam rectam ex acetabulis ossium innominatorum, &

in *femur* ,

in *crus* , ac

in *pedem extremum* distinguuntur ; quæ omnia ossibus constant triginta.

O S F E M O R I S.

OS FEMORIS omnium corporis humani ossium est longissimum , cylindricorum vero maximum , crassissimum , & robustissimum.

Situm

Situm est inter acetabulum ossis innominati, & tibiam; *situm* tamen non ex integro perpendiculari, sed nonnihil obliquum habet, adeo, ut extremitates superiores magis ab invicem remotæ sint, inferiores autem propius ad sese mutuo accedant.

In juventute manifesto patent oculis ossis hujus *epiphyses*. Ad modum ossium omnium cylindricorum in *partem mediam*, seu *corpus*, binasque *extremitates* dividitur.

Corpus, antrorsum flexum, *faciebus* tribus instructum est; *anteriori* convexa, duabusque *posterio-ribus*, planis, & *linea* longiori, maxime inæquali, eminente, ab utroque trochantere deorsum producta, ab invicem discretis: *linea* hæc inferius bifurcatur, & ad inferiora usque excurrit ossis capita, unde demum *facies* triangularis, plana exsurgit. Adest etiam circa *lineam* hanc eandem inæqualem, foramen unum, vel & plura, quæ in ipsum ossis penetrant cavum, & vasa illuc deducunt.

In *extremitate superiori* notandæ sunt *eminentiæ*, & *cavitates* sequentes:

1) *Caput*, sphaera est, supremum ossis occupans, dimidia cartilagine vestita, oblique introrsum, & nonnihil sursum tendens, ab acetabulo ossis innominati excipienda: *directionis* tamen ratio non in omni *scelecto* plane eadem est; in centro hujus sphaeræ *foveola* parva adest, cui adfigitur ligamentum rotundum femoris.

2) *Collum*, caput immediate excipiens, tenuius est superius, inferne latius, terminatum in oram inæqualem, cui adhærescit ligamentum capsulare, tum & in processus duos, qui speciali nomine *trochanteres* dicuntur. *Directio* hujus jam magis jam minus obliqua est, & pro hujus diversa ratione capitis diversa est positio, ut magis minusve obtusum cum corpore ossis constituat angulum.

3)

3) *Trochanter major* eminentia est magna inæqualis collo adnata, exteriora respiciens, capitique obversa. *Facies hujus externa* inæqualitatibus donatur plurimis pro musculorum insertione; *facies interna* inæqualiter cava est. In basi hujus trochanteris *fovea* specialis adest profundior; trochanter vero ipse in apicem demum obtusiozem terminatur. Partibus hisce omnibus tendines adfiguntur musculorum hic sitorum.

4) *Trochanter minor* in posteriori, & infima colli parte hæret, interiora spectans. *Eminentia* adfunt variæ pro adnexu musculorum.

Inter utrumque trochanterem posteriora versus *linea longitudinalis* est, cujus ope excavatio posterior major redditur: antè etiam inter trochanteres *linea* cernitur magis *eminens*, basin colli claudens.

Extremitas inferior crassa, lataque est; adfunt hic *eminentia*, & *cavitates* sequentes:

1) *Condyli* duo magni trochleam referentes, antè sibi maxime vicini, postè ab invicem remoti, atque ideo in *condylum externum*, & *internum* divisi; prior major paulo est; ambos cartilago vestit.

2) Postè ambis condylis *excisura rotunda* interjicitur, excavationem generans poplitis, & vasa poplitea excipiens, ambiens. Præter hanc excisuram in quovis condylo

3) *Excavatio semilunaris* cernitur, cui adfiguntur ligamenta cruciata; multæ præterea adfunt *inpressiones* pro adhæsiõne musculorum; lateraliter in quovis condylo eminentia adest, cum plurimis inæqualitatibus; antè inter condylos excavatio hæret, excipiens patellam.

Substantia, ut in ossibus cylindricis omnibus, compacta est in corpore, in extremitatibus utrisque spongiosa, in cavo interno reticularis, medulla repleta.

Connexio ossis femoris fit cum tribus ossibus : superius cum *acetabulo ossis innominati* per *enarthrosin* ; inferius cum *tibia* , & *patella* per *ginglymum angularem* .

Vsus . Partem extremitatum inferiorum præcipuam constituit .

C R V S .

CRVS altera extremitatum inferiorum pars est .

Hærent crura inter os femoris , & pedem extremum , ossibus constant tribus ; nempe binis longis : 1) *tibia* ; 2) *fibula* ; & 3) parvo rotundo , quod *patellam* dicunt .

T I B I A .

TIBIA inter os femoris est , & pedem extremum , in latere antico , & interno recta deorsum fertur , figura cylindrica , & fere triangularis , superne crassior , inferne tenuior est ; extremitates ambæ in juventute pro epiphysibus habendæ sunt .

Dividitur ad modum ossium cylindricorum omnium , queis etiam quoad *substantiam* similis est , in *extremitatem superiorem* , *inferiorem* , & *corpus* .

In *extremitate superiori eminentie* , & *cavitates* sunt :

1) *Caput* , compositum binis *condylis* , *externo* uno , altero *interno* ; quivis foveam superne habet profundam , cartilagine incrustatam , excipientem *condylos* ambos ossis femoris .

2) His *eminentia* duplex interjicitur , cui adfiguntur *ligamenta cruciata* .

3) Retro *condylos incisura poplitea* , profunda est .

4)

4) Anterius occurrit *spina tibiæ*; adnectitur huic ligamentum patellæ, ac tendo musculorum extensorum tibiæ, queis patella etiam firmatur.

5) *Foveola*, cui inhæret apex patellæ, sub hac

6) in condylo externo posteriora versus *facies cartilaginea* parva, fibulam recipiens.

Extremitas inferior superiori tenuior est: in hac denuo adsunt sequentes *eminentiæ*, & *cavitates*:

1) *Excavatio longitudinalis* in latere externo, fibulam excipiens.

2) In latere interno *processus*, *malleolum internum* constituens; hujus extremitati *sulcus* insculptus est, cui inhæret tendo musculi tibiæ postici.

3) Inferius in extremitate *cavitas articularis* transversalis, cartilagine obducta, eminentia planiori bifariam divisa, a malleolo interno longior reddita, astragalum excipiens.

In corpore cernuntur *anguli* tres, *faciesque* totidem; 1) *Angulus anterior* descendit a *spina tibiæ*; superne acutus, inferne subrotundus est; 2) *anguli* duo *postici*, quorum unus *posticus internus* dicitur, rotundus, ad malleolum internum descendens; alter, *posticus externus* audit, eique adhæret ligamentum interosseum. Anguli nunc enumerati tres *facies* ab invicem sejungunt. 3) *Facies interna* hæret inter angulum anteriorem, & posticum internum, nonnihil convexa est, ac a perioostio solum, & integumentis corporis communibus obtegitur. 4) *Externa*, angustior inæqualiter plana, ab angulo anteriori, & postico externo limitatur. 5) Posterior angulis duobus posticis intercipitur; insculptum huic, ad distantiam palmæ a condylis, foramen est, per quod arteria substantiam ossis ingreditur.

Connexio fit cum quatuor ossibus, superne cum *osse femoris* per *ginglynum angularem*, partim etiam cum

cum *femoris condylo interno* per *ginglymum lateralem*; inferius cum *astragalo*, per *arthrodian*; lateraliter superne, ac inferne cum *fibula* per *amphiarthrosin*, & *arthrodian*.

Vsus. Extensioni, flexionique pedis dicatur, tum & gressui, & stationi.

F I B V L A.

FIBVLA alterum cruris os longum est.

Hæret in latere externo, nonnihil posteriora versus, angulo postico externo tibiæ fere obposita.

Figura longa, cylindrica, tenuis, inæqualiter triangularis, quoad *structuram* cum ossibus cylindricis reliquis conveniens est: convenit etiam cum hisce quoad *divisionem* in *corpus*, binasque extremitates.

Extremitas superior, aut *caput fibulæ*, plana, oblique posita est; interiora versus *facie articulari* cartilagine obducta, cum tibia conjuncta gaudet; postrosum in *apicem obtusum* terminatur: sub capite *collum* situm est.

Extremitas inferior latior est, magisque oblonga, fere triangularis, *malleolum externum* constituens; magis hic deorsum descendit, quam internus; in *facie interna* ambit eum cartilago; ad formationem *cavittatis articularis*, *astragalum excipientis*, *malleolus hic externus* concurrat; in *postica parte* sulcum habet, quem transit tendo *musculi peronei longi*, & *medii*.

Corpus triangulum inæquale refert, tenuissimum & versus medium introrsum nonnihil flexum est: notantur in hoc *anguli tres*, & *totidem facies*.

Angulo interno adhæret *ligamentum interosseum*; descendit hinc ea ratione, ut *angulo tibiæ postico externo* directe obvertatur.

Angulus externus superior, & externus inferior magis minusve scindentes sunt.

Facies externa hæret inter angulum inferiorem, & internum.

Facies postica superne convexa parum, una cum externa, inferiora versus torquetur introrsum, & ab angulo superiori, ac externo inferiori circumscribitur. *Internam* claudunt angulus superior, ac internus; *linea vero obliqua* faciem hanc bifariam dirimit.

Connexio fit 1) superius, & inferius cum *tibia* per *synarthrosin*; 2) inferius cum *astragalo* per *arthrodian*.

Vsus. Nexum cum pede extremo firmat, & securiorem reddit.

P A T E L L A.

PAPELLA os illud parvum est, quod inter condylos ossis femoris, & in tibia hæret, spinæ tibie recta superinpositum. *Figura* inæqualiter triangularis, & complanata est; *dividitur* in *basin*, *apicem*, *latera*, & *faciem internam*, & *externam*.

Basis pars crassissima ossis est, superius os femoris respiciens.

Apex obtusus est, respiciens tibiam, cujus spinæ ligamento, & tendine antea dicto robusto adnectitur. In apice foveola parva inæqualis adest, cui ante dictus tendo musculorum extensorum tibie implantatur.

Facies externa convexa, inæqualis, versus basin crenata; *interna* concava, cartilagine tecta, *linea eminente* a basi ad apicem usque in *foveas* duas *articulares* divisa, a quibus trochlea ossis femoris excipitur.

Substantia, interne spongiosa, externe lamella tenui substantiæ compactæ amicta.

Connexio fit 1) cum *tibia* per *syndesmosin* ; 2) mediante *facie cartilaginea* cum *trochlea ossis femoris* per *ginglynum angulare*m.

Vsus. Articulationem ossis femoris cum *tibia* fir-
miorem reddit, ne corpus antroorsum ruat ; tendini mu-
sculorum extensorum *tibiæ* pro *trochlea* quasi inservit.

O S S A P E D I S E X T R E M I .

PES EXTREMVS , ultima sceleti pars componitur
tarso , *metatarso* , & *digitis*.

In genere hic notentur :

Margo internus , & *externus* , *extremitas anterior* ,
& *posterior* , *facies convexa superior* , seu *dorsum pedis* ,
& *facies concava* , *inferior* , seu *planta*.

T A R S V S .

TARSVS , inter *tibiam* , & *metatarsum* situs , con-
stat ossibus septem , 1) ex *astragalo* , 2) *calca-*
neo , 3) ex *osse naviculari* , 4) ex *osse cuboideo* ,
5) ex ossibus tribus , *cuneiformibus*.

Horum ossium maxima duo priora sunt ; me-
dium locum tenent duo sequentia ; minima omnium
sunt ultima.

ASTRAGALVS posteriori loco superne hærens ,
partibus binis constat , *majori* , seu *corpore* , *minori* ,
processum referente : locus , ubi partes hæ duæ coë-
unt , *collum* vocari poterit.

Corpus seu *pars postica* , *faciem* habet *superiorem* ,
inferiorem , duasque *laterales* ; *superior* magna est , car-
tilagine obducta , *trochleam* dimidiatam referens ,
parti inferiori *tibiæ* connexam. *Facies lateralis inte-*
rior , & *exterior* productio videtur superioris ; *exterior*
latior est interna , & a *malleolo externo* obtegitur ;
interna cavitate magna prædita est , ac ab interno
malleolo tegitur. *Facies inferior* concava , cartilagine

vestita, calcaneum excipit; in margine externo sulcus est insculptus, cui ligamentum capsulare adnectitur.

Processus, aut *anterior pars* loco superiori per excavationem, inferiori per ampliorem excisuram a corpore distinguitur. *Faciem* habet *anticam*, oblique convexam, cartilagine tectam, ossi naviculari adhærentem; *faciei inferiori* cartilagine duæ sejunctæ sunt, calcaneo adaptatæ.

CALCANEVM posteriori loco infra præcedens situm os pedis extremi maximum est, cujus basin constituere videtur. *Figura* maxime inæqualis est: dividitur in *corpus*, & *processum anteriorem*, ac *internum*.

In corpore cernitur loco postico eminentia aspera, cui tendo achillis adligatur.

Facies superior dividitur in duas partes; posterior inæqualis, anterior convexa, cartilagine vestita est, & concavitatem astragali ingreditur.

Inferior angusta, posterius eminentia duplici dotata est; adnectitur huic tendo plantaris.

Interna lateralis parum excavata est, ut eo facilius fiat transitus vasorum, nervorum, & tendinum quorundam muscularum.

Externa lateralis ligamentis tantummodo & integumentis corporis communibus tegitur.

In *processu anteriori* seu *majori* notentur:

Superne *excavatio* inæqualis cartilagine obducta, processum astragali excipiens.

Inferne *eminentia*, cui adhæret flexor digitorum brevis.

Anterius *facies* cartilagine vestita, partim concava, ossi cuboideo nexa.

In latere externo *facies* maxime inæqualis, eminentia, & concavitate instructa, cui musculus digiti minimi abducens, ac digitorum extensor brevis adhærescunt.

Processus

Processus internus, aut lateralis, a corpore, & processu majori procedens, concavitatem auget faciei internæ calcanei; facie parva cartilaginea superius, & inferius ipsemet instructus est.

OS NAVICVLARE ante astragalum interiora versus situm est: notetur in hoc:

Facies posterior, concava, cartilagine vestita, faciem astragali convexam excipiens.

Anterior, convexa, duabus lineis in facies tres minores cartilagineas discreta, quæ ossa cuneiformia recipiant.

Ora subrotunda, in interno pedis latere in apicem obtusum terminata; exterius os cuboideum attingens; adfiguntur huic tendines binorum musculorum.

OS CVBIFORME ante calcaneum exteriora versus ponitur; *faciebus sex gaudet.*

Superior inæqualis, dorsum pedis respicit.

Inferiori obliquus sulcus insculptus est, cui ligamentum rotundum, & tendo musculi peronei longi inhærent.

Posterior cartilaginea, lata, partim convexa, partim concava, calcaneum excipit.

Anterior, linea divisa os metatarsi quartum, & quintum excipit.

Exterior, omnium minima, sulco exiguo donatur, cui inhæret tendo musculi gastrocnemii postici.

Interior, longissima, facies duas cartilagineas habet, una os naviculare, altera vero os cuneiforme tertium excipit.

OSSA tria CVNEIFORMIA ante os naviculare ad invicem sita, cuneos referunt, ossibus reliquis intrusos, unde & nominis dependet ratio. In quovis notentur: *basis, apex, & facies* quatuor, quarum una *anterior, una posterior, duæque laterales* sunt.

OS CVNEIFORME PRIMVM maximum est; hæret in latere interno pedis ante os naviculare.

Basis convexa, inferiora respicit.

Apex sursum, versus dorsum pedis tendit.

Facies postica fere triangularis, concava, faciei anticæ, & internæ ossis navicularis adhæret.

Antica semilunaris, os primum metatarsi excipit.

Interna inæqualis, superius neçtitur ossi cuneiformi secundo, inferius ossi secundo metatarsi.

Facies lateralis externa libera hæret.

OS CVNEIFORME ALTERVM, reliquorum minimum, situm est inter primum, & tertium, ante os naviculare.

Basis inæqualis, brevis, sursum reflexa est.

Apex deorsum tendit.

Facies postica triangularis, coit cum facie media ossis navicularis.

Antica os alterum metatarsi attingit.

Interna jungitur ossi cuneiformi primo.

OS CVNEIFORME TERTIVM hæret inter os cuneiforme secundum, & cuboideum; notentur in hoc:

Basis, dorsum pedis spectans.

Apex deorsum tendens.

Facies posterior triangularis, faciei anticæ externæ ossis navicularis juncta.

Anterior, pariter triangularis, os metatarsi tertium excipit.

Interna lateralis, superius coiens cum cuneiformi altero, inferius cum osse metatarsi secundo.

Externa lateralis os attingit cuboideum.

Substantia ossium tarfi omnium spongiosa est.

Connexio fit 1) inter sese per amphiarthrosin; 2) anterius cum ossibus metatarsi per synarthrosin; 3) posterius loco superiori calcaneum neçtitur cum tibia, & fibula per arthrodian.

Vsus. Pedem flexiliorem, & muneribus exercendis aptiorem reddunt.

M E T A T A R S V S.

METATARSVS, pedis extremi pars altera componitur ossibus quinque cylindricis, inter tarsum, & digitos ad invicem fitis.

Figura horum quadrangulum oblongum refert. Considerentur in his :

Facies superior, convexa, & *inferior* concava.

Margo anterior, digitos, & *posterior*, ossa tarsi respiciens.

Margines bini laterales.

Quodvis horum 5. ossium ad modum cylindricorum omnium dividitur in extremitatem *posticam*, *anticam*, & *corpus*.

Extremitates posteriores excavatæ, ossa tarsi attingunt.

Antiores, capite convexiori instructæ uniuntur phalangibus primis digitorum, utrasque vestiunt cartilagine.

Magnitudine plurimum differunt. Primum brevissimum simul, & crassissimum est: reliqua quatuor longiora sunt; extremitates etiam horum posteriores crassiores sunt anterioribus.

Corpus gaudet *faciebus* tribus, & totidem *angulis*; unde & figuram habent triangularem.

Facies una superior est, reliquæ *laterales* sunt.

Anguli duo ex lateribus hærent, tertius plantam respicit.

Connexio horum ossium posterius cum *ossibus tarsi* per ginglymum angularem: anterius cum *phalangibus digitorum primis* per arthrodian fit.

Vsus. Corpus, dum erecti stamus, fulciunt; dorsum pedis, & plantam constituunt.

DIGITI.

DIGITI PEDVM ultimam efficiunt partem pedis, & totius sceleti; hærent in margine anteriori metatarsi, & nomine *pollicis*, seu *digiti maximi*, *digiti secundi*, *tertii*, *quarti*, & *quinti*, seu *minimi*, insigniuntur.

Quoad *figuram*, *divisionem* & *substantiam* conveniunt cum ossibus digitorum manus; quivis enim in tres phalanges dividitur, excepto solum pollice, qui duabus tantum instructus est. Phalanges horum etiam breviores sunt, quam phalanges digitorum manus.

Connexio phalangum digitorum pedis cum *ossibus metatarsi* per arthrodian fit; *connexio* vero phalangum seriei secundæ cum phalangibus seriei primæ, & phalangum seriei tertix cum phalangibus seriei secundæ per *ginglymum angularem*.

Vsus. Sub incessu, motibusque variis eo firmitus corpori subpeditant fulcrum.

OSSA SESAMOIDEA.

OSSA SESAMOIDEA nomen suum a *figura*, quæ illis cum seminibus lini intercedit, adquisiverunt. *Magnitudine* tamen multum ab invicem differunt. Reperiuntur inprimis inter phalangem primam, & secundam pollicis manus, & pedis; subin etiam adhærent condylis ossis femoris, ossi cuboideo tarfi, e. s. p.

Numerus determinatus non est.

Substantia spongiosa est, lamella compacta, tenui obducta.

Vsus. Tendinibus pro trochleis quasi inserviunt, motum eorum reddunt faciliorem, robur augent.

OSTEOLOGIA
RECENS,
ET
SYNDESMOLOGIA.

1875

S E C T I O I.

O S S A R E C E N T I A.

Diximus antea OSTEOLOGIAM dirimi in binas partes, quarum una *ossa sicca*, altera *ossa recentia* contemplatur. Agemus jam de OSTEOLOGIA sic dicta RECENTI; in hac vero examinantur sequentia:

- 1) PERIOSTEVM INTERNVM, & EXTERNVM.
- 2) CARTILAGINES.
- 3) MEDVLLA OSSIVM.
- 4) GLANDVLAE ARTICVLARES.
- 5) SYNOVIA.
- 6) VASA, & NERVI OSSIVM.
- 7) LIGAMENTA OSSIVM.

P E R I O S T E V M ; E T C O L O R
N A T V R A L I S O S S I V M.

PERIOSTEVM membrana tenuis quidem, sed robusta, magis, minusve diaphana, maxime elastica est, faciei ossium externæ, ac internæ superintensa. Tegit ossa corporis omnia, exceptis solum dentibus. *Facies externa* lævis est, *interna* pro varia ratione inæqualis ossium superficiei inæqualis. Diversa acquirit nomina, prout diversas amicit partes; sic cranium tegens, dicitur *pericranium*; vestiens cartilagine *perichondrium* audit; obducens ligamenta *peridesmium* adpellatur.

Structura membranæ hujus plurimis vasis instructæ componitur stratis diversis membranaceis, quæ jam plures, jam pauciores sibi mutuo superincumbunt: strata hæc ipsa denuo constant serie fibrarum membranacearum, quæ, si seorsim spectentur, directione parallela decurrunt; in periosteo autem universo arcte sibi sunt intertextæ.

Connexio sequenti fit ratione: facies periostei interna cohæret ope vasorum, firmissime cum ipsa ossis substantia; facies externa connectitur cum textu celluloso, & musculis; quum vero in senibus vasa plurima sensim aboleantur, exsiccescant, & in fibras abeant, periosteum in his non firmiter adeo, uti in juvenibus, ossibus adhæret.

Periosteum internum oriri videtur a vasis, nervisque, substantiam ossis transeuntibus, & per superficiem horum internam dispersis. Membrana hæc, periosteo externo adhuc tenuior, non solum medullam ossium cylindricorum, sed & omnes ossium cavernulas undique obducit.

Arteriæ, venæ, & nervi periostei exoriuntur a vicinis partibus. Quamplurimis ramificationibus quaquaversum disperguntur, & textum integrum referunt: quædam in cavum usque ossium penetrant.

Vsus periostei est:

1) Vt vasa excipiat, ordinet, quo demum in ossium cylindricorum interiora medullam secernant, & os ipsum nutriant.

2) Vt epiphyses cum ossibus ipsis nectat.

3) Vt muscoli, & tendines eidem inferantur; etsi quidem & nonnulli tendines perforent periosteum, ossique immediate adhæreant.

4) Vt ossa ab aëre externo, aliisque noxis defendat, dum vulnus ad illa usque adactum fuit.

COLOR NATURALIS OSSIVM.

COLOR NATURALIS OSSIVM RECENTIVM varius est; quædam albent, rubent alia, aliaque ex albo cærulefcunt; substantia præterea ossium compacta alba, spongiosa vero subrubra, & ex albo subcærulea est; hinc corpus ossium cylindricorum albet, extremitates nunquam non rubent.

Aetas etiam diversitatem quoad colorem ossium adfert. In adultis ossa in genere cernuntur alba, in infantibus rubicundiora: hæc tamen semper de corpore ossium, & substantia compacta solum tenenda sunt; ossium enim substantia spongiosa in senibus subfusca fit.

In ætate consistenti ossa omnia in genere rubriora manifesto sunt, quam quidem in senio; in illa enim quamplurima ossium vasa aperta adhuc sunt, & sanguinem transmittunt, quæ in senio sensim coalescunt: non tamen hæc dicta sunt in universum de subiectis omnibus ejusdem ætatis; varium enim vitæ genus notabile denuo circa hæc omnia adfert discrimen. Ossa hominis, ab ipsa tenella ætate duro labori adfueti a motu non interrupto firma prius, & compacta fiunt; quum vasa inter lamellas osseas decurrentia inde comprimantur, in fibras abeant, & eandem ob rationem citius albescant, quam in homine commodiori, otioso vitæ genere utente.

Dentes, uti albuginea oculi tunica, in Europæis, aliisque gentibus colore nitent margaritaceo nonnihil subgriseo; in æthiopibus autem, & dentes & albuginea tunica oculi candore niveo a reliquis manifeste distincto donantur.

Ossa hominum, qui ob luem veneream frictione mercuriali fuerunt usi, vel & argentum vivum usu interno in corpus receperunt, nunquam alba adeo evadunt,

evadunt, uti in sceleto eleganti foret requisitum; hinc & in hunc scopum adhiberi nequeunt.

Colorem ossium naturalem chirurgus ut noscat, utilissimum, & sæpe omnino necessarium est ratione morborum diversi generis, vulnerum, aut operationum, circa ossa instituendarum.

Addendum dictis adhuc est, notandum etiam probe Chirurgis esse, ubinam ossa inæqualia, scabra, aspera, aut lævia sint, ut sic sciant in statu præternaturali, quid secundum naturam, quid contra hanc sit, aut esse possit.

CARTILAGINE S.

CARTILAGO corpus firmum, læve, elasticum, colore margaritaceo præditum, extremitates ossium obtegens, hisque arctissime adcretum.

Firmitas harum, seu *durities* inter firmitatem ossis, & ligamenti medium tenet locum.

Substantia cartilaginum constare videtur gelatina coagulata, ac inspissata, cui fibræ interspersæ sunt sui generis: certum saltem id est, partes, quibus componuntur cartilaginee, cartilagineæ semper, nunquam vero osseæ esse indolis.

Superficies externa cartilaginum lævis, æqualis, membranaque tenui vestita est, quæ *perichondrium* audit, & ceu productio periostei habetur: tenuior tamen multo est, & minori, quam periosteum, sensibilitate videtur instructa esse.

Per totam cartilaginum *crassitiam* cavitates omnino nullæ occurrunt, nec cellulæ; hinc & nullam continent medullam, aut succum medullarem; pori nulli cernuntur manifestiores, sed foraminula solum minima pro transitu vasculorum exilissimorum.

Dividuntur cartilaginee trifariam :

- 1) Ratione figuræ ;
- 2) - - situs ;
- 3) - - usus.

Ratione figuræ convexæ sunt, aut concavæ, hemisphæricæ, semilunares, triangulares, oblongæ, ovales, vel demum figuræ indeterminatæ.

Ratione situs, cartilaginee dicuntur *interarticulares*, quod inter ossium articulationes hæreant; liberæ hæ sunt, nec cum ossibus concretæ: huc referuntur cartilaginee inter condylos ossis femoris, & tibiæ; in articulatione maxillæ inferioris; inter nexum sterni, & claviculæ. e. f. p.

Ratione usus vel sunt *obducentes*, quibus in extremitatibus ossium condyli, & foveæ articulares obducuntur, vel *unientes*, quorum ope bina ossa firmiter inter sese mutuo uniuntur.

Usus cartilaginum est :

1) Ob superficiem earum lævem, & lubricam, ossa articulatione mobili inter se juncta, facile & abs majori adfrictu supra sese volutari queunt; quo mechanismo motus horum longe expeditior redditur.

2) Flexilitate sua varias, pro diversis motibus requisitas formas recipere queunt.

3) Elasticitate sibi propria situm, formamque naturalem, pristinam denuo recuperant, quamprimum impressio recesserit; facere etiam elasticitas cartilaginum potest, ut motus articulationum facilius fiat, & promptior.

4) Articulationes ipsas lubricas reddunt, conservant.

5) Ossa demum varia immobilia firmiter invicem uniunt.

MEDVLLA; GLANDVLAE ARTI- CVLARES; SYNOVIA.

MEDVLLA OSSIVM pars est sanguinis oleosa, pinguiissima, jam fluidior, jam & crassior, in ossium internis tum cellulis horum osseis, tum tubis medullaribus ossium cylindricorum contenta.

Diximus jam antea, cellulas omnes osseas, & cavernulas ossium vestiri a periosteo interno; hoc totidem inibi producit folliculos, aut sacculos, in cellulas, & cellulares vesiculas subdivisos, quibus medulla continetur, quorumque orificia omnia inter sese invicem communicant: hinc & medulla exsiccata botros, aut series globulorum lateraliter in omnem ambitum sese excipientium referre videtur. Textus hic non multum differt ab eo, qui in aliis corporis cellulosis partibus, conspicitur, ubi pinguedo accumulatur; ea solum intercedente differentia, textum medullam coercentem minorem multo, & subtiliorem esse.

Medulla ex sanguine per arterias secernitur, in substantiam ossium penetrantes, ubi, in innumeros ramulos exiguos divisæ, succum suum medullarem in destinatas demum exonerant cellulas. Sanguis a secretionem hac residuus, excipitur a venis, & per eandem viam ex osse in massam sanguinis revehitur.

Copia vasorum subtilium una cum incremento ætatis sensim decrescit; nam, etsi majores vasorum trunci secretioni medullari dicati per incrementum corporis majores indies fiant; furculi tamen inde enati capillares paulatim coalescunt, &, prout majori minorive copia dispersi sunt, majorem minoremque medullæ ruborem conciliant. Patet hinc ratio, cur medulla in infantibus rubeat, in ætate virili ex albo flavescat, in senibus vero limpida, & aquosa sit.

Medulla

Medulla ipsa sensilis non est, cellulæ autem quibus reconditur, magna sensilitate gaudent; demonstrant hanc sententiam morbi dolore stipati in ossium interiori parte enati.

Vsus. Medulla inter lamellas ossium transfundans fragilitatem horum facilem minuit; ossa enim humectans facit, ut hæc facilius cedant, atque sic vi externæ resistent: veritatem hujus confirmat experientia, quæ nobis monstrat; fracturas ossium facilius enasci in hominibus, quorum succus medullaris a morbis corruptus est; facilius etiam enasci fracturas in senibus quam junioribus, etsi quidem in his ultimis frequentior fracturarum sese obferat occasio.

Anchylosin etiam avertit medulla, quum per foraminula circa articulationes præsentia transeat, articulationum ipsas juncturas intret, atque ibi loci una cum humoribus aliis ita dictam synoviam constituat.

GLANDULÆ HAVERSIANÆ glandulæ speciales sunt molles, ac teneræ, in articulationibus hærentes. Latius in ADENOLOGIA exponentur.

Glandulæ hæc situ adeo commodo in articulationibus recubant, ut motu ipso leniter quidem premi, nunquam vero, nisi enormior multo vis inferatur, contundi queant. Sitæ maximam partem sunt ad margines ligamentorum capsularium, vel in cavitatibus, & foveis specialibus articulationum.

Liquidum glandularum harum, leni pressione ex iis emulgendum commiscetur liquidis aliis hic loci confluentibus, ut lubricatione hac ipsa motus articulationum reddatur facilior, & adtritibus, exsiccatio, & detritus cartilaginum inpediatur.

SYNOVIA succus est albumini ovorum fere similis in cavitatibus articularibus ope ligamentorum articulationes ambientium reclusus.

Constat

Constat synovia :

- 1) *Mucilaginoso liquore glandularum articularium.*
- 2) *Partibus oleosis medullæ*, quæ per foraminula in extremitatibus ossium disposita in cavum articulare transfudant.
- 3) *Liquido aquoso*, exhalante ex finibus ultimis arteriolarum minimarum in *facie interna ligamentorum articularium.*

Vsus. Partes omnes ad articulationem facientes læves, lubricas, flexiles conservat, ut facile supra invicem volutentur, & hinc tum impediatur adtritibus reciprocus, tum & concretio articulorum.

VASA, ET NERVI OSSIVM RECENTIVM.

Ossa instructa sunt *arteriis* suis, & *venis*, a vicinis partibus semper exorientibus. *Arterie* distribuuntur in periosteo per omnes externas ossium partes, cartilagineas, ligamenta, glandulas articulares, e. s. p. tum per foraminula inter lamellas ossium hærentia interiorem ossium intrant substantiam, ubi denuo in periosteo interno distribuuntur, cellulas ossium retis adinstar perreptant, & medullam, aut succum medullæ similem illuc secernunt.

Vsus. 1) os nutriunt; 2) succum oleosum, quem *medullam* dicimus secernunt.

Nervi pariter a vicinis proficiscuntur partibus, per ante dicta foramina ossium ingrediuntur interiora, & per externas, internasque illorum propagantur partes. Præsentiam horum manifesto evincit ingratissima illa sensatio, qua morbi plerique ossium stipantur.

SECTIO

SECTIO II.

SYNDESMOLOGIA.



LIGAMENTA IN GENERE.

LIGAMENTA membranæ sunt albæ, robustæ, elasticae; tum ossa immobilia, tum & extremitates ossium mobilium invicem nectentes.

Membrana communi crassiores, & fortiores sunt, cartilagini tamen duritie, & robore cedunt; ut adeo medio fere loco inter has ambas ponantur.

Fabrica eorum constat fibris plurimis tenuissimis, robustis, invicem intertextis, quibus pro diversa situs ratione aut *ligamentum latum*, aut *tenuè*, aut *expansio ligamentosa* conficitur.

Dividuntur Ligamenta:

1) In *articularia*, proprie dicta, quibus *extremitates ultimæ binorum ossium, articulationem mobilem facientium, mutuo connectuntur.*

2) In *ligamenta*, quibus aut *ossa duo articulatione immobili nexa uniuntur*, vel & quibus *partes aliæ, imprimis autem musculi, adhærescunt*, & unde *motus horum facilior redditur.*

Ad primam classem pertinent:

1) *Ligamenta capsularia*; hæc ex *ambitu ossis unius enata extremitate altera eadem ratione ossi alteri undique adnectuntur.*

Nectunt ossa invicem, ne ex articulatione recedant, effluxum synoviae simul inpediunt; talia v. g. sunt *ligamenta jungentia os innominatum cum osse femoris, condylum maxillæ inferioris cum osse temporum; e. s. p.*

2) *Ligamenta*, non integrum ossis unius ambitum; sed lateralem quamdam partem solummodo amplectentia, & ossi alteri adnectentia.

3) *Ligamenta*, ossa duo intra ipsam articulationem invicem colligantia: v. g. ligamenta cruciata nectentia caput tibiæ cum condylis ossis femoris; ligamenta rotunda, quorum ope cohæret caput ossis femoris cum acetabulo, e. s. p.

Ad alteram classem referuntur:

1) *Ligamenta connectentia ossa duo immobilia*; v. g. ligamenta ossis sacri; e. s. p.

2) *Ligamenta, nectentia cartilaginem cum osse quodam*; v. g. ligamenta, quibus apex sterni conjungitur cum cartilagine costæ septimæ.

3) *Ligamenta cartilaginibus, & ossibus adnexa*, simul tamen dicata & partibus aliis, imprimis musculis, aut horum tendinibus, ut partes nunc dictas in situ retineant, dirigant, coërceant, directionem illarum in quibusdam motuum speciebus reddant magis determinatam, e. s. p. Huc referas: ligamenta annularia, ligamenta transversa, ligamentum poupartii, ligamenta interossea, ligamenta obturatoria, ligamentum cervicale, &c quæ omnia musculorum dicantur adnexui.

Ligamenta vasis copiosis gaudent: arteriæ in illorum faciem internam hiant, & liquidum exhalant, quod, synovix unitum, ligamenta nunquam non humectat, & flexilia servat. Venæ sanguinem residuum absorbent, ac in massam sanguinis revehunt. Vasa hæc, uti & nervi a vicinis partibus semper exoriuntur.

Ex dictis patet: motum ossium articulationis cujuscumque eo esse faciliorem, magisque expeditum, quo minoribus ligamentis ossa illa instructa, & quo debiliora, & longiora ligamenta ipsa fuerint: ex opposito autem motum eo magis esse limitatum, quo
major

major ligamentorum adest copia, aut quo breviora, & robustiora hæc eadem sint.

Vsus ligamentorum sequentibus absolvitur :

Ligamenta capsularia ossa duo invicem connectunt, & synoviae effluxum inpediunt. Ligamentis reliquis ossa junguntur, ac in debito situ retinentur. Præterea vero & musculorum tendines ad ligamenta firmantur.

LIGAMENTA IN SPECIE. LIGAMENTA MAXILLÆ INFERIORIS.

LIGAMENTA, quorum ope *condyli maxillæ inferioris* adligantur *cavitatibus articularibus ossis temporum*, sunt :

1) *Ligamentum capsulare* ; componitur hoc fibris firmis, ac robustis, ab ambitu foveæ articularis ossis temporum enatis, adhærentibus cartilagini inter hanc articulationem positæ, tandem vero collo condyli articularis maxillæ inferioris per omnem ejus ambitum adfixis.

2) *L. laterale maxillæ inferioris* oritur a facie interna anguli maxillæ inferioris prope foramen illius posticum; adhærescit margini posteriori foveæ articularis ossis temporum.

LIGAMENTA NECTENTIA OS OCCIPITIS CVM VERTEBRIS COLLI.

Condyli articulares ossis occipitis nectuntur cum foveis articularibus vertebræ colli primæ, tum & cum vertebris colli reliquis ope ligamentorum sequentium :

1) *L. capsularium* ; oriuntur hæc, ex utroque latere, a basi condylorum articularium ossis occipitis, inseruntur circa marginem fovearum articularium vertebræ colli primæ.

2) *L. lati anterioris*; ligamentum hoc enascitur a margine anteriori foraminis magni occipitalis, adhærescit ad arcum anteriorem vertebræ colli primæ, hærentem inter processum obliquum superiorem, & eminentiam, quæ corpus vertebræ hujusce constituit.

3) *L. lati posterioris*; firmitate cedit hoc præcedenti; oritur a margine postico foraminis occipitalis magni; adhæret ad arcum posticum vertebræ colli primæ, qui a processu obliquo superiori ad eminentiam usque, vices processus spinosi in vertebra prima colli obeuntem, extenditur.

4) *L. processus odontoidis*; oritur a margine antico foraminis occipitalis magni; adligatur processui odontoidi vertebræ colli secundæ.

5) *L. Cervicale*, seu *nuchæ*; oritur principio latissimo a protuberantia postica ossis occipitis, descendens inde sensim contrahitur; extremitatibus suis processibus spinosis vertebrarum colli demum adhæret.

LIGAMENTA VERTEBRARVM RELI- QVARVM.

*V*ertebræ omnes uniuntur invicem *ligamentis* sequentibus, tum quibusdam *propriis*, tum *communibus* omnibus; sunt hæc:

1) *L. transversa vertebræ colli primæ*; oriuntur ex utroque latere ex marginis anterioris vertebræ colli primæ latere interno; ad latus obpositum transversim feruntur, & processui odontoideo vertebræ colli secundæ adhærent: retinent hæc processum nunc dictum sub semirotatione capitis in suo situ.

2) *L. posticum commune vertebrarum*, ligamentum robustum, latumque est, ortum a vertebra colli prima, obtegens dein faciem convexam vertebrarum omnium, iisdem adhærens, ad os sacrum demum terminatum.

3) *L. anticum commune vertebrarum* ligamentum illud latum est, quod a processu odontoideo vertebræ secundæ colli enatum, faciem vertebrarum omnium concavam, seu internam obtegit, iisdem prioris adinstar, adhærescit, & ad os sacrum terminatur.

4) *L. interspinosa* ligamenta brevia, firmiterque sunt, secundum longitudinem spinæ totius dorsi a processu spinoso uno ad alterum excurrentia, hacque ratione processus spinosos omnes invicem firmanantia.

5) *L. intervertebralia* oriuntur, initio a vertebra colli secunda ducto, a marginibus vertebrarum, & decursu decussato a vertebra una ad alteram proficiscuntur.

6) *L. intertransversalia*, ligamenta brevia, exigua processibus transversis interposita, ab apice processus transversi unius ad apicem processus transversi alterius, priori superinpositi feruntur.

7) *L. capsularia processuum obliquorum* adhærescunt undique processibus obliquis.

8) *L. neclentia vertebram lumborum ultimam cum osse sacro*: ligamenta sunt ejusdem indolis, uti in vertebra reliquis; os sacrum cum vertebra lumborum ultima conjungunt.

LIGAMENTA IUNGENTIA STERNVM, ET COSTAS.

Sterno, præter ligamenta, quorum ope costæ, & claviculæ cum illo necluntur, & quæ mox exponantur, ligamenta duo sequentia propria sunt.

1) *Membrana sterni propria*, expansio firma, tendinea est, fibris longitudinalibus composita, faciem internam, & externam sterni obducens.

2) *L. cartilaginis mucronatæ* oriuntur, ex utroque latere unum, a cartilagine costæ septimæ veræ,

parteque vicina sterni; exhinc oblique descendunt, cartilagini xiphoideæ implantanda.

Costæ posteriori loco cum vertebris, antèrius cum sterno ligamentorum ope uniuntur; *ligamenta adnexa extremitatibus costarum posterioribus* sunt:

1) *L. capsularia capitulorum majorum costarum*; oriuntur circa capituli majoris costæ cujusvis ambitum; fibrisque latefcentibus terminantur circa cavitates articulares vertebrarum. Vniuntur itaque horum ope capita costarum majora cum corporibus vertebrarum.

2) *L. capsularia capitulorum minorum*, oriuntur ab ambitu capituli minoris cujusvis costæ; extremitates adnectuntur ad foveam articulare apici processus cujusvis transversæ vertebrarum dorsi insculptam.

3) *L. interna colli costarum* oriuntur a margine superiori colli costarum; terminantur in facie inferiori processus transversæ suprapositæ vertebræ dorsi.

4) *L. externa colli costarum* oriuntur a facie externa marginis superioris colli costarum omnium, oblique adscendunt, & ad marginem externum processus suprainpositi inferioris obliqui vertebrarum dorsi finiuntur. Ligamentum hoc ipsum in vertebra dorsi prima deficit.

5) *L. duo specialia*; fibris latioribus orta a margine inferiori costæ ultimæ, adnectuntur processui transversæ vertebræ lumborum primæ, & secundæ.

Ligamenta extremitatibus costarum anterioribus adnata sunt:

1) *L. capsularia cartilaginum costarum verarum* oriuntur undique circa extremitates cartilaginum costarum septem supremarum verarum; sine suo adhærescunt peripheriæ cavitatum articularium sterni. Ex ligamentis his ipsis multæ in facie anteriori prodeunt fibræ,

fibræ, per faciem externam radiatim latus obpositum versus excurrentes.

2) *L. costarum ipsarum propria*, quibus cohærent costæ inter sese, descendunt a cartilagine una directione perpendiculari recta ad alteram; uniuntur his & cartilagines costarum quinque inferiorum spuriarum inter sese mutuo.

LIGAMENTA OSSIVM PELVEOS.

Ligamenta, quibus *ossa innominata* tum *inter semetipsa*, tum & *cum osse coccygis*, & *vertebris lumborum* uniuntur, sunt:

1) *L. tria ossis ilei postica*, seu *ileo-sacra crassa*, & *robusta* sunt; enascuntur a spina posteriori iliaca, exhinc oblique descendunt, & processui primo, tertio, & quarto spurio transverso ossis sacri adfiguntur.

2) *L. duo sacro-ischiatica*, oriuntur principio laterali a processu quarto spurio transverso, parteque tota laterali ossis sacri, tum & a basi ossis coccygis, per decursum contrahuntur eorum fibræ, & oblique anteriorum laterum spinis ossis ischii inseruntur.

3) *L. pelveos transversale superius, & inferius*; ligamenta hæc duo oriuntur a margine postico ossis ilei, transversim excurrunt ea ratione, ut superius feratur ad processum transversum vertebræ ultimæ lumborum, inferius ad processum primum transversum ossis sacri.

4) *L. obturans foraminis ovalis*, oritur ex toto ambitu marginis foraminis ovalis, & in superiori solum parte foraminis hujus ipsius aperturam intercipit pro transitu vasorum obturatoriorum, & nervorum. Hic loci etiam sedes est quarundam specierum herniarum.

5) *L. inguinale*, seu *Poupartii*, seu *Fallopium*; ligamentum hoc robustum constat maximam partem expansione tendinea musculi abdominalis descendens obliqui; oritur a spina iliaca inferiori, & terminatur ad cristam ossium pubis. Sub ligamento hoc eodem exeunt vasa femoralia ex pelvi. Hic etiam loci occurrunt herniæ quædam, *femorales* dictæ.

6) *L. capsulare coccygis* ambit basin coccygis, & apicem ossis sacri.

7) *L. longitudinalia coccygis*, oriuntur a facie interna coccygis, terminantur in osse sacro. Ligamenta hæc tria firmanent nexum ossis coccygis cum osse sacro.

LIGAMENTA CLAVICULAE, ET SCAPULAE.

Clavicula cohæret anteriori cum *sterno*, & *costa prima*, posteriori cum *scapula* ope ligamentorum sequentium :

1) *L. interclaviculare*, ligamentum angustum, longum, robustum tamen retro sternum ab extremitate anteriori claviculæ unius ad alteram decurrit.

2) *L. capsularia antica claviculæ* ligamenta duo brevia, robustaque sunt, ex utroque latere ab ambitu anterioris extremitatis claviculæ enata, terminantur circa marginem cavitatis articularis sterni, qua clavicula excipitur.

3) *L. rhomboidea* oriuntur utrinque a facie inferiori aspera extremitatis anterioris claviculæ, oblique hinc ad costam primam lata ejus cartilagini adfiguntur.

4) *L. capsularia postica* parva, & robusta sunt; extremitatem posticam claviculæ, & *acromii scapulæ* in circulum amplectuntur, hincque ossa hæc mutuo connectunt.

Scapula ligamentis sequentibus cum extremitate postica claviculæ jungitur :

1) *L. trapezoideum scapulæ* oritur a facie interna processus coracoidei, terminatur ad extremitatem posticam claviculæ.

2) *L. conoideum scapulæ* oritur a radice processus coracoidei; inferitur eminentiæ asperæ extremitatis posticæ claviculæ.

3) *L. proprium scapulæ anticum* oritur a facie externa processus coracoidei; adligatur margini postico acromii.

4) *L. proprium scapulæ posticum* oritur a medio marginis superioris, terminatur ad radicem processus coracoidei.

LIGAMENTA HUMERI.

Extremitas humeri superior cohæret cum *cavitate scapulæ*, *inferior* cum *ossibus antibrachii* per ligamenta.

1) *L. capsulare humeri* oritur principio circulari a capite humeri, & undique etiam adhæret margini cavitatis glenoideæ scapulæ. In superiori ligamenti hujus ipsius parte apertura longitudinalis est, per quam tendo secundus musculi bicipitis ad partem superiorem cavitatis hujus articularis deorsum fertur. Augetur præterea ligamentum nunc expositum fibris tendineis tendinum musculorum vicinorum.

LIGAMENTA OSSIVM ANTIBRACHII.

Ossa antibrachii ligamentis variis junguntur tum cum *osse humeri*, tum *inter sese*, tum denique cum *carpo*.

Ligamenta cubiti sunt :

1) *L. capsulare*; ambit extremitatem inferiorem ossis humeri, supra condylos ossis hujus descendit, &

adnectitur margini scindenti tuberculi cubitalis, & coronæ cubitalis, uti & ligamento capsulari radii.

2) *L. brachio-cubitale*, seu *laterale internum* oritur ab eminentia antica, & superiori condyli articularis ossis humeri, supra ligamentum capsulare descendit, ac lateri interno processus coronoidei ulnæ implantatur.

3) *L. brachio-radiale*, seu *laterale externum*, oritur a condylo externo ossis humeri, ligamentum capsulare pariter superascendit, & fibris expansis ligamento radii coronario adhærescit.

Ligamenta radii sunt:

1) *L. coronarium*, seu *orbiculare* oritur a margine postico cavitatis semirotondæ ossis ulnæ; inferitur circa marginem circularem capitis superioris radii.

2) *L. capsulare*, seu *sacciforme*, oritur a margine incisuræ semilunaris in extremitate inferiori radii, anterius, & posterius caput totum ulnæ laxè obducit. Ligamenta hæcce bina concurrunt, ut facilius extrorsum, & introrsum verti queat radius.

3) *L. capsulare* oritur ex ambitu marginis cavitatis glenoideæ extremitatis inferioris radii, & capitis cubiti inferioris; cingit ossa tria prima carpi.

4) *L. duo transversa*; unum horum a cavitate articulari ulnæ deorsum ad os unciforme, & cuneiforme carpi fertur; alterum a processu styloideo radii ad os proficiscitur naviculare.

5) *L. obliquum* oritur a protuberantia minori ulnæ, spatium a ligamento interosseo superius interceptum oblique emetiens, ad radium, hujusque tuberculum tendit, eique adnectitur.

6) *L. interosseum*, ligamentum latum & robustum est, inter ulnam & radium hærens. Adfigitur angulo interno radii, & angulo externo ulnæ. Versus extremitatem superiorem ossium antibrachii spatium,

tium, uti antea dictum fuit, intercipit, quod *ligamentum obliquum* occupat.

Componitur ligamentum hoc fibris sese mutuo decussantibus, hinc inde interstitia exigua intercipientibus, per quæ vasa feruntur; faciebus duabus ligamenti hujus latis muscoli multi adhærescunt.

LIGAMENTA CARPI.

Ossa carpi tum inter sese, tum cum *antibrachio*, & *ossibus metacarpi* sequentibus ligamentis uniuntur.

Ligamenta carpi propria sunt :

1) *L. ossium carpi commune capsulare* dicitur illud, quo series prima ossium carpi cum serie horum ossium secunda jungitur.

2) *L. ossium carpi brevia* ligamenta sunt exigua, brevia, quibus tum *ossa carpi* in unam continuam seriem nectuntur, tum & series ipsæ invicem uniuntur; *ligamenta* vocantur *obliqua*, *transversa*, *capsularia*, & *propria ossium carpi*.

Ligamenta, quorum ope *carpus* cohæret cum *brachio anteriori*, supra jam exposita fuerunt.

Ligamenta, quæ *carpum* jungunt *ossibus metacarpi*, sub *ligamentis metacarpi* recensentur.

LIGAMENTA METACARPI.

Ossa metacarpi uniuntur loco posteriori tam cum *ossibus carpi*, quam & inter sese mutuo; fit hoc

1) *L. articularibus*, hæc brevia, & firma sunt ligamenta, queis series ossium carpi secunda connectitur cum extremitate posteriori ossium metacarpi; ratione situs varii, diversæque fibrarum directionis *ligamenta* dicuntur *dorsi manus*, *lateralia*, *recta*, *perpendicularia*, e. s. p.

2)

2) *L. interosseis metacarpi*; hæc exigua sunt; & extremitatem anteriorem, & posteriorem ossis metacarpi unius cum extremitate posteriori, & anteriori ossis alterius revinciunt.

LIGAMENTA DIGITORVM.

Ligamenta phalanges digitorum quatuor tum inter sese, tum cum ossibus metacarpi, pollicem vero cum osse carpi multangulo magno unientia, sunt:

1) *L. capsularia phalangum digitorum* conjungunt extremitates anteriores ossium metacarpi cum extremitatibus posterioribus phalangum digitorum quatuor seriei primæ. Hinc in quovis digito a phalange una ad alteram decurrunt, atque sic phalanges omnes simul firman.

2) *L. lateralia phalangum digitorum* ligamenta robusta sunt, quorum ex quovis latere unum ab osse uno ad os alterum supra positum fertur, & ligamento capsulari articulationis implantatur.

3) *L. capsulare pollicis* cingit extremitatem posticam phalangis primæ pollicis, adhærescit ex omni ambitu ossi multangulo magno carpi.

LIGAMENTA MANVS, TENDINES MUSCULORVM MANVS IN SITV SVO RETINENTIA.

Ligamenta, quibus tendines musculorum manus in situ suo debito retinentur, sunt:

1) *L. carpi transversale externum*; ligamentum hoc robustum oritur ab osse pisiformi carpi, & processu styloideo cubiti, transverso decursu per dorsum manus fertur, &, magis expansum, in facie hujus externa, ac processu styloideo radii terminatur; fibras quasdam emittit transcendentes muscolum abducto-

rem

rem pollicis : inter ligamentum hoc ipsum, & ossa transeunt tendines musculorum extensorum carpi, & digitorum.

2) *L. sex vaginalia Winslowii*, seu *transversalia tendinum extensorum*; ligamenta hæc brevia sub priori hærent, adligata tum huic eidem, tum & subjectis ossibus, & tendines musculorum extensorum vaginæ adinstar amicientia.

3) *L. tendinum extensorum transversa* ligamenta brevia sunt, transversim excurrentia in dorso manus sita, a tendine uno ad alium exporrecta.

4) *L. carpi transversale internum* robustum & firmum ligamentum in facie interna carpi eminentiis hujus quatuor adhæret; sub ligamento hoc eodem transeunt tendines musculorum flexorum digitorum.

5) *L. palmaria transversa* adnectuntur capitibus ossium metacarpi, exhinc transversim feruntur, musculos lumbricales metacarpi obtegunt, & tum ossibus metacarpi, tum ligamentis vaginalibus tendinum flexorum inplantantur.

6) *L. vaginalia tendinum flexorum* oriuntur a ligamento transverso interno, tendines vaginæ adinstar ambiunt, & una cum hisce palmam transcendentes ad extremas usque digitorum phalanges proficiscuntur, ubi una cum tendinibus muscoli perforantis terminantur.

7) *L. vaginalia*, seu *cruciata phalangum* tum transversa, tum & decussata directione feruntur supra ligamenta statim dicta vaginalia a margine uno ad marginem alterum lateris oppositi phalangis; adhærescunt itaque marginibus phalangum, & sic tendines in situ suo magis firmant.

8) *L. tendinum flexorum accessoria*, ligamenta hæc parva, firma tamen oriuntur a prima, & secunda digitorum phalange; amicientur a ligamentis vaginalibus

bus tendinum, & in tendinibus muscoli perforantis & perforati evanescent.

LIGAMENTA ARTICVLATIONIS OSSIS FEMORIS CVM ACETABVLO.

*L*igamenta duo neētentia caput ossis femoris cum acetabulo ossium innominatorum firmissima sunt, ac robustissima ligamentorum corporis universi omnium.

1) *L. capsulare* crassum, amplum, & fortissimum oritur a tota peripheria marginis acetabuli, & a spina inferiori iliaca; supra caput ossis femoris descendit ac insertione circulari adnectitur collo toti, basi que colli ossis nunc dicti.

2) *L. teres*, seu rotundum robustum, tenax, non ex integro rotundum, sed nonnihil complanatum est. Oritur intra ipsam articulationem ex cavo acetabuli, & foveolæ, in capite ossis femoris conspicuæ, inseritur.

LIGAMENTA ARTICVLATIONIS OSSIS FEMORIS CVM TIBIA, FIBVLA, ET PATELLA.

*L*igamenta quibus ossa hæc tria, tum & cartilagine illis interjectæ femilunares invicem uniuntur, sunt:

1) *L. laterale internum*, fat latum hoc est; oritur a facie externa condyli interni ossis femoris, ad quatuor circiter digitos transversos dein descendit, & inseritur parti superiori condyli interni tibiæ.

2) *L. laterale externum* latum adeo non est, crassius tamen præcedente, & exoritur a facie externa condyli externi ossis femoris, hinc descendit, ac in ligamenta duo finditur, quorum majus adnectitur faciei

ciei externæ condyli externi tibiæ, minus vero superius capiti fibulæ.

3) *L. capsulare*: oritur loco superiori a tota peripheria condylorum amborum ossis femoris, inferius adnectitur marginibus condylorum tibiæ, anteriori margini toti patellæ, quæ hic loci vices ligamenti capsularis obit. Ligamentum hoc augetur multum anterius ab expansione fasciæ latæ, & tendinibus muscutorum vicinorum.

4) *L. posticum* oritur posterius ab eminentia condyli externi femoris, supra ligamentum capsulare oblique descendit, & sub condylo tibiæ interno inseritur.

5) *L. alare majus, & minus*, ligamenta bina lata sunt speciem alarum referentia, e duplicatione ligamenti capsularis exsurgentia; adhærent lateribus patellæ, & in pinguedine ibi loci posita evanescent.

6) *L. cruciata* ligamenta duo robusta sunt, intra ligamentum capsulare situ decussato sibi superimposita: *anterior* oritur ab eminentiis cavitatibus superficialibus condylorum tibiæ interceptis, exhinc oblique adscendit, foveæ semilunari condyli externi ossis femoris inplantandum: *posterior* oritur ab iisdem eminentiis, per incisuram inter condylos ambos ossis femoris hærentem oblique adscendit, & foveæ semilunari condyli femoris interni adfigitur.

7) *L. cartilaginum semilunarium* vocantur sic ligamenta duo, cartilagine inter condylos femoris, & foveas superficiales articulares tibiæ hærentes, semilunares, tum inter sese, tum & cum tibia, & femore connectentia.

Instructæ cartilagine hæ ligamenti sunt & aliis minoribus, quorum ope adhærescunt tuberculis tibiæ, tum & ligamento, quo ambæ invicem conjunguntur.

8) *L. patellæ* ligamentum robustum est, oriens ab incisura apicis patellæ, exhinc recta descendens, & anterius spinæ tibix adnatum.

LIGAMENTA FIBULAE.

Ligamenta unientia fibulam cum tibia sunt:

1) *L. capsulare extremitatis superioris*, ambit hoc caput fibulæ, & condylo externo tibix adhærescit.

2) *L. interosseum*, ligamentum latum, robustum ligamento interosseo antibrachii simile, inter tibiam & fibulam hæret expansum. Adfigitur hinc angulo toti postico tibix, illinc angulo interno fibulæ, componitur fibris robustis firmiter sibi invicem intertextis hinc inde interstitia minora pro transitu vasorum intercipientibus. Superne aperturam relinquit a musculis ex utraque latere positis obtegendam. Faciebus ligamenti hujus latis adhærescunt nonnulli musculi ad pedem extremum proficiscentes.

3) *L. extremitatis inferioris*, ligamenta quatuor brevia, robusta, firmaque sunt; duo ex his *latus anterius* duoque posterius *occupant*; a tibia ad malleolum fibulæ oblique feruntur.

LIGAMENTA TARSII.

Ligamenta jungentia astragalum cum tibia, & fibula sunt.

1) *L. fibulæ anticum*, oritur a facie anteriori malleoli externi, oblique antrorsum migrat, & processui astragali superius inseritur.

2) *L. fibulæ medium*, oritur ab apice malleoli externi, decursu perpendicularari deorsum fertur, & in facie calcanei externa laterali terminatur.

3) *L. posticum fibulae* oritur a margine inferno, & postico malleoli externi, oblique postrosum flectitur, ac processui astragali inplantatur.

4) *L. tibiae deltoideum*, oritur a margine tibiae, & apice malleoli interni; terminatur tum ad processum astragali, tum ad peripheriam eminentem ossis navicularis.

5) *L. capsulare*, oritur ab ambitu toto marginis foveae articularis tibiae, adhærescit undique circa astragalum.

LIGAMENTA METATARSI.

Ossa metatarsi tum *inter sese*, tum posterius cum *tarso* vinciuntur sequentibus ligamentis :

1) *L. capsulare* jungit os metatarsi pollicis cum osse cuneiformi tarfi.

2) *L. articularia* conjungunt extremitatem posteriorem ossium metatarsi cum ossibus tarfi. Plura hic adsunt, quæ ratione situs diversimode adpellantur v. g. *ligamenta plantaria, pedis dorsalia, lateralia, e. s. p.*

3) *L. transversa dorsi pedis* tria sunt, in dorso pedis situ transverso ea ratione posita, ut ab ossibus binis metatarsi unum semper intercipiatur.

4) *L. transversa plantæ* etiam tria sunt; uniuntur cum ossibus metatarsi in planta eodem modo, uti priora in pedis dorso.

5) *L. interossea metatarsi* denuo tria sunt: ponuntur uti præcedentia, lateraliter tamen, inter ossa metatarsi.

LIGAMENTA DIGITORUM.

Digiti pedis uniuntur *inter sese*, & cum *ossibus metatarsi* ligamentis sequentibus.

1) *L. capsularia* ambiunt extremitates posticas phalangum digitorum seriei primæ, & extremitates anticæ ossium metatarsi: eadem ratione ambiunt & extremitates phalangum reliquarum, hincque conjungunt phalanges tam cum extremitatibus anterioribus ossium metatarsi, quam & inter sese.

L. lateralia, ex lateribus phalangum ab una ad alteram excurrunt, & ubique capsulis articularibus adhærescunt.

Ligamenta hæc omnia, eadem ratione, uti in manu, in dorso pedis ab expansione tendinum musculorum extensorum, in planta ab expansione tendinum musculorum flexorum augefcunt.

LIGAMENTA, RETINENTIA TENDINES PEDIS IN SITU SUO.

Tendines musculorum pedis eadem ratione uti tendines musculorum manus coercentur in dorso, & planta pedis ope ligamentorum, ne ex situ suo debito sub motu validiori removeantur. Ligamenta hæc sunt:

1) *L. vaginale tibiæ*, ligamentum est fortissimum enatum ab angulo anteriori in extremitate inferna tibiæ, tendines musculorum hic hærentes omnes firmiter ambiens, & in facie externa fibulæ terminatum.

2) *L. transversum tarfi*, seu *cruciatum* ligamentum duplex est: unum oritur in latere pedis externo supra malleolum fibulæ externum; alterum a processu calcanei: ligamenta hæc bina invicem decussantur ad nexum tibiæ, & tarfi, tumque primum adfigitur malleolo interno, alterum faciei internæ ossis navicularis. Ligamento hoc eodem firmantur tendines musculorum digitalium.

3) *L. tendinum peroneorum*, oritur a parte anteriori calcanei, inseritur in latere externo eminentiæ nunc dicti ossis.

4) *L. laciniatum*, oritur ab ambitu malleoli interni, radiatim expanditur, & fibris suis diductis tum evanescit in pinguedine ibi hærente, tum in membrana propria muscoli abductoris pollicis, tum demum in facie interna calcanei: vaginæ ad instar ambit tendines, & vasa excavationem calcanei trans-euntia.

5) *L. vaginale extensoris pollicis* amicit vaginæ ad instar tendinem hujus muscoli.

6) *L. vaginale flexoris proprii pollicis*; includit, uti vagina tendinem dicti muscoli in excavatione calcanei; inseritur faciei inferiori, & laterali hujus ossis.

7) *L. vaginalia tendinum flexorum*; vocantur sic ligamenta vaginas referentia, quibus tendines mu-

sculorum flexorum recluduntur in facie phalangum inferiori, seu concava.

3) *L. accessoria tendinum flexorum* brevia, sed robusta sunt; uti in digitis manus a phalangibus digitorum pedis exoriuntur, & a vagina tendinum inclusa in tendinibus his iisdem evanescunt.

L. tendinum extensorum transversa, vocantur hoc nomine ligamenta parva, quæ a tendine uno horum musculorum ad alterum feruntur, ac eosdem in situ suo retinent.



MYOLOGIA.

MUSCULI IN GENERE.

MUSCULVS pars carnosâ corporis humani est, cujus ope motus sensibilis producitur.

Musculi componuntur *fibris* duplicis generis : sub primam classem referuntur fibræ rubentes, molles, irritabiles, ac sensiles, hæc fibræ dicuntur *carneæ*; sub altera classe comprehensæ fibræ tenuiores, tenaciores, fortiores, coloris candicantis, subargentei sunt; hæc, dum in fasciculum angustiozem, & rotundum collectæ sunt, *tendinum*, dum vero in superficiem majorem, latam expanduntur, *expansionis aponevroticæ* nomine veniunt.

Quivis musculus dividitur in partes tres, nempe mediam, seu *ventrem*, nunquam non fibris carneis constantem, in *principium*, & *finem*; partes hæc duæ ultimæ plerumque tendineæ sunt; prior *punctum* fixum, hæc *punctum mobile*, vel & voce simplici *tendo* dicitur.

Musculi diversa adquirunt *nomina* ratione *magnitudinis*, *figuræ*, *situs*, *directionis*, *compositionis*, *usus*, *partiumque* *queis adnectuntur*: hinc musculi dantur *magni*, *medii*, *parvi*, *lati*, *triangulares*, *rotundi*, *pectorales*, *brachiales*, *obliqui*, *transversi*, *tricipites*, *biventres*, *pronatores*, *flexores*, *cleidomastoidei*, *coracoidei*, e. s. p.

In omnibus musculis deprehenduntur fibræ molles, longæ, tenues, textu copioso celluloso, quo obducuntur, in fasciculos colligatæ, fasciculi hi ipsi junguntur ope textus ejusdem cellularis, maximam partem pinguedine repleti in fasciculos majores; fasciculi hi septis membranaceis ab invicem discreti sunt, donec multi tales fasciculi membrana communi tenui cellulari obducti *musculum* constituent. Membrana hæc simplex est, lævis, sæpius pinguissima, & a textu celluloso enata, *tunica* dicitur *cellulosa musculi*: textus

tus autem cellulofus, tendines ambiens, & nunc dicto fimillimus, *vagina* adpellatur.

Fibræ, queis musculi componuntur, aut secundum horum longitudinem excurrunt, aut semicirculares sunt, aut obliquæ, aut transversæ; si omnes eadem directione ferantur, *musculus* oritur *simplex*, si vero varia directione in eodem musculo excurrant, *musculus* enascitur *compositus*; interim tamen musculi majores omnes in genere, qui ex aliis minoribus enascuntur, musculi audiunt compositi.

Musculi omnes instructi sunt *nervis*, per fibras hujus carneas tenuissimas distributis, tum & *arteriis*, ac *venis*, magna copia inter ipsas musculares fibras per tunicam ante dictam cellulofam propagatis, ubi sub specie retis subtilissimi evanescent, & musculo colorem rubrum conciliant. Tendines vero vasis solum gaudent lymphaticis.

Vsus musculorum est, ut instrumenta motuum in corpore sint: motus autem in plerisque musculis ex imperio fiunt animæ, in quibusdam tamen, v. g. in corde, in intestinis, e. s. p. per viam insitam.

M V S C V L I C A P I T I S.

MVSCVLI CAPITIS aut illico sub integumentis hærent cranii communibus; aut referendi sunt ad oculos, aures, nasum, os, labia, maxillam inferiorem, os hyoides, linguam, pharyngem, palatum molle, caputque asperæ arteriæ; aut demum dicantur motui ipsius capitis.

M V S C V L I C R A N I I

Sunt:

Musculi duo *frontales*, & *musculi* duo *occipitales*; describuntur ab Auctoribus quibusdam, quum expansione

panfione aponevrotica invicem connexi fint, ſub communi nomine musculli *epicranii*, aut *digaſtrici cranii*: conſiderabimus tum *frontales*, tum *occipitales* ſeorſim.

Musculli frontales musculli duo tenues ſunt, quorum quovis ex latere unus oritur circa medium marginis orbitalis ex parte hujus interiori principio ſubcarneo: uniuntur ſub initium tum invicem, tum & ope fibrarum quarumdam cum muscullis ſuperciliorum, orbicularibus palpebrarum, & naſi; exhinc oblique extrorſum verſus aſcendunt ad futuram coronalem, ubi tendinei maxime evadunt; adhæreſcunt firmiter membranæ offibus ſyncipitis ſuperinterea, & una cum expansione tendinea muscullorum occipitalium *galericulum* ſic dictum *aponevroticum* conſtituenti.

M. occipitales nomen adepti ſunt ab offe, cui incumbunt: oriuntur ex utroque latere a ſpina externa offis occipitalis, verſus proceſſum maſtoideum tranſverſim tendentis; tenues, & ſub initium tendinei aſcendunt a partibus poſticis oblique ſurſum, ſpatium duorum circiter digitorum tranſverſorum emenſi, terminantur in expansionem latam aponevroticam, cum tendine lato frontalium coëuntem, &, uti antea dictum fuit, *galericulum aponevroticum* formantem, cuti firmiſſime, pericranio autem laxè ſolummodo adhærentem; unde & cutis una cum *galericulo* hoc eodem facile movetur: extenditur utrinque ad collum uſque, & musculos, ibi loci poſitos, obtegit.

Uſus quatuor horum muscullorum eſt; ut frontem corrugent, & denuo exporrectam reddant, ſupercilia elevent, & cutim motu reciproco antrorſum, aut poſtrorſum ducant.

MUSCULI SUPERCILIORUM.

Corrugator ſuperciliorum ſitus eſt retro partem inferiorem musculli frontalis; oritur autem ad nexum

offis nasalis cum osse frontis, fibras tum emittit secundum arcum orbitalem sursum & extrorsum ambitum emetientes circularem; evanescunt tum in musculis supra positis, tum & in integumentis palpebrarum communibus.

Vsus. Cum sociò agens supercilia mutuo adducit, cutim intra supercilia in rugas longitudinales contrahit.

MUSCULI PALPEBRARVM.

Ad palpebras ex utroque tres referuntur muscoli:

- 1) *Orbicularis palpebrarum.*
- 2) *Levator palpebræ superioris.*
- 3) *Depressor palpebræ inferioris.*

1) *Orbicularis palpebrarum* tenuis, satisque latus est: fibræ musculi hujus carneæ adnectuntur in ambitum margini toti orbitæ; dum ad os pervenerunt zygomaticum, tenuiores evadunt, & latiores; in palpebra superiori crassiores sunt, magisque sibi invicem adhærentes, fibris demum intertexuntur musculi frontalis; decussantur præterea musculi orbicularis fibræ in angulo oculi externo, & interno, tendinem etiam in angulo interno emittunt parvum, processui nasali maxillæ superioris adnexum.

Vsus. Palpebras claudit, unde & ab aliquibus *sphincter* oculi dicitur.

2) *Levator palpebræ superioris* tenuissimus, incipit tenui tendine in fundo orbitæ prope foramen opticum, antrorsum fertur; per decursum magis magisque latefcit, & ope tendinis latioris adhæret cartilagini tarso palpebræ superioris;

Vsus ex denominatione constat.

Depressor

Depressor palpebræ inferioris oritur subin ab osse zygomatico, maximam partem vero e fibris platysmyoidis per genas adscendentibus, exhinc oblique adscendit, & tarso palpebræ inferioris adnectitur.

Vsus ex denominatione patet.

MUSCULI BULBI OCULI.

Motui bulbi oculi sex dicati sunt muscuali; *obliqui* duo, & quatuor *recti*.

- 1) *Obliquus superior*, seu *magnus*.
- 2) *Obliquus inferior*, seu *parvus*.
- 3) *Rectus superior*.
- 4) *Rectus inferior*.
- 5) *Rectus internus*.
- 6) *Rectus externus*.

1) *Obliquus superior*, seu *magnus*, aut *trochlearis* oritur tendine tenui proxime ad foramen opticum inter muscolum oculi superiorem, & internum rectum, exhinc antrorsum fertur, tendine longissimo tenui transit trochleam compositam ex canale insculpto ossi frontis in angulo orbitæ interno, & ex cartilagine in medio excavata, & ope duplicis ligamenti hic loci adligata; trochleam hanc egressus retrorsum flectitur, & faciei posticæ bulbi oculi prope rectum oculi externum implantatur.

Vsus. Bulbum oculi deorsum, & introrsum trahit.

2) *Obliquus inferior*, seu *parvus* oritur in fovea parva hærente in processu nasali ossis maxillaris superioris versus marginem orbitæ, & proxime ad orificium canalis lacrymalis ossei; exhinc ambit oculi bulbum, & implantatur demum huic eidem tendinis latioris ope in postica, & laterali parte retro muscolum rectum externum.

Vsus.

Vsus. Bulbum oculi introrsum, & simul sursum movet.

Musculi recti bulbi oculi tum a situ, tum ab officio sua adquisiverunt cognomina :

- 1) *Rectus superior*, *adtollens*, aut *superbus*.
- 2) *Rectus inferior*, *deprimens*, aut *humilis* :
- 3) *Rectus internus*, *adducens bulbum*, aut *bibitorius*.
- 4) *Rectus externus*, *abducens bulbum*, aut *indignatorius*.

Musculi nunc dicti quatuor enascuntur ope tendinum exiguorum proxime ad foramen opticum ab ipsa periorbita, seu periosteo orbitam investiente; ex hinc carnei recta antrorsum feruntur, & tendinum latiorum interventu inseruntur tunicæ bulbi oculi scleroticæ.

Vsus ex descriptione elucescit.

M V S C V L I A V R I S.

Musculi *Auris* distinguuntur in *externos*, & *internos*.
Externi denuo dirimuntur in duas classes.

Tres referuntur ad *aurem externam*, adnexi partibus circumpositis aliis :

- 1) *Auricularis superior*, *externus*.
- 2) *Auricularis anterior*, *externus*.
- 3) *Auricularis posterior*, *externus*.

Quinque alii, exigui quidem, semper tamen præsentibus, dicantur *cartilaginibus auris*.

- 1) *Tragicus*.
- 2) *Antitragicus*.
- 3) *Transversus auriculæ*.
- 4) *Major helcis*.
- 5) *Minor helcis*.

Musculi Auris interni, quatuor sunt, valde exigui.

- 1) *Musculus mallei externus.*
- 2) *Laxator tympani.*
- 3) *Tensor tympani.*
- 4) *Stapedius.*

MUSCULI AVRIS EXTERNAE.

1) *Auricularis superior externus*, aut *adtollens* componitur fibris tenuissimis carneis, exorientibus ab expansione aponevrotica muscutorum frontaliū, & occipitalium prope regionem temporalem; fibræ hæ transcendunt dein expansionem aponevroticam musculi temporalis, & tendinis ope inplantantur helici interiori, partim & exteriori prope cavitatem innominatam auris externæ.

Vsus ex nomine notus est.

2) *Auricularis anterior, externus*, reliquis minor, exoritur in basi processus zygomatici a membrana tendinea musculi temporalis, transversim fere retrorsum excurrit, & sub initium helicis externæ adhærescit parti contiguæ conchæ.

Vsus. Agens partem hanc conchæ intendere videtur.

3) *Auricularis posterior externus*, aut *retrahens* transversim fere situs est; haud raro duplex occurrit, & duobus præcedentibus robustior est. Oritur ab expansione aponevrotica muscutorum cervicalium ad processum mastoideum ossis temporum, transversim anteriora versus migrat, & parti convexæ conchæ adfigitur.

Vsus. Concham retrahit.

MUSCVLI CARTILAGINVM AVRIS.

1) *Tragicus* exiguus, fere quadratus est; oritur a margine tragi, terminatur anterieus, & exterieus in eodem trago.

Vsus. Tragum tendit, & ostium auris forsan nonnihil dilatat.

2) *Antitragicus*, oritur a radice helieis interioris, inferitur inferius in parte superiori antitragi.

Vsus. Ostium conchæ dilatat.

3) *Transversus auriculæ*, oritur a parte superna conchæ, transversum posteriora versus excurrit, & helieis interiori adnectitur.

4) *Major helieis exterioris* angustus, & oblongatus oritur a parte antica processus acuti cartilaginei exterioris helieis, secundum ductum helieis hujus ascendit, & eidem inplantatur.

5) *Minor helieis exterioris*, oritur a parte inferna helieis exterioris, secundum hujus flexuram externe ascendit, & margini hujus ejusdem inferitur.

Vsus. Musculi nunc dicti duo cartilagineas auris tendere videntur, ut remissiores soni eo distinctius percipiantur.

MUSCVLI AVRIS INTERNAE.

1) *Mallei externus* oritur a processu spinoso ossis sphenoides inter processum squamosum, & petrosum ossis temporis prodeunte; transit dein fissuram exiguam cavitatis articularis ossis temporum, & adnectitur processui longissimo mallei. Dubitant multi, an & musculus legitimus sit, quum a membrana spongiosa rubra distingui nequeat.

2) *Laxator tympani* minimus est, & tenuissimus: oritur superne a margine membranæ tympani

ad

ad finem meatus Auditorii externi, ubi adhæret membrana tympani, terminatur tendine tenuissimo ad manubrium mallei proxime ad processum hujus minorem.

Vsus hinc est, ut manubrium mallei retrorsum, & extrorsum ducat, sicque intensam membranam tympani relaxet. Dubitant nihilofecius anatomici celeberrimi, an verus musculus sit.

3) *Tensor tympani* adhæret ope tendinis minimi processui ossis sphænoidei inter canalem carotidis internæ, & orificium pro arteria duræ meningis, excurrit in sulco sibi proprio tubæ Eustachii, & ibidem loci amicitur a vagina membranacea, una cum sulco canalem integrum producente; tum sensim tenuior factus adnectitur circa finem canalis, deorsum, & extrorsum circa trochleam flexi, initio manubrii mallei.

Vsus. Agens manubrium mallei, & cum hoc simul & membranam tympani introsum ducit; sicque intendit.

4) *Musculus stapedius* parvus est, cono cartilagineo inclusus, exit ex hoc tendo musculi, antrorsum proficiscitur, & capiti stapedis sub incude adhæret.

M V S C V L I N A S I.

Naso tria musculorum paria propria sunt; ex utroque latere hærent tres.

1) *Levator alæ nasi, labiique superioris.*

2) *Constrictor vel compressor nasi.*

3) *Depressor alæ nasi.*

Referunt huc aliqui &

4) *Nasalem labii superioris.*

1) *Levator alæ nasi, labiique superioris* oritur tendine duplici a processu nasali ossis maxillaris superi-

oris, in lateribus nasi descendit, & parte inferiori sua inseritur pinnis narium, exteriori autem labio superiori, & sphincteri labiorum.

Vsus. Agens dilatat pinnas narium, & labium superius elevat; hinc nares dilatat.

2) *Constrictor, vel compressor nasi*, musculus tenuis oritur ab eminentia ossis maxillæ superioris supra dentes molares principio angusto; decurrens, pinnasque narium superascendens latefcit, & partim confunditur in dorso nasi cum socio, partim in pinnis narium evanescit.

Vsus. Dum uterque agit, pinnæ adprimuntur septo narium intermedio, sicque nares coarctantur.

3) *Depressor alæ nasi* oritur ab osse maxillari superiori, & alveolis dentium superiorum incisorum, & caninorum; latefcens dein adscendit, & septo, partique infimæ pinnæ narium implantatur.

Vsus. Nasum deorsum trahit, & nonnihil constringit.

Nasalis labii superioris. Vide circa hunc *Musculos oris, & labiorum.* Nro 7.

Vsus, apicem, septumque narium deorsum trahit.

MUSCULI ORIS ET LABIORVM.

Labii adtribuimus duodecim musculos; quorum octavus & undecimus simplices, reliqui omnes duplices sunt.

- 1) *Levator labii superioris, alæque nasi.*
- 2) — — — *proprius labii superioris.*
- 3) — — — *anguli oris.*
- 4) *Zygomaticus major.*
- 5) — — — *minor.*
- 6) *Buccinator.*

7) *Nasalis labii superioris.*

8) *Orbicularis labiorum.*

9) *Depressor anguli oris, seu triangularis.*

10) - - *Labii inferioris, seu quadratus.*

11) *Levator menti.*

12) *Latissimus colli, seu platysmamyoïdes.*

1) *Levator labii superioris, atque nasi, V. musculos nasi, n. I.*

Vsus patet ex denominatione.

2) *Levator proprius labii superioris, aut incisivus,* oritur ab osse maxillari superiori ad marginem infraorbitalem tendine minimo: fibræ carneæ oblique introrsum ad labium procurrunt superius, ibique loci permiscetur cum fibris orbicularis labiorum.

3) *Levator anguli oris, seu caninus* fibris tenuibus compositus oritur ab osse maxillæ superioris illico infra foramen orbitale anterius tendine duplici, sed brevissimo, exhinc ad angulum oris descendit, & in orbicularem demum terminatur labiorum.

Vsus tum hujus musculi, tum præcedentis ex denominatione elucescit.

4) *Zygomaticus major* longus est, ac tenuis; oritur a parte ossis Zygomatici connexa cum processu Zygomatico ossis temporum: fibræ musculi hujus in fasciculum quasi collectæ ab exterioribus interiora versus oblique descendunt, & decussantur cum fibris musculi elevatoris anguli oris, & sphincteris labiorum, in quo & evanescunt.

Vsus. Musculo utroque ex latere suo agente, anguli oris ab invicem diducuntur: agente nonnisi unico, angulus oris, & gena lateraliter sursum elevantur.

5) *Zygomaticus minor* si adsit (nam sæpe deficit) minimus est, & oritur proxime sub priori pau-

lo magis interiora versus, deorsum descendit, & in musculo terminatur labiorum sphinctere.

Vsus. Agit uti prior.

6) *Buccinator* exoritur ab alveolis dentium molarium superiorum, descendit ad alveolos molarium inferiorum: fibræ hujus carneæ conjunguntur & loco anteriori in angulo oris cum sphinctere labiorum.

Vsus. Sub masticatione cibos dentibus subjicit; sub inflatione instrumentorum musicorum aërem aut retinet magis, aut pro lubitu musici foras emittit. Notandum adhuc circa musculum hunc eundem est, perforari eum in medio a ductu salivali stenoniano.

7) *Nasalis labii superioris* componitur fibris paucis carneis, ab apice nasi, huicque contiguo septo narium exortis, ad labium superius descendentes, hinc exteriora versus ad angulum oris productis, & in orbiculari labiorum evanescentibus.

Vsus: agens aut septum narium, & apicem nasi deorsum trahit, aut angulos oris contrahit, hinc labium superius corrugat.

8) *Orbicularis labiorum*, aut *sphincter oris*, latus satque crassus, imprimis versus angulos labiorum est, totum emetitur oris ambitum ea ratione, ut fibræ labii superioris decussentur cum fibris labii inferioris ad oris angulos: hanc ob rationem musculus hic ab auctoribus quibusdam in *superiorem*, ac *inferiorem* subdividitur, quorum quisque figuram semicircularem habet; ossi adnectitur nulli, sed a musculis roboratur vicinis, in eum fibras mittentibus.

Vsus. Os contrahit, labia corrugat.

9) *Depressor anguli oris* sat tenuis, & triangularis est, unde a quibusdam *musculus triangularis labiorum* dictus fuit: oritur principio carneo a margine maxillæ inferioris e latere menti fibris magis expansis, quæ adscendentes contrahuntur in fasciculum angustiore;

deter-

determinantur demum decussatæ cum fibris sphincteris labiorum ad angulum oris.

IO) *Depressor labii inferioris* tenuis est, ab initio ad finem usque ejusdem latitudinis, hinc, quum anguli quatuor enascantur, ab auctoribus nonnullis *musculus quadratus menti* dictus fuit: oritur a mento, inferitur in medium labii inferioris, ubi cum sphinctere labiorum, & cum depressore anguli oris confunditur.

II) *Levator menti*, aut *incisivus inferior* oritur ab excavatione ossis maxillaris inferioris, supra mentum inpressa, illico infra dentes incisores, deorsum descendit, & ad marginem inferiorem menti terminatur in cutim.

Vsus. Labium inferius, ac mentum elevat.

I2) *Latissimus colli*, seu *Platysmamyoides* cum socio suo partem totam anteriorem, tum & partes laterales colli obtegit: latus & tenuis musculus oritur a clavicula, & ab humero, per collum ad labia oblique fertur; & fere ad aures usque producitur; evanescit demum insensibiliter in cuti faciei.

Vsus. Cutim colli deorsum, & oblique nonnihil ad latera ducit, collo partim superintendit.

MUSCULI MAXILLAE INFERIORIS.

Maxilla inferior quinque gaudet musculorum paribus: hinc ex utroque latere simul sumtis musculis decem movetur.

1) *Masseter.*

1) *Temporalis.*

3) *Pterygoideus internus.*

4) — — — *externus.*

5) *Biventer maxillæ inferioris.*

1) *Masseter*, musculus crassus, & robustus oritur principio duplici, vel & triplici a Zygomate, & margine infimo ossis malæ, oblique nonnihil descendit, & adhærescit demum faciei externæ anguli maxillæ inferioris.

Notandum adhuc est, excurrere supra masseterem ductum salivalem porotidicum.

Vsus. Concurrit ad elevandam maxillam inferiorem & os claudendum.

2) *Temporalis*, musculus latus, & complanatus enascitur a peripheria semicirculari conspicua ex lateribus cranii; adnectitur itaque ossi frontis, sincipitis, & temporali, obtegit hinc superficiem omnem interceptam, foveam temporalem, & Zygomaticam, ac a laminis binis pericranii hic loci dehiscentis amittitur; fibræ carneæ prope pontem Zygomaticum magis ad se mutuo accedunt, ab externa parte plurimum tendinescunt, ab interna indolem priorem carneam retinent, pontem Zygomaticum transeunt, & ope tendinis robusti adhærescunt processui coronoideo maxillæ inferioris. Musculum hunc eundem a superiori, & inferiori parte expansio fortis aponeurotica obducit.

Vsus. Maxillam inferiorem elevat, & partim ad latera ducit.

3) *Pterygoideus major*, aut *internus* oritur fibris carneis a cavitate foveæ pterygoideæ, quam fere explet, ex interiori latere alæ externæ: hinc oblique descendit ad angulum maxillæ inferioris, & tendineus factus inferitur faciei ossis hujus ejusdem internæ eadem fere ratione, uti masseter terminatur e latere externo.

Vsus. Maxillam inferiorem elevat, & ad latera movet.

4) *Pterygoideus minor*, aut *externus*, situm fere transversum habet in processu pterygoideo externo, & capite maxillæ inferioris, principio parvo tendineo adhæret faciei externæ processus pterygoidei externi, tum & parti maxillæ inferioris, processui huic eidem contiguæ: tum postrosum, & partim extrorsum fertur, & adnectitur extremitate altera foveolæ maxillæ inferioris, antè capiti hujus ejusdem maxillæ proxime subjectæ, tum & ligamento ibi hærenti capsulari, & margini cartilaginis interarticularis.

Vsus. Maxillam inferiorem antrorsum ducit, hinc efficit, ut dentes incisorii, & canini inferiores ante superiores promineant; atque id quidem fit, dum ambo muscoli simul agunt, si vero agat unicus, maxilla inferior oblique antrorsum ducitur.

5) *Digastricus maxillæ inferioris* oritur principio tendineo ab interna parte maxillæ inferioris, prope hujus symphysin, supra mylohyoideum, crassus illico, carnosusque factus ad duos circiter transversos digitos oblique extrorsum, & deorsum progreditur; tendineus, dein adhærescit expansioni aponevroticæ obductæ ossi hyoideo; tum sursum, & postrosum trans musculum stylohyoideum, quem perforat, latus, in ventrem mutatur carnosum secundum, qui demum ope tendinis foveæ processus mastoidei ossis temporum inseritur.

Vsus. Maxillam inferiorem detrahit; os aperit; os hyoideum, ore clauso, elevat.

MUSCULI OSSIS HYOIDIS.

Ossi hyoidi propria sunt quinque musculorum paria; quorum ex utroque latere quinque hærent.

1) *Sternohyoideus.*

2) *Coracohyoideus.*

3) *Stylohyoideus*.

4) *Mylohyoideus*.

5) *Geniohyoideus*.

1) *Sternohyoideus* longus, tenuis, & complanatus est: oritur superius, & nonnihil lateraliter ab interna facie sterni fibris carnosis, secundum partem colli anticam adscendit, & margini inferiori baseos ossis hyoidei adhærescit.

Vsus. Os hyoideum detrahit.

2) *Coracohyoideus*, longissimus, priori tenuior, nascitur a margine superiori scapulæ; fibræ carneæ oblique valde adscendunt; implantatur lateraliter parti infernæ baseos ossis hyoidis.

Vsus. Agens os hyoides detrahit, & ad latus ducit.

3) *Stylohyoideus* longus, & vix non teres est; oritur tendine breviori a basi processus styloidei ossis temporum; inseritur ossi hyoidi, imprimis ad nexum cornuum majorum cum osse reliquo: fibræ musculi hujus carneæ, sub finem imprimis, ab invicem diducuntur, ut transire easdem queat tendo musculi digastrici.

Vsus. Agens os hyoides lateraliter, & sursum movet.

4) *Mylohyoideus* latus est, sed tenuis, adhæret minimis partibus internis lateralibus maxillæ inferioris, basique ossis hyoidis; oritur a vicinia dentis molaris postremi fere ad symphisin usque maxillæ inferioris in loco maxime anteriori hujus ejusdem maxillæ; exhinc oblique introrsum progreditur, & secundum longitudinem conjungitur cum socio lateris obpositi mediante tendine tenuissimo; inseritur omnium ultimo parti supernæ baseos ossis hyoidis.

5) *Geniohyoideus* exiguus est, longiusculus, complanatus, oriens a symphisi maxillæ inferioris versus

os hyoides recta deorsum excurrentes, hujusque basi sub præcedente insertus.

Vsus. Ambo os hyoides antrorsum, & sursum movent.

MUSCULI LINGVAE.

Linguae dicantur sex musculorum paria :

- 1) *Ceratoglossus.*
- 2) *Basioglossus.*
- 3) *Chondroglossus.*
- 4) *Genioglossus.*
- 5) *Styloglossus.*
- 6) *Lingualis.*

1) *Ceratoglossus* enascitur a cornu majori ossis hyoidis, oblique nonnihil adscendit; & parti laterali linguae implantatur.

Vsus. Linguam retrorsum, & ad latera movet.

2) *Basioglossus* oritur a basi ossis hyoidis, hujusque margine superiori; fibrae carneae versus medium linguae evanescent.

Vsus. Linguam retrorsum, & introrsum ducit.

3) *Chondroglossus* minimus est, & si adsit, fibris paucis componitur carneis, exortis a cartilagine nectente cornua majora cum basi ossis hyoidei, linguae lateraliter insertis.

Vsus: agit uti prior.

4) *Genioglossus* enascitur fibris carneis crassioribus a symphisi maxillae inferioris, secundum longitudinem linguae postorsum excurrit, ejusdemque parti inferiori inseritur.

Vsus. Agens linguam antrorsum ducit.

5) *Styloglossus* longus hic est, ac tenuis, ope tendinis longiusculi enascitur a parte externa proces-

mus styloidei, oblique descendit versus latera linguæ, huic adhærescit, extremitatem suam exhinc producit apici linguæ inferendam.

Vsus. Agentibus utrisque lingua retrorsum, & sursum ducitur, agente unico ad latus agentis movetur.

6) Sub nomine *musculi lingualis* veniunt fibræ omnes carneæ, queis corpus linguæ constituitur.

Vsus. Agentibus hisce fibris lingua contrahitur, incurvatur, latior, aut angustior redditur.

MUSCULI PHARYNGIS.

Tubi alimentaris, aut *pharyngis* pars superior constat maximam partem fibris carneis, diversis partibus vicinis adhærentibus, unde & tot nominibus ab auctoribus fuerunt notatæ. Reduci tamen omnes ad sex sequentia musculorum paria.

Tres *pharyngis sphincteres* sunt:

- 1) *Constrictor pharyngis superior.*
- 2) - - - - - *medius.*
- 3) - - - - - *inferior.*
- 4) *Salpingopharyngeus.*
- 5) *Palatopharyngeus.*
- 6) *Stylopharyngeus.*

1) *Constrictor pharyngis superior*: quum copiosa adeo musculi huius sint capita, anatomici dividerunt illum in totidem separatos musculos, & quemvis horum speciali notarunt nomine.

Fibræ illius carneæ enascuntur a genioglossa, a ceratoglossa, a buccinatorè, ab hamulo, & lamina interna apophyseos petrosæ internæ, a musculo circumflexo palati, a stylopharyngeo, aliisque pluribus, oblique retrorsum adscendunt, & ex utroque latere partem superiorem pharyngis ambiunt, & simul cum constrictore pharyngis medio uniuntur.

2) *Constrictor pharyngis medius* oritur a cornu ossis hyoidis, fibræ carneæ oblique postrosum ascendunt, partem pharyngis ambiunt mediam, ex utroque latere coëuntes angulum produciunt acutum, & in tendinem demum abeunt tenuem subacutum, processui cuneiformi ossis occipitalis prope condylos adnexum.

3) *Constrictor pharyngis inferior* latus est, ac tenuis; oritur tum a processu inferiori cartilaginis thyroideæ, tum & a cartilagine cricoidea fibris latioribus carnosis; hæ, uti in priore, oblique postrosum ascendunt, partem amiciunt pharyngis inferiorem, & ex utroque latere coëuntes angulum constituunt acutum fere perfectum. Ob duplicem hunc exortum Auctores nonnulli binos distinctos ex hoc fecerunt musculos, quorum priorem vocarunt *thyropharyngeum*, alterum autem *cricopharyngeum*. Alii denuo constrictores nunc enumeratos tres omnes in unum contrahunt sub nomine *musculi sphincteris gulæ*.

Vsus trium horum musculorum ex denominatione cujusvis patescit.

4) *Salpingopharyngeus* oritur a salpingis acousticæ extremitate postica, hujusque parte tam ossea, quam cartilaginea; exhinc oblique antrorsum descendit, cum stylopharyngeo jungitur, & in pharyngem terminatur.

Vsus. Pharyngem elevat, hinc dilatat.

5) *Palatopharyngeus* oritur a margine postico ossis palatini, basi columellæ, tum & a processu pterygoideo interno, supra palatum molle excurrit, ad finem hujus ad latus, & nonnihil postrosum flectitur, in facie pharyngis laterali descendit, stylopharyngeo, & salpingopharyngeo jungitur, demumque tum in pharyngem, tum in cartilagineam thyroideam terminatur.

Vsus cum præcedente idem est; simul tamen, cum socio agens, palatum molle deorsum trahit.

6) *Stylopharyngeus* oritur posterius a medio processu styloidei fibris minimis tendineis, quæ tamen illico evadunt carneæ, & in fasciculum teretem adunantur; collectæ sic oblique interiora versus descendunt, permiscentur fibris palatopharyngei, terminantur demum in latera pharyngis, & cartilaginis thyroideæ.

Vsus. Agentibus utrisque pharynx elevatur, ducitur, brevior fit; agente unico, lateraliter elevatur.

MUSCULI PALATI MOLLIS, ET UVULAE.

Palatum molle, seu velum pendulum palatinum una cum uvula gaudet musculis sequentibus.

- 1) *Palatopharyngeus.*
- 2) *Constrictor isthmi faucium.*
- 3) *Levator palati mollis.*
- 4) *Circumflexus palati.*
- 5) *Azygos uvulae.*

1) *Palatopharyngeus.* Vide supra *musculos pharyngis, Num. 5.*

Vsus. Palatum deorsum ducit.

2) *Constrictor isthmi faucium* minimus hic est; nascitur inferius ex latere radice linguæ in arcu palati mollis anteriori, seu minori, sursum adscendit, partem arcus hujus ipsius constituit, & in uvulam implantatur.

Vsus. Palatum molle versus radicem linguæ detrahit.

3) *Levator palati mollis* musculus est robustus, carnosus, oriens ab extremitate processus petrosi of-

fis

sis temporum, tum & a parte cartilaginea tubæ acousticæ; expansus magis ad uvulam descendit; cum socio ex altero latere sibi obviam eunte arcum posticum, aut majorem veli penduli palatini format, & ad radicem uvulæ demum finitur.

Vsus. Palatum molle foraminibus posticis narium, & salpingi adplicat.

4) *Circumflexus palati*, aut *palatinus posticus* oritur præcedentem ab eodem processu petroso, a processu acuminato alæ internæ ossis cuneiformis, & a parte cartilaginea salpingis, hinc expansus descendit per semicanalem hamuli pterygoidei, tendo retrorsum flectitur, & socio unitus adfigitur margini lævi ossis palatini.

Vsus. Tendit veli penduli partem posticam mollem, deorsum parum, & antrorsum ducit; forsitan salpingem simul aperit.

5) *Azygos uvulæ* oritur loco postico a commiffura ossium palati, in facie postica veli penduli recta descendit ad usque apicem uvulæ, ubi & finitur.

Vsus. Columellam constringit, breviorē reddit.

MUSCULI LARYNGIS.

Laryngi, seu *capiti asperæ arteriæ* propria sunt tria musculorum paria:

- 1) *Sternothyroideus.*
- 2) *Hyothyroideus.*
- 3) *Cricothyroideus.*

1) *Sternothyroideus* longus est, complanatus, tenuis; oritur a facie superna, ac interna sterni, a vicina parte claviculæ, & a cartilagine costæ primæ; exhinc, supra glandulam thyroideam ascendit, & parti laterali cartilaginis thyroideæ adnectitur.

Vsus.

Vsus. Cartilaginem thyroideam, hinc & laryngem deorsum trahit.

2) *Hyothyroideus*; musculus hicce tenuis, complanatus, & angustus oritur tum a basi ossis hyoidis, tum ab hujus cornu, deorsum fertur, supra præcedentem inplantatur lateri cartilaginis thyroideæ.

Vsus. Laryngem elevat.

3) *Cricothyroideus* oritur a parte anteriori cartilaginis cricoidis, inseritur lateraliter cartilagini thyroideæ.

Vsus. Cartilagineas ambas propius ad invicem ducit.

MUSCULI RIMAE GLOTTIDIS

Sunt :

- 1) *Cricoarytenoideus posticus.*
- 2) - - - - *lateralis.*
- 3) *Thyroarytenoideus.*
- 4) *Arytenoideus transversus.*
- 5) - - - *obliquus.*

1) *Cricoarytenoideus posticus* obtegit una cum socio lateris obpositi medium fere totum posticum cartilaginis cricoidis; oritur posterius ab hujus parte convexa, oblique introrsum, ac sursum adscendit, & basi cartilaginis arytenoidis adfigitur.

Vsus. Vna cum socio rimam glottidis maxime diducit, hinc ampliorem eam omnino reddit.

2) *Cricoarytenoideus lateralis* exiguus est, & nascitur a facie laterali cartilaginis cricoidis, versus cartilaginem arytenoidem adscendit, & prope priorem basi cartilaginis dictæ lateraliter adnectitur.

Vsus. Agentes utrique cartilagineas arytenoideas diducunt, hinc rimam glottidis ampliant.

3) *Thyroarytenoideus tenuissimus* oritur a parte inferiori, ac interna cartilaginis thyroideæ, adscendit, & supra basin cartilaginis arytenoidis, parti hujus ejusdem anteriori, illico supra crycoarytenoideum lateralem, inferitur.

Vsus. Agentes utrique partem anteriorem rimæ internæ glottidis angustio-rem reddunt.

4) *Arytenoideus transversus* musculus simplex est, sub priori positus; transverso decursu loco posteriori fertur a margine interno cartilaginis unius arytenoideæ ad marginem internum cartilaginis obpositæ, fibras sæpius mittit in arytenoideos obliquos, & una cum his ad epiglottidem excurrit.

Vsus. Rimam glottidis contrahit, & angustio-rem facit.

5) *Arytenoideus obliquus tenuissimus*, angustus, & musculorum rimæ glottidis omnium minimus oritur a basi cartilaginis unius arytenoidis, oblique ascendit ad partem posticam, & superiorem alterius, ea ratione, ut musculi nunc dicti ambo sese mutuo decussent; & dexter feratur ad cartilaginem sinistram, sinister ad dextram; hoc facto supra partem anticam cartilaginum antrorsum flectitur, & ad epiglottidem usque proficiscitur, in cujus latere evanescit.

Vsus. Agentes utrique rimam glottidis angustio-rem faciunt.

Referunt huc Auctores nonnulli *musculos tres epiglottideos*, unum *elevatorem*, duosque *abductores*; verumtamen musculorum horum fibræ haud raro ex integro deficiunt, aut exiguæ adëo sunt, ut specialium musculorum nomen non mereantur.

M V S C V L I C A P I T I S.

Motui capitis dicantur 13. musculorum paria, & primo quidem,

Caput

Caput antrorsum flectunt.

- 1) *Sterno - mastoideus.*
- 2) *Cleido - mastoideus.*
- 3) *Rectus anticus major.*
- 4) - - - *minor.*
- 5) - - *lateralis capitis.*

Caput retrorsum movent;

- 1) *Splenius capitis.*
- 2) *Biventer cervicis.*
- 3) *Complexus major.*
- 4) *Complexus minor, seu trachelo - mastoideus.*
- 5) *Rectus posticus major.*
- 6) - - - *minor.*

Caput in circulum rotant.

- 1) *Obliquus inferior capitis, seu major.*
- 2) - - *superior - - minor.*

1) *Sterno - mastoideus* oritur a parte superiori sterni, & extremitate antica claviculae tendine duplici; qui musculorum duorum sejunctorum exhibent origines, illico tamen invicem uniuntur; tum posteriorum adscendit, & ope tendinis robusti adnectitur tum processui mastoideo ossis temporum, tum ossi occipitis.

2) *Cleido - mastoideus* pars solummodo est sternomastoidei, a clavicula exoriens.

3) *Rectus anticus major, seu longus* oritur a parte antica processuum transversorum vertebrae colli sextae, quintae, quartae, & tertiae; versus processum sphaenoidalem ossis occipitis adscendit, huicque, ante condylos articulares adhærescit.

4) *Rectus anticus minor* pollicem circiter longus est; oritur a basi processus transversus vertebrae colli primae, versus processum sphaenoidalem ossis occipitis oblique adscendit, & ibidem loci prope priorem adhæret.

5) *Rectus lateralis* longitudine præcedenti fere similis oritur a parte superiori processus transversæ vertebræ colli primæ; tum oblique extrorsum, & sursum latus adnectitur demum ossi occipitis, ubi hoc prope apophysin mastoideam connectitur cum osse temporum.

Musculi nunc dicti omnes, ex uno solum latere agentes, caput ad suum latus inclinant.

1) *Splenius*; musculus hicce complanatus, & latus oritur a processibus spinosis vertebrarum quinque supremarum dorsi, ac inferiorum colli, oblique adscendit, & adhæret parti laterali ossis occipitis usque ad initium processus mastoidei.

2) *Biventer cervicis* oritur a processibus spinosis vertebrarum dorsi, ventre duplici auctus ad os occipitis adscendit, eique, prope complexum majorem, adfigitur.

3) *Complexus major*, oritur tendinibus multis exiguis a processibus transversis vertebrarum dorsi duorum, aut trium superiorum, & vertebrarum sex inferiorum colli; inseritur superius foveæ inæquali in medio ossis occipitis.

4) *Complexus minor*, seu *trachelo-mastoideus*, tenuis, & angustus est; oritur ab iisdem processibus transversis uti major, cujus tendinibus sub initium etiam jungitur; sursum fertur, coit cum splenio, & infra hunc adnectitur margini postico processus mastoidei.

5) *Rectus posticus major* enascitur a processu spinoso vertebræ colli secundæ, oblique nonnihil extrorsum, & sursum excurrit, & adfigitur ossi occipitis sub complexo majori.

6) *Rectus posticus minor* oritur ab eminentia postica vertebræ colli primæ, oblique parum adscendit, & prope priorem, adhærescit vicinæ foraminis magni occipitalis.

1) *Obliquus inferior* enascitur a processu spinoso vertebræ colli secundæ; sub initium tendineus, mox carneus fit, oblique extrorsum versus extremitatem processus transversæ vertebræ colli primæ progreditur, illiusque parti posticæ adnectitur.

2) *Obliquus superior* oritur ope tendinis ab extremitate processus transversæ vertebræ colli primæ; oblique valde postorsum adscendit, ac adnectitur demum ad lineam transversam inferiorem ossis occipitis, illico supra finem recti magni postici.

M V S C U L I C O L L I.

Motum colli producunt decem musculorum paria, si partes quinque muscoli scaleni pro musculo sumamus unico: sunt vero sequentes:

Collum retrorsum flectunt:

- 1) *Splenius colli.*
- 2) *Spinalis cervicis.*
- 3) *Interspinales cervicis.*

Antrorsum ducit:

- 1) *Longus colli.*

In gyrum movent:

- 1) *Transversalis cervicis, seu colli magnus.*
- 2) *Cervicalis descendens.*

Ad latus flectunt:

- 1) *Scalenus.*
- 2) *Intertransversarii priores colli.*
- 3) - - - - *posteriores colli.*
- 4) *Levator scapulae.*

1) *Splenius colli* musculus specialis non est, sed pars solummodo splenii capitis, sine duplici processu transverso vertebræ colli primæ, & secundæ adherentis.

2) *Spinalis cervicis* oritur a processibus transversis vertebrarum quinque, aut sex superiorum principio tendinescente; tendines hi illico uniuntur, in ventrem abeunt carneum, qui in tendinem mutatus adfigitur processibus spinosis vertebræ colli secundæ, tertiæ, quartæ, quintæ, & sextæ.

Vsus. Collum antrorsum flexum elevat; & oblique ad latus, ac retrorsum ducit.

3) *Interspinales cervicis*: muscoli hi quinque exigui siti sunt inter processus spinosos vertebrarum sex inferiorum colli; primus oritur a parte superiori vertebræ colli septimæ, & finitur in partē inferna, & interna processus spinosi vertebræ colli sextæ: hujus ad normam adhærescunt & reliqui processibus spinosis vertebrarum colli.

Vsus. Processus propius ad invicem adducunt, collum antrorsum flexum erigunt, & postorsum ducunt.

1) *Longus colli* oritur a corpore vertebrarum trium supremarum dorsi, in collo adscendit, corporibus adhærescit vertebrarum colli, & terminatur ad eminentiam anteriorem vertebræ colli primæ.

Vsus. Collum retrorsum flexum erigit, antrorsum, & nonnihil ad latus ducit.

1) *Transversalis cervicis*, seu *colli magnus* adhæret longissimo dorsi, quocum sæpius arcte conjungitur: oritur ab extremitatibus processuum transversorum vertebrarum dorsi quatuor, aut sex supremarum totidem tendinibus parvis; hinc adscendit, & mediantibus tendinibus variis adnectitur processibus transversis vertebrarum colli sex inferiorum.

Vsus. Collum ad latus ducit, & oblique postorsum curvat.

2) *Cervicalis descendens*; oritur tendinibus brevioribus a cōsta tertia, quarta, quinta, & sexta superiori,

periori, mox carnosus factus retro levatorem scapulae, & complexum minorem adscendit; inseritur processibus transversis vertebrarum colli sex inferiorum, ubi & splenio colli jungitur.

Vsus. Collum, fere uti prior, movet.

1) *Scalenus* oritur a facie externa costae verae primae, secundae, saepe & tertiae; hinc oblique adscendit ad processus transversos vertebrarum colli, quibus ex ordine, ab ultima ad primam usque adhærescit; inter musculus hunc eundem nervi hærent, & vasa sanguifera brachium petentia; facili negotio dirimi potest in musculos quinque alios minores; hinc apud ALBINVM, aliosque Anatomicos recensetur *scalenus colli anterior, posterior, medius, lateralis, & minimus.*

2) *Intertransversarii priores colli*, musculi hi sex breves, & exigui feruntur a processu transverso vertebrarum colli uno ad alium; oritur quivis a parte superiori, & postica processus transversus vertebræ colli, & terminatur in parte inferiori, & antica processus transversus vertebræ colli supraposita.

Vsus. Collum ad latus flectunt; in latus oppositum flexum denuo erigunt.

3) *Intertransversarii posteriores colli*, præcedentium adinstar a processu transverso colli uno ad alium adscendunt; enascitur quivis a parte superiori & antica processus transversus, & proficiscitur ad partem inferiorem, & posticam processus transversus superioris.

Vsus horum, uti præcedentium, est idem.

4) *Levator scapulae* musculus est longus, sat latus, oriens ex parte postica a processibus transversis vertebræ colli secundae, tertiae, quartae, & quintae, inseritur parti superiori anguli scapulae.

Vsus. Collum ad latus; & nonnihil retrorsum ducit; anteriora versus flexum simul cum aliis elevat.

MUSCVLI DORSI, ET LUMBORVM.

Motui communi *dorsi*, & *lumborum* dicantur sequentes musculi.

- 1) *Multifidus spinæ.*
- 2) *Longissimus dorsi.*
- 3) *Sacrolumbaris.*

Motui *vertebrarum dorsi* in specie dicantur :

- 1) *Spinosus dorsi magnus, s. semispinalis.*
- 2) *Interspinales dorsi.*
- 3) *Intertransversarii dorsi.*

Motui *vertebrarum lumborum* dicantur :

- 1) *Quadratus lumborum.*
- 2) *Intertransversarii lumborum.*
- 3) *Interspinales lumborum.*
- 4) *Psoas parvus.*

1) *Multifidus spinæ* posteriorem occupat *spinæ dorsi* partem. Oritur tendinibus quatuor a quatuor eminentiis dorso ossis sacri inhærentibus; ascendit hinc oblique versus processus spinales, ac tendinibus suis ibi loci adhærescit vertebris omnibus *spinæ dorsi*, (excepta solum vertebra colli prima) ea ratione, ut nectatur processibus superioribus obliquis vertebrarum omnium lumborum, processibus transversis vertebrarum omnium dorsi, & processibus descendentibus obliquis vertebrarum sex inferiorum colli: tendines musculi hujus non ad unicam solum feruntur vertebra, sed fibras plures mittunt & ad vertebra secundam, tertiam, quartam, quin & quintam supra-positam.

Vsus. Ope adhæisionis suæ multiplicis *spinam dorsi* antrorsum flexam retinet, erigit, retrorsum flectit, parumque ad latus ducit, seu rotat.

Inferior musculi hujus pars ab Anatomicis quibusdam speciali nomine *sacer lumborum* dicitur.

2) *Longissimus dorsi*; musculus hic longus, & crassus enascitur fibris carneis a parte posteriori, interna, & superiori ossis ilei, tum & posterius a processibus spinosis superioribus ossis sacri, & ope tendinis latioris a spinis vertebrarum quatuor inferiorum lumborum; adfigitur præterea per fibras carneas processibus transversis, & obliquis vertebrarum lumborum, adscendit exhinc musculo sacrolumbari unitus per totam longitudinem dorsi, & adhærescit tum angulis, tum processibus transversis vertebrarum septem superiorum dorsi.

3) *Sacrolumbaris* musculus est longus, superius angustus, & tenuis, inferius latus & crassus, exoritur loco posteriori a parte superiori, & externa ossis ilei & sacri ope tendinis latioris; hinc ad processum usque transversum vertebræ infimæ colli adscendens, ibique demum loci terminatus: per hunc decursum adhærescit ope fibrarum plurimarum carnearum processibus transversis omnibus vertebrarum lumborum, & ope tendinum plurimorum parti posticæ costarum fere omnium; ab exortu suo ad costam usque ultimam arcte unitus est musculo longissimo dorsi: superius cohæret cum m. cervicali descendente.

Vsus. Vna cum musculo longissimo dorsi lumbos, & spinam dorsi, dum antrosum inclinantur, retrorsum ducit, erigit, & parum ad latus flectit; costas, queis tendinibus suis adhæret, imprimis deorsum trahit.

M V S C V L I D O R S I.

1) *Spinosus dorsi magnus* situs est lateraliter ad processus spinosos dorsi: oritur a processibus spinosis vertebræ primæ lumborum, & vertebrarum trium infimarum dorsi ope tendinum totidem specialium; per
decur-

decursum confunditur cum m. longissimo dorsi, & terminatur ad proc. spinosos vertebræ dorsi sextæ, quintæ, quartæ, & secundæ.

Vsus. Dorsum sustinet, erigit, retrorsum, & nonnihil ad latus flectit.

Semispinalis dorsi ALBINI pars, uti videtur, prioris est.

2) *Interspinales dorsi* oriuntur a proc. spinosis vertebrarum dorsi, uti interspinales cervicis a proc. spinosis vertebrarum colli.

Vsus. Vertebrae rachidis deorsum, & propius ad invicem ducunt, hinc partem spinæ dorsi inflexam erigunt, dein retrorsum flectunt.

3) *Intertransversarii dorsi* oriuntur eadem ratione a proc. transversis vertebrarum dorsi, uti musculi intertransversarii colli, a proc. transversis colli: notandum tamen est, musculorum horum inferiores crassiores esse, & majores; superiores autem, quo altius hærent, eo & fieri minores, adeo ut summi ligamenta magis, quam musculos referant.

Vsus. Vertebrae dorsi propius ad invicem ducunt, rachidem ad latus flectunt; in latus obpositum flexam retinent, erigunt.

M V S C V L I L V M B O R V M.

1) *Quadratus lumborum* oritur principio tendineo tum a spina posteriori iliaca, & a labio interno ad marginem ossis ilei superiorem, tum & a proc. transversis vertebrarum trium, aut quatuor inferiorum lumborum ope totidem tendinum; inseritur labio interno costæ ultimæ spuria.

Vsus. Lumbos ad latus flectit, in latus obpositum flexos retinet, erigit.

2) *Intertransversarii lumborum* muscoli sunt breves, lati, & crassi. Oriuntur, & terminatur eadem ratione, uti intertransversarii colli, & dorsi; notandum vero circa eos simul est, inferi quatuor primos proc. transversis lumborum, quintum vero vertebræ supremæ lumborum, infimæque dorsi.

Vsus. Lumbos ad latus ducunt; in latus oppositum flexos, retinent, erigunt.

3) *Interspinales lumborum*, sat lati, tenues, sub exortum finemque tendinei sunt; proficiscitur primus a proc. spinoso vertebræ ultimæ lumborum ad proxime suprapositum; secundus sic fertur a proc. spinoso secundo ad tertium; eadem ratione fertur unus a tertio ad quartum, a quarto ad quintum, ultimus demum a proc. spinoso quinto lumborum ad proc. ultimum spinosum dorsi.

Vsus. Lumbos antrosum flexos elevant, retrorsum, processus etiam spinosos propius adinvicem ducunt.

4) *Psoas parvus* adest hic sæpe quidem, non tamen semper. Oritur principio angusto, tenui, & fere tendineo lateraliter a margine inferiori vertebræ ultimæ dorsi, & a margine superiori vertebræ primæ lumborum; tum carnosus evadit, denuo tamen terminatur tendine lato, tenuique in loco illo ossis pubis, ubi os hoc cum osse ilei cohæret. Emittit præterea in latere externo ex fine suo tendinem latiore, & tenuiorem, obtegentem psoam magnum una cum m. iliaco interno, & descendentem ad regionem pubis, ubi cum aponevrosi fasciæ latæ femoris coit.

Vsus. Lumbos antrosum, & simul ad latus flectit.

MUSCULI OSSIS COCCYGIS.

Ad os coccygis referuntur musculi quatuor; ex utroque latere hærent duo.

- 1) *Curvator coccygis*, s. *sacrococcygeus*, &
- 2) *Ischio - coccygeus*.

1) *Curvator coccygis* musculus est parvus, oblongus, angustus, & tenuis, oriens a parte inferiori faciei internæ ossis sacri; ope tendinis terminatur ad officulum secundum, tertium, inprimis vero quartum ossis coccygis.

ALBINVS ad officio suo musculum hunc *curvatores coccygis* dicit; flectit autem officulum hoc ipsum antrorsum; in quibusdam subjectis ligamentum magis quam musculum refert.

2) *Ischio - coccygeus*, exiguus, tenuis, ex utraque extremitate tendineus, in medio autem carnosus est. Oritur a processu spinoso ossis ischii; terminatur tendine lato in facie interna ossis sacri, & coccygis.

Vfus. Os coccygis antrorsum versus spinam ischii ossis flectit; retrorsum flexum in situm naturalem reducit. Firmat & unionem coccygis cum parte infima ossis sacri.

MUSCULI THORACIS.

Musculi thoracici sunt :

- 1) *Intercostales externi.*
- 2) - - - *interni.*
- 3) *Levatores costarum longiores.*
- 4) - - - - *breviores.*
- 5) *Serratus posticus superior.*
- 6) - - - - *inferior.*

7) *Triangularis sterni.*

8) *Infracostales.*

9) *Diaphragma.*

I - 2) *Intercostales externi, & interni*, musculi sunt, quibus repletur spatium costis interceptum. Externi oriuntur ab extremitate postica costarum; fibræ musculorum oblique antrorsum excurrunt, & terminantur ad exortum cartilaginum costalium; interni enascuntur a sterno; fibræ eorum ratione inversa ab anteriori loco posteriorem versus obliquo cursu feruntur, ac ad angulos cujusvis costæ terminantur; replent hinc posteriores soli spatium omne inter cartilagineas, unde & *intercartilaginei* vocantur. Series horum musculorum quævis adfigitur margini inferiori costæ superioris, & margini superiori costæ subsequenti inferioris.

Ufus amborum est, ut costas propius ad invicem ducant; quum etiam costa suprema reliquis minus mobilis sit, costas simul elevant.

3) *Levatores costarum longiores* quatuor sunt, costis quatuor inferioribus proprii; decursus horum ea est ratio, ut proximam quamque semper super-scandant costam, quin eidem adhæreant, inserantur vero primum subsequæ; oritur hinc musculorum horum primus decurrens ad costam nonam, a processu transverso vertebræ dorsi sextæ, decurrens ad costam decimam a proc. transverso octavæ, decurrens ad costam undecimam a proc. transverso decimæ.

Oriuntur omnes principio tendineo; tum, carnosii facti, inseruntur sine denuo tendineo parti supernæ, ac externæ costarum; uniuntur sæpius per hunc decursum musculis intercostalibus, & levatoribus costarum brevioribus.

Costas elevant; qui costis duabus ultimis proprii sunt, easdem simul retrorsum ducunt.

4) *Levatores costarum breviores* costis numero respondent, duodecim siquidem ex utroque sunt latere. Oriuntur ab extremitatibus processuum transversorum vertebrarum dorſi undecim supremarum, vertebræque ultimæ colli; ea ratione, ut quivis horum musculorum oriatur a processu illo transverso, qui supra costam hæret, ad quam musculus decurrit; terminantur omnes ope tendinis ad eminentiam costæ cujusvis scindentem, quæ ad hujus a vertebra secessum conspicitur; tum & ad partem externam marginis superioris costæ. Fibræ, quo magis ad vertebra accedunt, eo & rectiores fiunt; quo magis ab illis removentur, eo magis evadunt obliquæ.

Vsus. Initium costæ primæ firmant, reliquas, musculorum aliorum ope adjuti, elevant.

5) *Serratus posticus superior* situs est sub m. rhomboideo, & cucullari: oritur principio lato tendineo a ligamento cervicali, processibus spinosis, vertebris binis infimis colli, binisque supremis dorſi; exhinc oblique antrorsum descendit, ac ope digitationum latarum tam carnosarum, quam tendinearum inseritur costæ secundæ, tertiæ, quartæ, & quintæ veræ.

Vsus. Costam, cui adhæret, elevat.

6) *Serratus posticus inferior* hæret sub m. latissimo dorſi; oritur tendine latiori a proc. spinosis vertebrarum trium infimarum dorſi, duarumque supremarum lumborum, exhinc adscendens carnosus fit, & inseritur digitationibus latis carnosis costis quatuor infimis spuris.

Vsus. Costas, queis inseritur, deorsum, & retrorsum ducit.

7) *Triangularis sterni* oritur tendinibus quatuor sat latis a costâ secunda, tertia, quarta, & quinta loco anteriori ex parte interna cartilaginum dictarum costarum, quarum ope costæ hæ sterno adhærent; fi-

træ musculi hujus tum carnosæ mox fiunt, & invicem uniuntur, obliquo decursu ad sternum descendunt, ac terminantur in tendinem longum, ac tenuem, sterno prope marginem cartilaginis xiphoidis adnexum.

Vsus. Cartilagines costarum, a quibus oritur, deprimunt, introrsum trahunt. Costam imprimis secundam deorsum, sequentes autem magis introrsum ducunt.

8) *Infracostales* musculi sunt tenues, plani, carnosissimi, numero indeterminato ex utroque latere faciei costarum internæ posteriora verius adhærentes; oriuntur a capitulis minoribus costarum, oblique deorsum excurrunt, ac terminantur in costarum angulis, ea tamen ratione, ut non angulo proximæ, sed angulo secundæ, vel & tertiæ subpositæ costæ adfigantur.

Vsus. Facere videntur, ut costæ deorsum, ac nonnihil introrsum ducantur.

9) *Diaphragma* vocatur musculus robustus, latus, duplex, cujus ope cavum thoracis a cavo abdominis sejungitur: oblique interjectus est nunc dictis binis cavis, adeo, ut pars anterior altius, inferior & posterior profundius multo hæreat, fornicem quasi constituit, cujus facies superior convexa thoracem respicit, pleura obtecta, inferior concava abdominis spectat cavum, & peritonæo investitur. Oritur musculus hic a locis diversis; antè carnosus enascitur ab interna, & superiori parte cartilaginis xiphoidis, & ex utroque simul latere a cartilaginibus costæ sextæ, & septimæ veræ, costarumque sequentium spuriarum, fibræ carnes versus medium coeunt, & tendinem triangularem constituunt, postorsum, & deorsum properantem: inferiori loco diaphragma ex utroque latere bina denuo, plerumque vero quatuor habet

bet principia; veniunt hæc fibris carnofis, & tendineis a processu transverso primæ, & a corpore secundæ lumborum vertebræ, tum & fibris tendineis a vertebra lumborum tertia, & quarta, ac a cartilaginibus illarum intermediis (Tenendum vero est, principia hæc posteriora ex latere dextro profundius nunquam non hære, quam ex latere sinistro) fibræ nunc enumeratæ omnes carneæ factæ illico adscendunt, mox denuo tendinescunt, uniuntur tendini diaphragmatis a superioribus descendentem, simulque tendinem generant diaphragmatis latum, in quo notandi sunt fasciculi quatuor fibrarum speciales; hærent enim ex his unus posteriori loco, alter decursu recto a latere dextro ad sinistram pergat, tertius dextrorsum, quartus sinistrorsum adscendit. Foramina insuper in diaphragmate notanda sunt diversa, & orificia: ac primo quidem inter principia diaphragmatis posteriora cernitur apertura, quam transit aorta, ductus thoracicus, & subin etiam truncus venæ azygos, una cum nervis binis intercostalibus magnis; quæ omnia extra saccum pleuræ ponuntur.

Foramen aliud adest oblongum ante, & supra aperturam præcedentem inter musculos inferiores dextri, & sinistri lateris; foraminis nunc dicti pars lateralis, & postica carnea, anterior autem tendinea est; descendit per hoc ipsum oesophagus, & per octavum nervorum in abdomen.

Ex latere dextro in medio tendinis lati foramen adest magnum fere quadrangulare, fasciculis ante dictis quatuor fibrarum tendinearum cinctum; per foramen hoc vena cava ex hepate proficiscitur ad cordis ventriculum anteriorem, & pleura ibidem loci unitur cum peritonæo. Foramen antea dictum angustius hinc reddi potest, ultimum vero parum non nisi contrahi, quum fibræ contrahere sese non possint.

Adfant

Adfunt demum & foramina in diaphragmate adhuc alia, quæ nervi plures minores, & vasa hæmatophora transeunt.

Dum contrahuntur fibræ diaphragmatis carnes, suprema illius pars versus abdomen descendit, & cavum thoracis hinc longius reddit, sub motu hoc eodem concava diaphragmatis pars planior fit; hepar ideo, ventriculus, splen &c. deorsum premuntur: costæ etiam infimæ spurix, sub contractione diaphragmatis, introrsum & postorsum trahuntur.

MUSCULI EXTREMITATVM SUPERIORVM.

*M*usculi extremitatum superiorum dividuntur in *m.* humeri, brachii, antibrachii, & manus.

MUSCULI HUMERI.

*A*d humerum referuntur *clavicula*, & *scapula*: huc spectant sequentes musculi:

- 1) *Cucullaris*, s. *trapezius*.
- 2) *Subclavius*.
- 3) *Serratus anticus major*.
- 4) - - - - *minor*.
- 5) *Rhomboideus*.
- 6) *Levator scapulae*.

PROMOTV HUMERI.

Cucullaris, s. *Trapezius* musculus magnus, latus, & tenuis est, dorsi, collique magnam partem obtegens. Oritur principio carnosio a parte superna, & media ossis occipitis, processibus septem spinosis vertebrarum colli, & a processibus septem supremis, nonnunquam vero & omnibus omnino spinosis vertebrarum

tebrarum dorsi : fibræ ejus carneæ versus humerum angustius coëunt, tendinescunt, & ad spinam terminantur acromii, partemque posticam claviculæ.

Vsus. Scapulam, & claviculam diversa ratione movet; ac vel retrorsum caput versus elevat; aut recta postrosum, vel deorsum trahit. Dum musculus hic ipse undique contrahitur, humerum retrorsum versus rachidem ducit.

PRO MOTV CLAVICVLAE.

Subclavius, musculus hic exiguus oritur tendine complanato ab eminentia, quam costa prima ad nexum suum cum cartilagine habet; excurrit dein carneus secundum claviculam per faciem hujus inferiorem, & parti claviculæ inferiori, ac posticæ adnectitur.

Vsus. Claviculam versus sternum ducit; tum & antrorsum, deorsumque movere valet.

PRO MOTV SCAPVLAE.

1) *Serratus anticus major* latissimus est, satisque tenuis; oritur fibris tendineis brevibus a facie externa costarum sex inferiorum verarum, duarumque supremarum spuriarum, totidemque digitationibus, quarum tres inferiores uniuntur digitationibus musculi abdominalis obliqui externi: tum, carnosus factus, oblique adscendit, versus extremitatem suam angustior sensim fit, & faciei internæ anguli anterioris inferni scapulæ adhærescit.

Vsus. Scapulam deorsum ducit.

2) *Serratus anticus minor* oritur digitationibus suis a costa secunda, tertia, & quarta vera; oblique adscendit, & tendine brevi, complanato adfigitur processui coracoideo scapulæ, quam thoracem versus antrorsum, & deorsum ducit.

3)

3) *Rhomboideus*; musculus hicce tenuis oritur tendineus a processibus spinosis vertebrarum quatuor, aut quinque inferiorum colli, & vertebrarum quatuor, aut quinque supremarum dorsi; carnosus factus oblique deorsum nonnihil ad basin scapulæ descendit, cui & adhæret; fertur subin ad angulum usque inferiorem scapulæ, ibique loci conjungitur cum musculo latissimo dorsi. Dirimunt Auctores nonnulli musculum hunc eundem in alios binos, quorum superiorem *parvum*, inferiorem *magnum rhomboideum* dicunt; superflua tamen hæcce videtur divisio.

Vsus. Scapulam oblique retrorsum, simulque sursum nonnihil movet.

4) *Musculus Patientiæ*, seu *levator scapulæ* forsan huc etiam spectat; descriptionem ejus v. superius sub *musculis colli*.

Vsus. Scapulam antrorsum elevat.

M V S C V L I B R A C H I I.

Motui *brachii* novem dicantur musculi:

- 1) *Deltoides.*
- 2) *Supraspinatus.*
- 3) *Coracobrachialis.*

Hi brachium *elevant*:

- 4) *Pectoralis major.*

Brachium *deorsum*, & *antrorsum ducit*:

- 5) *Teres major.*
- 6) *Latissimus dorsi.*

Brachium *retrorsum ducunt*:

- 7) *Subscapularis.*
- 8) *Infraspinatus.*
- 9) *Teres minor.*

Brachium *rotant*.

1) *Deltoides* crassus, robustissimus musculus nomen a figura sortitus fuit, quum fere triangularis sit, & græcam litteram Δ. referat: oritur principio lato, tendineo a parte media, & postica claviculæ, acromio, spinaque scapulæ; versus partem ossis brachii anteriorem excurrens angustior semper evadit, & fibris tum tendineis, tum carneis adnectitur eminentiis ibi loci positis longitudinalibus, inter quas & fibræ demittuntur. In septem alios minores musculos dirimi facile potest.

Vsus. Brachii os recta extrorsum elevat, contracta magis parte anteriori, os dictum oblique antrorsum; contracta vero magis parte postica, postorsum ducitur.

2) *Supraspinatus* replet cavitatem totam superiorem scapulæ; oritur ab ejus cavitatis parte postica, sub acromio caput ossis brachii superascendit, ejusque protuberantiæ magnæ tendine brevi, plano, crassoque externe adhæret.

Vsus. Os brachii antrorsum elevat, simulque oblique extrorsum ducit.

3) *Coracobrachialis* oritur principio tum tendineo, tum carneo a proc. coracoideo, ubi caput exoritur brevius musculi bicipitis, cui & per longius spatium junctus est, adeo ut pro parte illius haberi fere posset; secedit dein a dicto nunc musculo, & terminatur versus mediam ossis brachii in parte hujus inferiori, ac interna. Perforatur a nervis brachii cutaneis externis.

Vsus. Os brachii, & claviculam propius ad invicem ducit; illud ad latus corporis ducit.

4) *Pectoralis major*; musculus hic magnus, crassus, & carnosus oritur tendineus a parte tota antica claviculæ, a tota longitudine sterni, ubi cartilaginee costarum verarum omnium ossi huic adfiguntur: co-
hæret

hæret etiam externe cum tendine lato musculi abdominalis obliqui externi, enatæ ab his partibus fibræ carneæ sursum adscendunt, superiores vero oblique deorsum feruntur, & mediæ decursu transverso proficiscuntur ad os brachii ea ratione, ut per decursum angustiores semper fiant, ac tendine robusto, & lato ad digitos quatuor transversos sub capite ossis brachii adnectantur lineæ acutæ, ab eminentia magna descendenti. Ab ortu musculi hujus fibræ plurimæ tendineæ proficiscuntur versus sternum, uniuntur cum fibris focii ab altero latere advenientibus, simulque sic constituunt expansionem aponevroticam, supra sternum expansam, eique firmiter adnatam.

Vsus. Brachium, situ naturali secundum corpus deorsum pendens, versus latus hoc, & simul antrorsum parum ducit: brachium recta elevatum, deprimat, & antrorsum movet; antrorsum elevatum, ad pectus flectit. Dum fibræ m. hujus descendentes solæ agunt, os brachii elevat; dum agunt solæ transversæ, os dictum anteriora versus movetur; dum agunt solæ adscendentes, non tantum os brachii, sed & scapula tota deorsum ducitur.

5) *Teres major*: musculus oblongus, lævis, crassusque oritur ab angulo inferiori scapulæ, adscendit, & tendine expanso inseritur inter eminentias ambas ossis brachii, quod retrorsum, & deorsum movet.

6) *Latissimus dorsi*; oritur tendine lato a costis quatuor infimis spuriis, prope harum cartilagineas, a processibus spinosis vertebrarum dorsi sex, vel octo inferiorum, vertebrarum omnium lumborum, ossis sacri, & a parte postica spinæ iliacæ: per decursum contractior, ad angulum proficiscitur inferiorem scapulæ, & terminatur in tendinem, unitum cum tendine m. teretis majoris, adfigendum demum parti superiori, & internæ ossis brachii.

Vsus.

Vsus. Os brachii deorsum, & ad dorsum ducit; sursum elevatum deprimit: scapulam, & claviculam, inprimis ope fibrarum suarum carnosarum inferiorum deorsum, & postrosum flectit.

7) *Subscapularis* occupat faciem totam dorso obversam scapulæ; oritur a parte ejus postica usque ad collum fere ossis hujus, scapulæ ad morem angustior sensim fit anteriora versus decurrens, donec tendine sat lato in eminentia parva anteriori ossis brachii terminetur. In musculos plures exiguos sejungere facile potest.

Vsus. Os brachii introrsum notabiliter ducit, hinc antagonista est m. infraspinati, & teretis minoris.

8) *Infraspinatus*, uti m. præcedens cavitationem supra spinam, sic iste cavitationem totam infra illam sitam occupat: enascitur a facie tota convexa, uti & a margine inferiori scapulæ; præcedenti major, & sub initium latior est, per decursum trianguli adinstar sensim angustior fit, donec tandem ope tendinis brevis crassi & lati superiori, & posteriori parti eminentiæ ejusdem, uti prior, adfigatur.

Vsus. Brachium rotat, dum partem illius anteriorem a thorace extrorsum removet.

9) *Teres minor* exoritur a margine, anguloque inferiori scapulæ, principio partim carneo, partim tendineo, adscendit hinc, & latior semper fit, donec demum eminentiæ magnæ illico penes infraspinatum, uti & parti inferiori colli ossis brachii adnectatur.

Vsus. Eandem cum infraspinato exserit actionem.

MUSCVLI ANTIBRACHII.

Motui *Antibrachii* dicantur sequentes musculi :

1) *Brachiaeus internus.*

2) *Biceps brachii.*

Antibrachium flectunt.

3) *Triceps brachii.*

4) *Anconæus.*

Antibrachium extendunt.

5) *Pronator rotundus.*

6) - - *quadratus.*

7) *Supinator longus.*

8) - - *brevis.*

Pronatores, & supinatores sunt.

1) *Brachiaeus internus* enascitur ab eo loco ossis brachii, ubi finitur deltoides, ope tendinis bicornis quasi; inter quæ cornua inseritur apex deltoidis; adfigitur dein fibrarum carnearum ope interne toti lineæ acutæ ossis brachii, ab eminentia magna inferiora versus decurrenti, articulationem superascendit, & faciei internæ, ac anticæ coronæ cubiti adhærescit.

Vsus. Antibrachium flectit.

2) *Biceps brachii*, componitur musculis binis; in extremitate solum unitis: prior exoritur ope tendinis brevis, latique a proc. coracoideo, & ad medium usque ossis brachii descendit; alter enascitur tendine tenuiori, & longiori a parte superna marginis cavitatis articularis scapulæ, fertur tendo hic ipse per ligamentum capsulare supra caput ossis brachii, in sulco ambis eminentiis intercepto ad medium fere brachii descendit, uniuntur ibi loci ambo tendines, & musculum constituunt, in parte interiori ossis brachii ad articulationem usque proficiscentem, ibique partim ope tendinis angusti subteretis ad eminentiam radii

radii asperam, sub hujus collo prominentem terminatum, partim in membranam aponevroticam expansum, quæ musculos omnes, in facie interiori antibrachii sitos obtegit, & ad tres circiter digitos transversos, ante articulationem carpi evanescit. Dum aponevrosis hæc sub venæsectione læditur, symptomata sæpius oriuntur mala, aliunde nota.

Vsus. Radium, supra ulnam antrosum rotatum retrorsum flectit; brachium insuper flectere valet.

3) *Triceps brachii.* Sub hoc nomine Anatomici nonnulli tres describunt speciales musculos, nimirum: *Anconæum magnum, externum, & internum.* Primus, seu *longus* oritur ope tendinis a parte infima colli scapulæ, carneus in facie postica ossis brachii descendit. Alter, seu *brevis* enascitur a latere externo colli ossis brachii; descendit in latere externo ossis hujus ejusdem. *Tertius* oritur inferius a latere externo ossis brachii, confluunt tum invicem in parte hujus inferiori, & simul constituunt tendinem communem robustum latum, ad olecranon adligatum; exhinc demum membrana lata, tenuis aponevrotica, adinstar membranæ aponevroticæ musculi bicipitis per partem anticam, & posticam antibrachii expanditur, musculos omnes obducens, versus finem antibrachii terminanda.

Vsus. Totus cæterum hic musculus recta descendit, & agens antibrachium extendit; pars longior brachium ad latus corporis, & parum retrorsum ducit.

4) *Anconæus* oritur tendine angusto forti a condyli externi ossis brachii parte inferiori; terminatur in facie convexa ulnæ illico infra tricipitem.

Vsus. Concurrit ad extensionem antibrachii.

5) *Pronator rotundus* oritur a condylo interno ossis brachii; fertur exhinc obliquo tramite ad radium, cujus margini externo adnectitur tendine latiori.

Vsus. Radium & ulnam, hinc & manum, radii motum sequentem, introrsum rotat.

6) *Pronator quadratus* quadrangulum regulare exhibet; enascitur a parte inferiori, facieque interna cubiti, transversum fertur ad partem vicinam inferiorem, ac internam radii.

Vsus. Præcedentium actionem juvat.

7) *Supinator longus* oritur fat complanato, tenuique principio a condylo externo ossis brachii: descendit per faciem totam convexam radii; in cujus medio tendinescit, tendine demum tenuiori inferitur parti anticæ condyli radii inferioris.

Vsus. Radium ad ulnam in utrumque latus movet, hinc & manum non solum extrorsum flectit, sed & extrorsum flexam introrsum reducit.

8) *Supinator brevis* enascitur a condylo ossis brachii externo principio tendineo, & ab eminentia partis superioris, & externæ cubiti principio carneo; recta antrorsum, & deorsum ad partem superiorem, & internam radii, ad quatuor circiter transversos digitos sub hujus collo, descendit, radium ex integro ambit, & in illius medio terminatur.

Vsus. Manum introrsum flexam extrorsum ducit, quum radium, circa ulnam versum, retrahat.

M V S C V L I M A N V S.

1) *R*adialis externus.

2) *V*lnaris externus.

Manum extendunt.

3) *Vlnaris internus.*

4) *Radialis internus.*

Manum *flectunt.*

1) *Radialis externus*, duplici gaudet principio, unde etiam in *longiorem & brevior* dirimitur. Oriuntur ambo subtendinei a condylo inferiori, & externo ossis brachii; descendunt secundum faciem externam radii; in hujus medio abeunt in tendines tenues complanatos, qui in extremitate inferiori radii per sulcum ibi loci positum transeunt, & in dorso manus finiuntur ea ratione, ut tendo m. longioris basi ossis primi metacarpi, tendo brevioris basi ossis metacarpi secundi adnectatur.

Vsus. Manum extrorsum *flectunt.*

2) *Vlnaris externus* oritur a condylo externo ossis brachii, & a tota fere facie externa ulnæ: descendit secundum hanc, & in illius medio abit in tendinem, evanescentem in superiori parte ossis metacarpi quarti, & basi phalangis primæ digiti minimi.

Vsus. Manum retrorsum, & simul extrorsum parum *flectit*; eandem & *elevat.*

3) *Vlnaris internus.* Oritur a condylo interno ossis brachii, descendit secundum partem externam ulnæ, & tendine suo adnectitur ossi pisiformi, & unciiformi carpi.

Vsus. Manum *flectit*, & introrsum *ducit.*

4) *Radialis internus* oritur tendine sat lato a condylo interno ossis brachii, per ulnam oblique descendit; tendo ejus, circa medium ossis hujus incipiens transit sub ligamento carpi transversali interno, & inferitur plerumque parti internæ, & superiori ossis primi metacarpi.

Vsus est idem, uti præcedentis.

PRO MOTV DIGITORVM QVATVOR
MANVS.

- 1) *E*xtensor digitorum communis.
- 2) *P*erforatus, s. *s*ublimis.
- 3) *P*erforans, s. *p*rofundus.
- 4) *L*umbricales.
- 5) *I*nterosseï externi, &
- 6) - - interni.

1) *E*xtensor digitorum communis enascitur tendineus a parte postica, & inferiori condyli externi ossis brachii, externe secundum longitudinem antibrachii descendit, sed jam sub initium finditur in partes tres carnosas, quarum quævis terminatur in tendinem: tendines hi tres omnes una transeunt sub ligamento carpi externo, & supra dorsum manus ad digitos proficiscuntur tres priores, ubi latiores fiunt, & ope fibrarum plurium tendinearum invicem nectuntur; quivis supra dorsum sui digiti producitur ad usque basin phalangis anterioris, ubi demum omnes evanescent.

Abit musculus hic nonnunquam in tendines quatuor, tumque tendo unus ad digitum etiam minimum proficiscitur. Tendines hi, antequam ultimo terminentur, adhærent ope fibrarum phalangibus digitorum reliquis.

*V*sus. Phalanges digitorum omnes tres extendunt; ultimam & flectere queunt.

2) *P*erforatus, s. *s*ublimis. Oritur a condylo interno ossis brachii, ab extremitate superiori cubiti, a medio radii, & a ligamento ejus interosseo; corpus carnosum in medio cubiti abit in partes quatuor, quæ in totidem mutantur tendines; transeunt hi simul per ligamentum carpi internum, & supra palmam ad suum quisque properat digitum; antequam

vero

vero phalangem digitorum , in quibus terminantur, secundam adtigissent , perforantur a tendinibus musculorum perforantium.

Vsus. Digitorum phalangem primam , & secundam introrsum flectit.

3) *Perforans* , s. *profundus* oritur a parte superiori , & media ulnæ , ac a ligamento interosseo ; in tendines tum abit quatuor , excurrentes sub ligamento interosseo interno ad extremitates usque phalangum anteriorum digitorum ; per hunc decursum perforat , uti antea dictum fuit , musculos inpositos. Tendines musculi hujus , & prioris excurrunt in vagina membranacea , a ligamento carpi interno abscedente , ac in phalangibus binis digitorum primis circa mediam sui partem a ligamentis annularibus eorum aucta.

Vsus. Tertiam phalangem digitorum in specie , tum & alteram ac primam introrsum flectit.

4) *M. Lumbricales* musculi quatuor sunt tenues , exigui , oblongi. Oriuntur a tendinibus musculi perforantis sub ligamento carpi , antrorsum ad digitos feruntur , ac ope tendinis brevioris lateri interno phalangis primæ inplantantur. Spectari poterunt ceu priorum adjuutores.

Vsus. Phalanges primi ordinis ad palmam flectunt.

5) *M. Interossei externi* , & *interni* interstitia vacua inter ossa metacarpi replent. Tres externi , totidemque interni sunt ; *externi* explent interstitia ossium metacarpi in dorso manus ; oriuntur omnes tres a parte inferiori , ac a lateribus ossium metacarpi ; evanescent tendinibus complanatis in partibus digitorum lateralibus , ea ratione , ut primus lateri externo digiti medii , alter lateri ejus interno , tertius lateri externo digiti minimi adfigatur. *Interni* ossibus metacarpi inponuntur magis , quam intersternuntur ;

ortum suum repetunt ab extremitate superiori ossium metacarpi, quæ adhærescunt: terminantur eo modo, ut primus lateri interno indicis, alter lateri externo digiti annularis, tertius lateri externo digiti minimi adnectatur.

Vsus. Internorum quivis digitum suum antrosum versus pollicem, simul & introrsum nonnihil flectit: si digitus palmam versus incurvatus fuerit, magis adhuc ope musculi hujus flectitur. Externorum quilibet digitum suum retrorsum flectit, seu a pollice abducit, & simul introrsum nonnihil flectit: si digitus palmam versus incurvatus fuerit, magis de novo versus illam, sed simul oblique parum ad latus per hunc musculum flectitur.

PRO MOTV DIGITI INDICIS.

1) *Extensor indicis proprius.*

2) *Abductor indicis proprius.*

1) *Extensor indicis proprius* enascitur exterius a medio cubiti, & in parte hujus inferiori a ligamento interosseo antibrachii. Tendo ejus transit una cum m. extensore digitorum communi sub ligamento carpi externo; & terminatur in phalange tertia digiti indicis.

Vsus. Indicem extendit solum, dum indicare quid volumus; extrorsum etiam, & parum retrorsum versus digitum medium flectit.

2) *Abductor indicis proprius* oritur a parte superiori ossis metacarpi ex latere hujus interno principio carneo, versus os metacarpi indicis excurrit, eidem adhæret, ac tendine complanato parti superiori phalangis primæ digiti indicis adnectitur. Enascitur sub in principio duplici.

Vsus.

Vsus. Indicem a digitis reliquis pollicem versus abducit, ac ad palmam nonnihil flectit.

PRO MOTV DIGITI MINIMI.

- 1) *E*xtensor proprius digiti minimi.
- 2) *A*bductor digiti minimi.
- 3) *F*lexor parvus digiti minimi.

1) *Extensor proprius digiti minimi* enascitur tendine sat longo a condylo externo ossis brachii, extrorsum secundum cubitum carneus ad medium hujus usque excurrit, tum vero in tendinem longum, & tenuem terminatur, qui cum m. extensore digitorum communi cohæret, una cum eo ligamentum carpi externum subiens supra dorsum manus properat, digitum minimum petit, & phalangibus digiti hujus ejusdem, uti extensor communis digitis reliquis, adhæret.

Vsus. Phalanges tres digiti minimi extendit, primam & extrorsum flectit.

2) *Abductor digiti minimi.* Carneus enascitur ab osse pisiformi carpi, & a ligamento transversali interno metacarpi, terminatur in tendinem, qui cum tendine musculi præcedentis connectitur, & ossi metacarpi ultimo, partique superiori phalangis primæ digiti minimi adhærescit.

Vsus. Digitum minimum ab annulari abducit, & una cum osse suo metacarpi palmam versus flectit.

3) *Flexor parvus digiti minimi* exiguus est, & ab Auctoribus multis pro parte habetur præcedentis, ab aliis vero pro metacarpio: enascitur ab osse unciformi carpi, & ligamento carpi interno; finis, & insertio huic cum præcedenti communes sunt. In subjectis multis omnino non adest: si vero adsit, pha-

langem primam, & hinc digitum totum minimum ad palmam, versus pollicem flectit.

P R O M O T V P O L L I C I S.

- 1) *Abductor pollicis, f. thenar.*
- 2) - - - - - *brevis.*
- 3) *Antithenar, f. opponens.*
- 4) *Hypothenar, f. abductor pollicis.*
- 5) *Flexor brevis pollicis.*
- 6) - - *longus pollicis.*
- 7) *Extensor minor pollicis.*
- 8) *Extensor major pollicis.*

1) *Abductor pollicis, f. thenar*, enascitur tendineus ab externa, & media fere parte cubiti, & a ligamento interosseo; exhinc radium obliquo decursu petit, eundem ambit, & ad os metatarsi pollicis usque ei adfigitur; evanescit demum tendine plano in extremitate dicti ossis superiori.

Vsus. Os metatarsi pollicis palmam versus flexum extendit, nonnihil postrosum ducit, & hinc pollicem a manu removet. Pars tendinis musculi hujus conjungitur cum abductore pollicis brevi, & sic musculum hunc in actione sua juvat.

2) *Abductor pollicis brevis* exoritur a ligamento carpi interno, & ab osse carpi multangulo majori, recto tramite proficiscitur ad condylum superiorem phalangis primæ pollicis, cui parte tendinis sui inferitur; pars altera superascendit articulationem phalangis hujus cum osse metacarpi, in dorsum manus fertur, & cum tendine m. extensoris pollicis connectitur.

Vsus. Pollicem a manu removet, nonnihil postrosum ducit.

3) *Antithenar*, enascitur ab osse metacarpi primo, & secundo, exhinc oblique ad pollicem fertur, ejusque phalangi primæ tendine robusto implantatur.

Vsus. Pollicem introrsum flectit, hinc palmæ, & digitis e regione fere obponit.

4) *Hypothenar* enascitur ab osse multangulo magno, & a ligamento carpi interno, exhinc ad pollicem migrat, & ope tendinis, cum tendine flexoris brevis pollicis uniti, capiti superiori phalangis primæ inseritur.

Vsus. Pollicem introrsum in medium palmæ, dein & ad digitum medium ducit.

5) *Flexor brevis pollicis*, enascitur fibris tendineis interne a parte inferiori ossis carpi cuneiformis, capitati, & multanguli minoris, tum a ligamento carpi interno, & a capitibus proximis ossium metacarpi; inseritur tendine suo phalangi pollicis primæ, & secundæ; quædam fibrarum linearum tendinearum conjunguntur cum m. extensore majori, abductore breviori, & inferiori adductore pollicis.

Vsus. Phalangem primam pollicis in palmam flectit; os ejus metacarpi retrorsum, simulque extrorsum nonnihil ducit.

6) *Flexor longus pollicis*: uti musculo perforante gaudent digiti, sic & pollex proprio instructus est flexore: enascitur hic, uti ille a ligamento interosseo antibrachii, & a medio radii, in facie hujus interna una cum tendinibus m. perforantis digitorum descendit, sub ligamento carpi interno transit, pollicem versus flectitur, & in phalangis secundæ parte suprema terminatur.

Vsus. Phalangem pollicis ultimam, primamque palmam versus flectit.

7) *Extensor minor pollicis* oritur illico sub m. abductore longo pollicis ab ulna, & ligamento interosseo,

osseo, versus partem anticam capitis inferioris radii oblique excurrit, transiens ibi loci tendine suo tenui, planoque per ligamentum carpi ad dorsum pollicis pertingit, & unitur cum tendine m. extensoris pollicis majoris. Terminatur subin muscoli hujus tendo in capite superiori phalangis primæ pollicis.

Vsus. Si extremitate sua uniatur cum tendine m. extensoris majoris, phalanges ambas pollicis extendit, & extrorsum nonnihil ducit: si vero tendine suo phalangi pollicis primæ nectatur; eadem ratione phalangem primam solum movet.

8) *Extensor major pollicis*, oritur uti prior ab ulna, ligamento interosseo, & facie externa radii principio latiori, tenuiori, sed ex integro fere carneo, oblique nonnihil descendit, & in tendinem robustum, fere teretem mutatur, qui sub ligamento carpi externo transit, dorsum pollicis petit, & cum tendine m. extensoris minoris plerumque unitus, faciei externæ phalangis ultimæ pollicis prope illius basin adhærescit.

Vsus. Phalanges ambas pollicis extendit, & extrorsum, postorsumque ducit.

PRO PALMA.

- 1) *Palmaris brevis.*
- 2) - - - *longus.*

1) *Palmaris brevis* musculus est exiguus, fere quadrangularis, sub ipsis integumentis communibus hærens; oritur ope membranæ latæ aponevroticæ tum a facie externa ligamenti carpi interni prope pollicem, tum ab ipso exortu tendinis lati m. palmaris longi; abit paulo post in fasciculos aliquot carnosos; hi vero abeunt denuo in aponevrosin, per cutim evanescentem.

Vsus.

Vsus. Initium palmæ, ubi situs est, contrahit, hinc eandem reddit cavam.

2) *Palmaris longus*, oritur tendine brevi a condylo interno ossis brachii, corpore donatur carnosio exiguo, quod plerumque in tendinem longum, & angustum abit; hic in parte interna antibrachii descendit; ligamentum carpi internum supercandit, cui adhærescit, palmam petit, & in aponevrosin expanditur totam palmam obducentem, & ex partibus quatuor specialibus compositam, quarum quævis ad digitum suum excurrit, & parti internæ ossium metacarpi, basique digitorum inseritur. Aponevrosis hæc tendines, musculos, vasa, & nervos palmæ tuetur.

Vsus. Cutim palmæ contrahit.

MUSCULI EXTREMITATVM INFERIORVM.

Musculi motui *extremitatum inferiorum* dicati dirimuntur, ad morem ossium, ad quæ pertinent, in musculos *femoris, cruris, & pedis.*

MUSCULI FEMORIS.

Movendo *femori* inserviunt tredecim musculi :

- 1) *Psoas magnus.*
- 2) *Iliacus internus.*
- 3) *Pectineus.*
- 4) *Triceps femoris.*
- 5) *Obturator externus.*
- 6) *Glutæus magnus.*
- 7) - - *medius.*
- 8) - - *parvus.*
- 9) *Pyramiformis.*

10) *Obturator internus.*

11) *Gemellus.*

12) *Quadratus femoris.*

13) *Musculus fasciæ latæ.*

1) *Psoas magnus* oritur principio subtendineo a margine inferiori vertebræ ultimæ dorsi, & a vertebris quatuor superioribus lumborum, harumque processibus transversis; descendit in facie interna ossis ilei, tendinescit, & cum m. iliaco conjungitur; unitus huic progreditur inter spinam anteriorem, & inferiorem iliacam, & eminentiam proxime adsitam obliquam ossis pubis, transit demum sub ligamento Poupartii versus trochanterem minorem femoris, cui & adhæret.

Vsus. Os femoris antrorsum elevat, & simul exteriora versus retrahit.

2) **ILIACVS INTERNVS** enascitur a facie tota interna ossis ilei: fibræ ejus carneæ angustius semper contrahuntur, tendineæ factæ uniuntur psoæ magno, transeunt una cum eo, uti statim dictum fuit, per ligamentum Poupartii, terminantur demum sic unitæ in trochantere femoris parvo. Adest sæpius musculus parvus adhuc alius, enatus a spina iliaca inferiori, & antica, descendens in latere hujus externo, & insertus lineæ transversali ossis femoris illico infra trochanterem minorem. Vocatur ab aliquibus musculus *iliacus parvus*.

Vsus. Eandem cum priori exserit actionem.

3) *Pectineus* oritur a linea acuta ossis pubis, inferiora, & exteriora versus proficiscitur, terminatur demum in linea aspera infra trochanterem parvum ossis femoris.

Vsus. Femur unum alteri adducit, antrorsum parum elevat, & partem anticam illius extrorsum vertit.

4) *Triceps femoris* constat tribus specialibus partibus; unde & ab Anatomicis quibusdam in tres distinctos dirimitur musculos:

1) in *longum*;

2) in *brevem*;

3) in *magnum* introrsum proficiscentem femoris musculus.

Exoritur *primus* tendine robusto a margine antico ossis pubis prope symphisin; exhinc deorsum, & extrorsum tendit versus medium lineæ asperæ ossis femoris, cui adligatur.

Secundus enascitur illico infra præcedentem ab osse pubis, terminatur in linea aspera ossis femoris supra tendinem præcedentis.

Tertius enascitur ab eminentia, & facie antica ossis ischii; fibræ carneæ, ad morem binorum præcedentium descendunt, & lineæ eidem asperæ adnectuntur. Dum coierunt invicem omnes, abeunt demum in tendinem communem, secundum os femoris descendentem, inferius loco posteriori eminentiæ condyli interni adnexum.

Vsus. Musculi nunc enumerati tres femur unum alteri interiora versus adducunt.

5) *Obturator externus* oritur externe a parte antica ossis pubis & ischii, tum & anteriori loco a margine medio externo, posteriori demum a margine inferiori foraminis ovalis ossium innominatorum, fibræ carneæ inter marginem inferiorem acetabuli femoris, & tuberositatem ischiaticam per excisuram ibi loci positam transversim fere deorsum nonnihil proficiscuntur; terminantur posteriori loco ex latere interno ad basin trochanteris majoris femoris.

Vsus. Vna cum præcedente femur introrsum flectit, simul etiam extrorsum rotat.

6) *Glutæus magnus* musculus est latus, crassus, & carnosus: exoritur carnosus magis quam tendineus a parte dimidia postica marginis externi ossis ilei; ab ligamento externo ischiatico, ubi connectitur cum tendine m. dorsi longissimi, latissimi, & sacrolumbaris; tum & a margine externo ossis sacri, a parte postica laterali ossis totius coccygis, a facie demum interna fasciæ latæ. Musculus hic sub exortu suo adeo latus angustior sensim fit, dum per trochanterem majorem femoris oblique deorsum fertur, donec in tendinem abeat crassum, satque latum, qui in facie externa femoris conjungitur cum fascia lata, & ad quatuor scilicet transversos digitos infra trochanterem majorem in parte femoris posteriori terminatur.

Vsus. Femur postrosum versus rachidem elevat, & parum extrorsum rotat; femur antrorsum flexum ab altero abducit.

7) *Glutæus medius*, hæret sub præcedenti, & enascitur a facie tota externa ossis ilei, hujusque crista superiori, fibræ ejus, uti in priori, per descensum semper magis contrahuntur; demum, vero in tendinem abeunt robustum, superius in facie externa trochanteris magni terminatum.

Vsus. Femur unum ab altero exteriora versus removet.

8) *Glutæus parvus* hæret sub binis prioribus: enascitur a latere faciei totius externæ ossis ilei; fibræ radiatim excurrunt, & sensim denuo angustiores fiunt; terminantur demum in tendinem brevem robustum, in latere antico margini anteriori trochanteris magni adfixum.

Vsus. Femur, uti prior, extrorsum flectit.

9) *Pyrisiformis* a figura sua dictus, oritur lateraliter ab osse sacro, & parte vicina inferiori, & postica ossis ilei; oblique fere, parum tamen deorsum,

per

per excisuram ischiaticam transit, & terminatur ope tendinis longi in cavitate retro majorem trochanterem sita. Vnitur tandem tendo ejus cum tendine communi m. obturatoris interni, & gemelli.

Vsus. Femur, antrorsum flexum, extrorsum retrahit; inferiora versus flexum a femore altero removet.

10) *Obturator internus* obturat foramen ovale ossis innominati ab interno latere, uti externus ab externo. Oritur autem fibris tendineis a tota fere peripheria hujus ejusdem foraminis, uti & a ligamento, foramen claudente. Intercipiunt fibræ hæ tendinæ spatium exiguum pro transitu nervorum, & vasorum ex pelvi in femur proficiscentium. Tendo ejus transit per excisuram inter tuberositatem & spinam ossis ischii; flectitur in hac eadem excisura circa os ischii, extra pelvin transverso fere tramite dilabitur ad partem trochanteris totius superiorem, & internam, cui adnectitur.

Vsus. Rotat femur uti pyriformis, sed recta; antrorsum flexum ab altero removet.

11) *Gemellus* dirimitur a quibusdam in superiorem & inferiorem. Oritur plerumque principio conjuncto externe a spina, & tuberositate ischiatica: secedit dein in musculos binos, in communem tendinem denuo confluentes, qui cum obturatore interno jungitur, & in cavitate antea dicta retro majorem trochanterem terminatur.

Vsus. Obturatorem internum in actione sua juvant.

12) *Quadratus femoris* longitudine latitudinem superat; exoritur a margine externo tuberositatis ischiaticæ; fibræ carneæ femur transverso tramite petunt, & terminantur in linea trochantere majori, minorique intercepta.

13) *Musculus fasciæ latæ.* Musculus hic exiguus planus enascitur tendineus a latere externo spinæ anterioris, & superioris iliacæ, illico carnosus fit, & fibris tendineis brevibus evanescit in facie interna fasciæ latæ.

Ipsa autem *fascia lata* membrana est robusta aponevrotica enata a latere externo cristæ superioris iliacæ, a ligamento Poupartii, a ligamento muscoli abdominalis obliqui externi, & a parte inferiori ossis sacri, magnique trochanteris, descendit in femore, omnes vix non musculos circa illud positos includit; dum genu transcendit, musculos omnes ambit cruris, & in hujus demum extremitate terminatur.

Vsus. Musculus fasciæ latæ fasciam tendit, partem anticam femoris introrsum ducit.

M V S C V L I C R V R I S.

Motui *tibiæ* dicantur musculi decem, qui omnes a fascia lata includuntur.

- 1) *Rectus cruris.*
- 2) *Vastus externus.*
- 3) - - *internus.*
- 4) *Cruræus, s. cruralis.*

Crus extendunt.

- 5) *Biceps cruris.*
- 6) *Semitendinosus.*
- 7) *Semimembranosus.*
- 8) *Gracilis.*
- 9) *Sartorius.*

- 10) *Popliteus.*

Crus flectunt.

1) *Rectus anticus cruris* oritur tendine duplici robusto; cujus pars una enascitur a spina anteriori, & inferiori ossis ilei, altera a margine superiori acetabuli;

tabuli; exhinc antèrius recta in femore descendit, & unitur inferius cum m. crurali, ex lateribus autem cum musculis binis vastis cruris; inseritur demum una cum his ipsis in poplitem, & partem anteriorem ligamenti, quo patella cum tibia firmatur.

Vsus. Genu flexum extendit.

2) *Vastus externus* oritur a parte anteriori, & externa trochanteris magni ad hujus basin, ubi & cum glutæo magno cohæret; oblique exin descendit, latus externum femoris fere totum tegit, adligatur demum tendine lato, crasso, brevique margini externo patellæ, & parti anteriori condyli superioris tibiæ; conjungitur etiam cum ligamento patellæ, & fascia lata.

Vsus. Genu extendit.

3) *Vastus internus* obtegit latus totum internum femoris, uti prior externum. Oritur ab eminentia obliqua, sub trochantere minori sita; uti præcedens descendit, & ope tendinis lati inseritur lateri interno patellæ: conjungitur cum tendine muscoli cruris anteriori recti, & cum fascia lata: fibris quibusdam tendineis adfigitur etiam ex latere interno capiti superiori tibiæ.

Vsus. Genu pariter extendit.

4) *Crureus* oritur antèrius a latere externo ossis femoris, ad patellam descendit; & fibris carneis in tendineam indolem prius mutatis, conjungitur cum tendine communi binorum vastorum, & una cum hisce tendinibus in aponeurosin abit, patellam obtegentem, & uti antea dictum fuit, tibiæ adnatam.

Vsus. Concurrat hinc etiam ad extensionem genti.

5) *Biceps cruris* componitur musculis binis, qui in extremitate primum sua coeunt in communem tendinem. Vnus illorum paulo longior est, & enascitur tendine brevi, robusto, latoque a tuberositate Ischia-

tica; cohæretque ibi loci cum m. semitendinoso: brevior autem exoritur in medio fere femoris a linea aspera, quæ in ossis femoris parte posteriori conspicitur. Descendunt ambo parum exteriora versus, & tendinei facti, in tendinem robustum, complanatum, brevem abeunt, qui lateri externo capitis superioris fibulæ adfigitur.

Vsus. Genu postrosum flectit; flexo vero eodem tibiam, parte sua anteriori prius introrsum versam, extrorsum rotat.

6) *Semitendinosus* dicitur, quum pars media inferior mero tendine absolvatur: enascitur tendine angusto crasso a tuberositate ossis ischii, unitur parti longiori m. bicipitis cruris, terminatur postea in tendinem longum, crassum, complanatum, ex parte postica secundum ductum femoris recta descendentem, & faciei internæ infra caput ossis tibiæ, illico sub m. gracili adnatum.

Vsus. Genu postrosum flectit. Dum flexum est, tibiam, parte sua anteriori extrorsum prius versam introrsum movet.

7) *Semimembranosus* sic dicitur, quod pars media inferior solo tendine lato membranaceo perficiatur. Enascitur tendine longo, crasso, & fere tereti a parte superiori tuberositatis ossis ischii, secundum femur descendit, & adhærescit loco posteriori illico infra caput internum tibiæ.

Vsus cum præcedente idem.

8) *Gracilis*, musculus est longus, & tenuis, oriundus tum ad symphisin ossium pubis a ligamento ossa hæc connectente, tum infra illam a margine ossis pubis; descendit exhinc in latere interno femoris ad caput superius tibiæ; terminatur antè in latere interno capitis hujus prope spinam tibiæ.

Vsus.

Vsus. Genu postrosum flectit; dum flexum est, tibiam ea ratione rotat, ut pars anterior pedis extremi obvertatur pedi alteri.

9) *Sartorius* longissimus fere musculorum corporis omnium est: oritur tendine brevi a spina anteriori, & superiori iliaca, supercandit tum oblique musculos omnes in facie femoris anteriori positos, latus genu internum petens; tendinescit ibi, & ope tendinis sat lati terminatur sub capite tibiæ interiori.

Vsus. Genu postrosum flectit; tibiam ea ratione rotat, ut pars antica pedis extremi obvertatur pedi alteri, & ut sedentes femur unum alteri, sartorum in morem, superinponere queamus.

10) *Popliteus* situs est oblique sub poplite; enascitur autem tendine exiguo, brevi a condylo externo femoris, supercandit hinc oblique ligamentum capsulare, cui adhærescit, interiora petit, & in facie postica extremitatis superioris tibiæ terminatur.

Vsus. Tibiam, flexo genu ea ratione rotat, ut pars anterior pedis extremi obvertatur pedi alteri.

M V S C V L I P E D I S.

Motui *pedis* dicantur musculi octo, tum tarso, tum ossibus metatarsi adnexi:

1) *Gemellus*, sive *gastrocnemius*.

2) *Soleus*.

3) *Plantaris*.

Pedem extendunt.

4) *Tibialis anticus*.

5) *Peroneus tertius*.

Pedem flectunt.

6) *Tibialis posticus*.

Pedem introrsum vertit.

7) *Peroneus longus.*

8) - - *brevis.*

Pedem extrorsum vertunt.

1) *Gemellus*, sive *gastrocnemius*: veniunt sub hoc nomine muscoli duo crassi, lati nonnihil, oblongi, sub exortu separati, sub finem coeuntes, hinc musculum unum constituunt digastricum; oriuntur ex toto fere tendinei loco postico, & lateraliter illico supra condylos ambos ossis femoris, ea ratione, ut unus proficiscatur a latere externo, alter ab interno: corpora horum musculorum carnosia bina sub sura in unum confluunt, & tendinem formant communem, latum, robustum, qui cum tendine muscoli solei unitus tendinem generat crassissimum, validum, sub nomine *tendinis achillis* notum. Descendit hic versus calcaneum, angustior parum fit, & terminatur, magis denuo diductus, in facie postica nunc dicti ossis.

Vsus. Calcaneum elevant, plantam postrosum ducunt, hinc pedem extremum extendunt.

2) *Soleus* oritur principio duplici, lato, tendineo superius a parte postica fibulae, & tibiae; adhærescit tum margini postico spinæ tibiae internæ ultra medium hujus ossis usque, latior sensim per decursum fit, & cohæret tendini gastrocnemii, cum quo tendinem format achillis, & eandem exferit actionem.

3) *Plantaris* enascitur tendine complanato exiguo a condylo externo femoris; in corpus abit carnosum, quod mutatur mox in tendinem longum, tenuem, angustum, descendentem inter m. soleum, & gastrocnemium, cum tendine communi unitum, & faciei externæ faciei posticæ ossis calcanei adnexum.

Vsus idem cum gastrocnemio.

4) *Tibialis anticus* oritur superius infra condylum tibiæ a facie ejus externa, secundum hanc descendit, & in tendinem abit robustum, qui ligamentum transversale tarfi transit, & ope extremitatis duplicis tum faciei superiori convexæ ossis primi cuneiformis, tum basi ossis primi metatarfi adnectitur.

Vsus. Partem anticam pedis extremi elevat, & hinc flectit.

5) *Peroneus tertius* oritur secundum longitudinem partis dimidiæ inferioris fibulæ, tendo transit per ligamentum transversale tarfi, & terminatur in parte postica, & superiori ossis quinti metatarfi.

Vsus. Vna cum præcedenti pedem extremum flectit.

6) *Tibialis posticus* oritur carneus loco superiori a parte postica tibiæ, & fibulæ, illico infra articulationem ossium horum invicem; carneus descendit, ac in tendinem abit, retro malleolum internum ad pedem extremum excurrentem, ubi in plures portiones finditur, & in facie interna pedis tum ossi naviculari, tum parti posteriori, & inferiori ossis cuneiformis primi, & tertii tarfi, tum & non raro parti inferiori ossis metatarfi tertii adfigitur.

Vsus. Pedem extremum oblique introrsum, & postorsum elevat; hinc plantam introrsum, & postorsum rotat.

7) *Peroneus longus* enascitur superius a facie externa fibulæ, secundum illam descendit, & tendine suo retro malleolum externum per ligamentum, quod illi cum m. peroneo brevi commune est, transit in plantam, ubi in facie interna ossis metatarfi primi evanescit.

Vsus. Plantam extrorsum, & parum postorsum rotat.

8) *Peroneus brevis* oritur anterius a medio fibulæ, in tendinem mox abit, qui una cum tendine m. præcedentis retro malleolum externum per ligamentum utrique commune transit, & faciei convexæ ossis metatarsi quinti inseritur.

Vsus. Præcedentem in actione sua juvat.

MUSCULI DIGITORVM PEDIS.

- 1) *Extensor longus digitorum pedis.*
- 2) - - - *brevis* - - -
- 3) *Flexor longus, s. perforans digitorum pedis.*
- 4) - - *brevis, s. perforatus* - - -
- 5) *Lumbricales.*
- 6) *Interossei inferiores.*
- 7) - - - *superiores.*

1) *Extensor longus dig. ped.* oritur tum a parte anteriori ligamenti interossei, & parte inferiori, & antica tibiæ, tum a facie interna fibulæ, secundum longitudinem horum ossium descendit, oblique antorsum per lig. transversale tarfi ad dorsum pedis proficiscitur, & in tendines quatuor ibi loci finditur, qui in faciebus superioribus convexis digitorum quatuor minorum terminantur.

Vsus. Phalanges horum digitorum extendit; phalangem primam & elevat.

2) *Extensor brevis digitorum pedis*, oritur a facie externa, & superiori calcanei, per dorsum pedis oblique introrsum pergit, & finditur ibi in partes quatuor, quarum quævis mutatur in tendinem tenuem, planum, satque longum; primus, & maximus horum adhæret faciei superiori phalangis primæ pollicis, tres reliqui, tendinibus extensoris longi uniti inseruntur phalangibus extimis digitorum trium sequentium.

Vsus.

Vsus. Digitos, ad quos fertur, rectos reddit, dum phalanges omnes digitorum minorum, & primam pollicis extendit; elevat simul phalangem primam tum pollicis, tum & digitorum minorum.

3) *Flexor longus* s. *perforans*, enascitur a medio faciei posticæ tibiæ, & a ligamento interosseo, tendineus factus, retro malleolum internum ad calcaneum properat, cui ope ligamenti specialis adhærescit, & ubi conjungitur cum fasciculo fibrarum carnearum, quæ oriuntur a calcaneo, & ab aliquibus pro genuino habentur m. plantari. Fertur ab hoc ligamento oblique antrorsum, & extrorsum ad medium usque plantæ, ubi tendo quadrifariam finditur; partes hæc per fissuras tendinum quatuor m. perforati transeunt, & phalangi tertiæ digitorum quatuor minorum implantantur.

Vsus. Phalanges digitorum omnes tres digitorum quatuor minorum deorsum flectit.

4) *Flexor brevis*, s. *perforatus dig. ped.* hæret sub aponevrosi plantari, enata a facie inferiori calcanei, plantam totam tegente, & capitibus ossium metatarsi adhærente. Sub aponevrosi itaque hac musculus hic situs est, oritur a facie inferiori, & interna calcanei per decursum abit, uti prior, in tendines quatuor, qui in extremitatibus suis finduntur pro transitu tendinum m. perforantis, demum vero faciei internæ phalangis mediæ digitorum quatuor minorum inferuntur.

Vsus. Seriem secundam, & primam phalangum digitorum quatuor minorum deorsum flectit.

5) *Lumbricales* musculi sunt quatuor exigui, tennes, m. lumbricalibus manus simillimi, enascuntur a tendine m. perforantis digitorum, ope tendinum exiguorum parti inferiori, & posticæ phalangis primæ digitorum quatuor ultimorum adhærent, ubi fi-

bris quibusdam tendineis cum m. perforante ununtur.

Vsus. Phalanges primas quatuor digitorum versus plantam, & simul oblique antrorsum flectunt.

6) *Interossei inferiores* tres spatium inter ossa metatarsi in planta, uti superiores in dorso pedis, expleant. Oriuntur tendinibus tenuibus angustis ea ratione, ut primus secundum longitudinem partis inferioris, internæ ossis metatarsi tertii enatus terminetur in latere interno phalangis primæ tertii digiti; alter autem exortus a parte interna, & inferiori ossis metatarsi quarti, inseratur parti internæ phalangis primæ digiti quarti; tertius demum, ortus a parte interna, & inferiori ossis metatarsi quinti, inseratur ope tendinis sat longi, & lati, parti denuo internæ phalangis primæ digiti minimi.

Vsus. Phalangem primam digitorum quatuor minorum versus pollicem, & simul postrosum nonnihil ducunt.

7) *Interossei superiores* quatuor sunt: primus enascitur inferius a lateribus ossis primi metatarsi, & superius ab osse metatarsi secundo, terminatur in latere interno phalangis primæ digiti secundi, tres reliqui oriuntur a facie interna ossium metatarsi trium ultimorum, & a facie externa ossis metatarsi secundi, tertii & quarti; finiuntur tendinibus exiguis in latere externo phalangis primæ digitorum.

Vsus. Phalangem primam digitorum quatuor minorum a pollice abducunt, & simul postrosum parum flectunt.

P R O M O T V P O L L I C I S .

- 1) *E*xtensor proprius pollicis pedis.
- 2) *F*lexor longus pollicis pedis.
- 3) — — brevis — — —
- 4) *A*dductor pollicis pedis.
- 5) *T*ransversalis pedis.
- 6) *A*bductor pollicis pedis.

1) *E*xtensor proprius pollicis pedis oritur anterior a parte interna, & media fibulæ, a ligamento interosseo, subin & ab ipsa tibia, carneus factus, uti m. tibialis anticus per lig. transversale tarfi transit, ac in dorso phalangis extimæ pollicis terminatur; tendo hic utrinque emittit membranam latam, tenuem, aponevroticam, phalanges pollicis exacte ambientem.

*V*sus. Phalangem primam, & ultimam pollicis extendit, retrorsum flectit.

2) *F*lexor longus pollicis pedis, enascitur posterior a parte media, & inferiori fibulæ, tendine suo retro malleolum internum oblique in plantam descendit, ac in parte inferiori phalangis primæ, & ultimæ pollicis terminatur.

*V*sus. Phalangem ultimam; & primam pollicis deorsum flectit.

3) *F*lexor brevis pollicis oritur tendinoso sat lato, tenui tamen principio a parte infima ossis cuneiformis tertii, subin & ab osse cuboideo tarfi, decursu recto ad initium pollicis excurrit, & parte tendinis sui inseritur ossibus sesamoideis, inter articulationem pollicis & ossa metatarsi positus; altera parte adhærescit phalangi pollicis hujus primæ. Vnitur etiam cum tendine m. abductoris, & adductoris pollicis.

*V*sus. Phalangem pollicis primam deorsum flectit.

4) *A*dductor

4) *Adductor pollicis* oritur tendineus a parte inferiori ossis metatarsi quarti, tertii, & subin secundi, ac a tendine m. peronei longi, fertur hinc ad pollicem, & inseritur tendine suo parti posticæ, inferiori ossis sesamoidei interni, primæque phalangis pollicis. Tendo musculi hujus unitur cum præcedente & transverso pedis musculo.

5) *Transversalis pedis* oritur plerumque tendine lato tenuissimo ab extremitate antica ossis quinti metatarsi, & partim ab aponevrosi plantari, exhinc transversali itinere plantam emetitur; inseritur demum ossi sesamoideo, ubi insertio est m. adductoris pollicis, cujus extremo etiam unitur.

Vsus. Contractione sua partem plantæ anteriorem, supra quam excurrit, cavam reddit, quum pollicem ad digitos posteriores, hos vero ad pollicem de novo adducat.

6) *Abductor pollicis* oritur tendinibus latis, tenuibus a calcaneo, ab osse naviculari, & cuneiformi: coëunt hi omnes illico in musculum, qui tendine longo, crasso, & complanato in extremitate antica ossis primi metatarsi, & parte postica phalangis primæ pollicis terminatur.

Vsus. Pollicem a digitis reliquis abducit; concurrat etiam cum reliquis, ut pes extremus introrsum, & deorsum flectatur.

PRO MOTV DIGITI MINIMI.

- 1) *Flexor brevis digiti minimi pedis.*
- 2) *Abductor digiti minimi pedis.*

1) *Flexor brevis dig. min.* oritur tendineus a parte inferiori, & postica ossis ultimi metatarsi; inseritur parti posticæ inferiori phalangis primæ digiti minimi,

minimi, tum & margini externo faciei inferioris ossis ultimi metatarsi.

Vsus. Phalangem digiti minimi ultimam deorsum flectit.

2) *Abductor digiti minimi* oritur tendineus a facie tota externa calcanei, excurrit hinc ad os metatarsi quintum, & terminatur ope tendinis tenuioris exteriora versus, tum in extremitate ossis hujus superiori, tum & in basi phalangis primæ digiti minimi.

Vsus. Digitum minimum cum osse metatarsi deorsum flectit, & digitum hunc a reliquis abducit.

MUSCULI ABDOMINALES.

Musculi abdominales vocantur muscoli, qui abdomen ambiunt.

Decem sunt, quorum ex utroque latere quinque locantur:

- 1) *Obliquus externus abdominis.*
- 2) — — *internus* — — —
- 3) *Transversus abdominis.*
- 4) *Rectus abdominis.*
- 5) *Pyramidalis.*

1) *Obliquus externus abdominis* musculus est latus, tenuis, posterius ad exortum suum carnosus, anteriori, & inferiori loco in aponevrosin terminatus. Oritur superius, at nonnihil lateraliter a costis octo, aut novem infimis ope digitationum carnosarum octo, vel & novem; quatuor supremæ uniuntur cum digitationibus quatuor muscoli inpositi ferrati majoris anteriori, inferiores cum digitationibus ferrati inferioris & postici, ac cum latissimo dorsi; fertur tum oblique antrorsum, & deorsum; anteriori loco adnectitur secundum totam longitudinem lineæ albæ abdominis; terminatur ad cristam ilei, tum anteriori loco ad os pubis ope tendinis, conjuncti cum tendine muscoli obpositi.

siti obliqui externi, ea ratione, ut partes tendineæ musculorum horum binorum ad os pubis sese invicem decussent: finditur exin tendo hic loco infimo ex lateribus abdominis, ut transire queant in viris vasa spermatica, in feminis ligamenta uteri rotunda, ex cavo abdominali prodeuntia: fissura hæc sub nomine *annuli abdominalis* nota est; atque hic loci sedes est herniarum inguinalium; infra annulum hunc conjungitur cum musculo abdominis transverso, & una constituunt ligamentum tendineum, spinæ iliacæ inferiori, anterius ossi pubis adnexum, *ligamentum inguinale*, FALLOPII, aut POVPARTII dictum; exhinc deorsum magis descendit, ac fasciæ conjungitur latæ. Sub ligamento hoc eodem excurrunt tendines musculi psoæ magni, & iliaci interni, tum & arteriæ, venæ, nervique crurales: hic loci cernuntur herniæ sic dictæ femorales.

2) *Obliquus internus* priori subjacet; oritur fibris tendineis a processibus spinosis, & transversis vertebrarum trium, aut quatuor infimarum lumborum, a parte superna ossis sacri, ac a margine toto superiori, & antico ossis ilei; ascendit hinc & inferiori, posteriorique loco antrorsum, & oblique sursum; adfigitur margini inferiori partis cartilagineæ costarum omnium spuriarum, binarumque infimarum verarum ad sternum usque, & processum xiphoideum; anterius abit in aponevrosin firmam, cujus pars superna, & inferna simplex primum supra musculum abdominis rectum lineæ albæ abdominis inplantatur, dein vero in bina secedit strata, quorum unum supra rectum abdominis, alterum vero sub eodem ad lineam proficiscitur antea dictam albam, ubi de novo ambo invicem coeunt, ac tum in linea hac evanescent, tum ossi adligantur pubis.

3) *Transversus*

3) *Transversus abdominis* oritur principio tendineo loco posteriori a processibus transversis, & spinosis vertebrarum quatuor ultimarum lumborum, inferiori vero a labio interno marginis superioris, & antici ossis ilei, & pubis: superius enascitur a facie interna costarum omnium spuriarum, binarumque ultimarum verarum; extenditur ad cartilagineum usque xiphoideum sterni. Abeunt tum fibræ tendinæ musculi hujus ejusdem antè in tendinem latum, qui cum aponevrosi musculi obliqui interni cohæret, ac in linea alba abdominis terminatur.

Vsus. Ex unione tendinum horum trium musculorum exurgit in medio abdominis expansio illa aponevrotica, quam recepto termino *lineam albam* dicunt.

4) *Rectus abdominis* tres transversos digitos latitudine æquat, & in medio abdominis longitudinali decursu lineæ abdominis albæ adjacet. Oritur a cartilagine xiphoide, & a costis tribus ultimis veris, primaque spuria ope diversarum productionum, seu digitationum. Descendit hinc in linea alba abdominis inferiora versus, & adnectitur tendine lato tenui labio interno marginis superioris ossis pubis.

Notandum circa musculum hunc in specie est, præditum esse ab exortu suo usque ad umbilicum, sæpius & infra hunc eundem, lineis tribus, vel quatuor tendineis latioribus, quas *inscriptiones musculi recti tendineas* vocant; transversim inscriptiones hæ musculi hujus fibras recta descendentes interfecant. Vagina recti abdominis musculi intersectionibus, seu transversis lineis nunc expositis adhærescit; contribuere videtur ad majorem illius firmitatem.

5) *Pyramidalis* musculorum abdominalium omnium minimus, inferius in medio situs est; oritur a parte anteriori, & superiori ossis pubis, ascendens
magis

magis semper, magisque contrahitur, ut pyramidem referat, extremitate demum tendinea in linea alba abdominis evanescit, emissis etiam fibris plurimis tendineis in rectum abdominis. Musculus hic sæpe ex integro deficit, sæpe unicus solum adest, isque tum in medio hæret, & robustior est: si vero ex integro deficiat, rectus inferius latefcit, & crassior est, ut deficientis obeat vices.

Vsus. Musculi abdominales quinque abdomen constringunt, viscera contenta omnia premunt, excretionem fæcum, lotii, fœtus exclusionem & placentaæ promovent. Viscera abdominalia comprimentes diaphragma sursum agunt, hinc cavum thoracis angustius reddunt, & pulmones simul comprimunt. Motus etiam corporis in varium sensum faciliores reddunt. Musculis his ipsis accenseri etiam meretur diaphragma, partem abdominis superiorem reddens angustiore, viscera abdominalia deorsum, hinc musculos dictos extrorsum premens.

M V S C V L I A N I.

Tria sunt musculorum paria.

- 1) *Levatores ani.*
- 2) *Transversus perinæi.*
- 3) *Sphincter ani internus.*
- 4) - - - *externus.*

Levator ani, aut *musculus ani latus*, musculus latus, tenuisque est, oriens principio tendineo a spina ossis ischii, huicque propinqua facie interna ossis hujus ejusdem, ab interna parte ossis ilei, ad hujus nexum cum osse ischii, antè demum a parte interna, & superna ossis pubis; fibræ carneæ tum radiatim descendunt ad partem intestini recti posticam,
ubi

ubi tum ossi coccygis adhærent, tum uniuntur cum sphinctere ani interno, sicque posteriori loco ambiunt intestinum rectum, anteriori vero in viris collium vesicæ urinariæ, glandulam spermaticam, & vesiculas spermaticas, in feminis partem vaginæ uteri.

Vsus. Ambo simul agentes partem posteriorem intestini recti antrorsum ducunt, & simul elevant, ne, sub depositione alvi, foras prodeat. Comprimere simul parum videntur glandulam spermaticam, bulbum urethræ, & vesiculas spermaticas.

Sphincter ani internus annulus est oblongus carnosus, robustus, crassus, constans fibris orbicularibus intestini recti, orificium ani ambiens, & exacte claudens.

Sphincter ani externus musculus latus est, tenuis, carnosus, compositus binis fibrarum fasciculis, ex lateribus excurrentibus, & anteriori, posteriorique parte coëuntibus, sub angulis acutis posterioribus, & superius textui carnosio adnexo ossi coccygis, anterioribus autem, & inferius membranæ intestini recti, medio & lateribus musculis acceleratoribus, bulbo demum urethræ implantatis: conjungitur ope fibrarum plurium cum sphinctere interno, in feminis cum sphinctere vaginæ.

Vsus. Orificium ani musculo hoc clauditur, constringitur, ne fæces omni tempore exeant, tum & ne intrare quid intestinum rectum queat.

VESICÆ VRINARIÆ

proprius est

SPHINCTER VESICÆ: constat fascia fibrarum carnearum, in viris a sphinctere ani, in feminis a sphinctere vaginæ exortarum, collo vesicæ urinariæ undique adnexarum, idque constringentium, ne lotium
 O effluere

effluere semper queat. Referendæ huc etiã sunt fibræ carneæ, constringentes vesicam urinariam, ejusque cavum minuentes; quod quidem in SPLANCHNOLOGIA latius exponetur.

T E S T I B V S

dicatur.

CREMASTER TESTICVLORVM; oritur musculus hic, testi cuius in specie proprius, a fibris feculentibus muscoli obliqui interni abdominis, & a tendine hujus ejusdem, qui sub nomine *ligamenti Poupertii* notus est, una cum vasis spermaticis in scrotum descendit, ibique expanditur in vaginam, qua posterius primo, tum vero ab omni simul latere testis amicitur, comprimitur, elevatur, evacuatur. Referunt huc Anatomici nonnulli & tunicam carnosam scroti; hæc tamen non carnosæ, sed cellulose denso textu absolvitur, unde huc referenda non est.

M V S C V L I P E N I S.

sunt :

- 1) *Erectores*, seu *ischio - cavernosi*.
- 2) *Transversus perinæi primus*.
- 3) - - - - - *secundus*.
- 4) *Acceleratores*.
- 5) *Compressor prostatae*.

1) *Erectores penis* oriuntur a tuberositate ischiatica sub corporibus cavernosis penis; hinc antrosum, & introrsum adscendunt, ac corporibus cavernosis implantantur. Ex hoc eorum situ facile adparet, dicatos eos non esse, uti prius, autumabant auctores, peni erigendo, sed abducere illos potius hunc eundem

dem ab ossibus pubis deorsum, sicque in directione inter perpendicularem, & horizontalem media retinere.

2) *Transversus perinæi primus* oritur tendine exiguo tenui a tuberositate ischiatica, ad exortum erectoris penis (aut clitoridis in feminis) excurrit, carnosus illico factus, ad os ischii, jungitur cum erectore penis, & tum medio bulbi urethræ inseritur, tum in acceleratorem abit.

Vsus. Bulbum urethræ constringit, hunc eundem concutit, & retrorsum trahit.

3) *Transversus perinæi alter* oritur pariter a tuberositate ischiatica, & ante bulbum in urethram desinit.

Vsus. Urethram dilatat.

4) *Acceleratores* oriuntur ex utroque latere a corporibus spongiosis, ambiunt dein urethram, & in media, infimaque parte bulbi coeunt; posterius ununtur etiam cum sphinctere ani.

Vsus. Agentes bulbum comprimunt, concutunt, retrorsum trahunt.

In senibus, ubi muscoli nunc dicti jam debilitati sunt, ultimæ lotii guttæ ex bulbo nunquam penitus exprimuntur; hinc arte subplenda est natura.

5) *Compressor prostatae*, oritur a facie interna ossis pubis, inter partem infimam symphiseos horum ossium, & foramen magnum. Musculus hicce tenuis inflexus retrorsum excurrit, prostatam amplectitur, & vel in parte inferiori hujus evanescit, vel vero conjungitur cum socio, ex obposito latere adveniente.

VAGINAE VTERI

dicatur

CONSTRUCTOR CVNNI, oritur utrinque a sphinctere ani; augetur & fasciculo alio fibrarum carnearum, ab osse ischii enatarum; secundum exortum labiorum vulvæ antrorsum fertur, & cruribus clitoridis implantatur.

Vsus. Agens latera vaginæ comprimit, eamque sic angustiozem reddit.

CLITORIS.

instruitur

ERECTORIBVS BINIS CLITORIDIS; quivis ex suo latere enascitur ab ossibus ischii; terminatur in corpus spongiosum clitoridis.

Vsus idem est, uti erectorum penis virilis.



ANGIO-

ANGIOLOGIA.



V A S A I N G E N E R E.

Vasa omnia corporis humani aut *sanguifera* sunt, aut *lymphatica*: de his postremis in speciali sectione agemus.

Vasa dirimuntur in *arterias*, & *venas*.

Arteria canalis est membranaceus, flexilis, conoideus, vibrans, ramis innumeris per corpus propagatus, sanguinem a corde acceptum in omnes partes deferens.

Vena canalis est flexilis, conoideus, membranaceus, non tamen vibrans, sanguinem a partibus omnibus ad cor reducens.

Figura conoidea est; basis conii tum arteriarum, tum venarum in corde est; apices obversi sunt partibus a corde remotissimis.

Arteriæ itaque deducunt sanguinem a basi ad apicem, *venæ* ab apice ad basin.

Componuntur ARTERIAE *membranis*, seu *tunicis* sequentibus.

1) *Extima* tunica ubique enascitur a cavis, quæ arteriæ transeunt; in capite a dura meninge, in thore a mediastino, in abdomine a peritoneo.

2) Sequitur *cellulosa*, priori subjecta, arterias laxè ambiens; in arteriis magnis sæpe pinguedine turget; vasa ordinat, nutritioni majoris arteriæ dicata.

3) *Muscularis*; componitur fibris arcuatis, muscularibus, plures ex his circulum integrum absolvunt.

4) Priori subjecta absolvitur textu tenui celluloso, musculari arcte adhærente.

5) Ultima & *interna* alba, firma, lævissima est.

Instructæ sunt tunicæ hæ ipsæ arterioliis nutritibus, venis, ac nervis.

Ortus arteriarum omnium aut ab

Arteria pulmonali, enata ex cordis ventriculo anteriori, seu dextro, aut ab

Art. Aorta, exorta ex ventriculo cordis posteriori, seu sinistro repetendus est.

Finiuntur in

- 1) Venas exiguas, aut
- 2) in superficiem externam corporis,
- 3) in cava majora, minoraque, ubi rorem subtilissimum exhalant:
- 4) in vasa excretoria, liquidum corpori noxium excernentia; v. g. vasa cutanea,
- 5) in ductus, seu sinus speciales, in quos sanguinem subinde exonerant, v. g. in tubis fallopianis, in pene, &c.
- 6) In vasa secretoria, v. g. in hepate, testibus, &c.
- 7) In glandulas, quorsum etiam succum specialem deponunt.

Vsus. Sanguinem a corde ad partes corporis omnes deferunt; ex eo liquida nutritioni, vitæque sacra secernunt, inutilia ex corpore eliminant.

VENAE eadem gaudent structura, excepta solum tunica musculari.

Differunt ab arteriis :

- 1) In genere tenuiores, debiliores illis sunt.
- 2) Harum diameter amplior diametro arteriarum, quæ cum illis nectuntur; exceptionem faciunt arteriæ pulmonicæ, eadem cum venis pulmonicis diametro præditæ.
- 3) Copia harum in corpore adest major.
- 4) Non vibrant.
- 5) Arteriis minus profunde hærent.
- 6) Interius pluribus donantur valvulis.

Valvula

Valvula dicitur plica semilunaris mobilis, a tunicis binis internis producta, facie concava cor, convexa partes a corde remotas respiciens. Margine semilunari adnectuntur parieti interiori vasis, ex quo oriuntur; margo externus in hujus lumine libere fluctuat. Adest sæpius non nisi unica: subin & duæ, aut tres ex ordine parietibus adhærent.

Vsus. Impediunt ne sanguis versus apicem, aut partem angustio rem venarum retrogrediatur.

Non omnes venæ instructæ sunt valvulis, uti suo loco in specie dicitur.

Oriuntur venæ 1) ex tota corporis superficie; 2) ex superficie cavorum internorum corporis; 3) immediate ex finibus ultimis arteriarum; 4) ex cavitatibus specialibus, v. g. corporibus cavernosis penis, urethræ, vaginæ uteri &c. 5) ex glandulis lymphaticis. Exonerant omnes sanguinem suum 1) in venam cavam magnam; 2) in venas pulmonales; 3) in venam portæ, demum vero in atria cordis.

Vsus. Venæ sanguinem ex omnibus partibus reducunt ad cor: liquida tenuiora in externa, & interna corporis superficie resorbent, & ad cor deferunt.

SYSTEMA ARTERIOSVM IN GENERE.

AORTA, ex corde vix enata, emittit *arterias coronarias cordis*; tum sinistrorsum versus spinam dorsi arcum magnum; descendit secundum illam sub nomine *aortæ descendentis*.

Ex parte convexa arcus aortæ veniunt rami sequentes tres:

- 1) Arteria innominata, ex qua
Carotis dextra, &
Subclavia dextra.

- 2) Carotis sinistra.
- 3) Subclavia sinistra.

Carotis quævis abit in externam, & internam:
Carotis externa largitur ramos quatuor.

Anterius.

- 1) Thyroideam superiorem.
- 2) Sublingualem, seu raninam.
- 3) Maxillarem inferiorem.
- 4) - - - externam; ex qua
 Art. mentalis.
 - - coronaria labiorum.
 - - angularis.

Posterius

- 5) Art. pharyngeam adscendentem.
- 6) - - occipitalem.
- 7) - - auditoriam externam, tum
- 8) - - temporalem, ex qua
 Art. frontalis.

In latere interno maxillæ inferioris prope condylum articulare carotis externa vocatur *Art. maxillaris interna*: ex hac veniunt:

- 1) Art. sphœnomaxillaris; ex hac
 Art. duræ matris anterior.
 Art. alveolares superiores, & art. maxillaris superior.
- 2) Art. alveolares inferiores.
- 3) Art. duræ matris media, seu sphœno-spinosa.

Carotis interna, seu cerebralis intra cranium dat Art. ophthalmicam, s. orbitalem internam, ex qua
 Art. ciliares, & plerumque
 Art. centralis retinæ.

Carotis interna tum bifurcatur in ramos duos principes, quorum prior audit

- Art. cerebralis anterior, alter
 Art. - - - posterior.

Art.

Art. subclavia largitur ramos 4. sequentes principes :

- 1) Mammariam internam, ex qua
 Mediaſtina,
 Thymica,
 Pericardiaca, ex qua denuo
 Diaphragmatica superior, &
 Trachæalis, ſeu gutturalis inferior.
- 2) *Art. cervicalem*, denuo in ramum anteriorem, & poſtერიorem diviſa.
- 3) *Art. vertebrales*, hæ intra cranium unitæ generant Baſilarem.

Ex illis venit ulterius

 Auditoria interna.

Art. duræ matris poſterior, &

Spinalis anterior, ac

 - - - poſterior.

- 4) *Art. intercoſtalem ſuperiorem*.

 Truncus ſubclaviæ, ad axillam progreſſus

Art. axillaris, hæc ad brachium producta

Art. brachialis vocatur.

Art. axillaris dat ramos quatuor ſequentes:

- 1) Mammariam externam.
- 2) Thoracicam inferiorem.
- 3) Scapularem externam.
 - - - - internam.
- 4) Humeralem.

Art. brachialis primo multos ramos laterales emittit, tum bifurcatur in cubito, sæpius jam ſuperius ad exortum in ramos duos :

- 1) in *Art. cubitalem*.
- 2) in *Art. radiæam*, ſeu radialem.

 Cubitalis emittit ramos quinque :

- 1) *Cubitalem recurrentem*.

- 2) Interosseam externam.
- 3) - - - internam.
- 4) Arcum palmarem.
- 5) Digitales.

Radialis dat radiam recurrentem : inferius in palma duas digitales, una cum ramis variis, cum ramis cubitalis unitis.

Ex *trunco aortæ descendentis* exsurgunt in *thorace* rami tres :

- 1) Bronchialis.
- 2) Oesophagea.
- 3) Intercostales inferiores.

In *abdomine* rami octo :

I. *Art. Cæliaca*, ex qua

Duæ diaphragmaticæ, s. phrenicæ inferiores.

Coronaria stomachica.

Hepatica; ex hac vero

1) Pylorica.

2) Gastrica major, s. dextra, ex hac
Duodenalis.

Gastroëpiploicæ dextræ,

3) *Art. cysticæ*, s. capsulares.

Splenica, ex qua

1) Pancreatica.

2) Gastrica minor, seu sinistra, ex qua
Gastroëpiploicæ sinistra.

- - - - - mediæ.

3) Breves.

4) Epiploicæ.

II. *Mesenterica*, seu *mesaraica superior*, ex qua venit *Colica superior*, seu dextra.

III. *Renales*, seu *emulgentes*, ex quibus *adiposæ*, *suprarenales*.

IV. *Art. Spermaticæ*

V. Mesenterica inferior, ex qua colica sinistra, & hæmorrhoidalis interna.

VI. Lumbares.

VII. Sacrales.

VIII. Iliacæ, quæ dividuntur in internas, & externas.

Iliaca interna dat ramos quinque:

- 1) Iliacam parvam.
- 2) Gluteam.
- 3) Ischiaticam.
- 4) Pudendam communem, s. internam, ex qua hæmorrhoidales externæ, & Pudenda externa.
- 5) Obturatoriam.

Iliaca externa dat epigastricam, & iliacam externam minorem.

Truncus iliacæ externæ, per ligamentum Poupertii femur ingressus, *art. cruralis* audit; hæc ad popliteam usque delata *art. poplitea* vocatur.

Art. cruralis per decursum ramos varios mittit in musculos femoris.

Art. poplitea bifariam dirimitur; ramus unus *art. tibialis anterior*, alter *tibialis posterior* adpellatur; ex hac veniunt:

- 1) Tibialis interna.
- 2) Peronea, s. fibularis.
- 3) Plantaris in- & externa.
- 4) Arcus plantaris, ex quo enascuntur, Digitales.

ARTERIA PVLMONALIS, VENA EQVE PVLMONALES IN GENERE.

Arteria pulmonalis, ex corde enata, in ramos duos finditur; quorum primus

Art.

Art. pulmonalis dextra, alter
- - - - *sinistra* dicitur.

Venæ pulmonales ramis quatuor terminantur in corde.

VENAE IN GENERE.

- V**enæ quatuor pulmonales.
- 1) Vena cava superior, & inferior.
 - 2) Vena portæ.

VENA CAVA IN GENERE.

Vena cava dividitur in *superiorem*, & *inferiorem*.

RAMI CAVAE SUPERIORIS sunt :

1) Subclavia dextra, & sinistra; recipiunt hæ ramos varios venientes ex

Mediaſtino.

Pericardio.

Glandula thyroidea.

- - - thymo; recipiunt & venam

Thoracicam internam.

Bronchiale, &

Intercostales superiores.

2) Iugulares externæ, &

3) - - - internæ.

Vena jugularis externa recipit

1) Frontalem.

2) Angularem.

3) Temporalem.

4) Auricularem.

5) Sublingualem, f. raninam.

6) Occipitalem.

Vena jugularis interna recipit

1) Sinus laterales duræ matris.

2)

- 2) Gutturalem, f. laryngeam.
- 3) Maxillarem internam.

Rami venæ azygos sunt

- 1) Vertebrales.
- 2) Intercostales inferiores.
- 3) Bronchiales.
- 4) Pericardiaca.
- 5) Diaphragmatica.

Vena subclavia ad axillam novo nomine vena axillaris dicitur; recipit:

- 1) Scapulares.
- 2) Thoraciam superiorem, & inferiorem.
- 3) Brachialem.
- 4) Cephalicam.
- 5) Basilicam.
- 6) Medianam.
- 7) Salvatellam.
- 8) Cephalicam pollicis.
- 9) Digitales.

RAMI CAVAE INFERIORIS sunt:

- 1) Diaphragmaticæ.
- 2) Hepaticæ.
- 3) Renales; ex quibus
capsulares.
Adiposæ
Spermatice sinistra, ex renali sinistra.
- 4) Spermatice dextra.
- 5) Lumbares.
- 6) Sacrales.
- 7) Iliaca dextra, & sinistra, quarum quævis iliacam in- & externam recipit.

In Iliacam internam, f. hypogastricam sanguinem suum effundunt:

- 1) Obturatoria.
- 2) Pudenda dorsalis.

3) Hæmorrhoidariæ externæ.

4) Pudendæ internæ.

In *Iliacam externam* abit

Epigastrica.

Truncus iliacæ externæ, dum femur ingreditur, *femoralis*, seu *cruralis*, ad poplitem autem *vena poplitea* dicitur.

Recipit *femoralis* sensim :

1) Pudendas externas.

2) Ischiaticam.

Rami *Popliteæ* sunt :

1) Tibiæ anterior.

2) - - - posterior.

3) Peronea.

4) Surales.

5) Cephalica pollicis pedis.

6) Vena saphena pedis.

7) Plantares.

8) Digitales.

VENA PORTAE IN GENERE.

Vena portæ dirimitur in ramos binos, unus

Ramus ventralis, alter,

Vena portæ hepatica dicitur.

In *ramum ventralem* terminantur:

Mesaraica.

Splenica.

Hæmorrhoidalis interna.

Ramus hepaticus distribuitur ramulis plurimis per totum hepar.

RAMI ARCUS AORTAE IN SPECIE.

ARTERIAE AORTAE truncus enascitur ex ventriculo cordis sinistro; ad exortum suum *valvulis* tribus

tribus *semilunaribus* instructus est, quarum ope regressus sanguinis in cordis ventriculum impeditur. Hinc ad pollices aliquot adscendit, ex latere sinistro posteriorum in *arcum* curvatur, inferiora versus descendente, & ad quartam dorsi vertebram *aortæ descendentis* nomine notum.

Aorta cordis ventriculum sinistrum nunc egressa, antequam per pericardium adhuc prodeat, largitur

Arterias duas coronarias cordis; enascuntur hæc ex aortæ trunco maximam partem supra ipsas semilunares valvulas; rarius infra has easdem, ut valvulis obtegi queant.

Dextra oritur inter aortam, & art. pulmonalem.

Sinistra enascitur inter cordis atrium sinistrum, & aortam. Ambæ recurrunt ad cor, ramis invicem uniuntur, per substantiam cordis disseminantur, tandem vero in venas cordis abeunt. Rami nonnulli feruntur ad atria cordis, & pericardium, uti & ad tunicas aortæ.

Ex parte *arcus* dicti *convexa* oriuntur tres *rami principes*.

Primus, ex latere sinistro dicitur *art. innominata*; hæc in duas magnas arterias alias illico finditur.

Inferior ex latere dextro cum trunco principe simul excurrens, claviculam petens, *art. subclavia dextra* dicitur.

Altera secundum laryngem ad encephalon ascendens *art. carotis dextra* audit.

Ramus secundus, medius, ex arcu aortæ enatus, *carotis sinistra* vocatur.

Tertius, sinistrorsum magis situs, *subclaviam sinistram* constituit, dextra semper minorem. In quibusdam subjectis arteriarum harum divisiones, & ex-

ortus variant: rarius tamen similes aberrationes occurrunt.

Ambæ carotides lateribus asperæ arteriæ vicinæ, una cum jugularibus venis, & octavo nervorum pari textu celluloso unitæ ad marginem usque superiorem cartilaginis thyroideæ recta fere adscendunt. Ibi loci finduntur singulæ in ramos binos præcipuos; anterior *carotis externa*, posterior *carotis interna*, seu *cerebralis* audit.

I.

A. carotis externa adscendit a margine cartilaginis thyroideæ ad maxillam inferiorem, retro hanc ad condylum maxillæ articulare fertur; tumque *A. maxillaris interna* dicitur; per hunc decursum ramos emittit sequentes:

Ex *margine interno* illius oriuntur,

1) *A. thyroidea*, seu *laryngea superior*; hæc distribuitur per glandulam thyroideam, per musculos laryngis, & ossis hyoidis; furculos etiam mittit in glandulas jugulares, & cutim.

2) *A. sublingualis*, seu *ranina* oritur illico supra præcedentem; distribuitur per substantiam, & musculos linguæ, & glandulas sublinguales.

3) *A. maxillaris inferior* fertur ad porotidem, glandulas sublinguales, palatum molle, & musculos vicinos.

4) *A. maxillaris externa*, excurrit in facie externa maxillæ inferioris antrorsum supra masseterem ad usque latera menti, ubi *A. mentalis* dicitur. Hæc emittit ramum, qui ad angulos labiorum in ramos duos minores finditur: superior ex his procurrat secundum musculum orbicularem labii superioris, inferior secundum orbicularem labii inferioris usque ad labii medium, unitur tum socio ab altero latere adveni-

nienti;

nienti; ac dein sub nomine *A. labialium*, seu *coronariarum labiorum* veniunt. *A. mentalis*, missis quibusdam in musculos menti ramulis, adscendit ad latera nasi, ubi denuo quaquaversum ramos spargit, & ad angulum oculi pertingit internum sub titulo *A. angularis*; evanescit hæc in sphinctere palpebrali, & frontali.

5) *A. Pharyngea ascendens* oritur posterius ex carotide externa ad ipsam trunci hujus bifurcationem; ramulos mittit in pharyngem, & fauces; ramus per foramen lacerum ad duram usque meningem producitur.

Ex *marginè externo* carotidis externæ veniunt:

1) *A. occipitalis*; ramulos hæc mittit in musculum styloideum, & digastricum; inter apophysin styloideam, & mostoideam ad musculos fertur extensores capitis; ramus unus per foramen inter apophysin styloideam, & mostoideam, alter subin per foramen jugulare, & alter denuo per foramen occipitale magnum ad duram meningem fertur. Conjungitur hæc etiam cum *a. vertebrali*, & *cervicali*.

2) *A. auricularis*, seu *auditoria externa* oritur prope præcedentem; fertur ad aurem externam, ad membranam tympani, & ad tempora.

Emissis hisce ramis carotis externæ per porotidem supra processum zygomaticum, & musculum temporalem adscendit; porotidi, & faciei ramulos largitur; tum in

Art. temporalem abit, mittentem ramum in musculum frontalem, & palpebras, qui *a. frontalis* vocatur.

Truncus carotidis externæ retro maxillam inferiorem fertur, & *a. maxillam internam* emittit.

A. maxillaris interna, uti statim dictum fuit, continuatio trunci carotidis externæ est, quæ ad processum maxillæ inferioris condyloideum nomen mutat;

præterlabitur processum hunc, &, emissis in musculos pterygoideos ramis aliquot, subdividitur in ramos tres sequentes:

1) *A. sphæno-maxillaris* fertur per foramen proprium in ala majori ossis sphænoidei insculptum ad partem mediam cerebri; evanescit in temporibus, vertice, & crassa meninge.

Notandi inprimis sunt rami tres sequentes:

Primus, per fissuram ossis sphænoidei intrans distribuitur in facie anteriori duræ meningis, sub nomine *a. duræ matris anterioris*.

Ramus alius transiens per canalem orbitalem, ramulos mittit in sinum pituitarium, & dentes maxillæ superioris, sub nomine *alveolarium superiorum*; alius proficiscitur in faciem, & palpebras, vocatur ab Anatomicis nonnullis *A. maxillaris superior*.

2) *Ramus alter* arteriæ maxillaris internæ transit per canalem maxillæ inferioris, & in alveolos, ac dentes ramos emittit, *a. alveolares inferiores* dictos. Egreditur anteriori loco per foramen anticum canalis hujus ejusdem, & cum *a. maxillari externa* ibi loci conjungitur.

3) *Ramus tertius* transit per foramen spinosum ossis sphænoidei, distribuitur per partem mediam duræ meningis; hincque *a. duræ matris media*, s. *sphæno-spinosa* vocatur. Surculus rami hujus excurrere dicitur ad aquæductum fallopianum, alter ad cochleam.

II.

A. carotis interna, s. *cerebralis* statim ad exortum suum a trunco principe posteriora versus secedit, &, quin ramum ullum emittat, ductu serpentino ad foramen usque caroticum adscendit: tum per canalem caroticum antrosum lata cavum cranii ingreditur, serpentinis semper sub reptatibus, laminis duræ meningis inclusa, in medium fertur sinus cavernosi ephippii, ibique loci emittit

A. ophthalmicam, *s. orbitalem*: hæc sub nervo optico antrorsum, & introrsum producta, orbitam intrat, ramulos ablegat in glandulam lacrymalem, musculos oculi, & furculum parvum in nares; largitur dein & *art. ciliares*, per tunicam oculi choroideam & ligamentum ciliare distributas, uti & *a. centralem retinæ*; hæc postrema oritur ex trunco ipsius arteriæ ophthalmicæ, vel ex ramo arteriarum ciliarium, pulpam nervi optici subit, mediam intrat tunicam retinam, & sub specie retis arteriosi distribuitur per totam tunicæ hujus superficiem. Ex arteria hac eadem oriuntur vasa tunicæ hyaloideæ, uti & arteria postica lentis crystallinæ. Truncus carotidis internæ incurvo ductu fertur dein per sinum cavernosum, ex lateribus ephippii ad processus hujus superiores adscendit, duram meningem perforat, retrorsum flectitur, & in ramos duos principes abit, sub nomine *a. cerebrialis anterioris*, & *posterioris* notos.

A. cerebrialis anterior unitur cum socia ex altero latere adveniente, secundum columnas cerebri sursum, & posttrorsum properat, & parti cerebri mediæ, posticæque, tum ventriculo ejus tertio, fornici, & nervorum opticorum thalamis ramos mittit.

A. Cerebrialis posterior per fissuram sylvianam ad partes fertur laterales cerebri, plexui venoso furculos subpeditat, & conjungitur ope rami sat magni, cum ramo *a. vertebralium*.

Notandum hic adhuc in specie est, non solum ramorum carotidis internæ, sed & trunci ipsius ad ingressum in cavum cranii tunicarum mutari fabricam, easque tum tenuiores, debilioresque longe reddi, quam omnium aliarum corporis universi arteriarum sunt tunicæ.

A. subclaviæ duæ sunt, *dextra*, & *sinistra*; prima oritur ex *a. innominata*, posterior ex ipso arcu

aortæ. Retro claviculam, & sub hac eadem ad marginem feruntur superiorem costæ primæ, ubi & terminantur.

Ex subclavia quavis oriuntur rami quatuor sequentes principes.

I.

A. mammaria interna; oritur ex parte antica, & inferiori a. subclaviæ, ad medium claviculæ, interne secundum longitudinem costarum ad sternum descendit, & ramos emittit quatuor sequentes.

1) *A. mediastinam*, per mediastinum distributam.

2) *A. thymicam*, ad thymum excurrentem.

3) *A. pericardiacam*, pericardium, exhinc vero diaphragma petentem, unde & *a. diaphragmatica superior* ibi loci dicitur.

4) *A. trachealem*, s. *gutturalem*, reptatibus serpentinis secundum asperam arteriam ad glandulam thyroideam, & laryngem adscendentem, arteriæ laryngæ sæpius unitam, furculos exiguos quosdam ad partem superiorem scapulæ plerumque mittentem.

Oriuntur nonnunquam arteriæ hæ omnes ex latere dextro ex ipso a. subclaviæ dextræ trunco.

Mittit *a. mammaria interna* præterea etiam ramos ad musculos intercostales, & manimas, cum mammaria externa unitos, descendit dein, ad latus cartilaginis xiphoidis ex cavo thoracis egreditur, & in musculo abdominali recto terminatur, ubi sese jungit a. epigastricæ. Veniunt etiam ramuli quidam exigui in musculos abdominales reliquos, & peritonæum.

II.

A. cervicalis, s. *muscularis colli* oritur loco superiori ex trunco a. subclaviæ, plerumque ad ipsum jam exortum in ramum posticum, & anticum finditur.

Ramus

Ramus anterior, seu *a. cervicalis anterior* excurrit retro a. carotidem, & maximam partem in musculos distribuitur, ab osse sterni in collum adscendentes, uti & in musculos quosdam colli, in musculos pharyngis, & glandulas laryngeas.

Oritur subin ex arteria hac eadem & a. intercostalis superior.

Ramus posterior, seu *a. cervicalis posterior* enascitur interdum & ex a. vertebrali; sub processu transverso vertebræ septimæ colli ad musculos quosdam colli, & scapulæ fertur, in quibus & evanescit. *Ramus* hujus unitur sæpius a. occipitali.

III.

A. Vertebrales ambæ oriuntur ex a. subclaviis; sinistra tamen subin, etsi rarius id fiat, ex ipso arcu aortico procedit. Ambæ, quin ramum ullum emittant, ad vertebrae colli tendunt, exhinc per foramina processibus transversis vertebrarum harum insculpta sursum adscendunt ea ratione, ut primo per foramen vertebræ sextæ colli intrent, tum vero per foramina vertebræ colli quintæ, quartæ, & tertiæ reptatibus serpentinis producantur. Per hunc decursum mittunt ramulos in musculos colli, & involucra medullæ spinalis. Procedunt exin per foramen vertebræ colli secundæ oblique sursum, & extrorsum, inter processum transversum vertebræ colli secundæ, & primæ antrorsum, & extrorsum tendunt, majorem curvaturam posteriora versus faciunt, & foramen vertebræ colli primæ subeunt; volvuntur ibi circa sulcum processui transverso vertebræ dictæ insculptum, demum vero duram meningem perforant, ac per foramen magnum occipitale cavum ingrediuntur cranii, secundum medullam oblongatam adscendunt, ac inibi sub angulo acutissimo in truncum unum com-

munem coëunt, qui *a. basilaris* dicitur. Arteria hæc, quam alii & *a. cervicalem* dicunt, perforat dein sub ponte Varolii duram meningem, & ramos suos, hinc inde cum ramis carotidum unitos, mittit in medullam oblongatam, in cerebrum, & cerebellum: rami alii arteriæ hujus ipsius notatu magis digni sunt:

1) *A. auditoria interna*, fertur una cum septimo nervorum pari ad partes auris internas.

2) *A. duræ matris posterior*, per partem posticam duræ meningis dispersa.

3) *A. spinalis posterior*, & *anterior*; oriuntur hæc non ex *a. basilari*, sed ex ipsis *a. vertebralibus*; ambarum enim vertebralium ad ingressum suum in cavum cranii ramum quævis emittit; rami hi illico in truncum communem confluunt, posterius secundum medullam spinalem descendentes, unde & *a. spinalis posterior* dicitur; altiori paulo loco vertebralium quævis similem emittunt ramum, qui pariter cum socio suo in unicum abit truncum, antè secundum medullam spinalem descendit, & exin *a. spinalis anterior* dicitur. Arteriæ ambæ spinales uniuntur in medulla spinali cum surculis quibusdam *a. intercostalis*.

Notandum adhuc venit, tunicarum fabricam in arteriis vertebralibus delicatiorè etiam fieri ad ipsum earum in cranium ingressum, uti id circa carotides monitum prius fuit.

IV.

A. intercostalis superior, oritur ex *a. subclavia*, subin & trunco *a. cervicalium*. Excurrit in facie interna costarum trium, aut quatuor superiorum verarum prope harum capita, & cuivis ramum largitur, qui in costæ cujusvis margine inferiori antrorsum excurrit, & tum musculis intercostalibus, tum pleuræ inmergitur. Surculi parvi per foramina lateralia ad medullam spinalem tendunt.

Dum *truncus a. subclaviæ* supra costam primam trans musculos scalenos colli ex cavo thoracico egres-
sus est, *art.* nunc dicitur *axillaris*; ex hac oriuntur
rami inprimis sequentes:

1) *A. thoracica*, *f. mammaria externa* ramulos
spargit in mammas, & musculos thoraci inpositos.
Ramus unus excurrit inter m. pectoralem majorem,
& deltoidem prope venam cephalicam brachii secun-
dum longitudinem humeri inferiora versus.

2) *A. thoracica inferior* distribuitur per musculos
scapulæ, & dorfi.

3) *A. scapularis externa*, & *interna*; externa in-
hæret excisuræ marginis superioris scapulæ; dividitur
per musculos scapulæ, & circa articulationem hume-
ri; interna tum in musculos, tum in glandulas cavo
subaxillari incumbentes furculos mittit.

4) *A. humeralis* oritur nonnunquam ex *art. bra-*
chiali; distribuitur per musculos scapulæ, & humeri.

Emissis nunc dictis ramis sub tendine m. pec-
toralis majoris emergit, & nunc vocatur

Art. brachialis. Ad ipsum jam exortum in ra-
mos duos nonnunquam bifurcatur; maximam vero
partem trunco nonnisi unico ex latere interno bra-
chii supra m. coracoideum humeri, & m. anconæ-
um, tum & secundum marginem internum m. bici-
pitis brachii retro venam basilicam ad condylos usque
offis humeri descendit. A cavo subaxillari ad medi-
um offis humeri integumentis nonnisi communibus
corporis tegitur, tum musculis profunde immergitur,
& per hunc decursum musculos vicinos, & os ipsum
humeri arteriis auget. Inter condylos ambos inferio-
res offis humeri finditur (emissis antea ramis pluri-
bus in musculos vicinos, & articulationem humeri,
sub nomine *art. collateralium* notis) plerumque in

ramos binos præcipuos, quorum unus *art. cubitalis*, alter *art. radialis* dicitur.

Art. cubitalis, seu *ulnaris*, properat inter m. pronatorem rotundum, radiæum internum, palmarem longum, flexores digitorum, & os ulnæ secundum m. cubitæum internum ad carpum usque; per hunc decursum emittit ramos sequentes.

1) *A. cubitalis recurrens* recurrit ad condylum internum humeri, per articulationem distribuitur, & cum ramis lateralibus a. brachialis communicat.

2) Rami alii minores, inmersi musculis vicinis.

3) *A. interossea externa* oritur ad tres pollices transversos sub articulatione, statim ad exortum suum ligamentum interosseum perforat, secundum faciem externam ligamenti hujus ad extremitatem antibrachii anteriorem excurrit, ubi cum ramo arteriæ interossee internæ conjungitur; demum vero evanescit in musculis interossei externis manus; proficiscuntur ex hac rami duo grandiores ad musculos in antibrachio sitos.

4) *A. interossea interna.* Oritur illico sub priori, secundum faciem internam ligamenti interossei ad musculum proficiscitur pronatorem quadratum inferiora versus, ligamentum ibi loci perforat, & ramis arteriæ interossee externæ, & arteriæ radialis prius unita, in facie externa carpi, & dorso manus distribuitur. Emittit insuper furculum specialem, ligamentum carpi internum perforantem, per faciem carpi internam expansum.

Emissis hisce ramis a. cubitalis ligamentum transcendit carpi internum, & ex latere ossis pisiformis palmam intrat; per hunc decursum musculis vicinis, & cuti largitur ramos, quorum unus transit inter os metacarpi tertium, & quartum, & in dorso manus conjungitur cum arteria interossea externa.

Ab osse pisiformi versus pollicem a. cubitalis arcum facit, qui

Arcus palmaris dicitur. Ex parte arcus hujus ejusdem convexa oriuntur arteriæ tres, vel quatuor, excurrentes ad extremitates usque anteriores ossium metacarpi; ibi quævis in furculos duos finditur, qui ex lateribus digitorum, ordine a latere digiti minimi ad usque latus externum digiti indicis ducto ad eorum usque apices, ubi invicem conjunguntur, decurrunt, & *a. digitales* vocantur.

Ex parte arcus palmaris concava oritur ramus, ad pollicem cum ramo a. radialis unitus; enascuntur exin arteriæ duæ adhuc deficientes, digitales, quæ latus internum digiti indicis, & latus vicinum pollicis emetiuntur.

A. radiæa, seu *radialis* oritur subin, etsi rarius, ex ipsa etiam a. cubitali supra flexuram cubiti; largitur illico *a. radiæam recurrentem*, ad flexuram cubiti redeuntem, ubi cum ramis lateralibus a. brachialis conjungitur, & in musculis circumpositis evanescit. Descendit tum a. radiæa inter muscolum supinatorum longum, & radius ad usque extremitatem hujus ipsius anteriorem, emissis, per decursum in musculos vicinos ramulis plurimis. Dum loco inferiori ad carpum pervenit, sub ipsa cuti ossi immediate incumbit, adeo ut ictus, quos exserit, admoti digiti facile percipiant; ad eundem etiam locum pulsus explorare solemus. Intrat subin superiora versus inter pollicem, & digitum indicem palmam; nonnunquam vero magis adhuc posteriora versus flectitur, tumque vibrationes in carpo percipi nequeunt; interim tamen vix unquam eadem decursus ratio in utroque simul obtinet brachio. Communi maxime lege prope latus internum pollicis palmam subit, & partibus vicinis numerosos subpeditat ramos, quorum

notatu

notatu magis dignus ille est, qui cum ramo arcus palmaris communicat, & binas *a. digitales* constituit: una ex his in latere interno digiti indicis, altera in latere vicino pollicis ad cujusvis apicem excurrit, ibique loci junguntur arteriæ digitali ex latere obposito adpropinquanti.

R A M I A O R T A E DESCENDENTIS IN SPECIE.

Aorta descendens incipit in thorace a fine arcus aortici ad quartam circiter thoracis vertebram, exhinc descendit ex latere sinistro vertebrarum reliquarum omnium ad vertebram ultimam lumborum usque, ubi in ramos duos finditur, qui arteriæ vocantur iliacæ. Per hunc decursum ex thorace usque ad diaphragma ramos emittit sequentes quatuor.

1) *A. bronchiales*, distribuuntur hæc per vesiculas pulmonales, & ramos asperæ arteriæ; nutritioni pulmonum dicantur. Oriuntur subin ramo unico ex aorta, qui dein bifariam finditur; nonnunquam ex a. intercostali superiori enascuntur.

2) *A. Oesophageæ* plerumque duæ sunt, vel tres, nonnunquam & unica solum adest: distribuuntur per œsophagum, & hujus glandulas.

3) *A. intercostales inferiores*; ex quovis latere octo oriuntur ex aorta, excurrunt interius secundum marginem inferiorem cujusvis costæ ad hujus usque medium; finditur ibi quævis in ramum externum, & internum; externus petit thoracem, & musculos intercostales externos; internus pleuram, & musculos intercostales internos. Posteriori loco ad exortum suum singulæ ramos quosdam mittunt in tunicas medullæ spinalis, & musculos dorsi. Ex inferioribus proficiscuntur furculi nonnulli in diaphragma.

A. intercostales omnes, quæ in latere dextro decurrunt, statim ad exortum suum decursu transverso sub v. azygos transeunt.

4) *A. diaphragmaticæ inferiores*, seu *phrenicæ* dividuntur in dextram, & sinistram. Dextra oritur nonnunquam & ex a. cœliaca: ramis plurimis distribuuntur per faciem inferiorem diaphragmatis.

In abdomine truncus aortæ descendens largitur ramos sequentes octo:

I. *A. cœliacam*; hæc statim ad exortum suum, uti statim dictum fuit, diaphragmaticam inferiorem dextram emittit, dein vero in ramos tres sequentes majores abit:

1) *A. coronaria stomachica* orificium ventriculi dextrum coronæ adinstar ambit, ramos reliquos mittit in faciem superiorem, & inferiorem lateris dextri ventriculi. Ramus unus inde enatus hepar petit.

2) *A. hepatica* ramus maximus est a. cœliacæ, oritur ex ea dextrorsum, & ramos tres sequentes illico emittit.

1) *A. pylorica*, per pylorum dispersa, cum coronaria stomachica unita.

2) *A. gastrica dextra*, sive *major*; mittit hæc sub exortum ramum in duodenum, qui *a. duodenalis* audit, tum ex latere ventriculi dextro secundum arcum ejus majorem excurrit, & furculos plures ad omentum ablegat, qui *a. gastroepiploicæ dextræ* audiunt. Conjungitur sæpius cum arteriis ventriculi reliquis; truncus a. hepaticæ prope venam portæ ad fissuram hepatis properat, ibique emittit.

3) *A. cysticas*. Distribuitur demum, una cum ramis venæ portæ, furculis innumeris per totam hepatis substantiam.

Ramum tertium a. cœliacæ *a. splenica* constituit; oritur hæc sinistrorsum ex a. cœliaca, sub ventriculo,

triculo, & pancreate ad lienem pergit, perque hujus substantiam ramis 4. aut 5. distribuitur; oriuntur per hunc decursum ex ea rami sequentes:

1) *A. pancreatica*; per pancreas distributa.

2) *A. gastrica sinistra*, s. *minor* per latus ventriculi finistrum secundum arcum hujus majorem dispersa, in omentum *a. gastroepiploicas sinistras* mittens, tum demum *a. gastricæ dextræ* unita, ex qua unione oriuntur *a. gastroepiploicæ mediæ*.

3) *A. breves*, per extremitatem ventriculi finistram distributæ.

4) *A. omentalis*, s. *epiploica*, pariter ad epiploon excurrens.

II. Ramus alter aortæ descendens in abdomine est *a. mesenterica superior*; excurret inter laminae ambas mesenterij, ubi innumeros emittit furculos ad intestinum jejunum, ileon & cæcum; ramum insuper specialem mittit in intestinum colon, qui *a. colica dextra*, s. *superior* dicitur.

III. *A. renales*, s. *emulgentes* oriuntur lateraliter ex aorta; duæ sunt, quarum una ad renem dextrum, altera ad finistrum decursu transverso fertur; antequam vero margini renum concavo inserantur, emittunt *a. suprarenales*, & *a. adiposas renum*.

Notandum circa eas est, *a. renalem dextram* longiorem esse sinistra, quum aorta ex latere sinistro vertebrarum descendat; tum & excurrere eas sub vena cava.

IV. *A. spermaticæ*. Ex quovis latere oritur una, supra, maximam partem vero infra *a. renales* ex aorta: prodit nonnunquam *a. spermatica sinistra* ex ipsa *a. renali*; tum quævis ex suo latere exteriora versus ante musciculum psoam descendit; per decursum partibus vicinis furculos varios largiuntur; sat magnus ramus fertur in pinguedinem renum; rami omnes serpentinis

pentinis ductibus numerosis retro peritoneum ad anulum abdominilem descendunt ; ibi loci conjunguntur ex utroque latere cum vena spermatica, cum ductu spermatio, textuque plurimo celluloso in funiculum ita dictum spermaticum, per inguina ad testes migrant, & perforata testium tunica albuginea, convolutionibus serpentinis distribuuntur per testium substantiam : in feminis arteriæ hæ eadem intrant ovaria, & tubas fallopianas.

V. *A. meseraica inferior* statim ad exortum suum abit in ramos sequentes duos ; subin vero & in plures.

Ramus primus fertur ad latus sinistrum intestini coli, perque id ipsum, sub nomine *a. colicæ sinistrae*, seu *inferioris*, cum *a. colica dextra unitæ*, distribuitur.

R. secundus, seu *a. hæmorrhoidaria interna* distribuitur per totum intestinum rectum.

VI. *A. lumbares* oriuntur ex utroque latere 5. vel 6, superiores petunt diaphragma, & musculos intercostales infimos ; inferiores distribuuntur per musculos lumbares, & abdominales ; ubi musculos abdominales perforant, *a. hypogastricæ externæ* audiunt. Surculi nonnulli excurrunt etiam ad medullam spinalem, hujusque tunicas.

VII. *A. sacrae* ; oriuntur subin trunco simplici, subin & principio duplici, triplici, vel & quadruplici ex aorta. Distribuuntur secundum os sacrum, & furculis quibusdam interius per caudam equinam.

VIII. Finditur demum truncus ipse aortæ ad vertebam lumborum ultimam in ramos duos majores, qui *a. iliacæ* audiunt.

ARTERIAE ILIACAE, HVIVSQVE RAMI.

Art. iliaca ad digitos duos, vel tres transversos sub exortu suo in ramos duos, nempe in *a. iliacam internam* & *externam* dividuntur.

A. iliaca interna, seu *hypogastrica* a posteriori parte antrorsum flectitur, & ramos sequentes generat.

1) In fœtu *a. umbilicales*, ex lateribus vesicæ urinariæ supra peritoneum adscendentes, umbilicum ibi loci perforantes, tumque petentes placentam, ducturæ sanguinem ex fœtu in uterum: in adultis abeunt arteriæ in ligamenta.

2) *A. iliaca parva*, s. *interna minor* oritur hæc ex latere postico *a. iliacæ internæ*; in os sacrum, musculum psoam magnum, & iliacum internum, tum & ad ossa ipsa ilii ramos suos mittit.

3) *A. glutea* præcedenti major, una cum nervis ischiaticis per incisuram ischiaticam ex pelvi egreditur; per decursum musculis ani, intestino recto, & vesicæ urinariæ prospicit; distribuitur demum per musculos gluteos.

4) *A. ischiatica* ramos mittit ad os sacrum, & os ischii; per eandem, uti prior, incisuram egreditur, & distribuitur pariter in musculos gluteos, in articulationem femoris, & in periostrium ossis ischii.

A. pudenda communis statim ad exortum suum in ramos duos abit:

Anterior fertur inter vesicam urinariam, & intestinum rectum, & sub symphisi ossium pubis transit; in viris excurrit in dorso penis, & sub nomine *a. pudendæ externæ* in corpora spongiosa inseritur. In cavo pelveos vesiculis feminalibus, collo vesicæ urinariæ, & glandulæ prostaticæ ramos multos largitur. In feminis distribuitur per partes laterales uteri, ibique

que cum a. spermaticis, & hypogastricis communicat, ex quibus ultimis subin enascitur.

Ramus posterior per incisuram ischiaticam ex pelvi egreditur, & sub nomine *a. hæmorrhoidalis externæ* per spincterem ani distribuitur; rami nonnulli veniunt in corpora spongiosa penis, & urethræ.

A. obturatoria transit una cum nervo crurali minori per foramen ovale, & per musculos obturatorios, aliosque vicinòs distribuitur, furculos quosdam in glandulas inguinales, & cutim ablegat.

A. iliaca externa fertur ad ligamentum Poupartii, ibique ramulos duos emittit, quorum internus *a. epigastrica* audit, fertur hæc oblique nonnihil sub musculo abdominali transverso, & recto, supraque musculos hos eosdem superiora versus, ramulos iisdem largitur, demùm superius cum *a. mammaria interna* conjungitur.

Ramus externus *a. iliaca externa minor* dicitur, distribuitur per ossa ilii, & musculos abdominales obliquos.

Egreditur dein truncus *a. iliacæ externæ* sub ligamento Poupartii ex pelvi, sub nomine *a. cruralis*, seu *femoralis*; tegitur hæc in femoris parte antica, & interna sola cute, inferne vero musculis, ac per musculum tricipitem femoris in poplitem usque descendit, ubi *arteria poplitea* dicitur.

Per hunc decursum varios emittit ramos, quorum

Priores duo, aut tres cutim subeunt circa regionem pubis, & glandulas inguinales; tum plures exin enati distribuuntur per omnes musculos femoris; infimo loco propullulant rami laterales, cum arteriis recurrentibus tibix coeuntes. Notandum hic venit, arteriam femoralem superiori statim loco sub ligamento Poupartii in binos nonnunquam dirimi ra-

mos, quorum minor in facie femoris externa inter musculum rectum, & cruræum adscendit, major in facie interna femoris ad poplitem usque migrat, & art. popliteam constituit.

Art. poplitea ramulos quosdam mittit in poplitem, & vicinos musculos; ad digitos binos transversos sub poplite bifurcatur in *art. tibialem anticam*, & *posticam*.

Art. tibialis antica superius jam perforat ligamentum interosseum, hoc ipsum exsuperat, antrorsum ad dorsum usque pedis extremi descendit, & per hunc decursum ramulos spargit, unitos cum ramis lateralibus arteriæ popliteæ, aliosque junctos *art. tibiali posticæ*, & *art. peronæ*, seu fibulari, per partes vicinas quaquaversum dispersos.

Dum in dorsum pedis versus pollicem usque profecta est, musculos ibi loci perforat sitos inter ossa metatarsi; conjungitur tum in planta pedis cum arteria tibiali postica, & hoc ex mechanismo *arcus* exsurgit *plantaris*; rami reliqui distribuuntur per musculos metatarsi.

Art. tibialis postica denuo dehiscit in binos ramos; interior proprio nomine dicitur *art. tibialis posterior*, seu *tibialis magna*, exterior *art. peronea*, seu *fibularis*.

Art. suralis magna descendit in facie interna, & postica tibiæ, &, præter ramos varios in vicinas partes migrantes, in parte tibiæ superiori ramum emittit, qui substantiam ossis hujus ejusdem subit; tum retro malleolum pedis internum ad plantam pedis properat, ubi & bifurcatur in duos ramos, sub nomine *art. plantarium externarum*, & *internarum* notos.

Art. plantaris externa unitur, uti antea dictum, ramo arteriæ tibialis anticæ, & cum hoc eodem arcum plantarem format, ex parte arcus hujus conve-

xa oriuntur *arteriæ digitales pedum*. Ex parte conca-
va enascuntur furculi quidam properantes in muscu-
los plantæ.

Art. plantaris interna bifurcatur in medio plan-
tæ; ramus unus conjungitur cum ramis quibusdam
art. tibialis anticæ, & ad pollicem fertur; alter dis-
tribuitur per phalanges digitorum reliquorum, ibi-
que loci unitur cum furculis plantaribus.

Art. peronea descendit secundum faciem posti-
cam fibulæ, in extremitate hujus inferiori perforat
ligamentum interosseum, in pedis dorso emergit, &
ramis emissis supra hoc ipsum distribuitur; conjun-
gitur etiam posterius cum art. tibiali antica, & po-
stica.

ARTERIA PVLMONALIS; VENAE PVLMONALES.

Arteria pulmonalis oritur ex ventriculo cordis dex-
tro, aut antico eadem omnino ratione, uti aorta
ex sinistro: valvulis, uti aorta, instruitur tribus se-
milunaribus, quæ nonnisi minores paulo, & non adeo
robustæ sunt, nec tuberculis semper gaudent; fertur
tum ad pulmones, & in ramos illico abit duos, quo-
rum dexter sub arcu aortæ ad pulmonem dextrum,
sinister ad sinistrum fertur. Rami hi utrique distri-
buuntur furculis innumeris per pulmonum substanti-
am, vesiculas retis ad instar ambiunt, & in venis pul-
monalibus demum finiuntur.

Venæ pulmonales oriuntur furculis plurimis exi-
guis ex finibus ultimis arteriarum pulmonalium, coëunt
demum plerumque in ramos quatuor, qui se intra ca-
vum pericardii exonerant in sinum cordis sinistrum,

aut posticum. Notandum simul occurrit, minores esse arteriis pulmonalibus, valvulis gaudere nullis.

V E N A C A V A.

Vena cava dirimitur in *superiorem*, & *inferiorem*, ambæ coëunt intra pericardium, & expanduntur ibi in saccum fibris plurimis muscularibus instructum, quem sinum cordis dextrum, aut anteriorem diximus. Vbi cava inferior finitur in sinum, valvula adest membranacea, semilunaris, sinum ab ipsa cava separans, ab inventore *valvula Eustachii* dicta.

Cava superior omnem sanguinem excipit, ex capite, collo, thorace, & extremitatibus superioribus reducem.

Cava inferior excipit sanguinem ex abdomine, & extremitatibus inferioribus redeuntem.

V E N A E C A P I T I S.

Sanguis omnis encephali, faciei, collique exonatur in venas duas *jugulares internas*, duasque *externas*.

Venæ jugulares internæ oriuntur utrinque ab ita dictis foraminibus laceris; sanguinem omnem excipiunt, ex cerebro, & cerebello in sinus duræ meningis refluum, ab sinibus binis lateralibus; directione supra arterias carotides sumta in collo descendunt; recipiunt per hunc decursum,

Venam gutturalem, seu *thyroideam*, & *venam maxillarem internam*; exonerantur infra has in venas subclavias.

Venæ jugulares externæ oriuntur ex confluxu ramorum,

Venæ

Venæ frontalis,
 - - angularis,
 - - temporalis,
 - - auricularis,
 - - raninæ, seu sublingualis, &
 - - occipitalis; in lateralibus colli partibus
 illico sub integumentis communibus descendunt, &
 sanguinem ab hisce partibus reducem in venas sub-
 clavias revehunt.

VENAE EXTREMITATVM SUPERIORVM.

Venæ digitales sanguinem suum evomunt in

1) *Venam cephalicam pollicis manus*, supra faciem manus externam secundum pollicem recurrentem, sanguinem suum exonerantem in venam radialem externam.

2) In *venam salvatellam* recurrentem secundum digitum minimum, cum priori unitam, & sanguinem suum in *venam cubitalem in- & externam* evacuantem.

1) *Vena cephalica major*

2) in *v. basilicam*,

3) in *v. medianam*.

Vena cephalica major hæret in parte superiori antibrachii, & enascitur ex unione radialis externæ, & medianæ cephalicæ minoris.

Vena basilica adscendit in facie inferiori humeri, & enascitur ex confluxu 1) *v. cubitalium extern. & intern.* 2) *V. satellitum*, quæ art. brachialem ad

flexuram usque cubiti comitantur, & utrinque in musculos vicinos distribuuntur, 3) v. profundæ superioris.

Vena mediana hæret in medio antibrachii, & enascitur ex unione 1) v. medianæ cephalicæ majoris, 2) v. profundæ inferioris, 3) v. radialis internæ: adscendit in flexuram cubiti, & jungitur inibi cum v. cephalica magna, & basilica.

Omnes nunc enumeratæ venæ coëunt demum in humero in

Venam brachialem: hæc in facie interna humeri adscendit ad usque cavum subaxillare; dum hoc ipsum ingressa est, nomen suum mutat, &

Vena axillaris dicitur: hæc simul recipit venam thoracicam superiorem, & inferiorem, venam muscularem, & venas scapulares in- & externas; dum sub claviculam pervenit, nomen pristinum pariter mutat, & vena subclavia adpellatur.

In venas subclavias se exonerant:

- 1) Iugularis externa,
- 2) — — interna,
- 3) Vertebralis, excipiens cervicalem, & sinus vertebrales.
- 4) Antequam subclaviæ in v. cavam terminentur, exonerantur adhuc in eas

Mediastina,

Pericardia,

Diaphragmatica, seu phrenica,

Thymica,

Mammaria interna,

Laryngea,

Intercostales superiores.

Subclaviæ ambæ ex latere dextro coëunt tum in cavo thoracis

thoracis in truncum unicum, quem venam cavam superiorem, seu descendentem dicunt; hæc, recepta prius vena azygos, descendit, ac, uti antea dixi, in atrium cordis dextrum sanguinem contentum evomit.

Venam azygos confluentes rami sequentes absolvunt:

- 1) Venæ bronchiales.
- 2) - - œsophageæ superiores dextræ.
- 3) - - vertebrales.
- 4) - - intercostales dextræ superiores,
- 5) - - - - - & sinistrae inferiores.

VENAE EXTREMITATVM INFERIORVM

sunt:

Venæ digitales pedis, oriuntur in extremitatibus digitorum pedis; exonerantur

- 1) In *cephalicam pollicis*, excurrentem secundum pollicem, supra malleolum internum.
- 2) In *venam saphenam* secundum digitum minimum supra malleolum externum adscendentem, &
- 3) In *v. dorsalem pedis*.

Venæ hæ tres confluunt tum in *tibialem anteriorem*, hæc, loco inferiori cum tibiali postica prius unita, antrorsum adscendit, & ligamentum interosseum perforat.

Tibialis postica excipit inferius v. plantares, superius v. furalem.

Peronea retro malleolum externum secundum directionem fibulæ adscendit; antequam ad poplitem perveniat, unitur cum binis præcedentibus in truncum unicum, qui *vena subpoplitea* dicitur.

Hæc per poplitem adscendit, &, dum ex eo egressa est,

V. cruralis, s. *femoralis* vocatur.

Hæc ulterius supra faciem anteriorem femoris ad usque ligamentum Poupartii adscendit, per hoc ipsum in pelvin ingreditur, ibique loci

Vena iliaca externa adpellatur; excipit hæc venas pudendas externas a glandulis inguinalibus redeuntes, & cum iliaca interna in truncum unicum confluit, cum hac eadem venam cavam inferiorem, seu adscendentem productura.

Vena cava inferior enascitur a venis iliacis ad vertebam lumborum ultimam; ex latere dextro secundum spinam dorsi adscendit, per foramen dextrum diaphragmatis cavum thoracis ingreditur, & prope cor una cum vena cava superiori in sinum anteriorem cordis unitur.

Præter venas iliacas in *cavo pelveos* sequentes adhuc excipit ramos:

- 1) Venas sacrales.
- 2) - - lumbares.
- 3) - - spermaticam dextram.
- 4) - - renales.
- 5) - - hepaticas in *cavo thoracis*.
- 6) Diaphragmaticas, seu phrenicas inferiores

Vena iliaca interna excipit

- 1) Hæmorrhoidales externas, ab ano redeuntes, &
- 2) Hypogastricas.

In has postremas confluunt :

- 1) Pudendæ internæ.
- 2) Pudenda dorsalis penis.
- 3) Obturatoria, una cum venis aliis a partibus vicinis recurrentibus.

VENA PORTAE, HVIVSQVE RAMI.

Vena portæ vocatur vena illa magna, quæ sanguinem ab intestinis, omento, liene, & ventriculo ad hepar deducit; per substantiam hepatis, arteriæ adinstar, ramis innumeris distribuitur. Sanguis, quem vehit, impenditur secretioni bilis; residuus vero per furculos cavæ in truncum hujus defertur.

Truncus venæ portæ dividitur in binos ramos:

Superior, per hepar dispersus vocatur *vena portæ hepatica*.

Inferior *vena portæ ventralis* audit.

Vena portæ ventralis oritur ex unione ramorum sequentium trium principum.

I.

Vena splenica; hæc decursu transverso a liene orta in latere dextro rimam hepatis ingreditur, per decursum hunc sequentes excipit ramos,

- 1) V. stomachicam coronariam.
- 2) V. pancreaticas.
- 3) V. gastricam, seu v. gastro-epiploicam sinistram.

II.

Vena mesaraica; hæc excipit:

- 1) V. colicam dextram, & sinistram, quæ & cum ramulis hæmorrhoidalis internæ neçtitur, &
- 2) V. gastro - colicam, in quam exoneratur v. gastro - epiploica dextra.

III.

Vena hæmorrhoidalis interna; oritur ex ramulis redeuntibus ab ano, & intestino recto, uti & a mesocolo redeuntibus; augetur præterea & ramulis aliis venientibus a vena mesenterica majori, & vena gastro - epiploica dextra, & sinistra.

Rami nunc dicti tres principes confluent ad rimam hepatis in truncum unicum, qui cum trunco venæ hepaticæ, per hepar distributæ, unitur: hæcque ratione ex eorum unione exsurgit vena portæ.

CIRCVLATIO SANGVINIS IN FOETV.

In infante jam in lucem edito, ac in omni adulto circulatio sanguinis, uti notum nobis est, sequenti fit ratione:

Sanguis constrictione ventriculi cordis dextri, aut anterioris in arteriam projicitur pulmonalem; hæc denuo ab expansione contrahitur, quumque sanguis ob valvulas antea dictas semilunares, ad initium arteriæ pulmonalis positas, eamque sanguine repletam claudentes, in cor refluere nequeat, in extremos hinc fines arteriæ pulmonalis per omnes pulmones pellitur, ibi ab extremitatibus ultimis venarum pulmonalium recipitur,

pitur, & in ventriculum cordis sinistrum, aut posticum revehitur; hic accepta massa hac sanguinis, illico contrahitur, atque sic eadem ratione, uti prior, hunc in aortam propellit; aorta tum pariter constringitur, & sanguinem contentum per extremitates ultimas arteriarum in omnia viscera, omnesque corporis partes urget; ubi pro diversitate fabricæ liquida varia ex sanguine secernuntur; sanguis ab secretione, nutritione partium residuus, recipitur ab furculis minimis venarum, exhinc in ramos majores, demum in venam cavam magnam superiorem, & inferiorem ducitur, quæ omnium ultimo sanguinem in ventriculum cordis dextrum, ex quo prius pulsus fuit, defert. Hæ sunt circulationis leges in infante jam nato, & adultis.

Alia vero longe horum est ratio in embryone, seu fœtu: quum hic sanguinem suum ope venæ umbilicalis a matre accipiat, & per arterias umbilicales, in funiculo umbilicali reclusas ad matrem remittat.

Funiculus umbilicalis componitur vena umbilicali, binisque arteriis umbilicalibus.

Vena umbilicalis exoritur ex confluxu venarum placentæ uterinæ, quæ sanguinem ex finibus ultimis arteriarum uteri prodeuntem excipiunt, tum una cum funiculo umbilicali per umbilicum ingreditur, super peritonæo ad hepar adscendit, ac ibi in sinum venæ portæ exoneratur; ex sinu hoc eodem *canalis* sic dictus *venosus* sanguinem vehit ad venam cavam retro hepar adscendentem, cujus beneficio ulterius ad cor usque promovetur. Sanguis hic idem tum illico ab auricula cordis dextra in sinistram per foramen interjectum *ovale* transgreditur, reliquus autem deducitur

in ventriculum cordis dextrum, ex quo in arteriam pulmonalem, nonnisi parca tamen copia per pulmones, pellitur; maxima vero portio per *canalem arteriosum Bottalli*, ex art. pulmonali enatum, & trunco aortæ oblique insertum, in cavum aortæ vehitur.

Ex aorta ipsa sanguis, ut in homine adulto in omnes partes corporis, sic & in arterias ante dictas umbilicales propellitur; hæ oriuntur ex arteriis iliaticis internis, prope cystidem urinariam ad umbilicum adscendunt, & per hunc una cum funiculo umbilicali ad placentam migrant, ubi fines earum ultimi cum venulis minimis uteri conjunguntur, sicque iisdem sanguinem contentum tradunt.



DOCTRINA

DE

VASIS LYMPHATICIS.



DOCTRINA

DE

VASIS LYMPHATICIS.

*V*asorum lymphaticorum sub nomine veniunt venæ subtiles, diaphanæ, ex diversis corporis partibus liquidum pellucidum, excolor, subin & subflavesens, aut rubellum revehentes.

Vasa hæc lymphatica una cum venis lacteis, quæ proprio magis termino vasa lymphatica intestinorum vocari possent, cum trunco communi, *ductus thoracicus* adpellato, & glandulis rotundis, aut ita dictis lymphaticis *systema lymphaticum* constituunt.

Fabrica. Componuntur membranis tenuibus, diaphanis, robustis tamen satis, ratione ad propriam illorum indolem sumta: gaudent membranæ hæc eadem fibris muscularibus, vasisque propriis, ac nervis; uti id ex earum irritabilitate, evacuatarum liquido contento constrictione, intumescencia, & dolore aperte demonstratur. In lumine suo, adinstar venarum aliarum instruuntur valvulis plurimis per paria dispositis; in quibusdam locis tria, aut quatuor harum paria in interstitio pollicis unius occurrunt; refluxum liquidi contenti impediunt.

Oriuntur furculis minimis ex tota corporis superficie, ex textu celluloso subcutaneo, & cavis corporis majoribus, ex mammis, variisque demum visceribus; furculi hi sensum in ramos, rami in truncum communem confluunt.

Terminantur in ductum thoracicum, in quem cuncta liquidum suum evomunt; interim tamen & nonnulla inferuntur hinc inde in venas majores rubras. Antequam terminentur in truncum communem, inplantantur glandulis sic dictis lymphaticis, per
decursum

decursum occurrentibus, ex latere obposito ea iisdem denuo egrediuntur, & ad ductum proficiscuntur thoracicum.

Adfunt in omnibus vix non corporis locis, tum & in omnium fere viscerum superficie; v. g. in extremis partibus artuum superiorum, & inferiorum, in facie, in musculis linguæ, in collo, in pulmonibus, in hepate, in liene, in glandulis mesentericis, in mammis, in testibus, in funiculo spermatico, circa aortam, & venas iliacas, ubicunque demum glandulæ adfunt lymphaticæ.

Vsus. Liquida ad superficiem corporis delata, lympham coagulabilem ex cavis corporis majoribus, & succum nutritium ex cavo intestinorum resorbent; cuncta hæc in ductum thoracicum deferunt, ut ibi demum loci invicem misceantur, diluantur.

Humor vasis lymphaticis, textu cellulari, & cavis corporis contentus, a lymphâ ipsius sanguinis in eo solum differre videtur, quod aquam admistam vehat.

VASA LYMPHATICA IN SPECIE.

Vasa l. extremitatum inferiorum. Binæ horum occurrunt classes; quædam feruntur in *superficie*, alia *profundius* hærent; considerabimus utramque classem.

II.

Superficiaria hærent inter cutim, ac musculos, & ad integumenta corporis communia referenda sunt; ramus unus excurrit a digitis, supra dorsum pedis, & tendinem musculi cruræi antici adscendit; supra malleolos sæpius finditur, & speciem plexus constituit, producti per tibiam sub cute, tum in textu celluloso inter os nunc dictum, & M. gastrocnemium ad usque faciem internam genu, exhinc denuo immediate sub cute, & supra musculos femoris ad usque inguina

inguina, ubi rami hi varii glandulas lymphaticas subeunt. Harum glandularum, quarum 6. vel 8. sunt, quædam hærent in angulo, quem femur cum abdomine constituit, aliæ vero profundius paulo, loco anteriori in femore locantur. Postremis hisce immerguntur vasa dicta lymphatica, excepto solum unico, excurrente ad superiores, quas subeunt vasa lymphatica ex pube redeuntia. Hanc ob rationem & sedes bubonum venereorum vix non semper in glandulis hisce superioribus est, quum contraria ratione inferiores a pure ex adfectis ossibus resorpto maxime adficientur. Vasa lymphatica partium genitalium cum nunc dictis rete constituunt, sub ligamento Poupartii cavum abdominis ingrediens, ubi multos illico emittit ramos, partim arteriam iliacam ambientes, maxime vero in latere arteriæ hujus interno excurrentes.

Vasa hæc superficialia omnia, uti haud abs ratione conjicere licet, trunci sunt ramorum, qui per omnes partes extremitatum inferiorum, in textu cellulari, & sub cute resorptioni dicantur.

A pede ad usque inguina nulla plerumque pro vasis hisce occurrit glandula lymphatica; interim tamen & hic intercedit exceptio.

II.

Classis secunda vasorum lymphaticorum extremitatum inferiorum, uti jam dictum fuit, profundius hæret inter musculos, & arteriam femoralem concomitatur. Primus horum truncus proximus hæret malleolo interno, secundum arteriam tibialem posteriorem excurrentem. Exhinc sub musculis retro os adscendit, in medio cruris glandulæ occurrit lymphaticæ exiguæ, arteriæ semper adhærens proximus, ex glandula hac denuo egrediens in poplitem adscendit, binisque glandulis lymphaticis immergitur.

R

dunt

dunt hinc rami secundum art. femoralem trans ipsum muscolum bicipitem in glandulam quamdam inguinalem, reliquis omnibus profundius hærentem, demum vero in antea dictas inferiores, ubi cum vasis primæ classis, & cum aliis a pube exortis confluent: tota eorum classis tum per annulum abdominalem cavum abdominis intrat.

*Vasa lymphatica viscerum abdominalium, &
thoracicorum.*

Ab ipso abdominali annulo rami nonnulli comitantur arteriam iliacam externam ad marginem pelveos, alia subeunt cavum hoc ad incisuram usque ischiaticam excurrentia secundum arteriam iliacam internam, per quem decursum obviam veniunt aliis, a vesica urinaria, ab utero, vel vesiculis spermaticis, proficiscentibus, paucisque, a musculis glutæis exortis, & incisuram dictam transeunt. Vasa lymphatica uterina in utero gravido facile deteguntur.

Alia denuo secundum art. iliacam externam supra muscolum psoam, tum sub aorta ad lumbos, tum ad os sacrum feruntur, ubi cum vasis lateris obpositi rete elegans simileque supra psoam e regione hærentem constituunt. Inter ligamentum Poupartii, & regionem lumbarem plurimæ adsunt glandulæ.

Ad vertebrae lumborum secundam sub aorta invicem collecta, una cum vasis lacteis, ductum generant thoracicum.

Viscera abdominalia reliqua ramos suos principes pariter in ductum ablegant thoracicum. Plexus magnus a *renibus* venit, retro vasa renalia excurrit, & cum truncis ad aortam unitur; illuc etiam proficiscuntur vasa, quæ a glandulis renalibus fuerunt exorta.

Trunci *lienis* in hujus superficie concava locantur, exhinc una cum arteria ad pancreas tendunt, &
in

in hujus concavitate cum vasis lymphaticis visceris nunc dicti uniuntur.

Ventriculus duplici vasorum horum specie gaudet. Quædam in curvatura minori cum vena coronaria excurrunt, & glandulas quasdam ibi hærentes transeunt, alia serpunt in curvatura majori secundum art. gastricam dextram, glandulas similes transeuntia. Utraque sibi obviam fiunt ad orificium ventriculi inferius, & ad flexuram minorem duodeni rete formant, cui & vasa lymphatica lienis, cystidis feilæ, & hepatis intertextuntur. Rete hoc ipsum tum supra, tum & infra intestinum ad ductum thoracicum fertur.

Viscera majora abdominalia duplici plerumque classe vasorum lymphaticorum gaudent. Vna hæret in superficie, altera profundius ad arterias majores. In *hepate* ambæ classes invicem communicant. Quædam ex illis, quæ in facie illius convexa locantur, secundum venam cavam descendunt; alia juxta ligamentum dextrum ad diaphragma demittuntur, & ductum thoracicum. Vasa faciei concavæ ad venam portæ conjunguntur cum extrorsum prodeuntibus.

Quæ a *ventriculo* veniunt, ductui ipsi thoracico inferuntur omnia.

VASA LACTEA; RECEPTACVLVM CHYLI; DVCTVS THORACICVS.

Vasa lactea vasa sunt lymphatica tenera, diaphana, valvulis pluribus semilunaribus duplicibus instructa, exorta ex intestinis tenuibus, & crassis, chylum in illis ex cibis præparatum resorbentia, ac in receptaculum chyli deducunt. Oriuntur ex tunicæ villosæ facie interna, tunicas intestinorum reliquas perforant, & speciem retis formant, dum plura in textu cellulari tertio, inter tunicam muscularem, & exti-

nam intestinorum posito, invicem conjunguntur; proficiscuntur exinde inter laminas ambas mesenterii ad glandulas ibi disseminatas conglobatas, has easdem subeunt, & partem glandulæ maximam constituunt, quum repetitis vicibus per eandem distribuuntur. Emergunt ex glandulis dictis vasa lactea, ad glandulas alias excurrunt, demum alias denno petunt, in centro mesenterii propius ad invicem hærentes; ex hisce glandulis quatuor solum, quinque, vel plura paulo vasa lactea exeunt, una cum art. mesenterica sursum adscendunt, cum vasis lymphaticis, ex partibus corporis inferioribus, & visceribus abdominis exsurgentibus confluunt, vasque demum constituunt, quod *receptaculum chyli* adpellatur.

Vsus. Chylum ex intestinis resorbent, in receptaculum dictum deferunt.

Receptaculum chyli sacculus est membranaceus, saccatus, hærens inter aortam, & alam dextram diaphragmatis, supra hoc ipsum in cavum thoracis usque productus.

Figura superne, ac inferne conica est, hinc in medio latior; ea tamen ratione, ut amplitudo maxima tres lineas non superet, longitudo vero ultra duos pollices porrigatur. Sic plerumque occurrit; interdum tamen receptaculi unius loco ductus duo, tresve minores, angustique adsunt.

Vsus: lympham coagulabilem, ex corporis extremitatibus, & visceribus abdominis reducem, tum & chylum, in glandulis mesentericis partim jam dilutum, excipit, miscet, magisque diluit, adtenuat.

Receptaculum hoc chyli terminatur in *Ductum thoracicum*, ab itinere, quod emetitur, sic dictum.

Ductus hic thoracicus ponitur retro pleuram, inter venam azygos, & aortam; varie flexus adscendit;

dit; per hunc decursum vasa lymphatica gastrica, œsophagæa, & pulmonica excipit.

Figura cylindrica est, sæpius tamen, imprimis superiora versus finditur, denuoque invicem in unum tubum coit. Ad vertebam dorfi quintam retro œsophagum sinistrorsum fertur, per latus thoracis sinistrum retro vasa subclavia fursum adscendit ad vertebam circiter sextam colli; hinc jam simplex, jam & bifurcatus denuo descendit, ac ad nexum venæ subclaviæ sinistræ cum jugulari interna inplantatur.

Valvulis donatur paucis, & abs ordine dispositis, ante aperturam vera valvula fere circularis adest, sanguinis ingressum in ductum inpediens.

Descripta nunc ratione ductus thoracicus ordinaria lege occurrit; est tamen ubi duplex invenitur, mox vero in unum truncum denuo conjungendus. Finditur & interdum ad finem suum in ramos binos, & horum ope inplantatur in venam utramque subclaviam; vel & ramus unus inseritur venæ azygos, aut jugulari sinistræ.

Dum vero ramis pluribus terminatur, ad cuiusvis finem valvula adsidet.

Vsus. Succum nutritivum per vasa lactea in receptaculum usque chyli delatum diluit, & in venas paulo antea dictas promovet.

In *pulmonibus* vasa quædam e quovis lobo ad ductum thoracicum, alia antè ad venas jugulares, vel & ad venam subclaviam tendunt.

Notandum hic imprimis est, non omnia vasa lymphatica viscerum abdominalium ferri per glandulas. Idem & de vasis lacteis tenendum. Hinc obstructionem glandularum mesentericarum tabes non semper sequitur.

Non supervacuum fuerit, inseruisse hic exactiorem glandularum lymphaticarum expositionem.

Præter glandulas *mesenterio*, & *mesocolo* proprias, tum & *ventriculo* adnatas, *pancreas* glandulis plurimis ex utroque latere, inprimis arctè ad duodenum, instruitur. In *omento* plerumque binæ etiam occurrunt. Magna interiori faciei ligamenti Poupartii insidet; variæ adsunt in musculo *psoa*, uti & ad arteriam ili-acam internam in pelvi, pluresque ad vertebrae lumborum. Gaudent & *renes*, glandulæ suprarenales, *splen*, & *hepar* glandulis suis lymphaticis. Hærent quædam in medio thoracis ad ductum thoracicum, arctè ad egressum vasorum lymphaticorum; ad radices pulmonum adsunt plurimæ, in ipso autem pulmone omnino nulla adest. Sunt demum & quædam inter superficiem pulmonum, & venas subclavias, aliæ in angulo, quem vena hæc cum vena jugulari format; ad aortam prope pharyngem, subin & loco interiori inter costas. Glandulæ nigricantes ad ramos asperæ arteriæ, indolis pariter eisdem cum glandulis lymphaticis sunt, uti in ADENOLOGIA dicetur, & mucum nullum secernunt: non constanti lege adsunt similes glandulæ ad columnam spinæ dorsi. Hærent insuper glandulæ lymphaticæ ad glandulas maxillares, & parotides, ad art. mentalem, ad art. occipitalem, & una ad processum mastoideum. Intumescunt hæc glandulæ nonnunquam a pure resorpto, in vulneribus capitis, aut abscessibus, a cariosis dentibus, aut ulceribus labiorum.

Vasa lymphatica colli, & capitis.

Secundum venam jugularem internam excurrit vas lymphaticum, quod truncum vasorum horum, partem mediam capitis, & colli occupantium constituit; rami quidam carotidem externam comitantur.

In cerebro vasa hæc non conspiciuntur; nec pinealis, nec pituitaria glandula lymphaticæ est indolis;

lis ; vero tamen videtur simile, & cerebro sua esse vasa lymphatica.

Ramuli juxta carotidem externam errantes, in collo coeunt in truncum unicum, jugularem venam comitantem, & prope ingressum venæ hujus glandulas lymphaticas transeuntem. Adfunt & quædam glandulæ ad angulum venæ jugularis, & subclaviæ, per quas feruntur vasa lymphatica, a postica colli parte, & scapula venientia.

Glandula thyroidea gaudet vasis multis lymphaticis, quæ flatu adactò conspicua magis reddi queunt. Pars ad angulum antea dictum, pars ad ductum thoracicum feruntur.

Vasa lymphatica extremitatum superiorum.

Extremitatibus superioribus pariter duæ classes vasorum propriæ sunt ; superficialium, & profundiorum.

I.

Superficialia in macilentis hydropicis omnium optime conspiciuntur ; sub cute in facie postica antibrachii adscendunt, proxime ad caput radii antrorsum feruntur ; ramus unus in facie interna adscendit, sub condylo interno humeri protenditur, & furculum trans tendinem inter musculos & ossa antrorsum mittit, ubi cum profundiori alio conjungitur. Adscendunt dein rami priores reliqui a capite radii supra musculum supinatore longum, & bicipitem, ac in cavitate subaxillari glandulas transeunt. Ramus vero specialis, a quo furculus paulo antea dictus missus fuit, condylum articulare superascendens, glandulam ingreditur ; exhinc in facie antibrachii interna ad glandulas axillares proserpit. Vas lymphaticum aliud a metacarpo in facie brachii anteriori sursum scandit, & cum alio a latere postico supra cubitum advenien-

te textum format , interius in humero ad glandulas axillares productum.

II.

Inter vasa lymphatica profundiora , vasa sanguifera majora concomitantia indicabimus hic inprimis illud , quod venam radialem sequitur. Procurrit hoc inter art. cubitalem , & interosseam , ac arteriam brachialem in latere interno comitatur ; in medio humeri per binas transit glandulas , tum vero ductum magis emergit , & sub una arteriarum anastomoticarum transit , ad glandulas adscendens lymphaticas cavi subaxillaris. Tales vero rami , uti videtur , ad vasa sanguifera majora quævis aderunt. In omnibus enim brachii partibus vasa adesse debere reſorbentia adparet ex inoculatione variolarum , quæ respectu ad locum infitionis sumto , nunquam non succedit.

Rami duo principes vasorum lymphaticorum extremitatum superiorum sub vena subclavia in truncum unicum confluunt , qui plerumque ad ingressum ductus thoracici in angulo venarum illi inferitur. Ibidem loci cum eo junguntur rami venientes a capite , collo , glandula thyroidea , & facie antica pulmonum.

Omnia hæc dicta sint circa latus sinistrum. Vasa lymphatica lateris dextri eundem plerumque servant decursum. Truncus , ductui thoracico junctus ramis gaudet quatuor principibus. Vnus venit a brachio , tres reliqui oriuntur a glandula thyroidea , capite , & pulmonibus. Perspecta bene decursus hujus vasorum lymphaticorum lateris dextri ratio inferuire poterit expositioni tumorum topicorum.

NEVROLOGIA.



N E R V I
I N G E N E R E.

NERVI fasciculi sunt molles, filamentis plurimis albis medullaribus parallelis constantes, pia cerebri meninge cincti, organa sensus, & motus in corpore constituentes.

Oriuntur omnes aut ex cerebro, aut ex medulla spinali: primi dicuntur nervi *cerebrales*, posteriores nervi *spinales*; ex his utrisque oriuntur nervi reliqui omnes universi corporis.

Nervi cerebrales enascuntur vel ex cerebro solo, vel ex partibus aliis, medulla conjuncta cerebri, & cerebelli compositis; ex cranio per foramina propria utrinque egrediuntur, & in locis determinatis ulterius distribuuntur: novem nervorum horum sunt paria:

- 1) Olfactorii.
- 2) Optici.
- 3) Oculorum motorii.
- 4) Trochleatores, s. pathetici.
- 5) Trigemini, s. divisi.
- 6) Abducentes.
- 7) Auditorii, s. acoustici.
- 8) Vagi.
- 9) Linguales.

Nervi spinales enascuntur ex medulla spinali, per foramina rachidis egrediuntur, & exhinc per totum corpus distribuuntur. Triginta horum sunt paria, in classes quatuor discreta:

- 1) 8. paria nervorum cervicalium.
- 2) 12. - - - dorsaliū.
- 3) 5. - - - lumbarium.
- 4) 5. - - - sacralium, s. nervorum
offis sacri.

Nervi nunc enumerati omnes cerebri, & medullæ spinalis amiciuntur ad exortum suum a tenera meninge, ad foramen autem egressus ex cranio, aut rachide a meninge dura, aliove textu firmo celluloso, donec ad locum destinatum perveniant, ubi involucrum hoc ipsum denuo deponunt, ac in pulpam mollem resolvuntur.

Ex illis nervi omnes omnino alii exsurgunt.

Ganglia nervorum dicuntur nodi rubicundi, oblongi, magnitudine, formaque diversi, nervis ipsis nonnihil duriores, tunica speciali cincti; constant substantia medullari, fibrisque plurimis sibi invicem intertextis nerveis, sub specie textus tenuissimi cohærentibus; intra quem fibræ diversæ nerveæ mutuo coëunt.

Vfus eorum nondum est determinatus.

Dum vero nervi plures, retis adinstar, invicem texuntur, quin tamen colorem, & tunicas sibi proprias mutant, *Plexus* exsurgunt; nomina hi sua adipiscuntur ratione figuræ suæ, situs, aut visceris, cui dicantur: ex utrisque exsurgunt numerosi ramuli nervei, per partes vicinas distributi.

Vfus nervorum est:

- 1) Vt organa constituent quinque sensuum.
- 2) Irritabilitati, sensationi, & motui corporis perficiendis dicantur.

NERVI CEREBRALES IN SPECIE.

N*ervi paris primi, s. olfactorii* enascuntur ex medullari substantia lorum cerebri anteriorum, prope exortum crurum medullarium cerebri; per foramina ossis ethmoidei intrant in cavum narium, ramulis numerosis distribuuntur per membranam pituitariam narium, & organon olfactus constituunt.

N. paris secundi, s. *optici* oriuntur a thalamis sic dictis nervorum opticorum, & partim etiam a cruribus cerebri, quæ transcendunt; hoc facto, arcte sibi mutuo uniuntur, tum quivis ex suo latere ab altero denuo recedit, per foramina ossi sphænoïdi insculpta, posterius, & lateraliter orbitam intrant, tunicam externam deponunt, & in tunicam retinam expanduntur, antè ad ligamentum usque ciliare pertinentem, visus organon proprie constituentem.

3) *N. paris tertii*, s. *oculorum motorii* exsurgunt a cruribus cerebri infimis prope pontem Varolii. Feruntur tum ex - & antrorsum versus apicem processus petrosi, meningem crassam ibi perforant, per fissuram superiorem orbitam intrant, & in ipsa orbita maximam partem musculis bulbi oculi inseruntur, unde & nominis deducta fuit ratio. Ramus superior fertur ad muscolum oculi rectum superiorem, & ad elevatorem palpebræ superioris; alter ad m. rectum internum; tertius, inferior, & minor ad m. rectum inferiorem; quartus demum, inferior, isque simul major ad m. obliquum inferiorem.

Ex quarto, vel tertio oritur ramus, qui cum ramo primo paris quinti communicat ad formandum ganglion lenticulare, seu ophthalmicum, ex quo surculi prodeunt exigui ad ligamentum ciliare excurrentes, & in iride evanescentes.

N. quarti paris, seu *trochleatores* oriuntur principio simplici, vel & duplici ad valvulam Vieussenii lateraliter a cruribus cerebelli, exhinc antrorsum feruntur, duram meningem illico retro par tertium perforant, & cum eo transeunt per fissuram orbitalem superiorem; inseruntur musculo trochleatori bulbi oculi: ramuli quidam petunt musculos oculi reliquos, alii vero conjunguntur cum nervis orbitalibus.

N. paris quinti, seu *trigemini* oriuntur a parte anteriori crurum cerebelli: nervi hi crassi antè ad apicem processus petrosi subeunt sinum duræ meningis cavernosum ad latus fellæ turcicæ positum; ibique loci expanduntur in ganglion semilunare a Cl. Professore GASSER omnium primo detectum. Ex ganglio hoc eodem enascuntur tres rami, quorum primus *nervus ophthalmicus*, seu *orbitalis*, secundus *maxillaris superior*, tertius *maxillaris inferior* dicitur.

N. orbitalis prope exortum suum ramo sexti paris unum vel plures ramos subpeditat, ut simul constituent nervum intercostalem magnum, tum transit per fissuram orbitalem, ubi in tres illico subdividitur ramos, nempe in frontalem, lacrymalem, & nasalem externum.

Ramus frontalis in orbitæ parte superiori antrorsum excurrit; per hunc decursum perioestio, & musculo elevatori palpebræ superioris largitur furculos, per foramen superciliare egreditur, ac in musculis, integumentisque frontis evanescit.

R. lacrymalis in latere orbitæ externo antrorsum ad glandulam lacrymalem proficiscitur.

R. nasalis ramus est inferior nervi orbitalis; illico ramum exiguum ad formandum ganglion ophthalmicum emittit, tum antrorsum versus cantum oculi internum pergit, ibique unum, duosve ramos spargit, recurrentes per foramen orbitale internum in cavum cranii, illico tamen una cum nervis olfactoriis trans laminam cribrosam ossis ethmoidi in nares denuo redeuntes, ubi in membrana pituitaria evanescunt.

Rami alii proficiscuntur ad saccum lacrymalem, canalem nasalem, & carunculam lacrymalem.

In fundo orbitæ exoritur, uti antea dictum fuit, ex conjunctione ramuli nervi nasalis cum ramo paris secundi

Secundi ganglion ex albo rubellum rotundum, quod *ganglion lenticulare*, seu *ophthalmicum* dicitur; ex ganglio hocce enascuntur ramuli varii nervei, in tunica oculi sclerotica, & choroidea, uti & in uvea & ligamento ciliari evanescentes.

Ramus secundus quinti paris, seu *N. maxillaris superior* præcedenti major est, per foramen rotundum ex cranio egreditur, furculum exiguum ibi emittit, transeuntem per os maxillare, & cum portione dura nervi acoustici conjunctum; dirimitur tum in tres ramos:

1) in *N. sphœnopalatinum*: transit per foramen osse palatino & sphœnoide interceptum, ramulos mittit ad musculum pterygoideum internum, hoc facto cavum narium ingreditur, ibique distribuitur per sinum pituitarium ossis sphœnoidei, per tubam acousticam, & partim etiam per palatum molle; abscedit insuper ab eo ramus, qui sæpius in duos alios denuo finditur, ad orificium canalis carotici fertur, ibique jungitur ramo uni, vel duobus paris nervorum sexti, ut exin generetur nervus intercostalis magnus. Ramus alius transit per foramen pterygoideum medium, & conjungitur cum nervo maxillari inferiori.

2) In *N. alveolarem posteriorem*. Recta hic descendit, in furculos aliquot abit, quorum unus per foramen supra dentem ultimum molarem positum in cavitate maxillarem intrat, ibi per dentes molares distribuitur, & cum nervo alveolari anteriori communicat; furculi minores reliqui adeunt musculum buccinatorem.

3) *N. infraorbitalis* ramus tertius est *N. maxillaris superioris*, per foramen orbitale inferius intrat canalem orbitalem, & per hunc decursum dentibus molaribus, aliisque maxillæ superioris partibus ramulos mittit varios; tum per foramen orbitale anterius

denuo

denuo egreditur, per musculos genarum, nasi, & labiorum distribuitur, & hinc inde cum ramulis portionis duræ nervi acoustici communicat.

Tertius, isque maximus ramus quinti paris *N.* est *maxillaris inferior*; egreditur hic ex cranio per foramen ovale, per decursum furculos mittit in glandulas vicinas, & musculos; qui & sæpius cum ramis portionis duræ nervi Auditorii junguntur: dum supra m. pterygoideos ad faciem internam maxillæ inferioris pervenit, in ramos duos finditur, quorum

1) *N. lingualis internus*, seu *minor* dicitur: connectitur hic prope musculum pterygoideum internum cum nervo constituyente chordam tympani, & distribuitur per glandulas sublinguales, musculos vicinos, imprimis vero per ipsam linguam, ubi cum ramis paris noni sæpius pariter communicat.

2) Ramus major, seu secundus *N.* est *maxillæ inferiori proprius*; descendit hic inter m. pterygoideum externum & internum ad foramen maxillare posterius, perque id ipsum canalem maxillarem subit, ubi denti cuiusvis furculum largitur; per foramen maxillare anterius denuo egreditur, & mento, labioque inferiori furculos mittit.

N. paris sexti, seu *abducentes* oriuntur inter corpora pyramidalia medullæ oblongatæ, & pontem, tum antrorsum excurrunt, ubi duram meningem perforant, & sinui spongioso prope sellam turcicam inferuntur: emittunt ibi loci ramulos quosdam, qui prope canalem caroticum uniuntur cum furculis nervi maxillaris inferioris, ut ex hac unione enascatur nervus intercostalis magnus.

Nervi autem ipsi sexti paris egrediuntur una cum pari nervorum tertio, & quarto per fissuram orbitalem superiorem; distribuuntur per musculum bulbi oculi rectum externum.

N. paris septimi, s. *acoustici* utrinque in ramos duos sunt divisi, pars posterior, major, & mollior *ramus dicitur mollis*, seu *portio mollis*; minor dicitur *ramus durus*, seu *portio dura* nervi acoustici: utriusque excurrunt ad foveam meatus Auditorii ossis petrosi.

Portio mollis enascitur ex medulla oblongata, & ventriculo cerebri quarto, per foramina exigua foveæ ossis petrosi intrat meatum acousticum internum, ac ramulis innumeris distribuitur tum per cochleam, tum per vestibulum, ubi tunicæ inhæret vestibulum, & canales semicirculares interne obvestienti.

Portio dura oritur ex crure cerebri prope pontem, ad foveam ossis petrosi per foramen speciale transit, (quod foramen initium est aquæductus fallopii, excurrentis in facie ossis petrosi interna, & antica ad cavum tympani, tum per partem hujus posteriorem producti, demumque foramine stylomastoideo retro condylum maxillæ inferioris terminati) canalem hunc emittitur portio dura; ubi vero canalis retro tympanum deorsum flectitur, ramulum emittit per canalem alium in tympanum; adscendit hic sub nomine *chordæ tympani* inter malleum, & incudem supra membranam tympani, superius per fissuram retro articulationem maxillæ inferioris ex tympano denuo egreditur, & cum n. linguæ parvo unitur. Truncus princeps hujus nervi transit aquæductum fallopii, per foramen stylomastoideum foras prodit, auri externæ, & parotidi ramos largitur varios, & parotide ipsa perforata, per faciem ramis septem, vel octo dispanditur, qui rami *pedem* sic dictum *anserinum* constituunt; producit hic latescens antrorsum, postorsum, & sursum versus tempora, & communicat cum ramis tribus paris quinti, cum pari octavo cerebri, uti & cum pari tertio cervicali.

N. paris octavi, aut *vagi* oriuntur radicibus plurimis retro pontem inter tubercula olivaria, & pyramidalia ex medulla oblongata, & partim etiam ex ventriculo cerebri quarto; statim ad exortum suum conjunguntur nervis accessoriis Willisii. Oriuntur nervi hi ex nervo cervicali quinto, vel sexto superiori postico, lateraliter secundum vertebrae colli, & per foramen occipitale magnum in cavum cranii adscendunt, ibique uniuntur pari octavo, quin tamen cum eodem in unum confluant: sic uniti una cum jugulari interna per foramina lacera ex cranio egrediuntur, a pari octavo denuo abscedunt, & in musculis mastoideis, & cucullaribus evanescent.

Par ipsum octavum ad ipsum ex cranio egressum ramos spergit varios, quorum præcipui in collo ad linguam, pharyngem, laryngem, & glandulam thyroideam proficiscuntur, ac ab enumeratis nunc partibus sua adquirunt nomina: uniuntur cum ramis paris quinti, cum portione dura nervi acoustici, cum n. recurrente, intercostali magno, pari nono, omnibusque n. cervicalibus.

Emissis hisce ramis, in cavum thoracis descendunt.

In thoracis cavo truncus nervorum vagorum emittit sequentes ramos:

I) *N. recurrentem dextrum, & sinistram.* Dexter oritur dextrorsum ad arteriam subclaviam, hanc eandem ambit, tumque ad glandulam thyroideam sursum revertitur.

Sinister inferius nonnihil enascitur, sub arcu aortico, & circa hunc circumit, ac secundum oesophagum, & asperam arteriam ad laryngem usque adscendit. Distribuuntur utrique per musculos laryngis, & pharyngis.

2) Ad exortum n. recurrentium ramuli adhuc enascuntur plurimi alii, conjungendi cum ramis pluribus n. intercostalis magni, cum ganglio cervicali supremo, medio, ac infimo, tum & cum n. recurrentibus, diaphragmaticis, & pari primo n. cervicalium: nervi nunc dicti omnes in latere superiori pericardii confluunt, & sic *plexum generant cardiacum*; rami quidam inde abscedentes inter aortam, & art. pulmonalem secundum ductum a. coronariæ dextræ ad cor migrant, ac per ventriculum cordis dextrum, & sinistrum, per faciem externam cordis, perque vicinas partes disseminantur.

3) Tum truncus paris octavi in facie postica pulmonum utrinque producit, & ramos quosdam emittit, queis junguntur rami alii venientes a plexu cordiaco, & n. recurrentibus; sicque enascitur *plexus pulmonalis dexter, & sinister*, tum per pulmones, tum per asperam arteriam distributus.

4) Descendunt dein ambo trunci paris octavi secundum œsophagum ea ratione, ut ramus dexter in facie ejus postica, sinister in facie antica hæreat, ibique spargunt plures surculos, qui uniti *plexus œsophageos* producant; nervi exin proficiscuntur in œsophagum partesque vicinas.

5) Trunci demum n. vagi una cum œsophago per diaphragma ad ventriculum descendunt, ibi, imprimis circa orificium superius unione ramorum suorum *plexus duos stomachicos* gignunt; plexus anterior, & minor expanditur per faciem ventriculi anteriorem, arcumque majorem, posterior, isque major, distribuitur per faciem posticam, arcumque minorem; ramos varios mittit ad hepar, pancreas, & diaphragma.

6) Vniuntur rami nonnulli nervi hujus etiam cum ramis n. intercostalis magni, & concurrunt sic

ad formationem plexus hepatici, splenici, renalium;
e. f. p.

N. linguales faciunt nonum, & ultimum par nervorum cerebralium. Oriuntur a medulla oblongata inter corpora olivaria, & pyramidalia, per foramina anteriora processuum condyloideorum ossis occipitis ex cranio egrediuntur, communicant cum pari octavo n. cerebralium, & cum pari primo n. cervicalium; feruntur tum inter venam jugularem, & art. carotidem antrorsum, & nonnihil sursum versus angulum maxillæ inferioris; ibi loci introrsum flectuntur, ac per substantiam musculosque linguæ, ossisque hyoidis distribuuntur, ubi nervis linguæ dicatis aliis pariter uniuntur.

Adparet ex descriptione hac, oriri ex cerebro magno nonnisi nervos olfactorios, opticos, oculo-
rumque motorios, seu par primum, secundum, & tertium; oriri ex cerebello solum trochleatores, & trigeminos, seu par quartum, & quintum; reliquos vero omnes, seu par sextum, septimum, octavum, & nonum enasci ex iis locis, ubi medullosæ substantiæ cerebri, & cerebelli jam invicem unitæ sunt.

N. intercostalis magnus, aut, ob commercium quod inter hunc & nervos plurimos alios intercedit *sympathicus magnus* dictus, nec a cerebro, nec a cerebello, nec a medulla oblongata, sed a ramo sexti paris oritur, cui unitur ad foramen caroticum furculus minimus rami secundi paris quinti; ex unione ramorum horum binorum enascitur *N. intercostalis magnus*, per foramen caroticum inter corpora, & processus vertebrarum colli transversos in collo descendens; per hunc decursum augetur furculus nervorum cervicalium omnium, ac una cum hisce *ganglia tria cervicalia* constituit.

Gangliorum horum *supremum* hæret retro pharyngem ad vertebram colli secundam; ramulos emittit, contribuentes ad plexum pulmonicum, & cardiacum, tum & furculos alios, qui cum nervo linguâli, pari octavo, & gangliis duobus cervicalibus reliquis uniuntur.

Medium hæret ad vertebram colli quintam.

Infimum reliquorum minimum, lateraliter ad vertebram colli ultimam positum est, art. subclaviam, quam undique ambit, superascendens, deorsum fertur.

Ex ganglio hoc cervicali oriuntur ramuli varii nervei, conjungendi cum ramis paris octavi, & *plexum* notatu inprimis dignum *cardiacum* generantes.

Truncus ipse N. intercostalis retro art. subclaviam ex lateribus proc. transversorum vertebrarum dorsi per cavum thoracicum descendit; per decursum nervorum dorsaliûm, ex medulla spinali prodeuntium quivis, furculos duos in illum mittit, cum quibus ganglia totidem constituit; fertur tum una cum art. aorta ex lateribus vertebrarum lumborum, ossisque sacri, cum quorum ossium ramis nerveis varia denuo producit ganglia, ad extremitatem usque ossis coccygis, ibi loci versus socium introrsum flectitur, & cum eo communicat.

In thorace notandi inprimis veniunt rami quinque, ex quibus inferiori magis loco ganglia semilunaria oriuntur. Primus horum ramorum enascitur a ganglio dorsali quinto, secundus a sexto, tertius a septimo, quartus ab octavo, quintus a nono, decimo, & subin ab undecimo; rami nunc dicti omnes secundum ductum vertebrarum dorsi descendunt, diaphragma transeunt, ac inibi utrinque in truncum unum confluunt, *nervus splanchnicus*, aut *intercostalis parvus*, s. *anterior* dictum. Truncus quilibet illico

sub diaphragmate in facie aortæ anteriori lateraliter *ganglion* magnum *semilunare* producit, ex quo propul-
lulant furculi quidam exigui nervei; uniti hi invicem
generant *plexum solarem*: ex gangliis binis semiluna-
ribus oriuntur præterea plurimi ramuli, cum aliis ex
plexu solari advenientibus jungendi, & ad formandos
plexus abdominales omnes facientes.

Primus horum plexuum *plexus est cæliacus*; ori-
tur ex conjunctis ramis plexus solaris, & ganglii se-
milunaris.

Secundus est *plexus hepaticus*, oritur ex ramis
plexus abdominalis, & ganglii semilunaris dextri;
oriuntur inde nervi venæ portæ, cystidis felleæ, he-
patis, intestini duodeni, & omenti.

Tertius est *plexus splenicus*, ortus ex eodem ple-
xu abdominali, & ganglio semilunari dextro, una
cum vasis per excisuram magnam in lienis viscus pro-
ficiscitur; furculos etiam mittit ad ventriculum, &
pancreas.

Quartus est *plexus mesentericus superior*; enasci-
tur ex unitis ramis gangliorum duorum semilunari-
um, plexus solaris, & abdominalis. Mittit ramos
ad partem superiorem mesenterii, ad mesocolon, &
ad glandulas mesaraicas; rami nonnulli a. mesente-
ricam retis adinstar ambiunt.

5) *P. renalis* oritur ex ramis ganglii semilunaris,
plexus superioris mesenterici, & superlumbaris; dis-
tribuitur per renes, & glandulas renales. Rami qui-
dam plexus hujus, & præcedentis prope aortam de-
scendant, ad generandum plexum mesentericum po-
steriorem, inferiorem.

6) *P. mesentericus inferior*, &

7) *P. mesocolicus*, s. *mesentericus posterior* oriuntur
ex ramis supra aortam decurrentibus plexus mesent:
superioris, & renalis: ambo ramos mittunt in me-
senterium, & intestina.

8)

8) *P. hypogastricus* oritur ex ramis pl. mesenterici superioris, & inferioris, ad vertebram lumborum quartam ex utroque latere in unum confluentibus.

Plexus hic loco paulo inferiori in duos denuo abit ramos, quorum quivis ex suo latere in *ganglion planum* intumescit, cujus rami ad partes vicinas, intestinum rectum, vesicam urinariam, glandulas spermaticas, prostaticam, & uterum proficiscuntur.

9) *P. spermaticus* oritur ex plexibus mesentericis, cum nervis lumbaribus, & sacralibus connexis; mittit ramos ad vasa spermatica, testes, ovaria.

Ex ortu, & conjunctione plexuum horum omnium adparet, omnes in universum aut immediate, aut ope viscerum invicem conjungi, in viscera etiam abdominalia omnia nervos suos mittere.

NERVI MEDULLAE SPINALIS IN GENERE.

Nervi spinales dicuntur nervi orientes ex medulla spinali, per foramina lateralia vertebrarum colli, dorsi, & lumborum, uti & ossis sacri prodeuntes. Nervorum horum quivis oritur ex medulla spinali radice duplici, anteriori, & posteriori, quæ lateraliter coeunt, & ubique, antequam ex canali vertebrarum exeant, ganglion parvum generant.

N. spinales superiores decursu fere transverso ex vertebris exeunt; inferiores vero, quo magis descendunt, eo magis oblique deorsum ex vertebrarum foraminibus prodeunt: superiores minores sunt, inferiores (exceptis n. duobus infimis sacralibus) crassiores, & majores: truncus quivis illico ubi ex ganglio enascitur, ramos duos emittit, quorum unus jungitur socio superiori, alter inferiori, tum & duos alios, n. intercostalibus unitos.

Amiciuntur omnes meninge crassa, & tenui ad partes usque, in quibus ultimo terminantur.

Dividuntur n. spinales

- 1) in 8. paria n. cervicalium.
- 2) in 12. p. n. dorsaliū.
- 3) in 5. p. n. lumbarium.
- 4) in 5. p. n. sacralium.

NERVI CERVICALES.

Par primum n. cervicalium, quod aliqui pro pari decimo n. cerebralium habuerunt, oritur illico sub foramine occipitali magno, ubi incipit medulla spinalis, fertur dein lateraliter inter marginem huius ejusdem foraminis, & vertebram colli primam a posterioribus anteriora versus; supra proc. transversum vertebræ colli primæ cum ramis quibusdam nervi cervicalis secundi ganglion format, ex quo n. occipitalis oritur per foramen laterale egrediens.

Par secundum n. cervicalium exit inter vertebram colli primam, & secundam; una cum pari primo distribuitur per musculos capitis, & colli, parotidem, & aurem externam; surculum insuper ablegat ad nervum accessorium Willisii.

Par tertium exit inter vertebram colli tertiam, & secundam, ramis suis distribuatur per integumenta communia scapulæ, per musculum cucullarem, & per musculum brachii triangularem: mittit etiam surculos nonnullos ad formandum nervum diaphragmaticum.

Par quartum, quintum, sextum, septimum, & octavum invicem confluunt, & *plexum* constituunt *brachialem*, ex quo enascuntur nervi sex brachiales.

N. accessorius Willisii oritur utrinque ex unitis ramis paris secundi, quarti, & quinti nervorum cervicalium, &, uti jam antea dictum fuit, in cerebrum redit, inde una cum pari octavo denuo egreditur, & per musculus cucullarem distribuitur.

N. diaphragmaticus, seu *phrenicus* enascitur utrinque ex unione ramorum paris tertii, quarti, & quinti nervorum cervicalium, augetur insuper ramo abscedente a pari primo nervorum dorsalium, & alio veniente a *N. intercostali magno*; tum inter clavikulam, & art. subclaviam proficiscitur in cavum thoracis ad pericardium; exin descendit ad partem superiorem diaphragmatis, ac in eo ramis plurimis evanescit.

Plexus brachialis oritur ex unione nervorum quinque infimorum cervicalium, ramoque magno paris decimi tertii nervorum dorsalium, in superiori regione humeri inter clavikulam, & scapulam.

Ex plexu hoc, præter furculos multos exiguos, statim ab illius exortu ad vicinas partes proficiscentes, enascuntur rami sex sequentes principes, per extremitates superiores distributi.

- 1) *N. axillaris*, s. *articularis*.
- 2) *N. cutaneus brachii externus*.
- 3) - - - - - *internus*.
- 4) *N. medianus*.
- 5) *N. ulnaris*, s. *cubitalis*.
- 6) *N. radialis*.

1) *N. axillaris* ab exortu suo posteriora, & exteriora versus excurrit ambiens collum ossis humeri; distribuitur per musculus triangularem brachii, & ramulis plurimis per musculos vicinos scapulæ. Oritur sæpe non a plexu brachiali, sed a *n. radiali*.

2) *N. cutaneus brachii externus* proficiscitur per partem superiorem musculi coracobrachialis, a superioribus inferiora versus oblique hunc eundem perforat, ramosque ei nonnullos largitur; tum inter m. bicipitem, & internum brachii, inferiori autem loco sub solis integumentis communibus ad flexuram cubiti descendit, hanc eandem superascendit, & prope venam medianam sub cute in latere externo antibrachii ad pollicem usque migrat, ubi ramulis dispersis in cute evanescit.

3) *N. cutaneus brachii internus*: nervus hic exiguus descendit in latere interno humeri cute, & musculis obtectus; per decursum hunc in ramos binos finditur, qui ad flexuram usque cubiti una proficiscuntur; tum vero ramus anterior prope venam sic dictam basilicam sub cute, ac inter m. palmæ longum, & m. radiæum internum in palmam excurrit, huiusque cuti inseritur: ramus posterior excurrit secundum faciem internam antibrachii inter cutem, & m. cubitæum internum ad digitum minimum manus, ubi in cute disparet.

4) *N. medianus* una cum arteria brachiali secundum latus internum m. bicipitis brachii ad cubitum descendit; exhinc fertur secundum longitudinem antibrachii inter m. brachiaum internum, pronatorem rotundum, ac inter perforatum, & perforantem digitorum sub ligamento carpi interno in palmam; furculos parvos ubique in musculos manus spargit.

Rami ultimi constituunt *nervos digitales*; excurrunt hi ex utroque latere pollicis, digiti indicis, medii, & ex uno latere digiti annularis ad extremos usque horum apices; prospiciunt per decursum furculis multis cuti, tendinibus, & ligamentis.

5) *N. cubitalis* descendit in latere interno antibrachii inter art. brachialem, & venam basilicam, tum vero sub cute inter condylum internum humeri, & olecranon, loco magis inferiori ex latere musculi cubitæi interni secundum ductum antibrachii, in cujus extremitate anteriori in binos ramos finditur.

R. internus major *N. cubitalis internus* dicitur: ligamentum carpi internum transcendens, in facie interna ossis sesamoidei carpi ad manum migrat; ibi in tres denuo subdividitur ramos; quorum duo priores ex latere digiti annularis, & auricularis ad horum pergunt apices; tertius in palma versus pollicem arcum facit, cum ramo nervi mediani conjungitur, & in musculis vicinis evanescit.

R. externus minor, s. *cubitalis externus*, transcendens tendinem m. cubitæi externi, & dorsum manus, ad digitos duos ultimos meat, & ramis suis per facies digitorum horum convexas dispergitur.

6) *N. radialis* statim ab exortu suo ab anteriori parte posteriorem versus circa os humeri ambulat; exhinc in latere externo humeri inter m. brachii internum & externum ad flexuram usque descendit: tum fertur inter m. manus supinatore longum, & brevem ad extremitatem posticam, seu superiorem radii; per hunc decursum in musculos vicinos varios ramos mittit, & loco antea dicto in binos ramos finditur, quorum minor [secundum radi-um, inter musculum manus supinatore longum, & m. radiæum externum ad dorsum manus labitur, ac in musculis interosseis, in pollice, digitisque tribus primis terminatur,

R. major inter extremitatem posticam radii, & m. supinatore brevem transit; ramis suis evanescit in musculis antibrachii.

Quidam

Quidam ex nunc dictis nervis brachialibus diversis in locis invicem communicant.

NERVI DORSALES.

Diximus antea duodecim esse *nervorum dorsaliu* in paria; hæc omnia, prout per foramina vertebrarum dorsi exeunt, ramos varios postrosum ad musculos dorsi mittunt; hinc interiora versus secundum marginem inferiorem costarum ad sternum usque progrediuntur; quinque vero inferiores processus cartilagineos costarum attingunt: *N. costales* audiunt: superiores distribuuntur per musculos intercostales, serratos, & pectorales inferiores, errant per m. abdominales, diaphragma, & integumenta communia. Par primum ramum ablegat ad plexum brachialem.

NERVI LUMBARES.

N*ervorum lumbarium* quinque esse paria diximus; exeunt per foramina lateralia vertebrarum lumborum, & largiuntur lumbis, ossibus ilii, & musculis abdominalibus ramos; nonnulli feruntur una cum funiculo spermatico ad scrotum, & in feminis ad ovaria; alii errant per inguina, & musculos femoris superiores; furculi quidam excurrunt ad diaphragma; ab omnibus quinque paribus rami ablegantur, uti antea diximus, in n. intercostalem magnum.

Ex unione nervi lumbaris secundi, tertii, & quinti oritur utrinque *N. obturatorius*; descendit hic secundum latus internum *M. psoæ* in pelvin, musculos obturatores ambos perforat, per excisuram superiorem foraminis ovalis ossium innominatorum egreditur, ac furculis suis distribuitur per m. obturatores, tricipitem femoris, pectineum &c.

Par tertium, & quartum nervorum lumbarium una cum ramis nonnullis paris secundi nervum generat cruralem.

N.

N. cruralis anticus, s. medius oritur ex unione ramorum *N. lumbaris* tertii, & quarti, tum & ex furculis paris secundi, & quinti horum nervorum; supra os ileon scandit, sub *M. psoa* decurrit, & sub ligamento Poupartii in latere externo art. cruralis ex pelvi egreditur; plurimos tum spargit ramos, quorum nonnulli ad glandulas inguinales, alii ad musculos femoris feruntur; distribuuntur præterea pars magna inter integumenta communia, & fasciam latam, in cuti tandem evanescentes. Ramus unus secundum ductum *M. sartorii* ad condylum usque internum ossis femoris descendit, exhinc in latere pedis interno prope venam saphenam ad condylum internum migrat, & ex eo loco ad pollicem usque cuti sensim inplantatur.

Par *N. lumbarium* quintum cum pari primo nervorum sacralium præcipue conjungitur.

NERVI SACRALES.

Nervi sacrales, aut *Nervi ossis sacri* paribus quinque denuo absolvuntur; enascuntur ex cauda sic dicta equina medullæ spinalis, & per foramina anteriora ossis sacri egrediuntur; nervorum horum quatuor supremi, emissis quibusdam ramis ad partes in pelvi positas, junguntur cum pari ultimo *N. lumbarium* in plexum crassum, magnumque nervosum, unde exoritur *N. ischiaticus* magnus; par quintum totum fere ramis suis distribuitur per intestinum rectum, collum cystidis urinariæ, urethram, corpora cavernosa penis, ac in feminis per uterum, hujusque vaginam.

N. ischiaticus, seu *cruralis posterior*, & *magnus* nervorum corporis humani est maximus: oritur, uti statim dictum fuit, ex plexu, quem nervi quatuor supremi sacrales cum nervo ultimo lumbari constituunt; ramulos illico ad vesicam urinariam, intestinum rectum, & genitales partes ablegat; tum per incisuram
 ossis

offis ilei inter tuberositatem ischiaticam, & trochantarem majorem in parte postica femoris ad poplitem usque descendit; ibi loci nomen suum mutat, ac *N.* dicitur *popliteus*; nervus hic mox bifurcatur in ramos binos, quorum

- 1) Externus, minor *N. peronæus*,
- 2) Internus, robustior *N. tibiæus* dicitur.

N. peronæus externe in fibula descendit, in parte hujus inferiori a posterioribus anteriora versus flectitur, & ibi loci, emissis in musculos vicinos ramis pluribus, finditur in ramos binos:

R. externus sub aponevrosi ad malleolum properat externum, & exhinc supra dorsum pedis, & per cutim expanditur; internus prospicit partibus interioribus, & musculis pedis; ramuli nonnulli in digitos producuntur.

N. Tibiæus retro m. popliteum inter m. ambos gastrocnemios descendit, gastrocnemium inferiorem perforat, & inter hunc, & m. flexorem digitorum longum ad extremitatem tibie pertingit; per decursum hunc furculos ablegat in musculos vicinos, & cutim: ramus unus perforat ligamentum interosseum, & ad malleolum descendit externum, exhinc supra dorsum pedis ad digitos duos ultimos properat, ac sæpius cum *n. peronæo* communicat. Ramus princeps retro malleolum internum per excavationem ossis calcanei ad plantam fertur, ubi in binos ramos finditur, quos *n. plantares* dicunt.

N. plantaris externus excurrit in latere externo plantæ, & musculis, aponevrosique plantari plures largitur ramos.

N. plantaris internus excurrit in latere interno plantæ; uniuntur hi in planta, uti *n. cubitæus*, & *medianus* in palma, invicem; ac, uti hi per palmam, sic & illi per plantam, & digitos omnes distribuuntur.

ADENO-

ADENOLOGIA.



D E G L A N D V L I S I N G E N E R E .

GLANDVLA pars est corporis firma, rotunda, aut oblongata, organica, membrana propria cincta, arteriis, venis, & nervis composita, secretioni, aut mutationi liquidi determinati dicata.

Glandulæ dividuntur aut ratione fabricæ, aut ratione succi contenti in diversas classes.

Ratione fabricæ distinguuntur in classes quatuor :

- 1) in simplices,
- 2) in e simplicibus compositas ;
- 3) in conglobatas ;
- 4) in conglomeratas.

Ratione succi contenti distinguuntur aptius.

- 1) in muciparas ;
- 2) in sebaceas ;
- 3) in lymphaticas ;
- 4) in salivales ;
- 5) in lacrymales.

I. *Glandulæ simplices* sunt folliculi exigui, cavi, membrana speciali cincti, ductu proprio excretorio instructi, per quem liquidum in cavo suo secretum excernunt. Huc referuntur *glandulæ muciparæ* narium, linguæ, faucium, asperæ arteriæ, ventriculi, intestinorum, & cystidis urinariæ; tum & *glandulæ sebaceæ* circa anum positæ, & glandulæ parvæ, in meatu auditorio externo cerumen fecernentes.

Glandulæ hæ simplices aut hinc inde dispersæ sunt, aut plures in congeriem arcte sibi mutuo adherent, ea tamen ratione, ut membrana communi cinctæ non sint, & quævis ductu excretorio speciali gaudeat, qui cum ductu excretorio glandulæ alterius

T

nunquam

nunquam conjungitur. Priores *glandulae* dicuntur *simplices solitariae*, posteriores *glandulae simplices adgregatae*, seu *congregatae*; tales congregatae sunt glandulae intestinorum tenuium Peyerianae, &c. huc spectant & glandulae tales adgregatae, quae praeter membranam sibi propriam & alteri communi sunt inclusae, & quarum quævis per ductum excretorium specialem liquidum suum in cavum quoddam mucosum, seu pituitarium exonerant; tales conglutinatae dicuntur; v. g. tonsillae.

II. *Glandulae compositae* constant glandulis multis simplicibus, quarum ductus excretorii, in ductum excretorium communem junguntur; tales sunt v. g. glandulae multae sebaceae faciei, labiorum, palati, variarum cutis regionum, inprimis circa pedes, & regionem pubis.

III. *Glandulae conglobatae*, aut sic dictae lymphaticae vocantur illae, quae vasa inseruntur, & ex quibus denuo exeunt lymphatica; tales sunt glandulae mesentericae, omnesque lymphaticae reliquae, v. g. lumborum, inguinum, subaxillares &c. occurrunt & quaedam ad truncos majores venarum: componuntur textu vasorum lymphaticorum, tunica cellulosa mutuo nexorum. Notandum est, ductus iis nullos esse excretorios, in foetu etiam esse multo majores, minui in infante nato, evanescere fere in senibus.

IV. *Glandulae conglomeratae* componuntur congerie glandularum plurimarum simplicium, quarum ductus excretorii in truncum communem abeunt; tunica etiam cellulosa communi haec involvuntur; huc referuntur: parotis, pancreas, glandulaeque salivales omnes: a glandulis compositis parum discrepant; glandulis tamen pluribus simplicibus constant, quam compositae: minima glandularum harum cor-
pora

pora amiciuntur textu celluloso , & acinis , uti examinanti patebit , denuo minoribus absolvuntur.

Sunt & glandulæ multæ conglomeratæ , quarum ductus excretorius detectus nondum est ; v. g. gland. thyroidea , glandulæ suprarenales.

Ductus excretorius glandularum dicitur ductus , liquidum in glandula confectum excernens.

Vasa , & *nervi* glandularum enascuntur semper a partibus vicinis.

Vsus glandularum est , ut earum ope humores determinati secernantur , aut mutantur : usum glandularum conglobatarum prorsum hæctenus ignoramus.

GLANDVLAE IN CAVO CRANII CONTENTAE.

1) *Glandulæ duræ matris* glandulæ sunt ovales , plerumque albæ , subin & rubicundæ ; hærentes tum secundum ductum sinus longitudinalis superioris duræ matris , tum extra eundem in specialibus cavitatibus ossis frontalis , ossiumque binorum sincipitis , tum demum & sub sinu dicto in meninge pia. Occurrunt etiam nonnullæ in septo transversali.

2) *G. plexus choroidei* glandulæ sunt conglobatæ ; in ventriculis cerebri , plexui choroideo maximam partem unitæ occurrunt.

3) *G. pituitaria* ; inhæret excavationi speciali fellæ turcicæ , ubi infundibulum terminatur cerebri , pia meninge , duræque lamina interna obtecta. Glandula non est , sed pars ipsius cerebri : vocarunt eam Veteres glandulam pituitariam , quum crederent , secerni per eam pituitam ex cerebro in nares.

4) *G. pinealis* pariter glandula non est , sed protuberantia medullaris , eminens in medio inter tubercula quadrigemina cerebri.

GLANDVLÆ OCVLORVM.

1) *Glandula Meibomiana* triginta, aut quadraginta numero; dispositæ sunt serie simplici, vel & duplici secundum marginem internum palpebrarum sub cute, quam ductibus suis excretoriis in margine tarsorum perforant.

2) *G. lacrymalis* glandula est conglomerata, supra canthum oculi externum in orbita excavationi speciali ossis frontis inhærens; ductibus excretoriis sex vel septem instruitur, supra adnatam palpebrarum tunicam excurrentibus, & prope cartilagineum tarsum in facie interna tunicæ adnatæ hiantibus. Humorem secernit aquosum, subsalsum, oculum nunquam non humectantem, & si copia majori secretus fuerit, lacrymarum sub titulo per genas depluentem.

3) *G. caruncula lacrymalis* glandulæ sunt parvæ sebaceæ, a caruncula lacrymali obtectæ, cantho oculi interno inhærentes, & quum in cantho hoc eodem glandulæ meibomianæ nullæ adsint, harum loco succum subviscidum secernentes; oriuntur ex illis pili exigui, pulverem uti & inspissatum lacrymarum liquidum a punctis lacrymalibus arcentes, hincque efficientes, ut fordes oculorum in cantho colligantur oculi interno.

GLANDVLÆ NARIVM.

Glandulæ muciparæ membranæ pituitariæ narium exiguæ sunt; hinc inde per membranam pituitariam, imprimis vero circa septum narium dispositæ, pituitam secernentes.

GLANDVLÆ AVRIVM.

Glandulæ ceruminosæ auris externæ glandulæ sunt parvæ, flavicantes, in meatu auditorio externo sub cute hærentes, secretioni ceruminis dicatæ.

GLAN-

GLANDVLAE ORIS.

1) *Glandula parotides* glandulæ duæ conglomeratæ magnæ sunt, ex utroque latere sub aure spatium totum inter proc. mastoideum, & angulum maxillæ inferioris explentes, anteriori loco ad m. masseterem, superiori ad proc. Zygomaticum usque productæ. Ductus omnes excretorii exigui glandularum singularium confluunt demum in ductum excretorium majorem albicantem, ab inventore *Ductus salivæ stenonianus* dictum. Ductus hic vasis plurimis præditus enascitur ex parte infima glandulæ, sub initium sursum nonnihil ascendit; tum vero transverso decursu antrorsum fertur supra faciem externam m. masseteris, tum ab interioribus descendit, m. buccinatorem perforat, ac inter glandulas buccales circa dentem molarem secundum & tertium in os hiat.

Superius ad initium m. masseteris glandula conglomerata hæret adhuc alia, parotidi ipsi subin unita; ductus tamen hujus excretorius cum ductu stenoniano nunquam non unitur. In parotide hærent insuper glandulæ duæ, tres, vel plures lymphaticæ, ductu excretorio privatæ, hinc & cum ductu salivæ dicto nunquam unitæ.

2) *G. maxillares* glandulæ duæ conglomeratæ sunt, recubantes ex utroque latere ad angulum maxillæ inferioris internum sub m. mylohyoideo, & ceratoglossa cute tectæ; ductus earum excretorius transiens inter musculos sublinguales, *ductus Whartonianus* dictus, aperitur antè ex lateribus frænuli sublingualis.

3) *G. sublinguales*, glandulæ duæ conglomeratæ, oblongæ, angustæ sunt, sub lingua inter faciem internam maxillæ inferioris, & linguam m. mylo-

hyoideo incumbentes, ductibus excretoriis quindecim, aut viginti in lateralibus linguæ partibus apertæ: ductu excretorio gaudent & alio, cum ductu Whartoniano plerumque unito, subin & ab illo se-juncto, lateraliter in lingua hiante.

4) *G. buccales*, s. *genales* glandulæ sunt exiguæ simplices, racematim dispositæ circa ostium ductus stenoniani; quædam hærent & inter m. masseterem, & buccinatorem.

5) *G. labiales* glandulæ sunt exiguæ prioribus similes, residentes in facie labiorum interna. Liquidum salivæ analogum in cavum oris exonerant.

6) *G. molares*, ex utroque latere hæret una inter m. masseterem, & buccinatorem: glandulæ salivales compositæ sunt, ad dentem molarem ultimum ductu suo excretorio aperiuntur.

GLANDVLAE FAUCIVM.

In tunica oris interna, & faucium, quæ continuatio membranæ pituitariæ narium est, plurimæ hærent glandulæ mucilaginosæ: præcipuæ harum sunt:

1) *G. palatine* glandulæ sunt exiguæ; per faciem palati integram, inprimis per posteriorem dispersæ.

2) *G. uvulæ* copiosæ insident regioni circa uvulam; glandulæ sunt muciparæ.

3) *Tonsillæ*, seu *amygdalæ* nomen a figura sortiuntur; glandulæ duæ sunt muciparæ, quarum ex utroque latere una retro binos arcus veli penduli palatini hæret; liquidum mucilaginosum per ductus parvos excretorios illuc effundunt.

4) *Glandulæ* multæ *muciparæ* in radice linguæ, ductus earum excretorii in foramen sic dictum cæcum linguæ hiant.

GLANDVLAE COLLI EXTERNAE, ET INTERNAE.

1) *Gl. thyroidea* glandula magna est, antè in collo sita, superius cornibus suis binis, seu productionibus partes laterales cartilaginis thyroideæ, inferius cartilagineum cricoideum, una cum parte superiori asperæ arteriæ obtegens; continet liquidum aquosum, subviscidum; indeterminatum vero hæcenus est, an ad classem glandularum conglomeratarum, vel globatarum referri debeat, nec de illius usu constat, quum ductus excretorius illius detectus nondum fuerit.

2) *G. jugulares* glandulæ sunt quatuordecim ad viginti quatuor, quæ sub classem glandularum conglomeratarum referri debent; disponuntur circa venas jugulares externas, cute colli obtectæ.

3) *G. cervicales*, s. *occipitales* glandulæ sunt conglomeratæ, in cervice, & lateribus colli hærentes; in infantibus sæpius tumidæ.

4) *G. laryngeæ* muciparæ simplices sunt, residentes in membrana interna rimæ glottidis, liquidum secernentes mucilaginosum.

5) *G. pharyngeæ*, & *œsophageæ* hærent in tunica interna pharyngis & œsophagi, liquidum tale, uti priores, secernunt.

GLANDVLAE THORACIS.

1) *Gl. thymus* mollis, rariorisque texturæ est, hærens in spatio anteriori cavo mediastini infra partem superiorem sterni.

Inferiora, & superiora versus duobus cornibus producitur; in fœtu maxima est, mollis, interne succo aquoso albido referta; in adultis parva est, du-

ra, sensimque evanescit. Ductus excretorius detectus nondum est, hinc & nondum constat, ad quam referri debeat glandularum classem, aut quis ei tribuendus sit usus.

2) *G. bronchiales* glandulæ sunt majores, minoresve subcœruleæ, aut nigricantes, hærentes ad extremitatem asperæ arteriæ inferiorem, ubi hæc in binos ramos bifurcatur, inter tunicam externam, & secundam anteriori posteriorique loco, textui insidentes celluloso; ductus excretorii asperam arteriam perforant, & in hujus lumen succum nigricantem deponunt: occurrunt nonnullæ & in ipsis bronchiis.

3) *G. dorsalis œsophagi* hæret, si adsit, in regione vertebræ dorsi quartæ, aut quintæ, in facie postica, externa œsophagi. Nonnunquam dux adsunt; ductus excretorius detectus nondum fuit.

4) *G. mammariæ* glandulæ multæ parvæ sunt, inhærentes tunicæ adiposæ mammarum, ductus earum candicantes terminantur in papillis mammarum. In feminis lac in mammis secernunt.

GLANDVLAE ABDOMINIS.

In cavo abdominis sunt:

1) *Pancreas* glandula est magna conglomerata hærens in regione epigastrica sub parte ventriculi posteriori; per ductum suum excretorium succum salivæ analogum in duodenum exonerat. Amplior ejus descriptio in SPLANCHNOLOGIA tradetur.

2) *G. gastricæ* exiguæ, simplices sunt, hærentes in textu ventriculi celluloso tertio imprimis versus orificium ventriculi dextrum; ductus harum excretorii in cavum aperiuntur ventriculi.

3) *G. intestinales* glandulæ sunt simplices, tum solitariae hinc inde positæ, tum racematim congestæ, mucipa-

muciparæ ; quarum priores ab inventore *brunneriana*, posteriores *peyeriana* dicuntur. Recubant in intestinis tenuibus, & crassis inter tunicam villosam, & nerveam; mucum in intestina fecernunt. Maxima earum copia adest in intestino ileo.

4) *G. mesentericæ* glandulæ sunt copiosæ, molles, conglobatæ, inter laminas mesenterii, magnitudine, posituque diversis, occurrentes; inseruntur his, præter vasa lymphatica ex partibus corporis inferioribus redeuntia & vasa lactea intestinorum tenuium, hæc tamen ultima ex altero latere denuo egrediuntur, & ad receptaculum properant chyli. Glandulæ veræ lymphaticæ sunt, in quibus chylus, uti videtur, diluitur, & sic quadam ratione mutatur.

5) *G. cysticæ* glandulæ sunt parvæ, obscure fuscæ, simplices, positæ sub tunica cystidis felleæ intima, imprimis circa hujus collum, & ductum biliarium communem; ductibus suis excretoriis mucum in cystidis cavum fecernunt.

Extra cavum peritonæi.

1) *G. suprarenales*, s. *capsulæ atrabiliaris*, s. *renes succenturiati* glandulæ duæ conglomertæ sunt, utrinque renibus incumbentes; cavitatem recondere videntur; in infantibus recens natis maximæ sunt, succo ex flavo rubente turgidæ: ductus excretorius nondum detectus; usus nondum determinatus.

Plura videantur in SPLANCHNOLOGIA.

2) *G. lumbares* glandulæ sunt parvæ, conglobatæ, circa receptaculum chyli dispositæ.

3) *G. sacrales*, adhærentes ossi sacro, &

4) *G. iliacæ* positæ ad exortum vasorum pelveos; utræque glandulæ sunt parvæ, conglobatæ, lymphaticæ,

ticæ, excipientes vasa lymphatica extremitatum inferiorum, eaque tradentia receptaculo chyli.

GLANDULAE PARTIVM GENITALIVM VIRILIVM.

1) *Glandula prostata* glandula est compacta valde, firmaque sub collo vesicæ urinariæ anteriora versus urethræ, posterius intestino recto incumbens. Figura ejus cor refert, versus vesicam urinariam lata, crassa, & excissa, antrorsum tenuior est. Urethram ad bulbum usque undique ambit, eique ope textus cellulosi firmi, vesicæ ipsi urinariæ ope fibrarum carnearum arcte unitur. Facies superior, symphisi ossium pubis respiciens, complanata est, in medio sulco donata, cui incumbit vena penis. Ductibus excretoriis 10 — 12. gaudet, qui omnes anterieus circa caput gallinaginis hiant, & liquidum suum albidum viscosum, ubi id requisitum fuerit, in urethram exonerant: in feminis glandula hæc ipsa non adest: fabrica ejus, & usus contenti liquidi nondum constant.

2) *G. due sat magnæ conglomeratæ*, ex utroque latere retro bulbum hærentes singulæ, antrorsum excurrentes, in urethram apertæ, succum suum lubricantem in eam effundentes.

3) *G. mucosæ urethræ* plurimæ exiguæ glandulæ sunt, sub interna urethræ tunica hærentes, in ejus cavum succum lubricum pro defensione membranæ internæ ab acrimonia excernunt.

Glandulas reliquas urethræ ab aliis anatomicis descriptas hætenus nunquam vidi.

4) *G. odoriferæ glandis penis*, glandulæ sunt exiguæ sebaceæ simplices, circa collum, & coronam
glandis

glandis penis dispositæ, liquidum unctuosum, speciali odore donatum secernunt.

GLANDVLAE PARTIVM GENITALIVM MULIEBRIVM.

1) *Glandulæ odoriferæ labiorum majorum, & nympha-
rum*, glandulæ sunt sebaceæ, inhærentes faciei internæ labiorum vulvæ, & nympha-
rum, liquidum unctuosum speciali odore præditum ibi secer-
nentes.

2) *G. odoriferæ clitoridis* hærent in basi clitoridis, ejusdem cum præcedentibus sunt indolis.

3) *G. muciparæ urethræ analogæ* sunt glandulis muciparis urethræ virilis.

4) *G. vaginæ* glandulæ sunt muciparæ, sub intima vaginæ uteri tunica recubantes, in cavum hujus mucum suum deponentes; glandulæ muciparæ, quæ in postica vaginæ parte hærent majores, ab inventore suo *Bartholinianæ* dicuntur.

GLANDVLAE EXTREMITATVM.

1) *Glandulæ axillares*, ejusdem sunt indolis cum glandulis conglobatis lymphaticis; resident in fovea axillari prope vasa magna axillaria inter tendines m. pectoralis majoris, & latissimi dorsi; recipiunt vasa lymphatica ab extremitatibus superioribus, & mammis redeuntia.

2) *G. inguinales* pariter ad g. lymphaticas conglobatas referri debent: plures inhærent ex utroque latere sub cute textui celluloso, in parte inferiori inguinum; excipiunt vasa lymphatica penis, & partim etiam extremitatum.

3) *G. mucilaginosæ Haversianæ*, s. *synoviales* sic dictæ ab inventore fuerunt ; glandulæ sunt molles, & teneræ, ubique fere inter articulationes ossium in cavitatibus articularibus dispositæ. Maximæ hærent in excavatione acetabuli ossis innominati, cui os femoris inseritur. Secernunt in cavitates dictas liquidum unctuosum lubricans, quod cum humore ex ossium finibus exsudante oleoso, & cum succo ex ligamentis exhalante aquoso jungitur, & sinegma constituit, articulationes lubricans, motibus reddens, servans aptas.

GLANDULÆ CUTANEÆ.

Glandulæ cutaneæ glandulæ sunt minimæ sebaceæ recubantes in facie interna cutis, ductu suo excretorio cutim perforantes, ac in epidermide hiantes, ut in ea deponant liquidum lubricans, cujus ope illius mollities conservatur. Per totam corporis superficiem dispersæ sunt ; copiosiores tamen occurrunt in quibusdam locis, v. g. circa nasum, aures, scrotum &c. quam quidem in aliis.



**SPLANCHNO-
LOGIA.**

HUMANI CORPORIS DIVISIO.

CORPUS HUMANVM dividitur in genere
in *Caput*,
— *truncum*, &
— *extremitates*, seu *artus*.

CAPUT subdividitur denuo
in *faciem*, &
— *partem capillatam*.

In *facie* notanda veniunt :

Frons,
Tempora,
Aures,
Oculi,
Os,
Mentum, &
Buccæ, duæ posteriores partes in *viris* or-
nantur *barba*.

In *parte capillata* notentur :

Sinciput, in hujus medio *vertex*,
Occiput, &
Partes binæ laterales.

TRUNCVS dividitur in

Collum,
Thoracem, &
Abdomen.

In **COLLO** notentur : *pars anterior* ; in qua cer-
nitur *caput asperæ arteriæ*, in *viris*, sub nomine *pomi*
Adami, magis prominens.

Pars posterior ; in qua conspicua est *fovea nu-*
chæ, partesque binæ laterales.

THORAX dividitur

In *partem anteriorem*, cui incumbunt *mammæ*; in parte infima thoracis sub *sterno* adest *foveola*, *scrobiculus cordis* dicta:

in *partem posticam*, seu *dorsum*;

in *partes binas laterales*.

ABDOMEN dividitur

in *partem anticam*, seu *abdomen* proprie sic dictum:

in *partem posticam*, seu *lumbos*;

in *partes binas laterales*.

Regio abdominis anterior subdividitur in *regiones quatuor*:

1) in *regionem epigastricam*, cujus partes laterales sunt *hypochondria*: extenditur a *scrobiculo cordis* ad tres usque *digitos transversos supra umbilicum*.

2) in *r. umbilicalem*; cujus laterales partes audiunt *regiones lumbares*. Describitur hæc peripheria trium *digitorum supra*, totidemque *infra umbilicum*.

3) *r. hypogastrica*, cujus laterales partes adpellantur *regio iliaca*. Oritur ad *distantiam trium digitorum transversorum sub umbilico*, protenditur ad usque *regionem pubis*.

4) *r. pubis* in adultis *crinibus obsita*, cujus partes laterales sub nomine *inguinum*, seu *regionis inguinalis* veniunt: *infra regionem pubis cernuntur partes genitales* utriusque *sexus*.

Spatium partibus genitalibus & orificio ani interceptum perinaeum dicitur.

ARTVS, seu EXTREMITATES dividuntur in *superiores*, & *inferiores*.

Superiorum extremitatum quævis dividitur:

in *summitatem humeri*, sub qua hæret *fovea subaxillaris*:

in *brachium*,

in *antibrachium*, in quo notentur *flexura*, & *protuberantia cubiti* :

— *manum*, instructam *vola*, & *dorso*.

Manus subdividitur

in *carpum*,

— *metacarpum*, &

— *digitos*.

Digiti dividuntur

in *pollicem*,

— *indicem*,

— *medium*,

— *annularem*, &

— *auricularem*.

Inferiorum extremitatum quævis dividitur

in *femur*, cujus pars suprema, & exterior regio *ischiatica* dicitur.

— *crus*; quo & referuntur :

genu,

Poples, &

Sura;

in *pedem extremum*, instructum *dorso*, & *planta pedis*, ad hujus initium loco superiori notentur :

malleolus internus, & *externus*.

Pes extremus dividitur

in *tarsum*,

— *metatarsum*, &

— *digitos*.

INTEGUMENTA CORPORIS COMMUNIA: VNGVES: PILLI.

Partes corporis humani omnes amiciuntur integumento communi, quod in genere *cutis* dicitur.

Anatomici ad cutim referunt ;

- 1) *Epidermidem* ;
- 2) *Cutim* ;
- 3) *Tunicam adiposam* ;
- 4) *Vngues* ; &
- 5) *Capillos*.

Epidermis involucrum est diaphanum , insensibile , cutim obducens , eique ope vasorum plurimorum , & pilorum , qui id ipsum perforant , adhærens , vasis tamen , nervisque omnino destitutum.

Facies externa subcornea est , sicca , incorruptibilis , rugosa , poris plurimis pertusa : *facies interna* in Europæis mollis , semifluida , & ex integro fere mucilaginem referens est , cum priori unicam nonnisi laminam constituit : in Aethiopibus autem facies hæc eadem interna firma , membranaceaque est , ac in statu etiam sano ab exteriori facile separari potest. Foveolis gaudet exiguis , papillas nerveas in facie cutis externa conspicuas , excipientibus ; lamina hæc interna *rete malpighianum* dicitur. *Epidermis* obducit non solum superficiem externam universi corporis , sed & partes amiciuntur ab ea internæ , quum intestinum rectum , vaginam uteri , urethram , nares , os , aures , oculos subeat , & involucrum harum partium internum subpeditet. In quibusdam corporis partibus densior est , tenerior in aliis : in locis , qui aduruntur , aut sæpius adteruntur , laminæ novæ exsurgunt inter epidermidem , & cutim ; densior illa exin fit , atque hac ratione *callus*.

Fabrica epidermidis, uti videtur , absolvitur condensata ope aëris , & adtritum parte externa *muci malpighiani* ; mucus vero hic ipse , qui & , uti antea dictum fuit , *rete malpighianum* vocatur , succus videtur inspissatus , per vasa cutanea secretus : quum rete hoc

in Aethiopibus fuscum , in Europæis album fit , dubitandum jam non est, dependere ab eo colorem corporis.

Cutis proprie dicta textus est cellulofus arcte ad invicem compactus , hærens inter epidermidem , & tunicam adiposam , elasticus , fenfibilis , foraminibus pertufus numerosiffimis , compositus nervis , arteriis , venis , vafisque lymphaticis.

Epidermidis adinstar , univerfum corpus obducit. Facies externa , epidermidis superficiei internæ obverfa , densior est ; deteguntur per eam ubique , imprimis in apicibus digitorum tactu papillæ exiguæ obtufæ , compositæ vafis , nervis , textuque uniente hæc omnia ; papillæ nunc expofitæ sub nomine *papillarum nervearum* veniunt : facies interna cutis , membranam respiciens adiposam rarior est , foveolis multis prædita , quæ eminentias membranæ adiposæ excipiunt.

Inter faciem hanc , & membranam adiposam hærent hinc inde glandulæ multæ sebaceæ tum fimplices , tum compositæ , quarum excretorii ductus cutim perforant , in epidermide hiant , & illuc liquidum pingue , molle , aut viscofius fecernunt , cujus ope partes ab aëre , & adritu defenduntur ; hærent ibi loci & bulbi pilorum , pilique inde enati cutim pariter perforant. Notandum infuper est , cutim in quibusdam locis effe delicatiorem , duriozem , robuftioremque in aliis , differre eam pro ratione ætatis , vitæ generis , e. f. p.

Arteriæ cutis exiguæ , brevesque funt ; oriuntur ubique ex arteriis vicinis sub cute pofitis.

Venæ fanguinem fuum in venas fubcutaneas pariter exonerant.

Nervi copiofiffimi in cutem proficifcentes dirimuntur in ramulos minimos ; tactui per univerfum corpus , imprimis in apicibus digitorum , dicantur.

Vsus cutis : 1) corpus amicit , tuetur ; 2) vasa exhalantia , & resorbentia ordinat ; 3) Tactus organon constituit.

Membrana adiposa compositur celluloso textu, sub cute musculis incumbente, ex vesiculis, seu folliculis minimis, elasticis, insensilibus, invicem patentibus, in plerisque locis pinguedine turgidis conflato.

Facies externa eminentiis multis inæqualis est, quæ in cute foveolas inprimunt, eique uniuntur ; *facies interna* interstitia explet musculorum.

Vsus : partes internas a frigore tuetur, motum cutis supra musculos liberum conservat ; colorem candicantem , & pulchritudinem formæ externæ adauget.

UNGVES laminæ sunt tenues, cornæ, insensiles, plus minusve rigidæ, digitorum manuum, pedumque apicibus incumbentes.

Fabrica unguium : constant muco malpighiano condensato epidermidis.

Oriuntur inter plicam semilunarem epidermidis radice quadrangulari ab extrema digitorum phalange ; ac ab eadem in extremitate sua externa, & interna ad anteriorem usque extremitatem egredientes obteguntur. Dividuntur ungues

1) in radicem, ubi notanda venit macula semilunaris alba.

2) In corpus, seu partem mediam, &

3) in marginem anteriorem scindentem.

Vsus. Papillas subjectas nerveas tuentur, apices digitorum, sub adtactu corporis cuiusdam, eidem adprimunt.

Dubitandum non est, uti iisdem nos posse pro defensione.

PILI, CRINES, CAPILLI filamenta sunt exigua, cylindrica, diaphana, insensilia, elastica, ex cute prominentia, eique ope radicum parvarum firmiter inserta.

Fabrica, absolvitur textu spongioso, cellulari, in quo succus coloratus recluditur, & vagina speciali.

Color enascitur a succo, textum cellulosum replente.

Duplicis sunt speciei: longi, enati ex parte capillata cranii, genis, mento, thorace in viris, ex parte insuper anteriori brachiorum, & crurum, sub axillis, in inguinibus, & circa regionem pubis: pili breves, mollesque adsunt per totum corpus, excepta solum planta, & vola. Oriuntur in membrana adiposa ex bulbo membranaceo oblongo, vasis prædito, hæc ambit bulbum denuo alium, sanguine irrigatum, huicque demum inhæret pilus.

Pili omnes, vagina ex bulbo oriunda obducti, per cutim ad epidermidem pergunt, hanc eandem elevant, & vaginæ adinstar secum ducunt; textus internus spongiosus, & cellulosus membranis nunc dictis inclusus ab exortu suo ad extremum usque pili apicem protenditur. Pili continuo crescunt, & abscissi denuo recrescunt, quum medulla in iisdem contenta versus apicem protrudatur, & epidermidem sic necessario longiorem reddat. Dum vero pili in senibus medulla hac eadem privantur, siccescunt, fiunt, & excidunt. Nominibus præterea insigniti fuerunt diversis ratione situs, quem occupant, uti suis locis dicetur.

Circa usum pilorum respectu corporis, determinati quid assignari nequit.

Adferunt nonnulli, exhalare pilos per apicem, & fors per totam suam superficiem quemdam humorem. Capilli inserviunt præterea calori fovendo, &

pulchritudini; cilia, & supercilia sudorem, & infecta ab oculis arcent: aliis præcavetur, ne cutis ob majorem adtritum excorietur e. f. p.

CAVUM ABDOMINIS.

Cavum hoc magnum definitur superius a diaphragmate, inferius ab ossibus pubis, & ischii, ex utroque latere a musculis variis, a costis brevibus, & ossibus ilii, anterieus a musculis abdominalibus, posteriorius a vertebrae lumborum, osse sacro, & osse coccygis, externe ambiunt illud undique muscoli, & integumenta communia, interne peritonæum.

Interne in cavo abdominis hærent. antrosum, & lateraliter:

- 1) Mesenterium.
- 2) Epiploon.
- 3) Ventriculus.
- 4) Intestina tenuia, & crassa.
- 5) Vasa lactea.
- 6) Pancreas.
- 7) Splen.
- 8) Hepar, cum cystide fellea.

Retrorsum, extra peritonæum.

- 1) Renes.
- 2) Glandulæ suprarenales.
- 3) Vreteres.
- 4) Receptaculum chyli.
- 5) Aorta descendens.
- 6) Vena cava ascendens.

Inferius in pelvi, & extra peritonæum:

In viris:

Vesica urinaria;
vesiculæ spermaticæ, &
intestinum rectum.

In feminis præter vesicam urinariam, & intestinum rectum :

Uterus.

Ligamenta quatuor uteri.

Tubæ duæ fallopianæ.

Ovaria bina.

Vagina uteri.

Divisionem abdominis in regiones varias antea exposuimus.

PERITONÆVM.

Peritonæum membrana est firma simplex, cujus facies interna lævis, humescens, externa textu cellulari cincta, pinguisque est. Obducit faciem diaphragmatis totam inferiorem, retro musculos abdominales anteriora versus in pelvim descendit, vesicam urinariam, in feminis uterum obtegit; conjungitur ad intestinum rectum cum parte sua altera, posterius a renibus supra regionem lumbarem in pelvim descendente, ibique loci intestinum rectum obducen- te; hac vero ratione viscera abdominalia omnia involvit. Omnia, intra saccum hunc eundem hæren- tia, utpote ventriculus, splen, hepar, omentum magnum, & parvum, pancreas, intestina tenuia, & crassa una cum mesenterio, & mesocolo, peritonæo contineri dicuntur; extra peritonæum locantur om- nia ea, quæ sacco dicto non involvuntur, scilicet: renes, vesica urinaria, uterus, glandulæ spermaticæ, vasa majora hæmatophora, c. f. p. Si quis vero proprie loqui velit, viscera abdominalia omnia extra peritonæum hæere dicere jure poterit, quum om- nia integumentum suum extimum inde repetant.

Textus cellularis faciei externæ peritonæi, in quibusdam locis pinguedine repletur plurima; in aliis productiones format varias, quarum præcipuæ

ex utroque latere per annulos abdominales exeunt, funiculum spermaticum, ac testes obducunt; aliæ involvunt vasa iliaca, intestinum rectum, penem, vasa cruralia &c. aliæ, per foramina diaphragmatis cum aorta, & œsophago in thoracem penetrant, ibique cum pleura junguntur: videmus exin maximam communicationem peritonæi per totum corpus imprimis in hydropicis.

Formantur insuper a peritonæo in diversis locis & productiones breviores, quæ ligamenta audiunt: Oriuntur hæc a duplicata productione peritonæi, dum id ipsum a facie interna recedit, textum cellulosum in medio recludit, & ad viscus quodpiam accedit; quamprimum id ipsum adtigit, laminæ peritonæi ab invicem secedunt, & viscus excipiunt; textus cellulosus, qui prius in facie illius hæserat, nunc pariter in medium recipitur, & faciem visceris externam cum peritonæo conjungit. Productiones tales sunt mesenterium, ligamenta quatuor hepatis, ligamenta duo vel unum splenis, alia intestini coli, renum, uteri, & vaginæ.

Vasa ejus veniunt antè ab arteria mammaria, epigastrica, diaphragmatica; lateraliter ab art. lumborum, costarum, renum, & iliatis; posterius ab art. diaphragmatis, hepatis, splenis, ventriculi, renum, mesenterii, spermaticis, lumbalibus, intercostalibus, hypogastricis, & intestini recti internis. Venæ iisdem donantur nominibus, & feruntur ad venam cavam.

Vfus peritonæi est:

- 1) Viscera abdominalia cuncta in situ retinet.
- 2) Vi humoris exhalantis viscerum concretionem impedit.
- 3) Productionibus suis internis viscera omnia ambit, & ligamenta varia format.

M E S E N T E R I V M.

Mesenterium productio, uti dixi, peritonæi est: componitur hinc binis laminis, textum cellulofum recludentibus. Oritur principio angusto a vertebra lumborum prima, secunda, & tertia; antrorsum fertur; per decursum magis magisque latefcit, demumque laminis suis intestinum totum jejunum, & ileon, colon, partemque superiorem recti excipit. *Mesenterium* proprie dicitur illud, quod intestinis adhæret tenuibus; adnexum crassis mesocolon audit. Tum hoc, tum illud plurimam recondit inter laminas suas pinguedinem, glandulas numerosissimas, & nervos copiosos, a plexibus mesentericis ortos.

Arteriæ mesentericæ omnes veniunt ab aorta: venæ terminantur in venam portæ.

Notanda in eo adhuc sunt vasa plurima lactea, & lymphatica, per id ipsum ad ductum thoracicum excurrentia.

Vsus mesenterii utriusque est:

- 1) Intestina firmant.
- 2) Tunicam illis extimam largiuntur.
- 3) Glandulas, vasa lactea, lymphatica, & hæmatophora excipiunt.

O M E N T V M.

Omentum, seu *Epiploon* membrana est peritonæo fere similis, tenuis tamen, facileque dilaceranda, anterieus retro peritonæum intestina obtegens.

Constat laminis binis, textu tenuissimo celluloso exacte invicem unitis, pinguedinem per vasa secretam excipientibus. Oritur pariter a peritonæo, ac in *omentum parvum*, & *magnum* subdividitur; co-

hærent tamen invicem, ejusdemque simul sunt fabricæ.

Omentum magnum, seu *gastrocolicum* enascitur a toto arcu majori ventriculi ad lienem usque, liberum exin retro musculos abdominales, supraque intestina ad umbilicum, subin & in pelvin usque descendit, marginem suum inferiorem introrsum ibi vertit, denuo adscendit, ac tunicæ extimæ intestini coli, cavitatque lienis, ubi vasa magna viscus hoc ingrediuntur, adfigitur; terminatur demum in œsophago sub diaphragmate.

Colon omento præterea instruitur adhuc alio, ex dextro magis latere posito, cum omento magno simul excurrente, & *omentum colicum* dicto. Enascitur ex tunica extima, quæ duplicata, & longius producta ab intestino colo secedit, & apice cuneiformi supra intestinum cœcum terminatur.

Omentum parvum, enascitur loco posteriori profundius ex fissura transversa hepatis; componitur tunicis conjunctis peritonæi, ibi loci immerssis, superfcandit dein duodenum, & lobum hepatis minorem; lobulum Spigelii, & pancreas præterit, in colon proficiscitur, ac immergitur demum orificio ventriculi inferiori, & curvaturæ minori; durius exhinc factum, minusque pingue in ligamentum abit verum, œsophago implantatum, eumque cum diaphragmate connectens.

Notari debet in omento hoc eodem apertura naturali lege eidem insculpta, a *Winslowo* omnium primo detecta; flatu per foramen hoc adactò distendi potest omenti cavitas, una cum reliquis ejus faccis; adest foramen hoc nunquam non retro lobulum Spigelii minorem inter dextram partem hepatis, & vasa hepatica, venam portæ, vicinumque intestinum

num duodenum, retro productionem membranaceam, ex qua omentum minus enascitur.

Nervi omenti minimi sunt, exorti ab octavo nervorum pari.

Arteriæ omenti magni oriuntur a ventriculo; binæ sunt, *dextra*, & *sinistra*. Omentum colicum arterias suas acquirit ab art. colica, epiploica dextra, & duodenali.

Venæ majores omenti ad venam feruntur portæ, & truncum venæ splenicæ, & mesentericæ: minores excurrunt cum arteriis ejusdem nominis.

Anatomici recentiores *vasa lymphatica* in omento etiam detexerunt.

Vsus omenti multiplex est:

1) Exhalatione pingui intestina, hepar, splenem, & ventriculum lubricat; ne viscera hæc ob adfrictum continuum tum inter sese, tum ad peritonæum lædantur, impedit.

2) Secernitur in eo pinguedo, per vasa resorbentia ad hepar reducenda, bilis partem potissimam constituens.

3) Fovendis intestinis, & ventriculo; tum & digestionem perficiendæ, inservit.

4) Morbi plures demonstrare videntur, ab omento, uti a mesenterio resorberi liquida in cavum abdominis exhalantia; quum hydropici sæpe fiant illi, in quibus viscera hæc eadem obstructa, aut alia ratione male adfecta sunt.

V E N T R I C U L U S.

Ventriculus faccus est membranaceus, tyripipium referens, positus sub diaphragmate, in regionis epigastricæ medio, partim & in regione hypochondriaca sinistra retro hepar, & costas sinistras spurias, excipiendis cibus dicatus.

Figura

Figura ex oblongo rotunda est, ex latere sinistro versus œsophagum amplior, versus latus dextrum ad orificium ventriculi inferius sensim angustior fit.

Connectitur orificiis suis superius cum œsophago, inferius cum intestino duodeno; ex latere sinistro cum splene ope majoris partis omenti, & vasorum brevium: antè, & postè cum omento majori, & minori.

Notanda in ventriculo veniunt sequentia:

Orificia bina:

Superficies binæ:

Arcus bini, seu curvaturæ binæ:

Tunicæ quatuor, una cum glandulis multis, artèriis, venis, vasis lymphaticis, & nervis.

Orificia bina ventriculi sunt:

1) *Sinistrum, seu superius*, in regione epigastrica, versus hypochondrium sinistrum posteriori magis loco positum, œsophagi finem constituens.

2) *Dextrum, seu inferius*, hærens pariter in regione epigastrica, sed versus hypochondrium sinistrum, & anteriora magis respiciens; ad extremitatem suam, ubi intestinum duodenum incipit, plica instructum est magna, annulum crassum, lævem, carnosum referente; componitur hæc fibris muscularibus transversis, textu celluloso, & tunica ventriculi nervea, intimaque villosa, ab intestino duodeno amicitur.

Pars ventriculi media locatur maximam partem sub cartilagine ensiformi.

Superficies ventriculi sunt:

1) *Anterior*, musculos abdominales respiciens.

2) *Posterior*, vertebris lumborum obversa.

Arcus, seu curvaturæ sunt:

1) *Arcus major*, cui adhæret omentum majus, antrosum, & deorsum magis ponitur, ab orificio uno ad alterum producitur.

2)

2) *Arcus minor* hæret pariter inter ambo orificia, sed loco superiori, & posteriori, inseritur huic omentum minus.

Tunicæ sunt sequentes :

I) *Extima*, a peritonæo enata firmissima est, tunicas ventriculi reliquas ambiens; oritur ab hac ipsa utrumque omentum; fibrarum ei subjectarum carnearum ventriculi robur ab hac tunica augetur.

Altera *muscularis* dicitur, quum fibris variis muscularibus componatur. Fibræ longitudinales œsophagi ad ventriculum usque delatæ diversa ratione per eum disseminantur; excurrunt quædam per arcum ventriculi minorem ad orificium dextrum, & per hoc ipsum in ipsum duodenum, ubi sensim evanescent: distribuuntur per hunc decursum plurimæ dictarum fibrarum in facies ambas ventriculi; aliæ evanescent ex latere sinistro in sacco clauso ventriculi: aliæ a fibris circularibus œsophagi oriundæ faciunt hunc, & una cum fibris circularibus ipsius ventriculi ventriculum ipsum ad orificium usque inferius ambiunt. Aliæ demum fibræ longitudinales proficiscuntur inter arcus ambos ventriculi ad orificium illius inferius; orificium hoc ipsum constringunt, & *ligamenta orificii ventriculi inferioris* dicuntur. Inter tunicam hanc, & priorem textus cellulosus hæret.

Tertia *tunica nervea* vocatur; candicans hæc est, firma, crassa, & genuinam ventriculi fabricam constituit. Inter hanc & priorem denuo textus cellulosus intercipitur.

Sequitur tum loco intimo

Quarta, *tunica villosa* dicta; simplex hæc est, rubicunda, mucò obducta, constans villis prominentibus brevibus, amplisque plicis. Oritur, uti antea dictum fuit, ab epidermide, hinc & hujus adinstar, destructa denuo resarciri potest.

Villi

Villi sunt ipsa exigua vascula, quæ liquidum determinatum aut secernunt, aut resorbent. Inter hanc & tunicam nerveam denuo occurrit textus cellulofus, per quem, prioris adinstar, vascula exigua dispersa sunt, tunicam villosam penetrantia.

Glandulæ ventriculi simplices sunt; distribuuntur per textum cellularem tertium, & ductibus suis excretoriis tunicam villosam perforant. Copiosiores adsunt circa orificium ventriculi dextrum, quam quidem in aliis illius regionibus.

Arteriæ ventriculi oriuntur maximam partem ex arteria cœliaca: sunt vero sequentes:

1) *Superior*, seu *coronaria sinistra*, cujus ramus orificium ventriculi superius ambit; alter excurrit secundum curvaturam minorem, & conjungitur ibi loci cum art. coronaria ventriculi dextra minori, quæ ex ramo dextro art. cœliacæ exsurgit.

2) *Art. gastro-epiploica sinistra* oritur ab art. splenica, per omentum ad ventriculum proficiscitur, & ramis suis per utramque illius superficiem distribuitur.

3) *Art. coronaria dextra* oritur ab art. hepatica; per arcum ventriculi minorem sinistrorsum recurrit, & cum cognomine majori conjungitur.

4) *Art. gastroepiploica dextra* enascitur ex art. hepatica, per omentum ad ventriculum properat, & cum socia cognomine unitur.

5) *Vasa brevia* oriuntur ex art. splenica, excurrunt per arcum majorem ventriculi ad diaphragma.

6) *Art. superior orificii dextri* enascitur ex arteria hepatica.

7) *Inferiores* autem ab art. gastroepiploicis.

Venæ secundum arterias ambulant, iisdem donantur nominibus, demumque in venam portæ omnes

nes exonerantur. Notandum circa eas est, quod valvulis non donentur.

Nervi ventriculi numerosi sunt; oriuntur maximam partem a pari octavo; rami quidam proficiscuntur a nervis intercostalibus; hinc & ventriculus in universum, inprimis vero ad insertionem œsophagi maxima gaudet sensibilitate.

Vasa lymphatica distribuuntur per totum ventriculum, copiosissima vero adsunt in arcu minori: demonstravit Cl. MONROO injectionibus artificiosissimis exonerari omnia in ductum thoracicum.

Vsus ventriculi est :

Famem, partimque sitim, si corpori necessarium id sit, excitat, alimenta, & potulenta, per œsophagum in ventriculi cavum delata, excipit, & tamdiu retinet, donec tum motu visceris hujus, tum admistione variorum liquidorum, aliisque mutationibus pluribus apta reddantur, ut per orificium dextrum transire, & in intestinis chylum largiri queant; ipse demum ventriculus partem succi tenuissimi resorbet.

I N T E S T I N A .

Intestinorum sub nomine tubus venit longus ille, membranaceus, cylindricus, varie flexus, ad orificium ventriculi dextrum ab illius extremitate incipiens, in ano terminatus.

Dividuntur intestina in *tenuia*, & *crassa*.

Tenuia dirimuntur denuo

- 1) in Duodenum;
- 2) in Jejunum;
- 3) in Ileum; etsi quidem signa determinata characteristicam non subpetant, quibus bina hæcce postrema ab invicem distingui possint.

Crassa

Crassa dividuntur denuo

- 1) in cœcum;
- 2) in colon.
- 3) in rectum.

Adnectuntur omnia, excepto duodeno, ad mesenterium, de quo antea egimus.

Observata docent, longitudinem intestinorum, longitudinem corporis, ex quo desumpta fuerunt, sexies exsuperare.

INTESTINA TENVIA IN GENERE.

Fabrica intestinorum tenuium convenit fere cum fabrica ventriculi, & œsophagi; quatuor donantur tunicis, quæ eadem cum tunicis ventriculi habent cognomina.

1) *Extima* oritur, excepta solum parte intestini duodeni, a peritonæo, aut a mesenterio, & intestina exacte ambit. Mediante membrana hac eadem, & mesenterio intestina firmantur, & in situ retinentur naturali.

2) *Muscularis* est; fabrica hujus convenit cum fabrica tunicæ muscularis ventriculi, & in eo solum differt, quod fibræ longitudinales in intestinis tenuibus adsint rariores; circulares adsunt copiosissimæ, & maxima donantur irritabilitate; constant arcubus imperfectis, quorum plures circulum absolvunt. Inter tunicam hanc, & priorem adest textus cellularis, pinguedine sæpius turgens.

3) *Nervea* analogæ est nerveæ ventriculi tunicæ; constat filamentis exiguis, arcæ ad invicem fitis, quarum robur firmitatis intestinorum causa est. Vasa excipit, venientia ex textu cellulari, inter hanc & muscularem tunicam posito, eaque transmittit in tunicam intimam: inter hanc & sequentem denuo textus ponitur cellularis; tumque sequitur

4) *Tunica intima*, s. *villosa*; a villosa ventriculi hæc satis differt; constituit enim una cum textu subiecto cellulari, inprimis in intestino duodeno, & jeuno, plicas seu rugas magnas semicirculares; ac per totam superficiem internam intestinorum tenuium innumeris obsidetur villis, qui formantur a ductibus angustis ampullularum lactearum, tunicam internam penetrantibus; aperiuntur præterea in tunicam hanc intimam ductus excretorii majores, & minores plurimi glandularum mucipararum simplicium, & compositarum, quarum multæ in textu cellulari tertio duodeni, plures vero in intestino ileo hærent; simplices ab inventore glandulæ intestinorum Brunnerianæ dicuntur: liquidum suum omnes exonerant in cavum intestinorum tenuium.

Arteriæ oriuntur ab art. mesenterica superiori.

Venæ intestinorum tenuium confluunt omnes in venam portæ.

Nervi exigui, sed copiosi adsunt. Duodenum suos acquirit a plexu posteriori paris octavi. In reliqua intestina tenuia veniunt ex plexu medio nervi intercostalis.

Vsus intestinorum tenuium est. Chylum faciunt; resorbendo huic dicantur; ciborum residuum corpori factum inutile in intestina crassa propellunt.

INTESTINA TENUIA SPECIATIM EXPOSITA.

I) **I**ntestinum *duodenum* situm est in regione epigastrica dextra; nomen a longitudine, quam æquat, sortitum fuit. Enascitur ab orificio ventriculi dextro; flexum decursu transverso dextrorsum, & nonnihil postorsum ad collum usque cystidis felleæ proficiscitur; descendit hinc ex latere dextro, posteriori

reriori magis loco, a rene dextro ad laminam usque inferiorem mesocoli, inter cujus laminam superiorem, & inferiorem intercipitur; fertur hinc transversim, & sinistrorsum retro pancreas, & truncum venæ portæ, ante aortam, & venam cavam usque, retrorsum, ea tamen ratione, ut magis anteriora versus, & sursum simul adscendat. Curvaturam denuo novam facit ad vasa prius dicta sanguifera magna dextram versus; & per aperturam ibi positam specialem, ubi pars transversa mesocoli, & mesenterium intestinorum tenuium coëunt, in abdominis partem inferiorem descendit; ad ipsam vero nunc dictam aperturam nomen pristinum cum alio novo mutat, & intestinum *jejunum* dicitur. Laxum cætera hoc intestinum est, & amplum, imprimis in arcibus suis prioribus, ubi lamina peritonæi extima illud nondum cingit. Rubicundum est, & fibris muscularibus donatur crassioribus nonnihil, quam in reliquis sint intestinis tenuibus. *Arteriis* gaudet sibi propriis, quæ ab intestino, quod petunt, *duodenales* audiunt, & ab art. cœliaca enascuntur; ramus unus venit ab art. mesenterica superiori. Perforatur intestinum duodenum loco posteriori ad digitos quatuor transversos a ductu cholecho, & ductu pancreatico.

Vsus. Ingesta nonnihil remoratur, ut cum bile, & succo pancreatico exacte permisceri queant.

2) Intestinum *jejunum* a Veteribus sic dictum fuit, quum vacuum vix non semper fit, & in eo contenta, maximam partem sint liquida. Distingui intestinum hoc ab aliis dicunt colore magis rubicundo; vasis plicisque copiosioribus, glandulis paucioribus; tum & quod in regione magis umbilicali hæreat.

3) Intestinum *ileon* a præcedente, sub initium saltem, omnino non differt; etsi vero Veteres dixerint, instructum esse tunicis magis albicantibus, vasis paucio-

paucioribus, & plicis, glandulisque pluribus, hæere etiam magis circa regionem hypogastricam, & iliacam; initium tamen ejus ægre adeo determinari potest, ut *Ill. HALLERVS* optimo jure intestinum hoc & præcedens sub nomine communi *intestini tenuis* complectatur. Terminatur in regione iliaca dextra sub rene in intestinum cæcum, & parte superiori in intestinum colon.

INTESTINA CRASSA.

Priusquam *intestina* examinemus *crassa*, consideranda venit *valvula* dicta *Tulpii*, ad finem intestini ilei posita; producitur nempe ad initium intestini coli superius, & inferius tunica villosa, & nervea una cum fibris transversis muscularibus intestini ilei, & coli ea ratione, ut plica, seu valvula mobilis, mollisque ab inferioribus superiora versus, ac alia similia a superioribus in canalem intestini promineat; in medio valvulæ hæ non coeunt invicem, sed aperturam intercipiunt, rimam transversam referentem.

Vsus ejus in eo versatur, ut vi fabricæ suæ omnia ex intestino ileo exeuntia transmittat; contentis vero in crassis intestinis viam in tenuia intercludat.

Differunt crassa a tenuibus, quod

- 1) hæc postrema sint longiora;
- 2) teneriori fabrica composita;
- 3) angustiora; &
- 4) quin dissecentur, a crassis separabilia.

1) Intestinum *cæcum* enascitur infra insertionem ilei; spectari potest ceu productio intestini crassi in saccum ampliorem expansa: tres circiter, quatuorve transversos digitos longum latumque est, hæret in regione iliaca dextra, *extremitate* vero *cæca* sua incumbit alæ latæ ossis ilei: inferiori loco protuberat ex facie ejus externa processus longus, acutior, ex-

guus, varie flexus, glandulis muciparis interne obstitus, *processus vermiformis* intestini cæci dictus. Glandulæ in eo contentæ secernunt mucum, quo fœces ex intestino ileo venientes obducuntur.

2) Intestinum *colon* productio præcedentis est; amplum hoc, crassumque cernitur; fabrica etiam robustiori gaudet, quam quidem intestina tenuia.

Oritur in regione iliaca dextra, secundum renem dextrum in angulum usque hypochondrii dextri adscendit; sub hepate, & ventriculo transversim imprimis ad splenem decurrit; flectitur sæpius ibi loci in angulo profundo sub costis sinistris versus semetipsum; descendit exhinc denuo in regionem iliacam sinistram, ubi denuo curvaturam magnam facit, in pelvin progreditur, & intestinum *rectum* dicitur.

Connectitur ligamentis specialibus cum utroque rene, hepate, & splene.

Fabrica hujus cum fabrica intestinorum tenuium in genere convenit. Differt tamen

1) quod fibræ musculares longitudinales omnes in tres fasciculos unitæ sint, qui a processu oriuntur vermiformi, & ad finem usque coli excurrunt, ubi in duos tantum contrahuntur, quum duo minores in unicum majorem abeant; disperguntur fasciculi dicti per totum intestinum rectum. Fasciculorum horum maximus nudus hæret, alter a mesenterio, tertius a mesocolo amicitur.

2) Quod plicis majoribus, & amplioribus donetur, fœces nonnihil remorantibus, regressum inpedientibus.

3) Tunicam internam esse teneriorem, villis carentem, sed rugis, porisque multis præditam.

4) Adesse in eo glandulas plures simplices, mucum suum per dictos poros in intestini cavum evacuant.

3) Intestinum *rectum* oritur ab intestino colo ad vertebram lumborum ultimam; deorsum nonnihil sub exortum suum, tum vero & antrorsum flectitur, ac in cute terminatur orificio *anus* dicto. Intestinum hoc latum, planum, crassorum amplissimum, & pinguedine plurima obductum est. Incumbit faciei internæ ossis sacri, & coccygis, & connectitur tum his, tum & in viris, vesicæ urinariæ, glandulæ prostatæ, & vesiculis feminalibus, in feminis autem utero, & vaginæ uteri.

Fabrica hujus a reliquorum intestinorum fabrica in eo differt, quod

1) peritonæo antè solum cingatur.

2) Fibræ musculares, imprimis longiores robustiores multo esse, & intestinum ex integro amicare; fibras circulares, ad finem suum constituere musculum sphincterem internum, quem una cum musculis aliis huc pertinentibus in MYOLOGIA exposuimus.

3) Instructam esse tunicam internam poris multis, plicisque retiformibus, teneris, & lacunis specialibus, in quas ductus excretorii glandularum magnarum mucipararum hiant.

Peripheria ani cingitur imprimis glandulis sebaceis, smegma secernentibus, ne anus a fœcibus duris, acribusque excorietur, præcavens.

Arteriæ crassorum intestinorum sunt art. mesenterica superior, colica media, & mesenterica inferior. Proficiscuntur & in rectum intestinum rami varii ab hæmorrhoidali media, arteriæ iliacæ postremæ propagine, enati.

Venæ terminantur in venam gastrocolicam, vel in hæmorrhoidalem internam, ex hac vero in venam portæ: confluunt quædam in hæmorrhoidalem mediam, & externam, ac in truncos venarum ischiaticarum.

Vasa lymphatica intestini coli, & recti feruntur in vasa lymphatica lumborum.

Nervi crassorum intestinorum oriuntur a plexu colico sinistro, qui a pari octavo repetendus est; veniunt & alii ab intercostalibus infimis, aliique a nervis sacralibus.



V A S A L A C T E A.
R E C E P T A C V L V M C H Y L I.
D U C T V S T H O R A C I C V S.

Hæc omnia videantur in DOCTRINA DE VASIS LYMPHATICIS.

HEPAR ET CYSTIS FELLEA.

Hepar viscus est profunde rubrum, magnum, ponderosum, hærens immediate sub diaphragmate in hypochondrio dextro, parte angustiori regionem epigastricam etiam occupans.

In hominibus dividitur hepar in binos lobos, quorum dexter major, sinister minor est; dirimuntur lobi in uno latere ligamento lato, in altero fossa. Inter ambos hæret *lobulus tertius Spigelii* dictus.

In hepate notentur:

I. *Ligamenta quatuor*, quæ omnia oriuntur a peritonæo.

1) *Ligamentum laterale dextrum* connectit lobum crassiolem dextrum cum parte postica diaphragmatis.

2) *Lig. lat. sinistrum* connectit faciem convexam, & marginem lobi sinistri cum diaphragmate, & in quibusdam subjectis, quorum hepar maximum est, cum œsophago, & splene.

3) *Lig. hepatis latum suspensorium, sive medium* proficiscitur a diaphragmate in faciem convexam; lobum hepatis dextrum a sinistro separat, dum a superiori parte per fissuram magnam hepatis in faciem usque concavam illius descendit, distribuitur tum supra totum hepar.

4) *Lig. hepatis rotundum* in adultis absolvitur vena umbilicali in ligamentum concreta.

Referunt nonnulli Auctores huc sub nomine *ligamenti coronarii hepatis* tunicam hepatis externam.

II. *Facies duæ*, quarum,

Superior convexa, & lævis,

Inferior concava, & foveis, impressionibusque multis donata est, quæ tum viscera vicina, tum & vasa in hepar decurrentia excipiunt.

III. *Margines* bini, quorum

posterior superior obtusus,

anterior inferior acutus est.

IV. *Tubercula* duo ad ingressum venæ portæ.

V. *Fissura* in facie hepatis concava.

VI. *Sinus* pro situ cystidis felleæ.

Vasa hepatis sunt hæmatophora, cholephora, lymphatica, & nervi.

Vasa hæmatophora sunt:

1) *Art. hepatica* orta a cœliaca, inserta faciei concavæ hepatis. Largitur etiam cystidi felleæ suam arteriam. Sanguinem pro nutritione harum partium adfert.

2) *Vena umbilicalis*, in foetu sanguinem ex matre in illius hepar ducens, hæret in sinu hepatis, ramus ejus unus, *canalis venosus* dictus, inseritur in venam cavam, reliqui in venam portæ.

In adultis canalis hic concretus ex integro est.

3) *Vena portæ* truncus magnus est enatus ex venis intestinorum tenuium, & crassorum, ventriculi, splenis, omenti, & pancreatis, constans tunicis robustis, & crassis, ex latere dextro in cavitatem lobi minoris insertus, tum vero in ramos duos divisus, quorum dexter amplior in lobum magnum, seu dextrum, sinister minor in lobum sinistrum, & lobulum Spigelii proficiscitur.

Vbi vena portæ in hepar recipitur, tunicam robustam acquirit, quæ textu cellulari, ex vasculis multis exiguis, & nervis hepaticis constante absolvitur, venam portæ per totum hepar comitatur, & *vagina Glissonii* dicitur. Ramus venæ portæ quivis finditur in multos alios, denuo in minores furculos dividendos, bili secernendæ dicatos.

4) *Vena cava* per lobulum Spigelii ad foramen tendineum diaphragmatis postrosum adscendit. Excipit per hunc decursum venas ab ramis extremis venæ portæ, & arteriæ hepaticæ oriundas, sanguinem hinc ex hepate ad cor deducit.

Vasa lymphatica numerosa sunt; oriuntur undique per faciem convexam & concavam hepatis sub hujus membrana extima, liquidum suum in ductum thoracicum evomunt.

Ductus cholephori oriuntur per totum ambitum, & intimam hepatis substantiam ex finibus extremis venæ portæ, confluunt deinde in majores ramos, ex his in binos truncos, hi vero in sinu hepatico ad lobum minorem coeunt in truncum unicum, *ductus hepaticus* dictum; jungitur hic mox cum ductu alio, ab ortu suo *ductus cysticus* vocato; juncti hi bini ductus communi nomine *ductus choledochi* donantur. Ductus choledochus versus pancreas retro intestinum duodenum descendit, & ad pollices circiter sex infra orificium ventriculi inferius duodeno inplantatur; spatium quoddam inter intestini tunicas emensus conjungitur inter tunicam secundam, & tertiam hujus ejusdem intestini cum ductu pancreatico; demum vero confusis invicem bilis, & pancreaticæ lymphæ humoribus, in cavum intestini duodeni hiat.

Nervi hepatis sat copiosi sunt; oriuntur a nervo intercostali magno, & a pari octavo; proficiscuntur una cum arteria hepatica, & vena portæ in hepar.

Fabrica hepatis interna nota satis nondum est; momenta tamen sat gravia vascularem, non vero glandularem eam esse evincere videntur.

Vsus hepatis potissimus est, ut bilem, concoquendis cibis necessariam secernat, eamque tum immediate in duodenum excernat, tum in cystidem felleam deferat.

Videtur præterea, quod hepatis beneficio in fœtu, ubi bilis nullus adhucdum usus, hepar tamen maximum est, in petus sanguinis ex placenta, vasisque cunctis abdominalibus hic confluentis minuatur.

CYSTIS FELLEA receptaculum est membranaceum, adnexum sinui lobi dextri hepatis transversim a posteriori parte anteriorem versus ea ratione, ut extremitas obtusa, hemisphærica, *fundus* dicta, antè in margine hepatis præmineat, & intestino collo incumbat, pars angustior, seu *collum* posteriora respiciat; collum hoc sub initium versus semetipsum retorquetur, tum adscendit, & in ductum terminatur cysticum, qui, uti antea diximus, cum ductu hepatico conjunctus ductum choledochum constituit.

Ductus cysticus interne plicis multis magnis, cystis ipsa plurimis exiguis instruitur.

Magnitudo cystidis felleæ in diversis hominibus diversa est. In subjecto mediocriter magno, statuque naturali duas tresve uncias bilis continet.

Figura pyrum fere refert.

Tunicæ ejus sunt:

1) *Extima* venit ab hepatis involucre extimo, hinc a peritonæo, cystidem totam obducit. Sub hac textus hæret cellulosus, pinguedine sæpe turgens. Excurrunt per hunc vasa lymphatica, multa que sanguifera.

2)

2) *Muscularis* componitur fibris non rubentibus, sed candicantibus potius, & albis, quæ ipsam cystidem secundum totam fere longitudinem emetiuntur, ac invicem oblique decussantur. Sub tunica hac eadem textus denuo cellulofus hæret, in quo arteriæ elegans rete constituunt.

3) *Nervea*, nerveæ intestinorum simillima est, excipit hanc ordine textus cellularis tertius.

4) *Villosa*, ejusdem cum villosa intestinorum fabricæ; ea solum intercedente diversitate, quod uti in ductibus biliariis cellulas, & reticula formet, ac rugas exiguas producat, versus collum cystidis secundum hujus longitudinem excurrentes.

In medio cystidis, & circa collum illius glandulæ exiguæ adsunt, quæ in ejus cavum mucum rubicundum secernunt.

In animantibus ductus speciales adsunt, ex hepate in vesiculam fellis tendentes; in homine evicti certo nunquam fuerunt.

Vasa, & *nervi* cystidis felleæ ex hepate veniunt.

Vsus. Bilem ex ductu hepatico per ductum cysticum adlatam tamdiu remoratur, donec dissipetur bilis pars fluidissima, reliqua amarior, acrior, spissiorque facta sit: hæc vero tum pressione intestini duodeni, & ventriculi, qui, dum repletus est, in cystidem fellis immediate agit, vel & causis aliis per eandem viam, per quam bilis fluidior intraverat, deducitur denuo in ductum cysticum, exhinc vero per ductum choledochum in intestinum duodenum.

Bilis ipsa inservit miscendis exacte digestis cibis; conficiendo chylo, motui intestinorum peristaltico conservando.

S P L E N.

Splen viscus est spongiosum, ex rubro cærulescens; forma, situ, magnitudine varium valde, ut adeo hæc determinari ægre queant. Hæret tamen in homine sano ex sinistro semper latere in hypochondrio sinistro, infra costam undecimam & duodecimam spuriam. Ambitus ex rotundo oblongus est, ovalem referens figuram. Vacuo ventriculo in genere loquendo major est; minor vero, dum a repleto comprimitur, & evacuatur.

Notandum in specie circa viscus hoc est, convexum id esse versus costas, concavum ex latere interno, donari ibidem excavatione, cui vasa inseruntur.

Conjungitur cum partibus sequentibus:

- 1) Cum ventriculo per vasa brevia, & ligamentum.
- 2) Cum omento, & rene sinistro.
- 3) Cum diaphragmate per partem peritonæi.
- 4) Cum initio pancreatis per vasa.
- 5) Cum intestino colo per ligamentum.

Lien in homine membrana donatur unica, simplici, firma, ope textus cellulosi firmissime eidem adnata, a peritonæo oriunda.

Vasa splenis sunt:

Arteria splenica a cœliaca oriunda, & ratione ad molem splenis habita, major multo, quam ad hujus nutritionem foret requisitum. Fertur a decursu suo reptatibus serpentinis supra pancreas, & retro ventriculum; emissis in vicinas partes ramis inseritur faciei antea dictæ concavæ splenis. Finditur dein in ramos minores, qui in alios de novo dirimuntur adhuc exiliores, sanguinemque suum illico venis tradunt, quin eum aliorum emittant. Confluunt *venæ* tandem in unicam, quæ *vena splenica* dicitur, & recepta, præter

præter venas alias, vena coronaria magna ventriculi ramum principem finistrum venæ portæ constituit.

Nervi splenis exigui sunt, arterias ramis suis ambiunt, & oriuntur ex plexu speciali, qui a ramis posterioribus paris octavi, nervique intercostalis magni conficitur.

Vasa lymphatica in homine per superficiem fere solam splenis errantia conspiciuntur.

Vsus splenis pro certo adsignatus nondum fuit; videtur tamen, si ad fabricam ejus respiciamus, & situm, in eo potissimum consistere, ut sanguinem per quoddam temporis spatium remoretur, calore adaucto solvat, hinc vero fluidiorem reddat.

P A N C R E A S.

Pancreas glandularum salivalium omnium maxima est. Latitudine digitos transversos duos, longitudine unum exæquat.

Sita est glandula hæc in regione epigastrica retro ventriculum, & ante glandulam suprarenalem sinistram, ac aortam in spatio triangulari intestini duodeni.

Color ex albo rubet.

Longitudo octo, novemve pollicum est.

Figura linguam caninam refert; pars latior duodenum, acuminata lienem spectat. Oritur ab excisura profunda splenis, transversim fere, & dextrorsum ad intestinum protenditur dodecadactylon, cui ductus excretorius pancreaticus inplantatur.

Dividitur

1) In *extremitatem acutam*, ex latere sinistro lienis obversam, & *latam*, ex latere dextro duodeno adnexam;

2) In *faciem superiorem*, & *inferiorem*;

3) In

3) In *marginem anticum*, & *posticum*; in *posteriori ductus* locatur *excretorius*.

Componitur, glandularum salivalium omnium adinstar, glandulis plurimis exiguis simplicibus, textu celluloso invicem nexis, liquidum secretum in ductum communem evacuantibus. Ductus hic albidus, tenerque est, enatus a pancreatis extremitate acuminata, per medium glandulæ excurrens, intra duodeni tunicas cum ductu choledocho unitus, & in cavum nunc dicti intestini demum apertus.

Connectitur cum ventriculo, & splene ope membranarum, cum duodeno ope ductus pancreatici.

Arteriæ oriuntur ab art. duodenali, & mesenterica, tum & ab art. pylorica, e. s. p.

Venæ terminantur in venas duodenales, mesentericas, splenicæ, e. s. p.

Nervi exigui sunt; oriuntur a plexu postico gastrico, & a plexu hepatico, & splenico.

Vsus pancreatis. Liquidum salivæ analogum secer nit, ac per ductum suum excretorium in duodenum exonerat.

Vsus lymphæ pancreaticæ. Bilem ex cystide fellea reduce m diluit, acrimoniam ejus minuit, eamque cum ingestis miscet.

Prope pancreas glandula conspicitur adhuc alia minor, pancreati forma, & fabrica similis, ductu suo excretorio proprio in ductum pancreaticum patula. *Pancreas parvum dicitur*.

Sita est loco inferiori, & anteriori, ubi ductus pancreaticus intestino duodeno inplantatur.

GLANDVLÆ SVPRARENALES, RENES,
VRETERES, VESICA VRINARIA.

GLANDVLÆ SVPRARENALES corpora duo sunt cava, quoad fabricam glandulis analogæ, quorum ex utroque latere unum reni incumbit. Tunica cinguntur duplici, & cavum internum succo ex rubro fuscescente repletur. Figura fere triangularis est; magnitudo in fœtu ipsum renem superat; in adultis renibus minores sunt. Dextra hepatis, sinistra lieni, & pancreati, ambæ diaphragmati, & renibus adfiguntur.

Arteriis gaudent, *venis*, *vasis lymphaticis*, & *nervis*.

Arteriæ oriuntur ex arteriis diaphragmatis, ex aorta, & ex arteriis renalibus.

Vena dextræ glandulæ suprarenalis evacuatur in venam cavam, sinistræ in venam renalem.

Vasa lymphatica feruntur in ductum thoracicum.

Nervi iis cum renibus communes sunt.

Ductu excretorio instructæ sunt nullo; *usus* hætenus omnino latet.

RENES viscera bina sunt pallide rubra, & firma, fabam, aut phaseolum figura referentia; hærent extra peritonæum in regione lumbari ex utroque latere rachidis; musculo psoæ magno, quadrato lumborum, & transverso abdominis incumbunt ea ratione, ut ren dexter sub hepate, intestino colo, profundius nonnihil, magisque posteriora versus; ren sinister sub splene, ventriculo, pancreate, & colo elatius, & antrosum magis locetur.

Longitudo quinque circiter aut sex, *latitudo* quatuor pollices æquat.

In renibus notentur:

Superficies duæ;

anterior, cavum abdominis, &
posterior, rachidem spectans.

Margines duo, quorum

exterior convexus,
interior concavus, inæqualis, excissura donatus, cui vasa renalia inplantantur.

Extremitates binæ, cujus

superior crassa,
inferior longa, planâ, tenuisque est.

Ren dexter connectitur ope peritonæi cum hepate, intestino colo, diaphragmate, & splene; ambo vero cum glandulis suprarenalibus; & ope ureterum cum vesica urinaria.

Vasa renum sunt:

Arteriæ renales magnæ sunt, oriuntur ex aorta.

Venæ evacuantur in venam cavam magnam.

Vasa lymphatica terminantur in ductum thoracicum.

Ductus excretorius, quem sub nomine *ureteris* illico describam.

Nervi veniunt ex ganglio semilunari paris octavi, & nervo intercostali.

Fabrica renum triplex est, & componitur

1) *Externe* carne rubicunda, molli, *substantiâ corticalis* dicta; cortex hic vasculis constat numerosissimis exiguis.

2) *Glandulis* multis parvis, quæ arteriis gaudent, venis, vasisque lymphaticis:

3) *Substantia papillosa*, papillis decem, vel duodecim constante, ex quibus canales subtiles membranacei oriuntur, in cavum commune infundibuliforme terminandi, quod *pelvim renum* dicunt. Papillarum harum quævis amicitur membrana, quam *calicem* vocant.

Ab extrinſeco renes circumdantur tunica ro-
buſta, firma, arcte illis adcreta, non tamen a peri-
tonæo oriunda. Tunica hæc eadem cum peritonæo
per textum cellularem, pinguedine ſemper repletum,
connectitur.

Vſus renum. Lotium ex ſanguine ſecernunt,
in ureteres deducunt.

URETERES canales duo membranacei ſunt, quo-
rum quivis ex pelvi ſui renis oritur, peritonæo ob-
tectus ſupra pſoam magnum, & vaſa magna cruralia
in pelvin deſcendit, ibi loci veſicam urinariam latera-
liter in parte poſtica, & inferiori collum verſus, oblique
valde perforat, ut per ſpatium aliquod inter tunicas
veſicæ excurrat, antequam in hujus cavum hiet.

Amplitudo ureterum conſtans non eſt, ſub initi-
um, & finem plerumque dilatati ſunt. *Longitudo*
ſpithamam circiter æquat; decurrunt ad figuram lit-
teræ latinæ S. flexi.

Componuntur *tunicis* variis, quarum
primam, & extimam facit textus cellulofus,
ſecundam membrana tenuiſſima cellularis,
tertiam membrana alba, firma, nervea,
quarta, & intima perforatur a ductibus ex-
cretoriis glandularum mucipararum inter tunicas diſ-
tributarum, hinc & muco multo nunquam non ob-
ducta eſt.

Nervi, & vaſa iis adveniunt a vicinis partibus.

Vſus. Lotium in renibus ſecretum deferunt in
veſicam urinariam.

VESICA VRINARIA ſaccus eſt membranaceus
ex oblongo rotundus, hærens in parte anteriori ca-
vitatſ pelveos extra peritonæum; textu plurimo cel-
lulari offibus pubis adfixus.

Sita eſt in viris inter oſſa pubis, & inteſtinum
rectum; in feminis inter oſſa dicta, & uterum

In vesica urinaria notentur :

Pars superior, amplior, *fundus*, & *inferior*, angustior *collum* vesicæ dicta.

Superficies antica, lævior ;

- - *postica*, magis convexa,

- - *duæ laterales*.

Conjungitur textu celluloso in viris cum intestino recto, in feminis cum utero; in utrisque adhæret ope ejusdem textus, & fibrarum muscularium ossibus pubis; fundus vero peritonæo, & per urachum vincitur ad umbilicum.

Collum terminatur anteriori orificio angusto in canalem ampliorem, *urethra* dictum.

VRETHRA componitur

1) Membrana, quæ productio est epidermidis.

2) Tunica firma nervea.

3) Vtrisque interjacet textus rarior cellulofus, qui *corpus spongiosum urethræ* dicitur, & una cum membrana prima glandem constituit.

Notandum venit, urethram loco posteriori ad ortum suum angustiozem esse una fere vice quam per decursum sit. Ad ortum suum circumdatur a prostata; dein vero ad exiguam ab hac distantiam ambit eam undique *bulbus* sic dictus *urethræ*; superius & ex latere ponuntur corpora spongiosa *urethræ*; ipsa autem urethra hæret inter bina hæcce corpora, & anteriori loco glandem penis perforat. *Musculos urethræ* in MYOLOGIA vidimus.

Cohæret collum vesicæ cum angulo ossium pubis ope ligamenti, & ope urethræ cum pene; ureteres eam cum renibus nectunt.

Componitur *tunicis* sequentibus :

1) Tunica *cellulosa*, cuius ope nectitur cum vicinis partibus.

2)

2) *Tunica musculari*, constante magna copia fibrarum sibi intertextarum irritabilium: Oriuntur præcipuæ antè ab ossibus pubis, ad fundum vesicæ adscendunt, eumque superascendunt, ac per faciem vesicæ posticam ad prostatam denuo deorsum migrant.

Agentibus itaque nunc dictis fibris, vesica necessario deorsum premi debet, hinc vero lotium ad partem infimam, seu collum vesicæ urgeri: fibræ musculares reliquæ oriuntur a prostata, & decursu tum obliquo, tum transverso vesicam emetiuntur.

3) *Tunica nervea* in vesica inprimis sensilis, cætera vero nerveæ ventriculi similis est. Inter hanc & priorem textus hæret cellulofus tenuissimus.

4) *Tunica intima* ab epidermide corporis enata, & hujus adinstar post destructionem denuo resarcienda cum nervea exacte cohæret, & plicas format varias. Mucosæ semper obducta est, per ductus excretorios glandularum tunicam hanc penetrantes secreto.

Peritonæum vesicam non ex integro ambit, sed fundum ejus solum tegit; posteriori autem loco ad ingressum fere usque vterum eam vestit, ubi ab vesica denuo abscedit, ac ad intestinum rectum, vel in feminis ad uterum ambulat.

Arteriæ vesicæ oriuntur ab iliaticis, & umbilicibus.

Venæ rami sunt venarum, quæ cum arteriis iisdem donantur nominibus, ac in venam cavam magnam terminantur.

Vasa lymphatica deteguntur in primo statim textu cellulari.

Nervi oriuntur a pari tertio, quarto, & quinto nervorum sacralium, quidam veniunt & a plexu hypogastrico, qui a nervo formatur intercostali.

Vsus vesicæ. Lotium ex renibus per ureteres adlatum excipit, per quoddam temporis spatium retinet, per urethram ex corpore demum eliminat.

VIRORVM GENITALIA.

Genitalia virorum sunt :

- 1) Testes, cum scroto.
- 2) Vesiculæ spermaticæ.
- 3) Penis; seu membrum virile.

1) TESTES corpora duo parva, ovali figura donata sunt, quæ in adultis lege naturali extra cavum abdominis, sub pene, sacco proprio, *scrotum* dicto, inclusa hærent: in fœtu vero, & subin etiam in adultis non in scroto, sed in ipso cavo abdominali latent; descendunt tamen sensim in inguina, hinc in scrotum :

Involucra testium sunt

1) *Scrotum*; componitur hoc epidermide, cute, pilis multis obsita, & textu celluloso crasso vasis sanguiferis instructo, cuti arcte adnato, testem quemvis seorsim ambiente, ac etsi fibras musculares nullas omnino habeat, *tunica* tamen *muscularis*, seu *Dartos* dicto. Quum *Dartos* testem quemvis seorsim ambiat, scrotum dirimitur in cava duo ovalia, quæ inferius, ubi invicem coëunt, eminentiam formant asperam, *raphe scroti* dictam.

2) Testem quemvis undique obducit musculus *Cremaster*, e fibris musc. obliqui interni abdominis maximam partem enatus.

Vsus ejus est, ut testem comprimat, elevet; evacuet.

3) *Tunica vaginalis* componitur textu celluloso, flatu adacto facile distendendo, a peritonæo oriundo. Testem laxè ambit, & triplex est.

Extima

Extima amicit tum vasa spermatica, tum ipsum testem conjunctim; absolvitur textu externo cellulari peritonæi.

Secunda vas quodvis spermaticum separatim vestit.

Tertia testem quemvis seorsum involvit.

Enascitur hæc ab ipso peritonæo, & vasa obducit spermatica; arcte vero adeo illis adnata est supra initium testium, ut, in statu naturali, ne quidem flatu adactus aër in testem penetrare queat; amplius dein præbet involucrum, & laxè testi adhæret.

Tunica albuginea, seu tegmen testium intimum, fortis est, albens, densa, testem immediate cingens.

Notanda insuper circa testes sunt:

1) *Extremitates binæ*, quarum ea, quæ sursum, & nonnihil extrorsum tendit, acuminata, inferior autem obtusior est.

2) *Margines duo, anterior, & posterior* cui infidet epididymis.

Vasa testium sunt:

1) *Art. spermatica*; ex utroque latere una, ex aorta supra, vel infra art. renales, interdum & ex ipsa art. renali enascitur; exteriora versus ante m. psoam magnum ad annulum abdominalem usque descendit, unitur ibi loci cum vena spermatica, cum ductu spermatico, textuque multo celluloso in funiculum teretem, funiculus spermaticus dictum, per annulum abdominalem inguina ingreditur, & in scrotum ad testes ipsos descendit.

Arteriæ ad tunicas testium extimas decurrentes oriuntur ab art. cœliaca, ad scrotum feruntur rami ex art. crurali, & pudendis externis enati.

2) *Venæ spermaticæ*: *dextra* sanguinem suum in venam cavam, *sinistra* in unam vel ambas renales effundunt: enascuntur ramis multis tenuibus ex ipsis testibus,

testibus, & confluunt in truncos serpentino more flexos, qui in abdomen usque illas comitantur, & plexum ibi formant, sub nomine *corporis pampiniformis* notum, art. spermaticam amicientem.

Venæ integumentorum externorum testium eadem cum arteriis gerunt nomina, sanguinem suum tradunt venæ saphenæ, & crurali.

3) *Vasa lymphatica* tam in testibus, quam in funiculo adsunt spermatico.

4) *Nervi testium* copiosi adsunt, in testis intimam substantiam penetrantes; oriuntur autem a plexu renali; adveniunt iis & furculi a trunco nervi intercostalis, a plexu magno mesenterico, a nervis lumbaribus, & a plexu mesocoli; uniuntur hi omnes cum funiculo spermatio, & una cum hoc eodem ad ipsum proficiscuntur testem. *Nervi scroti, & m. cremasteris* oriuntur a nervo lumbari secundo, tertio, & quarto.

Fabrica testium. Componuntur testes canaliculis exiguis serpentino more flexis, ex art. spermatica ortis, & in glomeres exiguos convolutis, qui septis cellulosis ab invicem discriminantur. In quovis septo adest ductus excipiens semen ex canaliculis spermaticis; ductus nunc dicti omnes rete simul constituunt, tunicæ testium albugineæ adnatum; ex reti hoc eodem exsurgunt vasa viginti, vel & plura, quæ omnia varie contorta, revoluta ad marginem testium posticum adscendunt, ibique in facie testium externa cœunt in ductum communem unicum; ductus hic in margine testium posteriori denuo varia ratione complicatur, ac in gyros torquetur serpentinis; qui omnes tunica albuginea cincti corpus illud generant, quod *epididymidem* recepto in arte termino adpellant. Notandum in epididymide superius est caput crassum, convexum; inferius adest extremitas complanata magis, ac tenuior; his binis extremitatibus adhæret testi;

sti; pars media hæret libera, & saccum format, cui adfigitur vaginalis testium tunica.

Ductus hic, ex quo epididymis conflatur, sensim latefcit, in rariores flectitur gyros, tunica vaginali obvolutus una cum vasis spermaticis sub nomine *vasis deferentis* in inguinibus ad annulum usque ascendit abdominalem, hunc eundem transit, extra peritonæum in pelvi usque ad collum vesicæ urinariæ descendit, ubi quivis ex suo latere in vesiculas ibi loci positas spermaticas inseritur.

Funiculus spermaticus componitur ex vase deferente, arteria, venaque spermatica, vasis lymphaticis, nervis, & tunica vaginali cremasterem ambiente.

Vesicula spermatica receptacula duo exigua, candidantia sunt, parti vesicæ urinariæ infimæ adhærentia, tum intestino recto, tum glandulæ prostaticæ incumbentia; ab exterioribus interiora versus oblique decurrunt ea ratione, ut extremitates superiores, crassioresque latius ab invicem remotæ, inferiores, ac tenuiores mutuo unitæ sint.

Fabricam quod attinet, intestinum referunt diversa ratione contortum, implicatum; tunica extima crassa, & spongiosa, interior rugosa, villisque subtilissimis instructa est.

Vesicula spermatica quævis ductu plerumque excretorio unico instruitur, a glandula prostatica obrecto, urethræ initium ex inferiori latere perforante: ad ostium horum ductuum in urethram hians eminentia in hominibus conspicitur parva, oblongata; tunica urethræ interior hanc generat; posteriori parte latior est, anteriori terminatur in extremitatem *rostriformem*, unde & *capitis gallinaginis* nomine donata fuit.

Vasa sanguifera, & *nervi* a vicinis oriuntur partibus.

Vasa lymphatica glandularum feminalium evacuantur in glandulas lymphaticas, circa lumbos hærentes.

Vsus testium. Sperma ex sanguine secernunt.

Vsus vasis deferentis. Semen testium ope secretum conservat; in vesiculas spermaticas deducit.

Vsus vesicularum spermaticarum. Semen servant, partim in massam sanguinis universalem resorbent, tempore congruo in urethram expellunt.

MEMBRVM VIRILE, s. PENIS vocatur corpus cylindroideum, extra pubis regionem scroto incumbens; facies superior compressa parum *dorsum penis* dicitur.

Longitudo penis in adultis sex plerumque pollices æquat; crassities diversam servat molis legem.

Dividitur

in *radicem*,

in *corpus*, &

in *caput*, quod *glans penis* audit.

Constat urethra, & corporibus binis cavernosis penis, quæ omnia integumentis obvolvuntur corporis communibus.

Urethra canalis est membranaceus, ex collo vesicæ urinariæ, inferius per medium corporum cavernosorum utrinque positorum ad extremitatem usque penis excurrentis, ibique loci in parte glandis anteriori orificio longitudinali terminatus.

Figura in genere spectata cylindrica est, tribus tamen manifestioribus gaudet dilatationibus; prima conspicitur in glandula prostrata, prope caput gallinaginis; altera in bulbo; tertia sub initium glandis.

Componitur tunicis duabus, quarum extima productio est nervæ tunicæ vesicæ urinariæ; intima lævissima oritur ab epidermide, ductibus hinc inde
perfo-

perforatur excretoriis multis glandularum mucipararum.

Inter tunicas has ambas textus locatur cellularis, qui ab irruente sanguine, & aëre adaçto intumescere, rigere aptus natus est, & *corpus cavernosum urethræ* dicitur. Corpus hoc cavernosum oritur illico, sub glandula prostrata secundum inferiorem primum, dein & lateralem, ac superiorem urethræ partem, hanc eandem per totum comitatur penem. Posteriori loco ad exortum suum dilatatione longitudinali, *bulbus urethræ* dicta, donatur.

Illico retro bulbum urethræ adest protuberantia longitudinalis, quam antea *caput gallinaginis* diximus; obtegit hæc orificia bina spermaticarum vesicularum; circa eam posita sunt orificia decem, aut duodecim, exorientia ab excretoriis ductibus glandulæ prostratæ. Anterius ad penis finem corpus urethræ spongiosum tunicis suis duabus obvolutum exteriora versus, ac retrorsum flectitur; hac vero ratione format

Glandem penis; compositam epidermide, corpore spongioso, & urethræ tunica interna, quæ externam nunc format glandis tunicam, & hic loci copiosissimis gaudet nervis.

Figura conum refert obtusum, cujus apex anteriori loco urethræ perforatur orificio; basis nonnihil excavata postrosum hæret, ut recipiat corpora spongiosa penis; ab exteriori parte margine donatur rotundo, prominenti, qui *corona glandis* dicitur. Pars angustior, minusque lata sub corona posita *collum* vocatur *glandis*, cingitur hoc glandulis multis, liquidum mucosum secernentibus.

Corpora bina spongiosa urethræ enascuntur utrinque loco interiori a prominentia ossis ischii, & parte ossis pubis cum osse ischii cohærente, ubi tunica

cellulari densa, firmaque adnectitur. Exhinc introrsum, simulque antrorsum ad urethram feruntur, hanc eandem illico ante bulbum ambiunt, eique ope textus cellularis adhærent, sic unita antrorsum tendunt, & apice obtuso in glande terminantur.

Quum cylindros binos referant arcte sibi mutuo adhærentes, loco inferiori per totam suam longitudinem in medio sulcum intercipiunt, cui urethra incumbit, minorem etiam sulcum loco superiori, in quo, vasa decurrunt.

Fabrica interior componitur textu spongioso cellulari, qui ab influxu sanguinis intumescere, ab aëre flatu adactò distendi valet. Secundum longitudinem uniuntur invicem septo membranaceo, hinc inde, potissimum vero anteriora versus orificiis instructo, per quæ liber transitus ex corpore spongioso dextro in sinistrum patet.

Ab exteriori parte tunica tendinea amiciuntur. Gaudent præterea posteriori parte ligamento firmissimo, a symphisi ossium pubis enato, & penis dorso, ubi corpora dicta invicem jungi incipiunt, inplantato. Anteriora versus ligamentum hoc ipsum evanescit in textum cellularem subtilem, corpora cavernosa obvolventem. Externe teguntur cute, & epidermide, quæ, dum antè glandem transcendunt, versus semetipsas retrorsum, & introrsum revolvuntur. Cutis hæc revolutio, in cujus medio textus cellularis hæret, *Præputium* dicitur, & supra glandem retrahi potest. Inferius præputium ope ligamenti duplicis triangularis textui celluloso penis ad orificium usque urethræ adnectitur; ligamentum hoc, uti notum est, *ligamentum præputii* vocatur.

Glandulæ penis sunt :

Prostrata glandula densa, firmaque est, hærens inter collum vesicæ urinariæ, & urethræ bulbum, urethram

urethram non solum inferiori, sed & laterali, superiorique parte exacte ambit. Figura cordiformis est, posterius crassior, latior, anterieus tenuior, angustior.

Fabrica interna singularis est, nec satis adhuc evicta: ductibus gaudet decem, vel duodecim excretoriis, circa gallinaginis caput apertis, & in urethram succum albicantem, spissum, subviscidum evacuantibus. Externe tunica cingitur cellulari, cui fibræ plures musculares vesicæ urinariæ adhærescunt.

Glandulæ cooperianæ glandulæ sunt duæ exiguæ, hemisphæricæ, compositæ, quarum ex utroque latere urethræ extra corpus spongiosum, & musc. acceleratores inter bulbum, & prostatam hæret una. Ductu quævis gaudet excretorio, per quem liquidum mucosum in faciem urethræ internam pro hujus defensione excernitur. Glandulæ reliquæ, quas Auctores nonnulli hic enumerare solent, incertæ fidei sunt.

Vasa penis sunt:

Art. pudenda communis, seu *hæmorrhoidalis inferior* enascitur ab art. iliaca; dirimitur in binos ramos, quorum interior ad bulbum urethræ, & prostatam fertur; exterior finditur denuo in binos ramos, quorum unus excurrit per medium corporis totius cavernosi; alter proserpit per dorsum penis, terminandus furculis suis exiguis in corpora cavernosa, & cutim.

Veniunt præterea in cutim penis ramî alii ab art. cœliaca, & femorali enati.

Venæ pari in genere passu ambulant cum arteriis, evacuantur sæpius in venam iliacam; maxima illarum penis dorso incumbens, *vena penis* dicta, supra prostatam in venam hæmorrhoidalem, hæc in cavam demum terminatur.

Vasa lymphatica hærent sub cute, feruntur in glandulas inguinales.

Nervi

Nervi oriuntur ex nervo crurali magno, & sacrali postremo. Proficiscuntur præterea in urethram furculi nonnulli a plexu infimo mesenterico enati.

Musculos penis in MYOLOGIA vidimus.

VSVS *urethrae*; lotium, & in adultis sperma, una cum succo prostratae ex corpore eliminat; *corporum cavernosorum*; penem, & urethram expandunt, rigescere faciunt.

MVLIERVVM GENITALIA.

Genitalia mulierum dirimuntur in *externa*, & *interna*.

Ad *externa* referuntur:

- 1) *Labia pudendorum majora*.
- 2) *Clitoris*.
- 3) *Labia minora*, s. *Nymphae*.
- 4) *Orificium urethrae*.
- 5) *Orificium vaginae uteri*.

1) *Labia pudendorum majora* labia, seu lobi duo molles sunt, enati a symphisi ossium pubis, terminati in perinaeum. Supra exortum eorum regio cernitur prominens, mollis, pinguedine multa instructa, in adultis crinibus crispis obsita, *Mons veneris* dicta.

Ad extremitatem suam uniuntur invicem ope ligamenti robusti, quod in infantibus, & adultis optime conspicitur; in feminis vero, quæ frequentiores ediderunt partus, laxissimum est, vel subin omnino dilaceratur. Spatium ligamento hoc eodem, & ani orificio interceptum *Perinaeum* dicitur.

Fabrica labiorum constat epidermide, cute, & cellulari textu, pinguedine plurima facta, vasis prædito, intumescentiæ apto: facies interna rubet, ac multis gaudet glandulis muciparis, & sebaceis; externa cuti cancolor, pilis plurimis crispis obsita est.

2) *Clitoris*

2. *Clitoris* constat, uti penis in viris, corporibus binis cavernosis, ab ossibus ischii etiam enatis, eadem ratione unitis, antèrius tamen orificio carentibus, quum urethram non eadem ratione uti in viris cingant.

In statu naturali exigua est, brevisque, ob nervos vero copiosos sensilissima; locatur in superiori labiolum majorum angulo.

Penis virilis adinstar expandi, rigescere valet; instruitur etiam, uti hic, vasis, nervis, musculis elevatoribus, ligamento a symphisi ossium pubis oriundo, & clitoridi inserto, ac præputio retractili.

3) *Labia minora*, s. *Nymphæ* alas duas exhibent membranaceas, a præputio clitoridis enatas, & extremitate latefcente orificio vaginæ uteri implantatas. In naturali statu exiguæ nonnisi sunt; subin tamen adeo crescunt, ut ad notabilem propendeant longitudinem.

Fabricam quod adinet, componuntur, uti statim dictum fuit, ex præputio clitoridis, textum cellularem, intumescentiæ aptum natum in medio recludente: ex utraque superficie glandulæ plurimæ adsunt sebaceæ. *Nymphæ* maxima gaudent sensilitate, quum copiosi in illis lateant nervi, qui, uti & vasa hæmatophora a vicinis oriuntur partibus.

Ufus. Voluptati inserviunt; lotium, quod inter illas ex urethra profluit ea ratione dirigunt, ne femora madefacere queat.

4) *Orificium urethræ* locatur illico sub clitoride ad nympharum exortum. Urethra ipsa in feminis amplior multo, sed duos nonnisi pollices longa, hinc brevior multo quam quidem in viris est: cætera ad urethræ virilis fabricam accedit; orificium fere triangulare est, glandulisque gaudet muciparis magnis.

5) *Orificium*

5) *Orificium vaginae uteri* latet sub orificio urethrae.

Orificium hoc ipsum occlusum est in infantibus ope membranæ semilunaris, a tunica vaginae, & epidermide enatae, *Hymen* dictæ; dum membrana hæc adritu lacerata fuit, remanent ita dictæ *carunculae myrtiformes*, quæ duæ vel & quatuor cernuntur.

Ad *genitalia mulierum interna* referuntur:

- 1) *Vagina.*
- 2) *Vterus cum ligamentis.*
- 3) *Tubæ fallopianæ.*
- 4) *Ovaria.*

1) *Vagina* dicitur canalis membranaceus, orificio paulo antea dicto sub urethra enatus, sursum, & postrosum nonnihil proficiscens, ac orificio uteri undique adnatus, magnæ extensionis capax, sub exitum suum angustior, sub finem amplior multo est; longitudine 6. circiter aut 7. æquat pollices.

Fabrica membranacea est, & componitur:

1) Epidermide molli, subtilissima, & tunica crassa, alba, nervea; quæ utraque in facie interna vaginae plicas multas tum obliquas, tum transversas generant.

2) Papillis plurimis, sensilissimis nerveis, a nervo sacrali postremo enatis.

3) Fibris muscularibus, a fundo clitoridis proficiscentibus, musculus ani insertis, hinc orificium vaginae spincteris adinstar ambientibus.

Lacunæ præterea adsunt mucosæ multæ, per quas mucus in vaginam undique effunditur.

Vasa circa totum vaginae ambitum speciem retis formant; *arteriæ* oriuntur ex pudenda communi; *venæ* terminantur in hæmorrhoidalem externam.

2) *Vterus* receptaculum est cavum fibris muscularibus, vasisque instructum, in cavo pelveos in-

ter vesicam urinariam, & intestinum rectum positum.

Figura lagenam oblongam, nonnihil complanatam refert, cujus pars inferior, angustior *collum*, pars amplior *corpus*, pars suprema, convexa *fundus uteri* dicitur.

Circa uterum notentur :

1) Collum uteri interne cavum, plicis plurimis, in medio vero rima transversa, in cavum uteri ducente, *orificium uteri* dicta, instructum esse; undique cingi a vagina uteri.

2) In corporis interiori adesse cavum triangulare, & in quovis angulo orificium unum; inferius constituit rima oris uteri; bina superiora utrinque posita, exigua orificia faciunt tubarum uterinarum. In exteriori parte notentur

Facies binæ convexæ,

anterior, &

posterior, ex utroque latere *margo* acutus, ubi *facies* dictæ una coëunt.

Componitur uterus textu celluloso denso, duriori, spongioso tamen, fibris muscularibus tum planis, tum teretibus, imprimis in fundo, colloque uteri, dotato. In collo, & orificio uteri glandulæ muciparæ copiosæ adsunt, una cum vesiculis multis exiguis, sphericis, diaphanis, quas NABOTHVS pro ovulis feminarum falso declaravit. Cavum uteri interne vestit membrana tenuis, ab epidermide enata, plicas colli uterini generans. Fundus & partes laterales uteri, excepta tamen facie illius anteriori, & posteriori, obteguntur exterius peritonæo; quum vero peritonæum latius utero sit, ex utroque latere, ubi lamina illius posterior, cum anteriori coit, plicam latam format, quæ per latera pelveos, ad vasa hujus usque, expanditur, & sub nomine *ligamentorum uteri laterum* nota est.

est. Laminis binis ligamenti hujus ejusdem textus cellularis intercipitur una cum vasis plurimis, & nervis. Ligamentis hisce latis includuntur etiam tubæ uterinæ, seu fallopianæ, de quibus mox agetur. Pars ligamentorum inter tubas & ovarium hærens, partesque has invicem uniens, a figura, quam refert *alarum vespertilionum* sub nomine venit.

Ligamenta uteri rotunda oriuntur utrinque ex lateribus uteri infra, & ante initium tubarum, decurrunt, uti in viris funiculus spermaticus per annulum abdominalem, & evanescunt in labia externa pudendorum. Ligamenta proprio sensu non sunt, sed fasciculo absolvuntur vasorum, & fibrarum, laminæ duplici peritonæi inhærentium: fibras auctores nonnulli pro fibris habuerunt muscularibus; interim tamen a solo enascuntur textu cellulari.

3) *Tubæ uterinæ*, seu *fallopianæ* canales bini sunt, qui ad uteri fundum ex angulis cavi uterini lateribus prope ligamenta rotunda enascuntur, tum laminis ligamentorum latorum binis inclusi, transversim progrediuntur, ac proxime ad ovaria extremitatibus suis deorsum inclinatis finiuntur. Principium tubarum angustum est, in medio ampliores paulo fiunt, in extremitate denuo contrahuntur. Septem circiter, aut octo pollices exæquant; extremitas quævis ostio patet.

Fabrica vaginæ uterinæ fabricæ similis est; componitur scilicet vasis plurimis sanguiferis, & lymphaticis, a vicinis partibus advenientibus; fors & fibris quibusdam gaudent muscularibus.

4) *Ovaria* corpora duo sunt oblonga, utrinque complanata, duplicaturæ antea dictæ ligamentorum uteri latorum inhærentia, ad duos circiter pollices a lateribus uteri, retro & supra tubas fallopianas posita, hisque ope ligamenti, a figura sua sic dicti ala vespertilionis, adne-

xa. Figura ovariorum diversa est: longitudo unum duosve pollices, latitudo sex aut decem lineas æquat.

Notentur in ovariis:

Facies duæ: anterior, & posterior; complanatae parum sunt, & ligamento antea dicto lato amittuntur.

Margines bini: superior, rectus, ligamento eisdem adhæret, inferior convexus libere hæret, vasaque excipit.

Fabrica. Constant textu celluloso crasso, firmo, & ad fabricam ipsius uteri satis accedunt; externa tunica a peritonæo venit, hic loci crassissimo, & fere cartilagineo. Margo ligamenti lati, ovarium cum utero conjungentis, crassus, teres, non vero, uti Veteres credebant, cavus est; *ligamentum* vocatur ovarii.

In superficie cujusvis ovarii sub tunica externa vesiculæ conspiciuntur decem, vel & quindecim, conflatae ex membrana firma, & substantia cellulari; fibris cellularibus, vasculisque ovario minimis adnexæ; cavum earum liquido diaphano, coagulabili plerumque repletum est.

Magnitudo diversa est.

Nervi ovariorum oriuntur ex plexu renali.

Arteriæ uteri oriuntur ab art. iliacis, ab hæmorrhoidali externa; rami nonnulli veniunt ab art. spermaticis.

Venæ uteri analogæ in genere sunt arteriis; valvulas nullas habent; terminantur in venas iliacas, in hæmorrhoidales externas; rami quidam in venas spermaticas abeunt.

Arteriæ, & venæ ovariorum proficiscuntur a vasis spermaticis, quæ simili ortu gaudent, uti vasa spermatica in viris, pampiniformem similem plexum formant, & ovariis demum inplantantur.

Vasa lymphatica rarius occurrunt; observata tamen ab Anatomicis clarissimis fuerunt.

Nervi uteri oriuntur a sacralibus, ab ischiatico magno, & a plexu infimo mesocolico.

Vsus uteri: fœtum, seu embryonem excipit, nutrit, ad legitimum usque partus tempus retinet, demum expellit; menstrua simul per eum evacuantur.

UTERVS GRAVIDVS; PLACENTA UTERINA; FUNICVLVS VMBILICALIS; FŒTVS; HVIVS INVOLVCRA.

UTERVS GRAVIDVS ob humorum copiosiore adfluxum per omnem suum ambitum major, substantia ejus crassior, sed spongiosa fit; quum vasa, in utero virgineo prius minima, jam increscant magnitudine, & sanguine turgeant.

Cavum uteri a fœtu sensim magis magisque increfcente magis etiam indies dilatatur, expanditur: collum uteri, substantiæ totius adinstar, crassius, & spongiosum fit. Os uteri clauditur; cessant menstrua, quum sanguis prius eliminandus jam nutritioni dicetur embryonis.

PLACENTA corpus est spongiosum, læve, rotundum, disco simillimum, fundo uteri plerumque adfixum.

Consideranda in placenta veniunt:

Facies superior, inæqualis, hirta, textu cellulari adnata finibus extremis vasorum umbilicalium, atque hac ratione cum ipso utero cohærens.

Facies inferior, levis, cujus medio implantatur funiculus umbilicalis.

Margo rotundus.

Fabrica.

Fabrica. Conflatur ex ramis vasorum umbilicalium, textuque denso cellulari. Facies ambas amittit membrana chorion.

Vsus. Sanguinem ex utero excipit; venis umbilicalibus tradit.

FVNICVLVS VMBILICALIS constat arteriis binis, vena, & uracho; uniuntur invicem ope communis membranæ, interius spongiosæ, cutis fœtus productionis.

Arteriæ exoriuntur ab art. iliacis internis fœtus, terminantur in placentam.

Vena umbilicalis oritur ramulis plurimis ex placenta, per decursum in tubercula quasi hinc inde insurgit; una cum vasis umbilicalibus reliquis inter sedentes arcus cutis muscutorumque abdominalium umbilicum intrat, terminatur demum in hepate embryonis.

VRACHVS oritur a basi vesicæ urinariæ, finitur in funiculo umbilicali; in animantibus cavus est; cavitatem & in humano uracho Anatomici nonnulli detexerunt.

Longitudo tres plerumque spithamas æquat.

Vsus venæ umbilicalis; sanguinem ex placenta in fœtum ducit: *usus arteriarum binarum;* sanguinem ex fœtu in placentam propellunt.

FOETVS ipse, seu **EMBRYO** in cavo uteri *involutis* sibi propriis inclusus hæret.

Involucrorum fœtus

Primum, & extimum membrana villosa est, facile dilaceranda, vasis sanguiferis dotata, superficies placentæ ambas obducens, faciei toti internæ uteri tum textu cellulari, tum vasculis exiguis adnexa, *chorion dicta.*

Tunica media, priori subjecta, alba, inpellucida, firmior, inferiorem solummodo tegit placentæ faciem,

fœtui obverſam, cohæret ope textus cellularis tam cum chorio, quam & cum amnio.

Intimum involucrum, fœtui proximum, tunica eſt diaphana, læviſſima, tunicæ mediæ adinſtar ſub placenta hæret, aquoſo latice undique repletur, *membrana amnios* adpellari conſuevit.

Si fœtus plures ſimul adſint, cuius membrana amnios propria, & peculiaris eſt.

Liquidum nunc dicta tunica contentum quoad indolem ſuam convenit cum ſero ſanguinis, ad ignem uti ſerum coagulatur; prout graviditas increſcit, minuitur liquidi huius copia.

Uſus. Fœtum ab impreſſionibus tuetur validioribus, forſan & nutrit; ſub partus negotio uteri orificium dilatat, vaginam humefaciens reddit lubricam.

Maximus anatomicus HVNTER præter tunicas enumeratas tres embryonis quartam inſuper detexit, quæ faciem totam internam uteri gravidæ, & placen- tæ obducit, *membranæ deciduæ* nomen eidem impoſuit.

DIVERSITAS EMBRYONIS AB HOMINE ADULTO ſequentibus potiffimum abſolvitur:

1) In fœtu copia humorum adefſt major; ſolida omnia in genere molliora ſunt, quam quidem in adultis.

2) In fœtu *canalis* ſic dictus *venofus* ſpecialis a ſinu venæ portæ in venam cavam proficiſcitur; canalis vero hic, venæ umbilicalis, & art. umbilicalium adinſtar in adultis concreſcit.

3) Ratione molis corporis habita hepar in fœtu majus multo ac in adultis eſt.

4) Pulmones in fœtu exigui, firmi, ex atro rubentes, aquæ fundum petentes ſunt; in adultis vi-
ventibus

ventibus respirationis ope magni, expansi conspiciuntur, spongiosi, & albicantes, tum & aquæ superficiæ innatant.

5) Ex trunco art. pulmonalis in fœtu decurrit ductus in aortam, sanguinem ex illa in hanc promovens, *canalis arteriosus* dictus; occluditur in adultis.

6) *Foramen ovale* septo intermedio inter ambas auriculas cordis in fœtu insculptum, sanguinem ex auricula dextra in sinistram transmittens, in adultis pariter coalescit.

7) *Valvula Eustachii*, hærens interius inter venam cavam inferiorem, & saccum, in quem vena hæc prope cor expanditur, in fœtu major, quam in adultis est.

8) Glandula thymus, caput, hepar, glandulæ suprarenales, processus vermiformis intestini cœci, in fœtu majora multo ac in adultis sunt.

9) Ventriculus, & intestina replentur in fœtu fœce ex nigro viridescente, tenaci, *meconium* dicta: intestina crassa angusta sunt, post partum vero dilatantur: ventriculus in longitudinem magis diducitur.

10) Membrana tympani in fœtu vestitur membrana alia alba, mucosa, post partum denuo evanescente.

11) Meatus auditorius externus embryonis, cujus sulcui membrana adaptatur tympani, ab osse petroso sejunctus est; coalescit vero post partum cum osse nunc dicto.

12) Pupilla cingitur *membrana* sic dicta *pupillari* post partum pariter evanida.

13) Dentes folliculorum mucosorum adinstar latent in maxillis; post partum firmiores sensim fiunt, donec demum foras prodeant.

14) In vertice ossa parietalia cum osse frontis nondum coaluerunt; hinc aperturam intercipiunt, membrana solum obteſtam, *fontanella*, seu *fons pulsabilis* dictam.

15) Ossa omnia corporis molliora, epiphyſes cum ossibus ipsis nondum concretæ sunt.

16) Cavitates etiam articulares, & mucosæ formatæ perfecte nondum sunt.



S E C T I O II.

S P L A N C H N O L O G I A E.



T H O R A X.

THORAX vocatur pars corporis a collo ad diaphragma usque producta; sterno, costis, & vertebrae dorsii undique circumscripta; interius tunica communi, quam *pleuram* dicunt vestita, *mediastini* ope in binas cavitates diremta.

Externe thoraci binæ vicumbunt mammæ.

In *cavo thoracis* reconditur cor una cum vasis magnis, & pulmonibus;

Anterius locatur glandula thymus.

Posterius hæret œsophagus, vena azygos, ductus thoracicus, par nervorum octavum, nervus intercostalis magnus, & diaphragmaticus.

M A M M A E.

MAMMAE dicuntur partes duæ hemisphærice convexæ, subduræ, anterius thoraci utrinque incumbentes, secretioni succi albi, nutrititii, quem *lac* vocamus, dicatæ.

Instratæ sunt musculo pectorali majori; externe amiciuntur integumentis corporis communibus: notanda in mammis veniunt:

I) In medio, seu centro cujusvis mammæ corpus prominens, irritabile valde, cellulari, & spongiosa fabrica donatum, foraminulis (seu ostiis ductuum

tuum excretoriorum galactophororum) pertusum, *Papilla mammae* dictum.

2) Circa papillam adest halo, seu circulus rubicundus, in senioribus fuscescens, glandulis multis sebaceis cinctus, *area mammae* dictus.

Fabrica interior mammarum constat pinguedine plurima molli circumposita, quæ potissimum mammarum molem externam constituit; glandulaque magna, eminenti, quæ denuo glandulis multis minoribus, arteriis, venis, nervis, vasis lymphaticis, ductibusque propriis excretoriis galactophoris constat; partes hæ singulæ textu cellulari firmo, albente non solum amiciuntur, sed & mutuo interius uniuntur.

Arteriæ mammarum veniunt ab art. mammariis internis, ex art. subclavia oriundis; ab art. mammariis externis, ab art. humerali, & intercostali: furculi arteriarum harum exigui uniuntur etiam cum art. epigastricis.

Venæ iisdem cum arteriis donantur nominibus, manifestius adhuc uniuntur cum venis epigastricis.

Vasa lymphatica feruntur in glandulas axillares

Nervi copiosi oriuntur a nervis intercostalibus superioribus.

Ductus excretorii galactophori ductus sunt subtilissimi, molles, albi, ex glandula prius dicta mammaria magna enati, ad medium papillæ undique decurrentes, in area coeunt, ac in ipsa demum papilla octo, decemve orificiis aperti.

Vsus mammarum. Lac nutritioni infantis dictum fecernunt, adservant.

In viris etiam glandula dicta mammaria magna, una cum papilla, & hanc cingente area adest; interim tamen rarissime nonnisi in viris lac secretum fuisse constat.

PLEVRA,

PLEVRA, MEDIASTINVM,
PERICARDIVM.

I.

PLEVRA tunica crassa, robusta, diaphana, cellularis est; interne cingens costas, sternum, vertebrae dorsi, diaphragma, hinc totum cavum thoracicum.

Facies pleuræ interna lævissima est; externa textu cingitur cellulari.

II.

MEDIASTINVM productio pleuræ est; constat scilicet ex binis pleuræ laminis, textu celluloso invicem nexis. Mediastinum cavum thoracis perpendiculariter in duas cavitates dirimit, hinc una cum pleura saccos duos membranaceos constituit, quibus obvolvuntur pulmones; sacci hi bini pulmonici oblique ea ratione hærent, ut inferiora versus ab invicem removeantur, & spatium intercipient triangulare, cui incumbit saccus tertius, cor obducens, *pericardium* dictus.

Anterius mediastinum superiori loco ipsi sterno, prout vero descendit, ex sinistro magis latere margini sterni, tum cartilaginibus costarum adhæret; unde cavitas thoracis dextra latior redditur sinistra.

Posterius necitur vertebris dorsi;

Inferius diaphragmati, & pericardio;

Superius vasis magnis hæmatophoris.

Posteriori loco ad vertebrae dorsi saccis binis pulmonalibus intercipitur spatium triangulare, cui aspera arteria, retro hanc œsophagus, vena azygos, ductus thoracicus, & partim aorta incumbunt: anteriori loco glandula thymus simile replet spatium.

Vasa sanguifera pleuræ & mediastini a vicinis adpropinquant partibus.

Vsus tunicarum harum: cavi thoracici intestiora vestiunt, in binas cavitates illud dirimunt, pulmonibus, & cordi extimam subpeditant tunicam.

III.

PERICARDIVM faccus est membranaceus, quo cor includitur, cum substantia tamen cordis non concretus. Locatur in spatio inferiori saccorum pulmonalium, hinc lateraliter, & superne a mediastino circumdatur.

Fabrica. Constat membranis binis, quarum extima venit a mediastino, interna vero propria est, textu constans cellulari firmo, denso; utrisque textus cellularis texturæ rarioris interponitur.

Adhærescit superius vasis majoribus cardiacis, & mediastino, inferius fibris tendineis diaphragmatis. Notandum simul venit, adesse nunquam non & in statu naturali aquosum laticem in cavo pericardii; usus hujus liquoris est, ut concretio inpediatur cordis cum pericardio.

Arteriæ pericardii oriuntur ab art. asperæ arteriæ, quædam & ab art. mediastini, & diaphragmaticis.

Venæ terminantur in venam sine pari, in venas intercostales, thymicas, & asperæ arteriæ proprias.

Vasa lymphatica feruntur ad glandulas quasdam vicinas lymphaticas.

Vsus pericardii. Cor amicit; motum exorbitantem coërcet.

COR; PARTES CORDI PROPRIAE.

COR musculus cernitur cavus, pericardio inclusus, in hominibus transversim fere diaphragmati ex sinistro latere, ac in anteriori thoracis cavitate positus.

In corde notentur:

Basis, aut pars latior, latus respiciens dextrum.

Apex, lateri obversus sinistro, costam veram sextam quodammodo feriens.

Facies superior, convexa, &

- - *inferior*, complanata, diaphragmati incumbens.

Margo anterior, acutus, a basi cordis ad apicem usque productus, a ventriculo cordis dextro, seu anteriori efformatus.

- - *posterior*, rotundus, eadem, uti prior, decurrens ratione, a ventriculo cordis postico, seu sinistro generatus.

Dividitur cor

1) in *cor*, proprie sic dictum;

2) in *atria* cordis.

3) in *truncos principes* vasorum hæmatophorum, cordi adnatos.

I.

COR ipsum dirimitur in binos *ventriculos*.

Ventriculus cordis posterior, seu *sinister*, qui cor constituit primitivum, angustior, & in genere minor est; interim tamen cernitur crassior multo, robustior, longior, magisque rotundus, priori; dirimitur ab hoc ope septi, sibi maximam partem proprii.

Ventriculus anterior, seu *dexter*, latior, amplior, sed simul brevior, tenuior multo, & debilior posteriori est. Septi, cujus ope a ventriculo posteriori
sejun-

sejungitur , pars minima ventriculo huic anteriori propria est , sed adpendicis potius in morem fibris muscularibus cordi sinistro adligatum videtur.

Fabrica universa cordis componitur fibris muscularibus , quæ in tria potissimum diversa dirimi queunt strata.

Fibræ cordis *extimæ* feruntur a basi illius ad apicem , & cor totum ambiunt.

Mediæ extimis inmediate subjacent , transversa magis , quam priores , ambulant directione ; ope hujus ejusdem decursus ambos effingunt cordis ventriculos.

Intimæ oblique feruntur a basi ad apicem ; plurimæ aliæ , eadem , uti descenderunt , ratione intra ventriculos cordis ambos recurrunt ; aliæ perpendiculari demittuntur decursu , in fasciculos uniendæ exiguos , quibus formantur columnæ , trabes , diversique sulci cordis ; evanescent demum tendineis extremitatibus in valvulis amborum ventriculorum.

Ambit faciem cordis externam universam tunica firma , lævis , cujus interior paries textu cellulari , pinguedine maximam partem repleto , vestitur.

Ventriculus cordis quilibet orificiis gaudet binis , quorum unum in adhærens atrium , alterum in arteriam ducit.

Orificium ventriculi anterioris versus atrium directum ovale est , terminatum margine albente subtendineo ; a margine hoc eodem oritur circulus membranaceus , partibus constans tribus inæqualiter quadrangularibus , a Veteribus *valvularum tricuspidalium* nomine insignitis : Valvulæ hæ versus parietes cordis ope fibrarum tendinearum fortium columnis carnis cardiacis adfiguntur.

Orificium ventriculi posterioris versus atrium patens duabus tantum gaudet valvulis , quæ *valvule* dicuntur *mitrales*.

Arteriæ nutriendo cordi sacrae oriuntur ex aorta, & sub nomine *art. coronariæ dextræ*, & *sinistræ* notæ sunt.

Ad *venas* refertur vena coronaria magna, auriculæ dextræ, & coronaria minor ventriculo cordis inferta.

Vasa lymphatica exonerantur in glandulas vicinas lymphaticas.

Nervi oriuntur ex plexu cardiaco, cujus generis vidimus in NEUROLOGIA.

II.

ATRIA cordis cavitates duæ sunt, in basi cordis supra orificia ventriculorum positæ; quævis instruitur sinu, & auricula.

Saccis duobus parvis cæcis ferratis, qui in atriiis conspiciuntur, *auricularum*, reliquo atriorum cavo *sinuum* cordis donatum fuit nomen; nectuntur tum membranis, tum venis coronariis cordi; dirimuntur, cordis adinstar, septi ope in *atrium dextrum*, seu anterius, & *sinistrum*, seu posterius; septum hoc in fœtu, uti antea diximus perforatum, in adultis plerumque occlusum est.

Sinus dexter una cum auricula sua amplior non-nihil sinistro est.

Componuntur membranis binis, inter quas fasciculi plures fibrarum muscularium decurrunt: membrana interna non solum totum ambit cavum atriorum, sed & ventriculos cordis; concurrit simul ad formandas valvulas tricuspidales, easque columnis adnectit cordis.

Vasa & nervos cum corde eosdem habent.

Ufus. Sanguinem ex venis magnis sibi unitis reducem excipiunt; in ventriculos cordis exonerant.

III.

III.

TRVNCI MAGNI PRINCIPES vasorum sanguiferorum cordis sunt :

Aorta ex ventriculo cordis sinistro, &
Art. pulmonalis ex ventriculo cordis dextro enata.
Vena cava, terminata in atrium dextrum;
Venæ pulmonales, sanguinem suum tradentes
 atrio sinistro cordis.

Ampliores vasorum horum descriptionem vide in ANGIOLOGIA.

Connectitur cor superius cum vasis magnis, & cum pericardio, inferius cum diaphragmate.

Vsus cordis. Sanguinem per venas in sinus reductum ex his in ventriculos suos excipit, & illico arteriarum ope in pulmones, & totum corpus projicit.

T H Y M V S

Vide ADENOLOGIAM.

P V L M O N E S.

PVLMONES vocantur viscera bina, cavo thoracis inhærentia, saccosque binos pleuræ replentia. Dirimuntur ope mediastini, cavum thoracis bifariam sejungentis in *pulmonem dextrum* & *sinistrum*; dexter, major subdividitur in lobos tres, sinister minor, in lobos duos.

Color in infantibus læte rubet, in adultis subcærulefcens est.

Figura saccorum, queis includuntur, figuram refert; basis lata, facies antica ex integro fere plana, exterior subconvexa, posterior rotunda, interior plana est; extremitas inferior pulmonis sinistri ob cordis

dis vicini situm excavata est; extremitas superior amborum pulmonum cono obtuso similis est.

In statu naturali superius solum ope asperæ arteriæ collo, inferius per vasa pulmonalia magna cordi adnectuntur; cætera undique sunt liberi.

Involucrum pulmonum externum tenerum, albens est, ac a pleura oritur. Subjicitur huic textus cellulofus, rarus, pinguedine semper carens.

Fabrica pulmonum interior componitur lobulis pluribus, involucro pulmonum externo invicem junctis; lobulorum horum interstitia textus antea dictus cellularis explet, per quem vasa distribuuntur. Lobulorum horum quivis componitur copia maxima lobulorum denuo minorum, qui ex similibus magnitudine semper decrefcentibus exfurgunt; interstitia omnium textus explet cellularis; lobuli demum exilissimi abeunt in vesiculas parvas membranaceas, quæ in fœtu vacuæ, & collapsæ, in infante vero nato, ac in adultis aëre sunt repletæ, ac invicem patent. Arteria pulmonalis, venæque pulmonales distribuuntur ramis suis per totos pulmones in vesiculas antea dictas, donec demum furculi omnium subtilissimi vasorum horum vesiculam quamvis retis adinstar cingant.

Præter vasa hæc magna pulmones gaudent arteriis adhuc aliis minoribus, nutritioni visceris hujus dicatis, & sub nomine *art. bronchialium* notis; oriuntur ex aorta, & art. intercostalibus.

Venæ iisdem cum arteriis donantur nominibus, & terminantur in venam azygon, & venam intercostalem.

Vasa lymphatica textum retiformem in superficie pulmonum faciunt; excurrunt in ductum thoracicum.

Glandulæ bronchiales nigricantes, aut cærulescentes hærent circa ramos bronchiorum, secretioni dicantur mucii.

Nervi oriuntur imprimis a pari octavo, & n. intercostali magno; dividuntur in plexum pulmonalem posticum, & anticum.

Vsus pulmonum. Conficiendo, & elaborando sanguini, respirationi, vocis formationi dicantur.

COLLVM IN GENERE.

Partes *collum* constituentes dividuntur in *externas*, & *internas*.

Externæ sunt :

- 1) Integumenta communia corporis.
- 2) Musculi.
- 3) Vertebrae colli 7. cum parte his inclusa medullæ spinalis.
- 4) 8. paria nervorum cervicalium.
- 5) Par octavum nervorum cerebralium, & n. intercostalis magnus.
- 6) Art. duæ carotides.
- 7) Art. vertebrales.
- 8) Venæ 2. jugulares ex - & internæ.
- 9) Glandulæ parvæ colli.
- 10) Glandula thyroidea.

Partes internæ sunt :

- 1) Larynx.
- 2) Aspera arteria.
- 3) Fauces.
- 4) Pharynx.
- 5) Oesophagus.

LARYNX, ET ASPERA ARTERIA.

LARYNX corpus cavum est, cartilaginibus, musculis, ligamentis, & glandulis compositum, retro linguam in parte colli anteriori situm.

Larynx nectitur superius musculis, & ligamentis ad os hyoides; posterius membranis quibusdam ad basim linguæ, musculis demum variis ad pharyngem.

Cartilagines laryngis quatuor sunt:

- 1) Cartilago *cricoidea*, s. *annularis*.
- 2) - - - *scutiformis*, s. *thyroidea*.
- 3) Cartilagines binæ *arytenoideæ*.
- 4) *Epiglottis*.

1) *Cart. cricoidea* nomen a figura sortita fuit: antèrius angusta, posterius lata est, ibique loci spina in excavationes duas dividitur, queis cart. arytenoideæ excipiuntur.

Basim reliquarum omnium constituit; jungitur inferius cum aspera arteria ope ligamentorum quorundam, & fibrarum muscularium, superius cum cart. thyroidea, & arytenoideis.

2) *Cart. thyroidea* perpendiculariter annulari suprainponitur, & partem laryngis anteriorem superiorem, & maximam constituit; constat laminis binis cartilagineis, fere quadrangularibus, antèrius in angulum obtusum coëuntibus, posterius ab invicem remotis. In viris cartilago hæc eadem durior, magisque prominens est, ac in mulieribus; nomen hinc apud auctores quosdam invenit *pomi Adami*.

Posteriori parte, superius & inferius processibus binis gaudet, qui *cornua* dicuntur, cornua superiora recta ligamentis rotundis cohærent cum cornubus ossis hyoidis; inferiora, & breviora adfiguntur cavitatibus huic usui dicatis articularibus cart. annu-

laris; ligamentis & musculis adhærescit ad cartilagineas reliquas.

3) *Cart. binæ arytenoideæ* perpendiculari positione hærent retro cart. scutiformem in binis excavationibus cart. annularis. Figura donantur speciali: basis latior est, nonnihil excavata, cum cartil. crycoide articulatione mobili jungitur; superiora versus angustiores fiunt, & triangulares; latus posticum excavatum, antè convexum est; terminantur demum in cartilagineam subovalem, & crassiorem nonnihil. Superius, & inferius a sese remotæ sunt, vinciuntur tamen ope fibrarum plurium muscularium: spatium itaque, quod intercipiunt perpendiculare pro diversa actione fibrarum harum angustius, latiusve reddi potest.

Vniuntur præterea cum cart. scutiformi ligamentis robustis elasticis, membrana laryngis pituitaria obductis, infra medium cart. arytenoidearum enatis, transversa fere directione antrosum excurrentibus, faciei internæ partium lateralium cart. scutiformis adfixis, ac in cartilagineis nunc dictæ angulis obtusis demum evanescentibus.

Sub ligamentis his adsunt bina adhuc alia minora, a cartilaginibus arytenoideis pariter enata, inferiorum adinstar antrosum excurrentia, in medio autem cart. scutiformis terminata. Inter ligamenta hæc duo superiora, & inferiora utrinque cavitas est, quæ sub nomine *ventriculi Galeni* venit. Superius, & inferius intercipiunt in medio hiatus angustum ovalem, *rima glottidis* dictum. Hiatus hic posterius una cum spatio perpendiculari, superius inter cartilagineas binas arytenoideas posito simul excurrit, ac hujus adinstar, prout cartilagineas contrahuntur, aut dilatantur, angustior, ampliorve reddi potest. Rima hæc glottidis in statu naturali posterius amplior semper, antè angustior.

Vfus

Vsus rimæ glottidis. Vocem diversissima ratione mutat.

4) *Epiglottis* suprainponitur aperturæ laryngis, nomen ab officio habet.

Figura fere ovalis est, postrosum concava, antrosum convexa. Apex, seu extremitas superior hæret libera, & vi sibi propria elastica sursum semper elevatur; dum vero sub deglutitione dorsum linguæ retrotrahitur, epiglottis inponitur aperturæ laryngis, hinc viam ex cavo oris in laryngem claudit; basis ligamento robusto adfigitur cart. thyroideæ, ossi hyoïdi, basique linguæ.

Larynx totus obducitur externe textu subtili celluloso, interne membrana pituitaria, ex cavo oris enata.

Glandulæ laryngis omnes referendæ sunt ad classem glandularum mucipararum, ac tum dispersæ sunt per tunicam totam internam laryngis sub forma granulorum exiguorum, tum &, uti v. g. supra cartilagineas arytenoideas, plures simul invicem cohærent.

Vsus succi mucosi harum glandularum est, ut partes has humefaciat, mobiles, hinc muneri suo aptas conservet.

Musculi laryngis, quorum quinque sunt, in MYOLOGIA fuerunt expositi.

Vsus laryngis. Vocem, variosque vocis sonos format; aër sub respiratione per laryngem in pulmones intrat, & ex iis denuo egreditur.

Glandula thyroidea. Vide circa hanc ADENOLOGIAM.

Arteriæ ejus veniunt ex art. subclaviis, & carotidibus; *venæ* terminantur in jugulares.

Succo subaquofo , viscido parum , & flavicante turgēt ; usus nondum constat ; quum , an ductu gaudeat excretorio , determinatum non sit.

ASPERA ARTERIA tubus est annulis cartilagineis , membranis , fibrisque muscularibus compositus ; oriens in collo infra cartilaginem laryngis annularem , exhinc in cavum thoracis descendens , ibique in binos bifurcatus ramos , qui in plurimos de novo minores ramulos per pulmones distribuuntur , finibusque demum ultimis vesiculas constituunt pulmonales.

Fabrica asperæ arteriæ constat

1) *Tunicis* binis ; extima absolvitur textu cellulari ; interior nervea , sensilissima , ductibus multis mucosis gaudet , ac epidermide velatur ; utrisque interponuntur

2) *Annuli cartilaginei* , mediantibus fibris muscularibus invicem nexi . Circulos integros non absolvunt , hinc fines eorum postici fibris muscularibus robustis , rectis , circuli deficiens segmentum explentibus uniuntur.

Annuli hi cartilaginei tenues sunt , elastici , anteriùs crassiores paulo quam ex lateribus : superiores majores sunt ; inferiores , quo magis descendunt , eo & fiunt minores.

Fibræ musculares , annulos dictos unientes , tum transversim excurrunt , atque hæ asperam arteriam arctant ; tum perpendiculares sunt , ab annulo uno ad alterum descendentes ; his aspera arteria brevior redditur : subveniunt postremis fibræ musculares aliæ , a cart. annulari ortæ , posteriori loco secundum totam longitudinem asperæ arteriæ descendentes , in pulmonibus demum evanescentes.

Inter tunicam internam asperæ arteriæ , & musculares fibras glandulæ multæ simplices locantur ,
mucum

mucum diaphanum, subaquosum in asperæ arteriæ cavum excernentes.

Aspera arteria in superiori parte cavi thoracici ad tertiam colli vertebram in binos bifurcatur ramos, quorum dexter brevior, & amplior, sinister angustior, & longior paulo est; prior dextrum, sinister sinistrum petit pulmonem.

Fabrica horum ramorum, quamdiu extra pulmones adhuc decurrunt, trunco ex toto similis est, ad ipsum vero in pulmones ingressum annuli cartilaginei sensim abeunt in laminas formæ irregularis, angulos; pars muscularis, & membranacea illis interjecta magis magisque augetur, donec demum furculi minimi meris compositi cernantur tunicis, cartilaginè carentibus, & in vesiculas abeant minimas, quas antea sub nomine vesicularum pulmonalium descripsimus.

Arteriæ asperæ arteræ veniunt ex carotidibus, quædam adveniunt ex subclaviis.

Venæ terminantur in jugulares.

Nervi veniunt ex ramo recurrente, a pari octavo oriundo.

Vsus asperæ arteriæ. Dum loquimur, & respiramus, aërem introrsum, & extrorsum mittit.

FAUCES; PHARYNX; OESOPHAGVS.

I.

FAVCIUM sub nomine cavum venit amplum, retro linguam, & palatum molle positum, in pharyngem terminatum.

Limitatur retrorsum vertebris omnibus colli; superius osse occipitis, parteque media ossis sphænoïdis; anterius, & lateraliter palato molli; inferius pharynge, & faucibus; externe undique musculis; late-

raliter, & posterius textu plurimo celluloso. Lateraliter aperiuntur in fauces tubæ binæ acouſticæ.

Cavum totum faucium veſtitur interne tunica rubente, ſpongioſa, ex cavo oris, & narium adveniente.

Arteriæ veniunt a carotide externa, & in primis a maxillari interna.

Venæ terminantur in jugularem internam.

Muſculos huc pertinentes, & oſſa in MYOLOGIA, & OSTEOLOGIA vidimus.

Nervi veniunt a pari quinto, & octavo.

Uſus faucium. Deglutationi dicantur, reſpirationi, loquelæ, & ob orificia tubarum, auditui.

II.

PHARYNX, ſeu pars œſophagi ſumma, ſaccus eſt carnoſus, infundibuliformis, retro laryngem ſitus, a faucibus incipiens, in œſophagum terminatur.

Fabrica conſtat meris muſculis, tunica pituitaria oris interne obductis.

Muſculorum ſuorum ope cohæret cum baſi cranii, vertebris colli, larynge, & oſſe hyoideo; uti in MYOLOGIA diximus.

III.

OESOPHAGVS tubus eſt tum membranaceus, tum muſcularis, a pharynge incipiens in collo inter aſperam arteriam & vertebras colli ex ſiniſtro paulo magis latere, tum vero in ſpatio triangulari poſtico mediæſtini per thoracem & foramen ſiniſtrum diaphragmatis descendens, & ventriculo demum inſertus.

Componitur tunicis ſequentibus, quarum

1) ſeu *extima* a pleura venit.

2)

2) *Muscularis*, constat fibris multis, tum per totam longitudinem excurrentibus, tum annularibus, quibus œsophagus brevior, & angustior reddi valet. Vtrisque textus interponitur cellularis.

3) *Nervea*.

4) *Intima* venit ab epidermide; inter hanc, & præcedentem copiosæ adfunt glandulæ muciparæ, quarum ductus excretorii membranam hanc perforant. Duæ ob magnitudinem suam notatu inprimis dignæ adfunt, circa regionem vertebræ dorsæ quartæ, aut quintæ positæ; *glandulæ* dicuntur *dorsales*.

Vsus. Deglutita ingesta in ventriculum defert.

CAPVT IN GENERE.

*E*xternæ partes capitis sunt

- 1) *Integumenta corporis communia*, una cum *capillis*.
- 2) *Musculi varii*, quos in MYOLOGIA vidimus.
- 3) *Ossa faciei, & cranii*, una cum periostio; de quibus actum fuit in OSTEOLOGIA.

Partes internæ sunt;

- 1) *Cavum oris*,
- 2) *Lingua*.
- 3) *Nasus*,
- 4) *Aures*.
- 5) *Oculi*.
- 6) *Cerebrum* partesque omnes ad cerebrum pertinentes.

CAVUM ORIS.

*P*artes cavum oris extrinsecus ambientes sunt:

1) *Labia*, divisa in *superius*, & *inferius*. Labium quodvis in medio ligamento speciali, & ex cutis plica generato, *frœnulum labiorum* dicto, supra dentes incisivos gingivæ adligatur. Quum labia componantur musculis, & tunica vasculis numerosissimis instructa, epidermide subtili obducta, in sanis hominibus læte rubent. Extremitates ambæ, ubi labia invicem uniuntur, *anguli* dicuntur *labiorum*.

2) *Mentum* pars infima, media, prominens faciei est, sub labio inferiori posita. Mentum, & labia in viris obsidentur barba.

3) *Buccæ*, s. *genæ* partes carnosæ, fornicatæ faciei sunt, sub oculis orientes, ad maxillam usque inferiorem productæ.

Fabrica. Componuntur partes hæ integumentis communibus, musculis variis, & ossibus binis maxillaribus.

Arteriæ oriuntur a carotide externa; sunt art. maxillaris, coronaria labiorum, angularis, pluresque rami a partibus vicinis advenientes.

Venæ analogæ sunt cum arteriis, terminantur omnes in jugulares externas.

Nervi oriuntur a pari quinto, & septimo, scilicet:

Nervus orbitalis inferior, labialis N. maxillaris inferioris, & portionis duræ N. acoustici.

Cavum oris terminatur interne & superne a palato duro, & molli; inferius a lingua, & musculis sub ea positis; antè, & lateraliter ab alveolis & dentibus; protenditur postrosum in fauces usque.

In cavo oris notentur:

1) *Arcus alveolares*, gingiva cincti, dentes ambientes.

2) *Gingiva*, alveolos amiciens, dentes ad coronam usque, tum & maxillas ex interiori parte amiciens. Constat tunica rubicunda, vasis copiosis dotata, spongiosa, fabricæ singularis.

Palatum pars est superior fornicata oris; ab anteriori parte posteriorem versus maxilla superior, ac uvula limites ejus definiunt.

Dividitur in *palatum durum*, & *molle*.

Palatum durum componitur anterioribus ossibus maxillæ superioris, periostio, ac tunica communi oris, quæ, in animantibus imprimis, rugas copiosas sat manifestas format, obductis.

Palatum molle s. velum pendulum palatinum, dicitur septum, enatum a margine extimo ossium palatinorum, ac lateraliter a processibus pterygoideis ossis sphœnoidis; antependii mobilis adinstar inter foramina postica narium, seu choanas, & os in cavum faucium deorsum propendens.

Velum hoc pendulum palatinum componitur tunica oris, & narium interna, quibus glandulæ plures, & muscoli hærent inclusi; arcus format binos ex utroque latere ab ipso palato descendentes; arcuum horum anteriores duo minores, ac subtiliores adhærescunt lateraliter linguæ; duo posteriores, ac majores inseruntur lateraliter pharyngi. In medio arcuum duorum posteriorum producitur velum pendulum palatinum in corpusculum conoideum, glandulis plurimis dotatum, *uvula*, seu *columella* dictum. Ex utroque latere hæret inter binos arcus glandula oblonga, subovalis, postrosum convexa, antrorsum magis complanata, superius crassior, duodecim pluribusve ductibus majoribus excretoriis in cavum oris aperta. Glandulæ hæc ob figuram suam *amygdalæ*, vel & *tonsillæ* dicuntur.

Musculos palati mollis in MYOLOGIA vidimus.

Cavum oris integrum vestitur interius tunica rubente, spongiosa; constat vero hæc productione epidermidis, & textu cellulari; utrisque interjiciuntur, imprimis in velo pendulo palatino, & faucibus, glandulæ multæ exiguæ, quarum succo partes hæ lubricæ, mollesque conservantur.

Glandulæ salivales magnæ, liquidum suum in cavum oris exonerantes expositæ fuerunt in ADENOLOGIA.

Arteriæ harum partium veniunt a carotide externa, & maxillari interna.

Venæ terminantur in jugulares internas.

Nervi oriuntur a parvi quinto, & octavo.

Vsus hujus cavi: masticationi dicatur, & deglutitioni alimentorum; aëri ad respirationem necessario transitum concedit; dicatur demum & loquelæ distinctæ, & lactationi.

L I N G V A.

LINGVA pars est mollis, carnosæ, in omnem sensum mobilissima, inferius in cavo oris posita, organon gustus verum constituens.

Dividitur

1) in *basin*, seu partem posticam, ossi hyoidi, & mediante hoc eodem ossibus vicinis, & musculis adnexam.

2) In *corpus*, seu partem mediam, aut majorem, antè in *apicem* liberum, & mobilem terminatam.

3) In *dorsum*, seu faciem superiorem; in qua notetur *linea mediana* per medium excurrens, linguam bifariam dirimens, & posterius *foramen* sic dictum *cæcum*, glandulis undique oblitum, liquidum suum mucosum illuc exonerantibus.

4)

4) In *faciem inferiorem*, ope *ligamenti sublingualis*, quod, uti *frœnulum labiale*, productio cutis est, partibus infra positis adnexam.

5) In *partes duas laterales*, *ligamentis membranosis maxillæ inferiori* adnexas.

Fabrica linguæ interna componitur fibris muscularibus, quas in MYOLOGIA vidimus. Fibræ linguæ musculares omnes amittuntur tunica, productione epidermidis, reticuli subjecti hic loci imprimis crassi malpighiani, tunicaque faciei, & oris; est vero tunica hæc eadem ob copiosam salivam, & glandularum plurimarum, faciei dictæ tunicæ internæ subjectarum mucosum laticem, nunquam non mollis, & madescens. In tunicæ dictæ superficie superna, dorso linguæ, imprimis vero apici, marginibusque binis lateralibus inductæ, corpuscula plurima conspiciuntur verrucas referentia, sub *papillarum nervearum lingualium* nomine nota.

Figura papillarum harum varia est; tres tamen earum species potissimum distingui solent.

Quæ ad primam referuntur, maximæ sunt: septem circiter, aut novem, in parte linguæ postica circa foramen cœcum dispositæ cernuntur; figura pyramidem, aut *conum inversum* refert; radice donantur tenui, acuta, crassiori, obtusoque apice; constant vasculis pluribus exiguis, & nervis, textus cellularis interventu invicem nexis; superius in medio foraminulis videntur pertusæ, aut saltem excavatæ.

Alteram classem papillæ constituunt *fungiformes*; minores prioribus, & teneriores sunt; mediam imprimis dorsi linguæ partem tenent; anteriora versus magnitudine sensim decrescunt; ad linguæ accedentes apicem confertiores adsunt; figura harum cylindro fere similis, in apicem obtusum, hemisphæricum superiora versus terminato.

Ad tertiam classem *conoideæ* referuntur papillæ; basis harum latior adhæret linguæ, apex sursum tendens cernitur tenuior; copiosissimæ hæ præ reliquis omnibus adsunt; insident imprimis parti solum anteriori linguæ, & apici, ubi inflexæ nonnihil cernuntur; obsident quædam & foramen linguæ cœcum.

Papillis nunc dictis omnibus interjiciuntur papillæ aliæ filiformes cylindraceæ, ad eandem pertinentes classem; tegit has, uti & priores membrana semidiaphana, albicans; productio epidermidis faciei hæc est, ac in hominibus nunquam, uti in animalibus, perforata deprehenditur.

Arteriæ linguæ copiosæ sunt; maxima, quæ *lingualis*, seu *ranina* audit, enascitur ex carotide externa, ac in facie inferiori linguæ ad apicem hujus usque excurrit. Minores aliæ enascuntur ex ramis art. labialis.

Venæ confluunt in venam lingualem magnam, quæ sanguinem suum tradit jugulari externæ.

Nervi oriuntur ex pari octavo, nono, & quinto; motui, sensuique dicantur linguæ.

Vsus linguæ. Loquelæ sacra est, masticationi, deglutitioni, suctioni, & gustui.

N A S V S.

NASVS apte dividitur in *partem* prominentem *externam*, & *latens cavum internum*.

Pars prominens, externa, seu *nasus* proprie sic dictus triangularis est, & componitur musculis variis, superius ossibus, inferius cartilaginibus, quæ in universum corporis vestiuntur integumentis communibus.

Externe in naso veniunt consideranda:

1) *Radix*, seu pars superior, fronti adnata.

2)

2) *Dorsum*, seu prominentia media, secundum illius longitudinem decurrens.

3) *Apex*, seu pars inferior, subrotunda, &

4) *Alæ*, seu *pinnae*, partes nasi laterales, mobiles.

Ossa, & *musculos* suis locis jam consideravimus.

*Cartilagine*s nasi quinque sunt; nimirum:

1) *Media*, partem septi narium cartilagineam constituens.

2) Ex utroque latere septi duæ ponuntur; quarum *anteriores*, antrorsam inflexæ, unione sua apicem nasi, *posteriores* vero alas nasi producunt.

Pars nasi *interior* cavum exhibet amplum, profundum, irregulare, exortum antè ope binorum orificiorum ab alis nasi, posterius orificiis totidem in cavum faucium apertum.

Componitur ossibus multis; ac interventu septi perpendicularis tum cartilaginei, tum ossei dirimitur in binas cavitates; quarum capacitas cavitatibus multis accessoriis ossis frontalis, ethmoidei, sphænoidei, & maxillaris superioris, tum & laminis spiritalibus concharum & canale lacrymali augetur.

Cavitates nunc enumeratæ omnes vestiuntur tunica molli, spongiosa, rubicunda, periostio firmiter undique adnata, ab Anatomicis *tunica pituitaria* dicta.

Tunica hæc eadem gaudet nervis plurimis odoratum perficientibus, vasisque, mucum secernentibus; forsan & glandulis dotata est muciparis.

Nervi in naso nudi fere hærent; dicatum naso totum par nervorum cerebralium primum est, una cum ramis variis a quinto pari enatis.

Arteriæ veniunt ab art. maxillari interna, & carotide interna.

Venæ terminantur in venas orbitales & temporales, hæc vero in jugulares internas.

Vsus.

Vsus. Dicatur nasus olfactui, distinctæ loquelæ, & respirationi eo expeditiori. Nasus externus ad venustatem plurimum facit. Pili, seu vibrissæ, quibus foramina antica narium obsidentur, insectis viam in nares præcludunt.

A V R I S.

AV R I S ab Anatomicis dirimitur in tres regiones.

- 1) In *auriculam*, & *meatum auditorium externum*.
- 2) In *cavitatem tympani*.
- 3) In *labyrinthum*.

I.

AV R I S **E**X T E R N A componitur cartilagine ovali, cujus facies posterior caput versus convexa; anterior concava, cavitatibus multis, flexisque prominentiis prædita est; singulas ordine jam videbimus.

1) *Helix* gyrum auris extimum faciens, oritur supra lobulum, incurvus adscendit, tum vero deorsum, ac introrsum torquetur; evanescit demum in linea prominenti concham bifariam dirimente.

2) *Anthelix* priori subjacet; & componitur binis eminentiis, in angulum acutum coëuntibus: helici, & anthelici interponitur excavatio, *scapha* dicta.

3) *Concha* cavum est, anthelici subjectum, & uti prius dictum fuit, ab helice bifariam sectum; pars ejus inferior, profundior terminatur in meatum auditorium.

4) *Tragus* prominentia est parva, cartilaginea, anterior, extremitati anteriori helicis adnexa, pilis parvis plurimis obsita, introitum in meatum auditorium quodam modo defendens.

5) *Antitragus* prominentia similis est, sed minor, priori obposita, cartilaginea; producitur ab inferiori parte anthelicis, parteque concava conchæ.

6) Pars inter tragus, antitragum, & initium meatus auditorii propendens versus inferiora, mollis, *lobulus auris* dicitur; membranaceus lobulus est, plurima pinguedine farctus; pars hæc antiquissimo æque, ac nostro ævo diversa ratione ornatur.

Fabrica auris externæ componitur cartilaginibus, membrana tenui, textuque celluloso, cui glandulæ multæ sebaceæ inhærent, obductis.

Adnectitur præterea *ligamentis binis* ossi temporum, quorum anterius oritur a basi proc. mastoidei, & terminatur in latere antico meatus auditorii, & cartilagine auris externæ; posterius enascitur supra proc. mastoideum, & basi adfigitur meatus auditorii.

Musculos, auris externæ motui sacros examinavimus in MYOLOGIA.

Meatus auditorius canalis est tum cartilagineus, tum, (in homine adulto maximam partem) osseus, ex integro fere diametri cylindrici, a trago, & concha incipiens, introrsum, & nonnihil antrorsum flexus, ad membranam tympani terminatus; anterius, & posterius amplior est, in medio contractior; in infantibus recens natis, ac in fœtu canalis hic totus cartilagineus est, & extremitati solum adhæret circulus imperfectus osseus, cui superintenditur membrana tympani; successu temporis circulus nunc dictus una cum parte canalis interna ossescit; pars vero anterior, & externa in adultis etiam conchæ adinstar, cujus productio est, cartilagineam retinet indolem. Canali toti superintenditur membrana tenuis, sensilissima, epidermide tecta, inferius textus cellularis ope meatui auditorio adfixa; textui dicto, imprimis loco anteriori glandulæ insident plurimæ conglobatæ flavicantes,

vicantes, succum tenuem, flavum, sub nomine *ceruminis* notum, fecernentes.

Annulus osseus extremitati meatus acoustici adpositus, cum osse petroso in unum sensim concrefcens, sulco gaudet, cui undique adnata est membrana, extremitatem internam meatus auditorii a cavo tympani sejungens, ob figuram, quam refert, *membrana tympani* dicta.

Membrana hæc ipsa ovalis, infra medium versus cavum tympani convexa, versus meatum auditorium concava; supra medium autem convexa versus meatum, concava versus cavum tympani.

Situ nonnihil obliquo ponitur, ea ratione, ut pars superior antrorsum, inferior postorsum magis tendat. Componitur, ex observatis Anatomicorum, *laminis* sex; prima, & extrema productio est epidermidis; secunda productio membranæ meatum acousticum vestientis; tertia textus cellularis, in quo vasa elegans faciunt rete; quarta splendens, tenuis, diaphana enascitur a periostio meatus; quinta textus cellularis est, simili vasorum plexu, uti tertia, donata; sexta demum, eaque intima proficiscitur a periostio cavi tympani.

Etsi vero membrana hæc laminis componatur pluribus, satis tamen tenuis est, a malleo, hujusque musculis intensa, ac sensilissima, uti inflammationes id evincunt.

Fabrica, situs, & sensilitas membranæ hujus aptam eandem reddunt, ut undas sonoras aëris per meatum auditorium in eam irruentes, excipiat, & in aurem internam ulterius deducat.

Foramen, quo membranam tympani, plures perforatam crediderunt, in statu naturali præsens nunquam est.

II.

CAVUM TYMPANI, seu tympanum nomen suum deducit a figura, quæ tympano bellico similis est. Insculptum est ossi petroso; figura irregulariter rotunda est, ut longitudo profunditatem superet; cingitur anterior a membrana tympani, posterior in parte interiori ossis petrosi a septo osseo, cuius ope sejungitur a labyrintho, seu intima auris regionæ; septum hoc pertusum est binis foraminibus, ob figuram suam nomine *fenestræ ovalis*, & *fenestræ rotundæ* insignitis: paries osseus, inter fenestras ambas in tympanum prominens *promontorium* dicitur; cavum tympani in binas dirimit partes.

Anterior & superiori loco cavum tympani perforatur a tuba acoustica, quam exactius mox contemplabimur; sub tuba meatus adest, quem carotis transit; superius, & posterior plurimæ conspiciuntur cellulæ, & foveæ, ex postica parte cavum tympani in adultis augetur cellulis contiguus processus mastoidei, quæ in fœtu nondum adsunt; cellulæ hæ omnes plurimum ad soni repercussionem faciunt. Tunica vasis copiosissimis instructa, trans tubam adveniens, a membrana pituitaria narium exorta, superficiem totam internam obducit.

In *cavo tympani* consideranda veniunt:

1) *Ossicula quatuor auditus*, quorum nomina a figura quam referunt, fuerunt deducta.

Malleus, a capite crassiore, incudi unito, sic dicitur: caput hoc rotundum locatur in parte superiori, & externa tympani, lineis donatur prominentibus binis, sulco per medium divisis; terminatur in *collum* angustius, processus binos emittens, quorum *brevior* crassior, conoideus membranæ adhæret tympani; *longior*, complanatus incumbit canali tubæ. Ex

ipso collo descendit inter laminas membranæ tympani ad hujus usque medium manubrium longum, extremitate latiori, & extrorsum nonnihil versa ibidem loci adligatum.

Musculos mallei vidimus in MYOLOGIA.

Incus; retro malleum locatur, cujus capiti crassiori superficie latiori, binis excavationibus, & prominentia media gaudente connectitur articulatione mobili: caput hoc incudis terminatur in bina crura, *brevius* unum, alterum *longius*. Crus *brevius* introrsum excurrit ad parietem osseum tympani, ac ope ligamenti extremitate sua duplici parieti huic adhærescit: *longius* eadem cum malleo directione ad medium fere cavi tympani descendit, ac extremitate sua introrsum curvata officulum ovale excipit.

Officulum subrotundum, ovale, ex uno latere convexum, & altero complanatum est; unitur cum incude, & stapede.

Stapes obliquo, & horizontali fere positu introrsum, versus promontorium locatur: basis lævigata, plana supra promontorium adaptatur foramini, quod antea *fenestram diximus ovalem*.

Ex basi hac eadem oriuntur crura bina incurva inæqualiter longa, quorum extremitates inflexæ coëunt in capitulum excavatum, anterius membranam tympani respiciens, officulum subrotundum excipiens, & mediante hoc necitur cum crure longo incurvo incudis.

Crura ambo donantur interius sulco, ex quo undique enascitur membrana, basi stapedis adnexa.

Musculum stapedium vidimus in MYOLOGIA.

Officula nunc dicta quatuor obducuntur peristio, membranulis invicem necuntur.

2) *Tubæ acausticæ*, seu *Eustachianæ*; quævis ex aure sua enascitur ope semicanalis ossei ab extremitate

tate antica tympani, ante promontorium enascitur; excurrit tum antrorsum, & simul introrsum, per hunc vero decursum sensim angustior fit; &, perforato osse petroso, terminatur apertura aspera inæquali in meatum partim cartilagineum, partim membranaceum, sub exortum angustum, per decursum sensim ampliorem, antrorsum, & introrsum excurrentem, demum vero retro palatum molle prope alam externam proc. pterygoidei orificio amplo, & obliquo in scapham abeuntem. Per orificium hoc ipsum membrana pituitaria narium, tubæ faciem internam obducens, tympanum ingreditur. Tuba ipsa nunquam non patet, hinc per eam liber transitus est aëri in tympanum, humorum liber exitus ex tympano in fauces: per hanc eandem viam Chirurghi recentiores in quibusdam aurium morbis requisitas faciunt injectiones.

Aër tympanicus ad auditum requisitus.

3) *Fenestra ovalis*, uti antea dictum fuit, posteriori loco in medio fere septi ossei supra promontorium, hinc e regione fere membranæ tympani cernitur insculpta. Tegitur basi stapedis, ac in vestibulum ducit.

4) *Fenestra rotunda* in parte inferiori, & postica septi nunc dicti hæret; membranula clauditur propria; in cochleam ducit.

5) *Chorda tympani* nervus est, qui chordæ adinstar per medium faciei internæ membranæ tympani descendit, a portione dura nervi auditorii enatus.

III.

In regione auris intima, ob anfractus plures variosque, *labyrinthus* dicta notentur:

1) *Vestibulum*, cavum exhibens rotundum, in osse petroso retro tympanum positum; in cavo hoc

tres cernuntur cavitates contiguæ, quarum inferior subrotunda, superior elliptica, tertia canali similis est. Vestibulum totum amicitur membrana molli nervea; ea tamen ratione, ut membrana hæc eadem ope halitus subtilis, in liquidum demum coëuntis a parietibus ossis maneat sejuncta. In vestibulum aperiuntur fenestra ovalis, orificia quinque canalium trium semicircularium, meatusque nervorum, ac articularum.

Cavitas hæc tota repleta est aqua, per canalem specialem adlata; canalis hic oritur a sinu transverso duræ meningis, substantiam ossis transit, & orificio speciali, *aquæductus vestibuli* dicto, in cavum vestibuli hiat.

2) *Canales tres semicirculares* hærent postrosum, & superius in osse petroso.

Componuntur cortice osseo duro, circulum dimidium magnitudine nonnihil superant, in medio angustiores quam in extremitatibus, interne vero cavi sunt.

Vestiuntur interne periostio, ac pulpa nervea replentur; utrisque latex aquosus interponitur.

Nomen a situ obtinuerunt; *superior anterior* oblique ponitur, & cum osse petroso angulum rectum constituit; *inferior postremus* reliquorum maximus situm perpendicularem obtinet; *extimus* minimus cum osse petroso situ ponitur horizontali. Canales hi aperiuntur omnes in vestibulum, quinque tamen nonnisi orificiis, quum ostium internum canalis superioris una cum ostio superiori canalis inferioris in orificium commune hiat.

Quum substantia interior ossis petrosi in fœtu raræ valde, spongiosæque texturæ sit, in adultis vero sensim indurescat, & cum canalibus dictis in os unicum abeat; ratio adparet, cur canales semicirculares

in

in fœtu facillime, in adultis autem vix ab osse petroso sejungi queant.

3) *Cochlea* nomen a figura sortita fuit. Hæret in osse petroso antè canales semicirculares ea ratione, ut basis postrosum, apex antrorsum & extrorsum spectet.

Componitur gyris binis cavis cochleideis, & axi ossea conoidea, in medio per canalem divisa, ac per totam longitudinem, uti & in basi foraminulis plurimis exiguis pertusa. Cochlea secundum cavitatem suam septo tum membranaceo, tum osseo, *lamina spiralis* dicto, in duos semicanales, qui *scalæ* audiunt, dirimitur; scala interna posterior terminatur in *fenestram rotundam*, & *scala* dicitur *tympani*; anterior aperitur in vestibulum, atque hæc *scala vestibuli* appellatur.

Ex apice cochleæ enascitur cavitas alia infundibuliformis, mediante orificio exiguo cum utraque scala communicans.

Lamina spiralis oritur ex axi ossea, tum exteriora versus in membranam abit, & a periostio interno cochleæ undique obvolvitur.

Cochlea tota repletur aqua, per canalem osseum adducta; canalis hic oritur ex cavo cranii opè orificii specialis, os petrosum perforat, in scala tympani prope fenestram rotundam terminatur, & *aquæductus vestibuli* audit. Distribuuntur præterea per cavum cochleæ fibræ nervæ mollissimæ, a pari nervorum septimo ortæ.

Nervi externi, & interni auris veniunt maximam partem a pari septimo, ad excavationem proficiscuntur in parte interna, & superiori ossis petrosi retro labyrinthum sitam, quæ *meatus acoustici interni* nomine venit, ac in ramos dirimuntur binos, quorum minor *portio dura*, major *portio mollis* appellatur.

Portio dura transit per foramen, superius excavationi nunc dictæ ossis petrosi insculptum; per canalem ibi loci proprium transiens sub initium adscendit parum, dein recta progreditur, ac retro tympanum, & stapedem demum descendit. Canalis hic sub nomine *aquæductus Fallopii* notus est. *Portio dura* per hunc decursum specialem ramum mittit in tympanum, inter malleum, & incudem sursum adscendentem, per fissuram, retro articulationem maxillæ inferioris ex tympano egredientem, & nervo linguâli unitum. Pars reliqua nervi hujus per foramen stylomastoideum egreditur, ac in aurem externam, parotidem, magnam partem faciei, tempora, & partem posticam capitis ramos multos mittit, qui cum ramis tribus quinti paris, cum pari octavo, & nervo intercostali magno conjunguntur.

In *aurem externam* præter portionem duram veniunt & nervi alii antèrius a ramo tertio paris quinti, postèrius a nervo secundo, & tertio cervicali enati.

Portio mollis portione dura major est; oritur ex medulla oblongata, & ventriculo cerebri quarto; prioris adinstar excurrit ad excavationem ossis petrosi, & sub hoc eodem per foramina fundo excavationis hujus insculpta exigua ramulos suos mittit in vestibulum & cochleam. Ramuli ad vestibulum properantes distribuuntur per piam meningem, & arachnoideam membranam, quibus facies interna vestibuli, & canalium semicircularium obducitur, ac una cum membranâ nunc dictis expansionem generant, cujus ope vestibulum in partem superiorem, ac inferiorem dirimitur; hanc ob rationem COTTUNIVS expansionem hanc *septum dixit nervosum*: observavit idem Vir clarissimus, ramos in cochleam abeuntes exire per foramina axes cochleæ, ac fibras horum tum per scalam tympani, tum per septum cochleæ dispergi.

Arteria

Arteriæ auris externæ oriuntur ab art. temporali, & ab art. postica auris externæ. *Arteriæ membranæ tympani* veniunt ab eadem art. temporali. *Arteriæ cavæ tympani* veniunt a carotide interna, a ramo art. duræ meningis e. f. p.

Ab art. maxillari interna pariter proficiscitur ramus in tubam, & meatum auditorium externum. *Arteriæ vestibuli, canaliculi semicircularium, & cochleæ* rami sunt arteriæ duræ meningis, & arteriarum vertebraliū.

Venæ similes sunt arteriis, terminantur in jugulares internas.

Detexit Cl. COTTUNIVS & *vasa lymphatica*, ex vestibulo & cochlea per canalem specialem in cavum cranii excurrentia.

Vsus auris. Motus tremulos aëris excipit, ad officula auditus, exhinc vero per partes auris intimas omnes in cerebrum usque deducit; atque hac ratione organon auditus constituit.

O C V L V S.

OCVLI in hominē, ac animantibus plerisque anteriorius sub fronte cavo osseo, *orbita* dicto, insident.

Circa oculum notentur:

1) *Partes* ad oculum pertinentes conservationi hujus, motui, ac perfectioni famulantes.

2) *Organon visus*, seu *oculus proprie sic dictus*, aut *bulbus oculi*.

Partes ad oculum pertinentes sunt:

1) *Supercilia*.

2) *Palpebræ*, cum suis *cartilaginibus tarsis*, & *ciliis*.

3) *Puncta lacrymalia*, *ductus lacrymales*, & *sacculus lacrymalis*.

- 4) *Glandula lacrymalis.*
- 5) *Caruncula lacrymalis.*

I.

SVPERCILIORVM sub nomine venit stratum pilorum brevium, denso agmine sibi superinpositorum, in parte ossis frontis infima arcum orbitæ prominentem superiorem obsidentium. Adhærent arcui huic basi radicem nasi, apicibus canthum externum spectantes; hinc musculorum suorum ope sursum, & deorsum, duci, simul & corrugari queunt.

Vsus. Radios irruentes lucis debite frangunt, pulverem deciduum, sudorem per frontem defluum ab oculo arcent; pathemata animi partim exprimunt.

II.

PALPEBRÆ productiones binæ mobiles, semilunares cutis faciei sunt, oculum obtegentes. Oculus quivis gaudet duabus, *superiori* una, altera *inferiori*; superior major, mobilior; inferior minor est, ac musculorum vicinorum magis, quam sibi propriorum auxilio movetur. Vbi palpebræ invicem coeunt, utrinque generant angulum; naso propinquus *internus*, & *major*, obpositus *externus* & *minor* oculi *canthus* dicitur.

Externa palpebrarum superficies constat integumentis corporis communibus, hic loci tenerioribus, tenuioribus, sensuque exquisitiore præditis; internam constituit membrana subtilis, rubra, sensilissima, anteriorem bulbi oculi partem obtegens, hinc & *membrana adnata*, seu *conjunctiva oculi* dicta. Vtrisque interjicitur in margine palpebræ superioris, & inferioris lamella arcum referens, cartilaginea, *Tarsus oculi* vocata. Palpebræ superioris tarsus major, magisque flexus est. Marginem externum tarforum obtegit

tegit cutis palpebrarum, quæ hic firmior, crassiorque est: ex hac enascuntur pili, extrorsum flexi, breviores, clausis palpebris sese invicem interfecantes, ciliorum sub nomine noti. Impressionem radiatorum lucis, prout requiritur, dirigunt, & infecta ab oculis arcent. In margine interno dispositæ hærent secundum longitudinem cujusvis palpebræ glandulæ parvæ conglobatæ simplices, sebum mollius, unctuosum secermentes, *glandulæ sebaceæ Meibomianæ* dictæ.

Palpebræ ob nervos copiosos, quos a ramo primo, & secundo paris quinti, ac a portione dura paris septimi adquirunt, sensilissimæ sunt.

Arteriis, venisque copiosis donantur; adveniunt ab vicinis partibus.

Musculi palpebrarum in MYOLOGIA fuerunt expositi.

Vsus palpebrarum. Oculos durante somno tegunt; pulverem, aliaque corpuscula exigua ab oculis nunquam non abstergunt, eosque a radiis valide nimis irruentibus lucis tutantur.

III.

PUNCTA LACRYMALIA orificia bina sunt exigua, quorum in quavis palpebra unum ad extremitatem cartilaginis tarsi prope canthum oculi internum conspicitur: ex quovis intra cutem ductus specialis deorsum, & nonnihil introrsum progreditur, unus horum ductuum infra, alter supra carunculam lacrymalem excurrit; retro hanc in saccum confluent communem, qui *saccus lacrymalis* dicitur. Inhæret hic foveæ, ab osse unguis, & canale ossis maxillaris superioris efformatæ; interne obducitur tunica firma, tendinea, ac membrana pituitaria narium, terminatur demum in *canalem* osseum sic dictum *nasalem*. De-

scendit hic postroorsum nonnihil flexus, in nares, ac sub osse conchiformi inferiori in eas aperitur.

Vsus horum ductuum omnium. Ad deductionem lacrymarum in nares dicantur.

IV.

GLANDVLA LACRYMALIS glandula durior, granulosa est, in orbita supra canthum externum excavationi speciali ossis frontis incumbens; descendunt ex ea ductus excretorii sex pluresve in facie interna tunicæ adnatæ palpebrarum descendentes, eam ad distantiam linearum aliquot a tarsis totidem orificiis perforantes, sicque inter palpebras & oculi bulbum liquidum aquosum subsalsum, *lacrymarum* sub nomine notum exonerantes. Exhalant præterea extremitates arteriolarum minimarum per totam superficiem tunicæ conjunctivæ humorem, qui una cum latice lacrymali, & smegmate glandularum Meibomianarum, oculum, & faciem internam palpebrarum nunquam non madefacit, lubricat.

V.

CARVNCVLA LACRYMALIS tuberculum cernitur longiusculum, extrorsum conoideum, rubrum; cantho interno oculi ante ipsam palpebrarum conjunctionem incumbens.

Exsurgit ex complicatione tunicæ palpebrarum internæ; glandulas multas sebaceas continet, ex quibus pili minimi propullulant.

Vsus. Palpebras in canthis ab invicem removet; in parte hac palpebrarum, ubi glandulæ Meibomianæ deficiunt, ejus glandulæ liquidum secernunt lubricans; lacrymas inprimis in puncta lacrymalia deducit.

Circa *bulbum oculi* notentur;

Bulbus inhæret in parte superiori faciei cavo osseo, ex septem ossibus in OSTEOLOGIA descriptis composito: inter cavum hoc & bulbum sita est pinguedo plurima, una cum *musculis* bulbi, in MYOLOGIA expositis.

Figura globosa est:

Fabrica: constat *tunicis* pluribus, ac *humoribus*, *tunicis* inclusis.

Tunicæ sunt:

I) *Extima, dura*, ob suam firmitatem *sclerotica* dicitur; alba hæc est, tenax, & densa; posterius crassior, anterieus tenuior est; anterieus aperturam intercipit, cui tunica alia diaphana valde, circularis, magisque convexa undique adhærescit, laminis multis conflata; ob pelluciditatem suam *cornea* vocata. Cornea densa pariter, robustaque est, infensilis, ac vi diaphaneitatis suæ radiis lucis in oculi centrum intimum transmittendis apta nata. Inter laminae corneæ occurrit semper humidum diaphanum aquosum, per speciales poros exhalandum, perque alios denuo resorbendum.

Tunica hæc ipsa una cum parte antica scleroticæ tegitur a tunica adnata, membranæ internæ palpebrarum productione; utrisque interjicitur textus cellulofus, vasis rubris & diaphanis refertissimus, inflammationum oculi plerarumque sedes.

Tunica altera *choroidea* est; subjacet scleroticæ, eique vasorum interventu plurimorum adfigitur; facies interna speciali voce *membrana Ruyschiana* vocatur, quum Ruyschius adsumserit, choroideam ex laminis binis esse compositam.

Constat arteriolis plurimis exilissimis, ac venulis; una cum sclerotica antrorsum ad initium usque corneæ progreditur, ubi textu plurimo celluloso scleroticæ sub forma limbi albi, *orbiculus ciliaris* dicti adhærescit;

hærescit; recedit tum a sclerotica, & cornea, ac ab hoc ipso orbiculo undique deorsum, ac introrsum recta progreditur, hacque ratione discum rotundum format, cujus facies anterior ob diversos quibus gaudet colores *iris* audit; posterior facies, quam prius *membrana Ruyschiana* nomine notavimus, a colore, quo inducta est, nigro *uvea* adpellatur. Discus dictus in medio perforatus est foramine, quod *pupilla* dicitur, pro diversis circumstantiis contractili, aut dilatabili.

In *iride* conspiciuntur striæ multæ majores, minoresque, in diversis hominibus diverso colore præditæ, ac radiatim a margine externo iridis ad oram ejus usque internam, & minorem excurrentes; dividuntur ibi in ramos duos, circa pupillam in circumulum coeuntes, ex quo aliæ denuo similes striæ in marginem usque externum pupillæ abeunt. Striæ hæc una cum circulo dicto a plerisque Anatomicis pro fibris habitæ fuerunt muscularibus, quibus pupilla diduceretur, & contraheretur. Contracta pupilla striæ omnes rectæ sunt, dilatata eadem, in serpentinis convolutæ gyros.

Facies postica choroideæ, seu *uvea* colore nigro undique inducta est, facile abluendo; abluto colore hoc, eadem fere, uti in priori, ratione striæ conspiciuntur versus pupillam radiatim excurrentes.

Retro uveam oriuntur ex choroidea ab orbiculo ciliari antea dicto striæ albæ, complicatæ, colore nigro undique inductæ, exhinc postorsum excurrentes, ac membranæ subtili substantiæ vitreæ, ubi lenti inferitur crystallinæ, firmiter adligatæ; extremitates earum fluctuantes ad ipsam usque disseminantur lentem crystallinam, cui incumbunt, non tamen ad crescunt; vocantur omnes simul sumptæ nomine *ligamenti ciliaris*, vel seorsim spectatæ *processus* dicuntur *ciliares*.

ciliares. Ex observatis recentissimis productione videntur absolvi vasculorum minimorum choroideæ.

Vsus, uti videtur, in eo versatur, ut tum lentem firment crystallinam, tum radios lucis ex lateribus irruentes absorbeant, ne visus evadat perturbatus.

In foetu membrana adhuc adest alia, subtilissima, cinerei coloris, ex margine interno iridis orta, pupillam ex integro obtegens, hinc *membrana pupillaris* dicta.

Tunica tertia, & *intima oculi retina* vocatur, quæ pro expansione pulpæ nervorum opticorum habenda, vasisque plurimis instructa est. Oritur loco posteriori a nervo optico; facies posterior ex integro pulposa cohæret cum membrana Ruyfchiana; anterior, seu interna, vasis magis composita, substantiæ vitreæ immediate incumbit, ad ligamentum usque ciliare antrorsum fertur, eique adhæret, exhinc, uti nonnulli autumant, versus lentem progreditur, hujusque limbo adcrefcit.

Tunica hæc ipsa genuinum visus est organon.

HVMORES OCVLI, ex quibus tamen aquosus nonnisi ob fluiditatem suam nomen hoc meretur, quum secundus firmum, tertius molle corpus sit, enumerantur sequentes:

I) *Humor aqueus* humor est fluidissimus, diaphanus, interstitium magnum inter corneam, & pupillam, uti & spatium triangulare parvum ab uvea ad lentem usque productum explens. Interstitia hæc ipsa vocantur a quibusdam *camera oculi*, prius, idque majus *cameram anteriorem*, posterius minus *cameram posteriorem* dicunt.

Humor hic aquæ similis est, deperditus facile refarcitur; sub majori frigore in glaciem congelasce-re valet.

Humor

2) *Humor vitreus*, seu potius *substantia vitrea*, aut *corpus vitreum* corpus molle est, rotundum, diaphanum, faciem totam excavatam retinæ ad uveam ferre, hinc maximam oculi partem explens; antèrius foveola donatur, cui lens crystallina incumbit.

Componitur cellulis multis, invicem patentibus, quarum interstitia liquido repleta sunt diaphano, aquæ simillimo, paulo magis tamen densiori; deperditum hoc majori copia, non amplius refarcitur.

Ambit externe substantiam vitream membrana subtilissima pariter diaphana, *membrana hyaloidea* dicta: finditur hæc ibi loci, ubi ligamentum ciliare substantiæ vitreæ incumbit, in laminas binas, quarum anterior, posteriori derelicta, a substantia nunc dicta secedit, oram lentis extimam superfcandit, ac supra hanc eandem in facie anteriori convexa lentis margini hujus adhærescit: Anatomici nonnulli *Zona ciliaris* nomen eidem tribuunt. Lamina postica tunicæ hyaloideæ cum præcedente simul non excurrunt, sed corpori vitreo manet unita, ac antrorsum super corpus hoc ad faciem usque lentis posticam descendit, lentisque membranæ propriæ pariter ibidem loci connectitur.

Inter laminas hæc binas anteriori loco, ubi anterior a posteriori secedit, interstitium remanet cavum triangulare, in statu naturali vapore humido madidum, ab inventore *Canalis Petitianus* dictum.

Arteriæ humoris vitrei oriuntur ex arteria centrali retinæ.

Vsus illius est, ut frangat radios lucis, ac unitos in posticam usque oculi partem promoveat; tum & oculi tunicas expansas retineat.

3) *Lens crystallina* a figura, & diaphaneitate sic dicta, firmum corpus est, glaciato gelatinoso analogum, hinc inter humores propriè dictos non reponendum.

nendum. Hæret anteriora versus pupillæ directe ob-
 posita in excavatione sphæroidea humoris vitrei lens
 crystallina; humori vitreo, uti antea dictum fuit,
 ope tunicæ hyaloideæ, a qua undique cingitur, est
 adnexa. Lentis adinstar superficiebus binis convexis
 donatur, quarum anterior planior, posterior conve-
 xa magis est. In fœtu, & neonatis sphæram vix non
 refert; in adultis tamen complanata magis redditur.
 Amicitur tunica propria, firma, crassa, diaphana,
 posteriori loco a tunica hyaloidea cincta, lenti ta-
 men nullibi adcreta; *capsula hæc audit lentis crystal-
 line.*

Componitur lens hæc laminis pluribus, sibi
 mutuo inpositis, diaphanis, interiora versus magis
 ad sese accedentibus, filamentis cellularibus subtilissi-
 mis conjunctis; inter laminas hæc humor subaquo-
 sus reconditur.

Lens in statu naturali, & in junioribus diapha-
 na maxime est, nec ullo instructa colore; in seni-
 bus flavescens nonnunquam occurrit; color hic cen-
 trum sub initium obsidet, demum & ad peripheri-
 am expanditur.

Idem fit, dum opaca redditur, & cataracta,
 cujus sedes in lente crystallina est, enascitur.

Posteriori ex parte in lentem proficiscitur arteria,
 quæ ramus est arteriæ centralis retinæ, & ex axi hu-
 moris vitrei egreditur; tum & ramuli ligamenti ci-
 liaris.

Vsus. Radium lucis in ea magis adhuc, quam in
 humore aqueo franguntur, tumque substantiæ tra-
 duntur vitreæ.

Arteriæ oculi sunt:

Art. ophthalmica a carotide interna orta, rami-
 ficationibus variis per palpebras, glandulam lacryma-
 lem, musculos, & tunicam choroideam dispersa.

Art.

Art. centralis retinae ramus est art. ophthalmicæ, in pulpam usque nervi optici penetrans, cum illo oculum subiens, ac furculis exiguis in retina evanescentes.

Art. ciliares oriuntur pariter ex art. ophthalmicis; distribuuntur per tunicam choroideam, & uvulam, ubi prope orbiculum ciliarem circulum efformant.

Venæ confluunt omnes in truncum unicum *venæ ophthalmicæ* nomine notum; terminatur hæc in jugulares externas.

Nervos opticos per retinam ex integro distributos organon visus genuinum constituentes totum par secundum nervorum opticorum constituit. Oculum non per ipsam ejus axin, sed lateraliter per *foramen* sic dictum *opticum* subeunt.

Ramus ophthalmicus ramus primus paris quinti est; adveniunt præterea rami varii a pari tertio, quarto, & sexto, qui tum per oculum ipsum, tum per partes ad oculum pertinentes distribuuntur.

Notari adhuc inprimis meretur:

Ganglion ophthalmicum, enatum ex unione rami nervi ophthalmici, rami alius tertii paris, & nervi optici.

Vsus oculi. Radii lucis ejus ope excipiuntur, franguntur, in focum adunantur, ac ratione hac objecta externa in retina depinguntur, imago vero depicta in encephalon ulterius propagatur.

In hominibus, cornea, lenteque convexioribus donatis, radii citius franguntur, hinc citius coadunantur; secedunt dein ab invicem, & puncta plura retinae tunicæ feriunt; ratio hæc est, cur homines tales objecta solummodo propinqua melius percipiant; *myopum* his inditum fuit nomen; malo inderi queunt ope *vitri concavi*. Si vero cornea, &

lens

lens planior sit , radii non adeo franguntur , atque tales , *presbyopes* dicti , remota solum manifestius distinguunt objecta. Remedio his est *tubus nigro pigmento inductus* , aut *lens convexa*.

CEREBRI MENINGES; CEREBRVM, ET CEREBELLVM; MEDVLLA OBLONGATA, ET SPINALIS.

CEREBRI MENINGES.

CEREBRVM externe ambit tegmen osseum, in fœtu tenuissimum, extensile; in adultis crassum, & firmum; contentum encephalon a læsione quacunque defendens.

Ossa , queis tegmen dictum , seu galea cranii componitur , in OSTEOLOGIA fuerunt enumerata.

Præter galeam vero hanc eandem cerebrum vestiunt & membranæ sequentes :

- 1) *Dura meninx* , seu *dura mater*.
- 2) *Arachnoidea*.
- 3) *Pia* , seu *tenuis meninx*.

1) *Dura meninx* membrana est ex textu cellulari composita , robusta , firma , insensilis , ac irritabilitatis expers , sub cranio sita , laminisque binis composita , quarum exterior faciem totam cranii obducit , eique undique inprimis vero ad suturas firmiter adcreta est , hinc periostei vices explet. Lamina interna cum exteriori in multis locis connexa est ; in quibusdam vero ab invicem distant. Lamina hæc interior varias productiones , aut processus format duræ meningis ; præcipui horum sunt :

2) *Processus falciformis* enatus anteriori loco ab osse sphœnoidali, a crista galli, tum secundum futuram totam sagittalem, ac a medio ossis occipitis; antè angustus est, posteriora versus latefcit, & in apicem demum terminatur: subit hemisphæria magna cerebri, ac margine suo infimo acuto septo medio cerebri adnatus est.

In falce, tum & per meningem duram reliquam conspiciuntur fibræ multæ albæ tendinæ, irritabilitate carentes.

Septum transversum, seu *tentorium cerebelli* enascitur a spina inferiori ossis occipitis, horizontali decursu antrorsum decurrit, spinæ frontali, & processibus ephippialibus ossis sphœnoidis posticis utrinque implantatur; separat hinc cerebrum a cerebello. In medio perforatur foramine ovali, per quod, & foramen occipitale magnum medulla oblongata cerebri ex cranio egreditur.

3) *Septum cerebelli*, uti in cerebro magno falcem, breviorè tamen, refert; enascitur ex spina occipitali media, terminatur ad foramen ossis occipitis magnum; cerebellum in binas partes principes perpendiculariter dirimit.

4) *Processus bini laterales.*

Lamina externa duræ meningis exit demum per foramina omnia cranii, & processus format totidem; queis ut specialia dentur nomina, supervacuum duco.

Vsus septorum horum diversorum est, ut cerebrum tueantur, ne pars una alteri incumbere, aut eandem comprimere queat.

Considerandi adhuc sunt in dura meninge *Sinus* diversi, in quos venæ cerebri, & meningum sanguinem suum effundunt. Præcipui sinuum horum sunt:

1) *Sinus longitudinalis* : cavitas hujus non rotunda, sed fere triangularis est : enascitur antè a crista galli, exhinc adscendit, ac inter laminas ipsas processus falciformis ad finem hujus usque excurrit, ubi cum septo transversali unitur, ac in sinus binos laterales evacuatur.

2) *Sinus laterales* ; *dexter* scilicet *transversus*, & *sinister* ; hærent ambo in spina cruciata ossis occipitalis.

Dexter sinistro plerumque major est ; in sulco sibi proprio, ossi occipitis, & ossi temporum insculpto, sub initium transversum, tum vero decursu incurvo deorsum fertur ad *foramen* sic dictum *lacerum*, seu *jugulare* ; ibi loci amplior multo fit, quum recipiat sinus duos alios ; sinum nempe inferiorem petrosum, & occipitalem, de quibus mox dicemus ; exoneratur demum in venam jugularem internam.

Sinister, plerumque minor, exoneratur pariter in venam jugularem sui lateris ; recipit sinum quartum, paulo post describendum, & sinum occipitalem sui lateris.

3) *Sinus longitudinalis inferior* parvus est ; adhæret margini falcis inferiori, acuto ; excipit venas quasdam a falce, plures vero ab ipso encephalo, & corpore calloso enatas ; sanguinem acceptum effundit ope venarum exiguarum in sinum quartum.

4) *Torcular Herophili*, seu *sinus quartus* exoritur ubi falx, & septum transversum invicem coeunt ; excurrit inter laminas duræ meningis posteriora versus, sanguinem a corporibus striatis, plexu venoso, septo lucido, aliisque partibus encephali reducem excipit ; maximam partem in sinum transversum sinistram, vel & in dextrum, subin vero in utrosque simul exoneratur.

5) *Sinus quatuor petrosi* ; ex utroque latere superior unus, ac inferior adest.

Superior enascitur plerumque in extremitate maxime antica sulci ossi petroso insculpti, in hoc eodem postrosum ambulat, ac inseritur vel in sinum transversum, ubi sinus hic deorsum flectitur, aut in sinum petrosam inferiorem. Sanguinem ex venis quibusdam meningis, ac partis anterioris cerebri advenientem excipit.

Inferior situs est secundum radicem ossis petrosi; conjungitur prope processus posticos ephippiales cum socio ex altero latere adveniente, cum sinu cavernoso, & petroso superiori; excipit & venas quasdam duræ meningis; exoneratur in sinum transversum.

6) *Sinus occipitalis, posterior, ac anterior.*

Posterior excipit venas inferiores, & posticas duræ meningis, tum & quasdam ex vertebrae colli reduces; in processu falciformi cerebelli cum socio ex latere obposito adveniente in unum confluit, ac terminatur una cum hoc eodem ope orificii communis, subin & duplicis, in sinum transversum.

7) *Anterior* enascitur a præcedente; deorsum ad foramen occipitale magnum descendit, & aperitur in sinus duos inferiores petrosos; inplantatur subin ramus ejus in venam vertebralem.

8) *Sinus duo cavernosi* utrinque prope ephippium positi. Fabrica interna constat textu cellulari, sanguine farcto. Communicant cum sinu petroso superiori, & inferiori, & cum sinu occipitali anteriori; terminantur huc variæ venæ encephali; tum & nonnunquam vena iis inplantatur ophthalmica.

Per sinum quemvis cavernosum excurrit arteria carotis interna, ac tertium, quartum, sextumque par nervorum cerebralium.

Notandum præterea est, ad sinus hosce enasci nervum intercostalem magnum.

9) *Sinus rotundus* interius ephippium undique ambiens, textu pariter donatur celluloso, sanguine turgido, glandulam pituitariam circumdante; conjunctus est cum sinibus petrosi superioribus, & cum sinu occipitali antico; venas excipit ossis sphænoïdalis, & glandulæ pituitariæ.

Sinus nunc dicti omnes veræ sunt venæ, ac ab aliis venis in eo solum differunt, quod inter laminas hæreant duræ meningis, huic eidem uniantur, & robustiores multo venis communibus sint: figuram etiam sinus nonnulli triangularem potius quam cylindricam exhibent.

Vsus. Sanguinem cerebri in jugulares internas, ac interventu ramorum diversorum per foramina varia cranii transeuntium in venas alias effundunt; quum præterea numerosis adeo vicibus invicem communicent, sanguini, variis ex causis, v. g. cantu, instrumentorum inflatu, &c. in encephalon congesto commodum præbent secessum, quin ullum exin detrimentum in corpus redundet; id vero venarum aliarum ope facile adeo fieri non potuisset.

Arteriæ duræ meningis:

1) *Anteriores* adveniunt per fissuram supra orbitalem: *mediæ*, a carotide enatæ, per foramen speciale ossi sphænoïdali insculptum: posterius veniunt ab arteriis vertebralibus.

Venæ copiosæ exiguæ terminantur in sinus, hi vero in jugulares, subin simul in vertebrales.

Notandum adhuc venit hæere sub meninge dura, imprimis ad sinum longitudinalem superiorem *glandulas* multas exiguas, ovales, quarum usus nondum constat.

Nervi in dura meninge detecti nondum fuerunt.

2) *Altera cerebri tunica arachnoidea* dicitur; membrana hæc est simplex, tenuissima, diaphana,

inter duram, tenuemque meningem posita, cerebrum undique obducens. Cohæret ope textus cellulosi cum vasis sibi subjectis, & tenera meninge; hanc vero, cerebri interstitia subeuntem nunquam comitatur, sed ubique supra eam excurrit.

Flatu adactò demonstrari facile potest.

3) *Tertium cerebri involucrorum pia mater*, seu *tenuis meninx* dicitur. Componitur textu celluloso tenui, diaphano, paulo tamen densiori, ramos plurimos ad encephalon decurrentes ab art. carotidibus, & vertebralibus enatos una cum venis excipiente; arachnoideæ subjicitur, cerebrum magnum per omnes gyros, ac interstitia, cerebellum, & medullam totam spinalem obducit.

Vsus tunicarum harum: partes subjectas obtegunt, vasa in eas decurrentia ordinant, comitantur.

CEREBRVM ; ET CEREBELLVM.

*S*ystema totum nervosum dividitur

- 1) In cerebrum;
- 2) in cerebellum;
- 3) in medullam oblongatam: hæc galeæ cranii in hærent.
- 4) in medullam spinalem, vertebris inclusam.
- 5) in nervos, ex partibus nunc dictis quatuor enatos, per corpus totum distributos.

CEREBRVM magnum partem occupat superiorem cranii, ac in hemisphæria duo ovalia, dextrum, & sinistrum dirimitur, in quibus *facies tres* distinguuntur.

Facies superior convexa, *inferior* inæqualis; lævis *ex utroque latere* posita. Hemisphæriorum quod-
vis

vis in facie sua inferiori inæquali subdividitur denuo in *lobos* tres minores; in lobum scilicet *anticum* fossæ coronali inhærentem; in lobum *medium* foveæ insidentem inter os sphœnoidale & os temporum positæ, & in lobum *posticum*, septo transverso, cerebellum obtegenti, incumbentem.

Cerebrum constat substantia duplici, subcineritia, *substantia corticalis*, & interiori, alba, *substantia medullaris* dicta.

Corticalis substantia ex cineritio colore rubet, mollissima est, composita vasis plurimis subtilissimis hæmatophoris, aliisque; medullarem substantiam ambit, quæ prioris esse videtur productio, quum arctissime eidem cohæreat: in superficie illius occurrunt excavationes plurimæ irregulares, flexuosæ, ac eminentiæ.

Medullaris substantia alba, mollisque est, corticali subjecta, constans vasis copiosis mollibus, tum & fibris numerosissimis albis, exilissimis, tenerrimis, mollibus, parallelis. Interiora versus augetur semper, demum vero inferius confluit in massam unam, hemisphæria bina connectentem, a VIEVSENIO *centrum ovale* dictam, quum Anatomicus hic adsumserit, fibras medullares omnes dicto loco in unum coire centrum.

Pars hæc media, alba, medullaris, hemisphæria cerebri bina conjungens, & diductis his ipsis ab invicem sub falce in conspectum illico prodiens *corpus* adpellatur *callosum* cerebri.

In hujus superficie conspiciuntur striæ duæ albæ, parallelæ, pluresque transversales: anteriori loco corpus callosum angustius paulo est, & cum cruribus cerebri anterioribus conjungitur; posteriora ver-

sus latefcit , & unitur tum cornui inferiori ventriculi anterioris , tum pedi hippocampi , partibusque sibi ipsi subjectis.

Sub corpore callofo in conspectum prodit corpus quadricorne medullare, *fornix* dictum. Cornua bina anteriora enascuntur ex medulla cerebri, & per commissuram cerebri anteriorem , a lobo uno ad alterum decurrentem , conjunguntur; posterius terminatur fornix in fasciam latam , tenuem ; hæc in cornua , seu crura bina alia denuo finditur , ob figuram suam *pedes hippocampi* dicta. Vniuntur pedes hippocampi posteriori loco mutuo secedentes ope corporis medullaris , striis transversis , palmarum ramulos æmulantibus , inscripti , *psalterium* dicti. A corpore callofo septum medullare , tenue perpendiculari ductu secundum cerebrum in medium fornicis descendit , cavum corpori callofo subjectum in partes binas æquales dirimens , nomine *septi pellucidi* insignitum.

Ventriculi cerebri anteriores teguntur superius a corpore callofo , ac a septo lucido bifariam ex æquo dirimuntur. Crura eorum anteriora sibi invicem obversa sunt , ab anteriori parte secundum latera corporis callofi horizontali ductu postrosum excurrunt , per decursum vero magis semper magisque ab invicem recedunt ; deorsum dein , & a posteriori parte antrosum flectuntur ; hac ratione ad se denuo accedunt , ac in lobo cerebri medio demum terminantur. Amiciuntur interius a tenui meninge , & in statu naturali madescunt a vapore subaquoso , qui morbose adfectus in gelatinam sæpius coagulatur , vel & copia adeo magna increfcit , ut ventriculi hi aqua turgeant.

In ventriculorum dictorum quovis secundum cujuslibet longitudinem porriguntur vasa copiosa, exilissima hæmatophora, & lymphatica; quæ una cum globulis multis parvis, rotundis, diaphanis, hydatides referentibus, a tenui meninge in fasciculum, *plexus choroideus* dictum coadunantur.

Thalami nervorum optidorum corpora sunt duo sibi mutuo propinqua, alba, in basi ventriculi anterioris prominentia, & secundum ventriculum hunc introrsum, deorsum parum, antrorsumque excurrentia. Exteriora versus superficies eorum convexa, introrsum plana est.

Substantia externa gaudent albente, medullari; interna corticali, cineritia. Constituunt partim nervos opticos, partim crura cerebri.

Corpora striata dicuntur eminentiæ duæ longiores, cineritiæ, in basi ventriculi anterioris elevatae; anteriora versus magis hærent, & corporum striatorum nomine donantur, quum facies externa strii multis longitudinalibus, subrotundis, albis notata sit.

Componuntur externe corticali, interne medullari cerebri substantia. Simul unitæ concurrunt ad formationem crurum cerebri.

Ventriculus tertius fissuram longitudinalem refert, quæ sub ventriculis anterioribus, ubi facies planæ thalamorum nervorum optidorum coeunt, sita est. Antrorsum, versus basin cranii per speciem columnæ exiguæ, cineritiæ, cavæ, *infundibulum* dictæ ducit in glandulam rotundam, excavationi speciali sellæ turcicæ incumbentem, *glandula pituitaria* dictam, cujus vero nondum detectus est usus. Posteriori loco terminatur ventriculus hic ope orificii in canalem, *aquæductus Sylvii* dictum, & in ventriculum quartum, cerebello proprium, tendentem.

Tubercula, s. *eminentiæ quadrigeminæ* tubercula sunt exigua, alba, subovalia, quorum ex utroque bina supra orificium posticum ventriculi tertii, & aquæductum Sylvii ponuntur: tribuerunt iisdem Veteres nomina specialia incongrua.

Tuberculis nunc dictis insidet eminentia parva, conoidea, cineritia, *glandula pinealis* dicta; basi cum cerebri medulla jungitur; cui dicetur usui, nondum constat.

Consideranda adhuc veniunt inferiori loco *cruva cerebri*; albissima sunt, & oriuntur in basi cranii ex cerebri medullari substantia. Iunguntur posteriora, & inferiora versus cum cruribus cerebelli; hac vero ex unione *medulla* sic dicta *oblongata*, seu *principium medullæ spinalis* enascitur.

C E R E B E L L V M .

CEREBELLVM cerebro magno minus multo est, ac ope septi horizontalis a dura meninge enati, *septum cerebelli* dicti ab illo sejungitur.

Situm est sub cerebro magno in parte postica, & inferiori cranii, excavationibus binis internis ossis occipitis incumbens: secundum superficiem suam dirimitur incisione profunda in hemisphæria duo æqualia; connectuntur hæc mutuo superiori, inferiorique loco intermedia substantia, fabrica cerebello analogâ, annulum referente, *protuberantia vermiformis* dicta.

Fabrica, uti in cerebro, duplici absolvitur substantia; exterior cineritia, mollis, sulcis, anfractibusque multis superficialibus, & longitudinalibus, arcus parallelos circulares constituentibus gaudet;

gaudet ; interna medullaris est ; exsurgit hæc per totum ambitum cerebelli , & coadunatur in hujus centro in *crura* sic dicta quatuor *cerebelli* , cruribus cerebri unita , unione hac medullam oblongatam producentia.

Crura hæc cerebelli ratione duplici , vel , si partem exiguam substantiæ medullaris , cum medulla spinali inferius confusam , simul consideremus , triplici terminantur.

Crura duo *interiora* adscendunt versus eminentias quadrigeminas ; junguntur ibi cum cruribus cerebri , & truncum constituunt unicum , qui illico infra pontem *medulla oblongata* dicitur.

Incumbit hæc faciei excavatæ proc. ossis occipitis , ossi sphænoideo adnati.

Crura duo *exteriora* , eaque *maxima* ab invicem secedunt , antrorsum & deorsum nonnihil flectuntur ; hinc arcuum binorum adinstar crura cerebri ambiunt , & , sub hisce denuo unita , eminentiam producunt annularem , *Pons Varolii* dictam.

Sub cruribus hisce oritur pars ea medullæ , quæ a cerebello deorsum procurrit , & medullæ spinali implantatur.

Illico ante pontem crura interiora cerebelli quatuor progignunt eminentias ; externæ anteriores *corpora olivaria* , inferiores *pyramidalia* a figura , quam referunt , adpellantur.

Inter crura hæcce quatuor , inter medullam scilicet oblongatam , & protuberantiam vermiformem cavum parvum subovale est , quod antea *ventriculum quartum* diximus. Cavo huic , uti tribus reliquis , plexus venosus incumbit ; basi ejus medullari species
canalis

canalis insculpta est, quæ *calamus* vocatur *scriptorius*. Superius obtegitur velo medullari, quod VIEVSSE-
NIVS *valvulam magnam cerebri* dixit: anteriori loco per aquæductum Sylvianum aperitur in ventriculum tertium; inferius terminatur in medullam spinalem.

MEDULLA SPINALIS.

MEDULLA SPINALIS productio est medullæ oblongatæ cerebri; cavo, quod vertebrae colli, dorsi, lumborum, & ossis sacri componitur, inhærens; inferiori loco, ad vertebrae plerumque secundam lumborum, in fasciculum nervorum magnum, a figura, quam refert, *cauda equina* dictum, terminata.

Figura columnam exhibet, antè, & postè parum compressam, dictisque nunc locis per totam longitudinem sulcis binis notatam.

In collo minor, in dorso angustior, infimo demum loco crassior denuo est.

Fabrica medullæ spinalis, uti in cerebro, componitur substantia medullari, alba, aliaque cineritia; ea tamen hic intercedente diversitate, quod substantia medullaris, alba in medulla spinali mollior sit, externe hæreat, fibrisque componatur plurimis, oculo nudo facile distinguendis; cineritia vero, obposita ratione ac in cerebro, interius recondatur. Cerebri adinstar obducitur dura meninge, arachnoidea, tenuisque meninge; tunicæ duæ priores medullam spinalem laxè solum amplectuntur: extima præterea superficies duræ meningis a vertebra colli prima ad vertebrae usque duodecimam dorsi ligamento

mento ferrato in interstitiis exortus nervorum obducitur.

Arteriæ cerebri, cerebelli, & medullæ spinalis oriuntur a carotidibus internis, & ab arteriis vertebralibus.

Venæ terminantur in sinus omnes capitis, sinusve vertebrales.

Vsus cerebri. Sensuum internorum, externorumque organa perficit, nervos emittit, queis constituntur motus, sensusque corporis organa.

F I N I S.





T A B V L A

R E R V M , E T S E C T I O N V M .



	<i>Pag.</i>
DE ANATOMIE IN GENERE	I
OSTEOLOGIA	9
Ossa Capitis	16
Cranii	19
Os Frontis	<i>ibid.</i>
Ossa duo Parietalia	21
Os Occipitis	22
Ossa Temporum	24
Organi auditus	26
Os Sphænoideum	31
Ethmoideum	34
Ossa Cranii Triquetra	36
Facies	37
Maxillaria superiora	<i>ibid.</i>
Nasalia	39
Lacrymalia	40
Zygomatica	41
Palatina	42
Os Vomeris	44
Ossa Spongiosa inferiora	<i>ibid.</i>
Os Maxillare inferius	45
Dentes	47
Cavum Narium	50
Orbitæ	<i>ibid.</i>
Oris	52
Faucium	<i>ibid.</i>
Os Hyoides	55
Ossa Trunci	56
Ossa Spinæ Dorfi	56

*

De

T A B V L A

	<i>Pag.</i>
De Vertebris in specie	58
Vertebræ Dorſi in ſpecie.	61
Lumborum in ſpecie	62
Oſſa Thoracis	<i>ibid.</i>
Sternum	63
Coſtæ	64
Oſſa Pelvis	67
Os Sacrum	68
Coccygis	69
Oſſa Innominata	70
Ilei	<i>ibid.</i>
Iſchy	71
Pubis	72
Oſſa Extremitatum Sup.	75
Os Humeri	<i>ibid.</i>
Scapulæ	<i>ibid.</i>
Claviculæ	77
Brachiale	78
Oſſa Antibrachii	80
Cubitus	<i>ibid.</i>
Radius	81
Oſſa Manus	83
Carpus	<i>ibid.</i>
Metacarpus	86
Digiti	88
Oſſa Extremitatum inf.	90
Os Femoris	<i>ibid.</i>
Oſſa Cruris	93
Tibia	<i>ibid.</i>
Fibula	95
Patella	96
Pedis extremi	97
Tarſi	<i>ibid.</i>
Metatarſi	101

	<i>Pag.</i>
Ossa Digitorum	102
Sesamoidea	<i>ibid.</i>

OSTEOLOGIA RECENS ET SYNDESMOLOGIA.

Ossa recentia	105
Periosteum	<i>ibid.</i>
Color ossium	107
Cartilagines	108
Medulla : Glandulæ articulares : Synovia	110
Vasa, & Nervi ossium	112
Ligamenta in Genere	113
Ligamenta Maxillæ inferioris	115
Ossis Occipitis	<i>ibid.</i>
Vertebrarum	116
Sterni, & Costarum	117
Ossium Pelveos	119
Claviculæ, & Scapulæ	120
Humeri	121
Ossium Antibrachii	<i>ibid.</i>
Carpī	123
Metacarpi	<i>ibid.</i>
Digitorum	124
Tendinum manus	<i>ibid.</i>
Ossis Femoris cum Acetabulo cum Tibia, Fi- bula, & Patella	126 <i>ibid.</i>
Fibulæ	128
Tarsi	<i>ibid.</i>
Metatarsi	129
Digitorum pedis	130
Tendinum pedis	<i>ibid.</i>

M Y O L O G I A.

Pag.

De Musculis in genere	135
Musculi Capitis	136
Cranii	<i>ibid.</i>
Superciliorum	137
Palpebrarum	138
Pulbi oculi	139
Auris	140
Auris externæ	141
Cartilaginum Auris	142
Auris internæ	<i>ibid.</i>
Nasi	143
Oris, & Labiorum	144
Maxillæ inferioris	147
Ossis Hyoidis	149
Linguae	151
Pharyngis	152
Palati mollis, & Uvulæ	154
Laryngis	155
Rimæ Glottidis	156
Capitis	157
Colli	160
Dorsi, & Lumborum	163
Dorsi	164
Lumborum	165
Ossis Coccygis	167
Thoracis	<i>ibid.</i>
Extremitatum sup.	172
Humeri	<i>ibid.</i>
Claviculæ	173
Scapulæ	<i>ibid.</i>
Brachii	174
Antibrachii	178
Manus	180

Musculi

	<i>Pag.</i>
Musculi Digitorum 4. Manus	182
Digiti Indicis	184
Digiti minimi	185
Pollicis	186
Palmæ	188
Extremitatum inf.	189
Femoris	<i>ibid.</i>
Cruris	194
Pedis	197
Digitorum pedis	200
Pollicis	203
Digiti minimi	204
Abdominales	205
Ani	208
Vesicæ Vrinariæ	209
Testium	210
Penis	<i>ibid.</i>
Vaginæ Vteri	212
Clitoridis	<i>ibid.</i>

A N G I O L O G I A.

Vasa in genere	215
Systema arteriosum in genere	217
Arteria Pulmonalis : Venæ Pulmonales in genere	221
Venæ in genere	222
Vena Cava in genere	<i>ibid.</i>
Portæ in genere	224
Rami Arcus Aortæ	<i>ibid.</i>
Aortæ descendentis	236
Arteriæ Iliacæ, harumque rami	240
Arteria Pulmonalis : Venæ Pulmonales	243
Vena Cava	244
Azygos	247

T A B V L A

	<i>Pag.</i>
Venæ Capitis	244
Extremitatum superiorum	245
- - - inferiorum	247
Vena Portæ, hujusque rami	249
Circulatio sanguinis in Fœtu	250

DE VASIS LYMPHATICIS. 255

Vasa Lymphatica in specie	256
Vasa Lactea : Receptaculum Chyli : Duc- tus Thoracicus	259

N E V R O L O G I A.

De Nervis in genere	267
Nervi Cerebrales in specie	268
Medullæ Spinalis in genere	279
Cervicales	280
Dorfales	284
Lumbares	<i>ibid.</i>
Sacrales	285

A D E N O L O G I A.

De glandulis in genere	289
Glandulæ Cavi Cranii	291
Oculorum	292
Narium	<i>ibid.</i>
Aurium	<i>ibid.</i>
Oris	293
Faucium	294
Colli externæ, & int.	295
Thoracis	<i>ibid.</i>
Abdominis	296
Genitalium Virilium	298
- - - Muliebrum	299
Extremitatum	<i>ibid.</i>
Cutaneæ	300

S P L A N C H N O L O G I A.

Humani Corporis divisio	303
Integumenta corporis communia : Vn- ques : Pili.	305
Cavum Abdominis	310
Peritonæum	311
Mesenterium	313
Omentum	<i>ibid.</i>
Ventriculus	315
Intestina	319
- - - Tenuia in genere	320
- - - - - in specie	321
- - - Crassa	323
Hepar & Cystis Fellea	327
Splen	332
Pancreas	333
Glandulæ suprarenales : Renes : Vre- theres : Vesica Vrinaria	335
Genitalia Virorum	340
- - - Mulierum	348
Vterus gravidus : Placenta Vterina : Fu- niculus Umbilicalis : Fœtus : hujus Involucra	354
Thorax	359
Mammæ	<i>ibid.</i>
Pleura : Mediastinum : Pericardium	361
Cor : partes cordi propriæ	363
Pulmones	366
Collum in genere	368
Larynx, & Aspera Arteria	369
Phauces : Pharynx : Oesophagus	373
Caput in genere	375
Cavum Oris	<i>ibid.</i>

Lingua

TABVLA RERVM, ET SECTIONVM.

	<i>Pag.</i>
Lingua	378
Nafus	380
Auris	382
Oculus	391
Cerebri Meninges	401
Cerebrum, & Cerebellum	406
Cerebellum	410
Medulla Spinalis	412



Errata.

<i>Pag.</i>	<i>Lin.</i>				
3	33	-	trachæa	l.	trachææ.
4	17	-	corpris	-	corporis.
6	19	-	mage	-	magis.
9	17	-	fitu	-	fitu.
18	22	-	testitudo	-	testudo.
30	34	-	fallopj	-	Fallopj.
31	22	-	inferiori	-	inferiori.
59	23	-	impediarur	-	impediatur.
62	12	-	verteba	-	vertebra.
69	22	-	lateralter	-	lateraliter.
71	28	-	futuras	-	synostofin.
73	21	-	futuris	-	synostofi.
74	12	-	intestium	-	intestinum.
111	3	-	demonstant	-	demonstrant.
178	28	-	ambis	-	ambabus.
186	18	-	Metatarfi	-	Metacarpi.
221	21	-	decursum	-	decursum.
225	24	-	finistro	-	dextro.
227	4	-	quaquavorsum	-	quaquaverfum.
275	16	-	cordiaco	-	cardiaco.
362	3	-	intestiora	-	interiora.











